



Edward Herbert-Punbury.



3106



L'Icel
56737h
1816


Snorri Sturluson. Heimskringla

KONUNGA-SÖGUR

AF

SNORRA STURLUSYNI

TOM I.



*Ruinae Templi Veter. Upsalae, quibus Templ. hodiern.
superstructum.*

HOLMIAE,
EXCUD. ELMÉN ET GRANBERG,
MDCCCXVI.

42223
31/8/98



KONUNGA-SÖGUR

AF

SNORRA STURLUSYNI.

Ynglinga Saga

Saga Hálfðanar Svarta

Saga Harallds ens Hárfagra

Saga Hákonar Goda

Saga af Haralldi Gráfelld

oc Hákonu Sigurdarsyni

Saga af Olafi Tryggvasyni

Holmiæ,

Excud. Elmén et Granberg

MDCCCXVI.

KONUNGA SÖGUR.

FORMÁLINN.

Á bók þessi let ec rita fornar frásagnir um höf-
dingia þá er ríki hafa haft á norðrlöndum, oc á
danska túngu hafa mælt, sva sem ec hefir heyrt
fróða menn segia: sva oc nockorar kynqvísir þeirra,
eptir því sem mer hefir kent verit: sumt þat er
finnz í Langfedgatali því, er Konungar hafa rakit
kyn sitt, eda adrir stór-ættadir menn: enn sumt
er ritat eptir fornum qvæðum eda sögu-lióðum, er
menn hafa haft til skemtunar ser. Nú þó at ver
vitum ei sannindi á því, þá vitum ver dæmi til
þess, at gamlir fræðimenn hafa slíkt fyrir satt haft.
Þiódólfr enn Fródi úr Hvini var skalld Harallds
ens Hárfagra, hann orti oc qvædi um Rögnvalld
Konung Heidum hærra, þat er kallat er Ynglinga-
tal. Rögnvalldr var son Olafs Geirstadaálfs, bróður
Hálfðanar Svarta. I þessu qvæde eru nefndir XXX.
langfedgar hans, oc sagt frá dauda hvers þeirra oc
legstad. Fiölnir er sá nefndr, er son var Yngvifreys,
þess er Svíar hafa blótat lengi síðan: af hans nafni
eru Ynglingar kalladir. Eivindr Skalldaspillir talldi
oc langfedga Hákonar Jarls ins Ríka í qvædi því

er Háleygia-tal heitir, er ort var um Hákon. Sæmingr er þar nefndr, son Yngvifreys; sagt er þar oc frá dauð hvers þeirra oc haugstad. Eptir Þiódolfs sögn er fyrst ritin æfi Ynglinga, oc þar víðaukit eptir sögn fróðra manna. En fyrsta ölld er köllut Bruna-ölld, þá skyldi brenna alla dauða menn, oc reisa eptir bauta-steina; Enn síðan er Freyr hafdi heygdr verit at Uppsölum, þá giördu margir höfðingar eigi síðr hauga enn bauta-steina, til minningar eptir frændur sína; Enn síðan er Danr enn Mikilláti Dana Konungr let ser haug giöra, oc baud sic þannig bera daudan med Konungs skríði oc herbúnadi, oc hest hans víð öllu södulreidi, oc mikít se annat: enn hans ættmenn giördu margir sva síðan; þá hófz þar Haugs ölld í Danmörku; enn lengi síðan hellz Bruna-ölld med Svíum oc Nordmönnum. Enn er Haralldr enn Hárfagri var Konungr í Noregi, þá bygdiz Island. Med Haralldi voru skalld, oc kunna menn enn qvædi þeirra, oc allra Konunga-qvædi þeirra er síðan hafva verit at Noregi, oc tökum ver þar mest dæmi af því, er sagt er í þeim qvædum, er qvedin voru fyrir siálfum höfðingium, eda sonum þeirra: tökum ver þat allt fyrir satt, er í þeim qvædum sinnz um ferdir þeirra eda orustur. Enn þat er háttr skallda at lofa þann mest, er þá eru þeir fyrir; enn engi mundi þat þora, at segia siálfum hönum þau verk hans, er allir þeir er heyrdi, vissi at hegómi væri oc skrök, oc sva siálfr hann: þat væri þá háð enn eigi lof.

Frá Ara presti inum Fróða.

Ari prestr inn Fróði Þorgilsson Gellis sonar, ritadi fyrstr manna her á landi at Norrænu máli frædi, bæda forna oc nýa: ritadi hann mest í upphafi sinnar bókar um Islands bygd oc lagasetning; síðan frá lögsögnmönnum, hvessu lengi hverr hafði sagt; oc hafði þat ára-tal fyrst til þess er kristni kom á Island; enn síðan allt til sinna daga. Hann tók þar oc við mörg önnur dæmi, bæði Konunga æfi í Noregi oc Danmörk, oc sva á Englandi; edr enn stór-tíðindi er giörz höfðu her á landi. Oc þykir mörgum vitrum mönnum hans sögn öll merkiliguz: var hann forvitri oc sva gamall, at hann var fæddr næsta vetr eptir fall Harallds Sigurdarsonar. Hann ritadi, sem hann siálfr segir, æfi Noregs Konunga, eptir sögu Odds Kollssonar Hallssonar af Síðu: enn Oddr nam at Þorgeiri Afráðskoll, þeim manni er vitr var, oc sva gamall, at hann bió þá undir Nidarnesi, er Hákon Jarl enn ríki var drepinn. Í þeim sama stad let Olafr Konungr Tryggvason efna til Kaupánga, þar sem nú er. Ari prestr Þorgilsson kom VII. vetra gamall í Haukadal, til Halls Þórarinssonar; oc var þar XIV. vetur. Hallr var madr stórvitr oc minnigr; hann mundi þat er þangbrandr prestr skírdi hann þrevetran: þat var vetri fyrr enn kristni væri lögtekin á Islandi. Ari var XII. vetra gamall, þá er Isleifr biskup andadiz. Hallr fór milli landa, oc hafði felag Olafs Konungs ens Helga, oc feck af því uppreist mikla: var hönum

Því kunnigt um Konungriki hans. Enn er Isleifr biskup andadiz var lidit frá falli Olafs Konungs Tryggvasonar nær LXXX. vetra. Hallr andadiz IX. vetrum síðar enn Isleifr biskup; þá var Hallr at vetra tali nírædr oc III. vetra. Hann hafði giort bú í Haukadal þritogr, oc bió þar LX. oc IV. vetra.; sva ritadi Ari. Teitr son Isleifs biskups var med Halli í Haukadal at fóstri, oc bió þar síðan; hann lærði Ara prest, oc marga frædi sagði hann hönum, þá er Ari ritadi síðan. Ari nam oc marga frædi at þuridi dóttur Snorra Goda: hun var spök at viti: hun mundi Snorra födur sinn; enn hann var þá nær half-fertugr er kristni kom á Island; enn andadiz einum vetri eptir fall Olafs Konungs ins Helga. Því var eigi undarligt, at Ari prestr væri sannfródr at fornum tíðindum, bæde her oc utanlands, at hann var siálfr náungiarn oc vitr oc minnugr, enn hafði numit at gömlum mönnum oc vitrum. Enn qvædin þykia mer sízt úr stad færd, ef þau eru rett qvedin, oc skynsamliga upptekin.

YNGLINGA SAGA.

CAP. I.

HER SEGIR FRA LANDA SKIPAN.

Sva er sagt, at kringla heimsins, sú er mannfólkitt byggir, er miök vag-skorin: gánga höf stór ur útsíðnum inn í iördina. Er þat kunnigt, at haf gengr af Niörvasundum, oc allt út til Jorsala-lands. Af hafinu gengr lángr hafsbotn til landnords, er heitir Svarta-haf; sá skilr heims þridiungana: heitir fyrir austan Asia, enn fyrir vestan kalla sumir Evropa, enn sumir Enea. Enn nordan at Svarta-hafi gengr Svíþíód in mikla eda in kallda. Svíþíód ena Miklu kalla sumir menn eigi minni enn Serkland hit Mikla; sumir iafna henni við Bláland hit Mikla. Hinn neyrdri lutr Svíþíóðar liggr óbygðr af frosti oc kullda, sva sem hinn sydri lutr Blálands er audr af sólarbruna. I Svíþíód eru stór herut mörg: þar eru oc margskonar þíóðir undarligar, oc margar túngur: þar eru risar, oc þar eru dvergar; þar eru oc blámen. Þar eru dyr oc drekar furduliga stórir. Ur nordri frá fiöllum þeim, er fyrir utan eru bygd alla, fellr á um Svíþíód, sú er at rettu heitir Tanais; hun var fordum köllut Tanaqvísl edr Vanaqvísl; hun kemr til

siávar inn i Svarta haf. I Vanaqvíslum var þa kallat Vanaland, edr Vanaheimr; sú á skilr heims þridiungana; heitir fyrir austan Asia, enn fyrir vestan Evropa.

CAP. II.

FRA ASIA MÖNNUM.

Fyrir austan Tanaqvísl í Asia, var kallat Asa-land, edr Asaheimr; enn höfuthorgina, er var í landinu, kölludu þeir Asgard. Enn í borginni var höfdingi sá, er Odinn var kalladr; þar var blótstadr mikill. Þat var þarsidr at XII. hofgodar voru æztir: skylldu þeir ráða fyrir blótum oc dómum manna í milli; þat eru Díar kalladir edr drottmar: þeim skyldi þíonustu veita allt folk oc lotning. Odinn var hermadr mikill oc miök vídförull, oc eignadiz mörg ríki: hann var sva sigrsæll, at í hverri orustu feck hann gagn. Oc sva kom at hans menn trúdu því, at hann ætti heimilan sigr í hverri orustu. Þat var háttr hans, ef hann sendi menn sína til orustu, edr adrar sendifarar, at hann lagdi ádr hendur í höfut þeim, oc gaf þeim bianac: trúdu þeir at þá mundi vel faraz. Sva var oc um hans menn, hvar sem þeir urdu í naudum staddir, á siá eda á landi, þá kölludu þeir á nafn hans, oc þóttuz iafnan fá af því fró: þar þóttuz þeir eiga allt traust er hann var. Hann fór opt sva langt í brot, at hann dvalldiz í ferdinni mörg misseri.

CAP. III.

FRA BRÆDRUM ODINS.

Odinn átti II. brædur, het annar Ve, enn annar Vilir; þeir brædr hans styrdu ríkinu þá er hann var í brottu. Þat var eitt sinn, þá er Odinn var farinn langt í brot, oc hafði lengi dvaliz, at Asum þótti örvaent hans heim: þá tóku brædur hans at skipta arfi hans; enn kono hans Frigg gengu þeir bádir at eiga. Enn litlu síðar kom Odinn heim; tók hann þá við konu sinni.

CAP. IV.

OFRIDR VID VANI.

Odinn fór með her á hendur Vönum; enn þeir urdu vel við, oc vördu land sitt, oc hafðu ymsir sig: heriudu hvarir land annara, oc gördu skada á. Enn er þat leiddiz hvarumtveggjum, lögðu þeir milli sín sættar stefnu, oc gerdu frid, oc selldaz gislar; fengu Vanir sína eina ágæstu menn, Niörd hinn audga, oc son hans Frey; enn Æsir þar í mót þann er Hæmir het, oc kölludu hann allvel til höfðingia fallin. Hann var mikill madr oc hinn vænsti: með hönum sendu Æsir þann er Mímir het, hinn vitrastí madr; enn Vanir fengu þar í mót þann er spakastr var í þeirra flocki, sá het Qvásir. Enn er Hæmir kom í Vanaheim, þá var hann þegar höfðingi görr; Mímir kendi hönum ráð öll. Enn er

Hæmir var staddr á þingum edr stefnum, sva at Mímir var eigi nær, oc kæmi nockur vandamál fyrir hann, þá svaradi hann æ enu sama: Ráði adrir, qvad hann. Þá grunadi Vani at Æsir mundi hafa falsat þa í manna skiptinu: þá tóku þeir Mími oc hálshiuggu, oc sendu höfudit Asum. Odinn tók höfudit, oc smurdi urtum þeim er eigi mátti fúna, oc qvad þar yfir galldra; oc magnadi sva, at þat mælti við hann, oc sagdi hönum marga leynda luti. Niörd oc Frey setti Odinn blótgoda, oc voru þeir Díar med Asum. Dóttir Niardar var Freya; hun var blótgydia oc hun kendi fyrst med Asum seid, sem Vönum var titt. Þá er Niördr var med Vönum, þá hafdi hann átta systur sína; því at þat voru þar lög: voru börn þeirra Freyr oc Freya: Enn þat var bannat med Asum, at byggja sva náit at frændsemi.

CAP. V.

ODIN SKIPTI RÍKI OC FRA GEFION.

Fíall-gardr mikill gengr af landnordri til útsudurs; sá skilr Sviþíód ena Miklu, oc önnur ríki: fyrir sunnan fíallit er eigi langt til Tyrklands; þar átti Odinn eignir stórar. I þann tíma fóru Rumveria höfðingar víða um heiminn, oc brutu under sic allar þíódir. Enn margir höfðingar flydu fyrir þeim ófrídi af eignum sínum. Enn fyrir því at Odinn var forspár oc fiólkunnigr; þá vissi hann at hans afqvæmi mundi um norðrhalfu heimsins byg-

gia. Þá setti hann brædur sína Ve oc Vila yfir Asgard; enn hann fór oc Díar allir med honum oc mikit mannfolk annat. Fór hann fyrst vestr í Gardaríki, oc þá sudr í Saxland. Hann átti sonu marga: hann eignadiz ríki víða um Saxland, oc setti þar sonu sína til landzgæzlu. Þá fór hann norðr til síávar, oc tók sér þar bústad í ey einni; þar heitir nú Odins ey í Fíoni. Þá sendi hann Gefion norðr yfir sundit á landa leitan: þá kom hun til Gylfa, oc gaf hann henni eitt plógsland. Þá fór hun í Jötunheima, oc gat þar IV. sonu við iötni nockorum; hun brá þeim í yxnalíki, oc færði þá fyrir plóginn, oc dró landit út á hafit, oc vestr gegnt Odinsey, oc er þat land kallat Selund: þar bygdi hun síðan. Hennar feck Skiölldr son Odins; þau biuggu at Hleidru. Þar er vatn edr síar eptir, þat er kallat lögrenn. Sva liggja firðir í leginum í Svíaríki, sem nes í Selundi. Sva qvad Bragi hinn gamli:

Gefion dró frá Gylfa
glöð diúpröðuls audla
sva at af renni röknum
rauk danmarkar auka.
Báru yxn oc átta
enni tungl þar er gengu
fyri vineyar víðri
valröf flögur höfnt.

Enn er Odinn spurdi at gódir lands kostir voru austr at Gylfa, fór hann þannoc, oc gördu þeir Gylfi sætt sína, þvíat Gylfi þóttiz eingi krapt til hafa til móttöðu við Asana. Mart áttuz þeir Odinn

við oc Gylfi í brögðum oc sionhverfingum, oc urðu Æsir iafnan ríkri. Odinn tók sér bústad við laúgin, þar sem nú eru kalladar forno Sigtúnir, oc gerði þar mikit hof oc blót, eptir siðveniu Asana. Hann eignadiz þar lönd sva vítt, sem hann let heita Sigtúnir: hann gaf bústadi hofgodnum: Niördr bió í Noatúnnum; enn Freyr at Uppsölum; Heimdallr at Himinbiörgum; Þór á Þrúðvangi; Balldr á Breidabliki: öllum feck hann þeim góða bólstadi.

CAP. VI.

FRA ATGERVI ODINS.

Þá er Asa-Odinn kom á norðr-lönd, oc med hönum Díar; er þat sagt med sannindum, at þeir hófu oc kendu íþróttir þær, er menn hafa lengi síðan meðfarit. Odinn var göfgastr af öllum, oc at hönum námu þeir allir íþróttirnar: því at hann kunni fyrstr allar oc þó flestar. Enn þat er at segia fyrir hveria sök hann var sva miök tignadr, þá baru þessir lutir til: hann var sva fagr oc göfuligr álitum þá er hann sat med vinum sínum, at öllum hló hugr við; enn þá er hann var í her þá syndiz hann grimmligr sínum óvinum. Enn þat bar til þess, at hann kunni þær íþróttir, at hann skipti litum oc líkium, á hveria lund er hann villdi: önnur var sú, at hann taladi sva sniallt oc slett, at öllum er áheyrdur, þótti þat eina satt; mællti han allt hendingum, sva sem nú er þat qvedit, er skalldskapr heitir: Hann oc hofgodar hans heita lióða-smidir, því at sú íþrótt

hófz af þeim í Nordrlöndum. Odinn kunni sva gera, at í orustu urdu óvinir hans blindir, eda daufir, eda óttafullir; enn vopn þeirra bitu eigi hellðr enn vendir: enn hans menn fóru brynja-lausr, oc voru galnir sem hundar edr vargar, bitu í skiölldu sína, voru sterkir sem birnir eda gridungar: þeir drápu mannfólkit, enn hvartki elldr ne iarn orti á þá: þat er kallat berserks-gangr.

CAP. VII.

FRÀ ÍPROTTUM ODINS.

Odinn skipti hömum; lá þá búkrinn sem sofinn eda dauðr, enn hann var þá fugl eda dyr, fiskr eda ormr, oc fór á einni svipstund á fiarlæg lönd, at sínum erindum edr annara manna. Þat ktnni hann enn at gera med orðum einum, at slöckva elld, oc kyrra síá, oc snúa vindum hveria leid er hann villdi. Odinn átti skip þat er Skíðbladnir het, er hann fór á yfir höf stór; enn þat mátti vesla saman sem dúk. Odinn hafði med sér höfuf Múmis oc sagði þat hönum mörg tíðindi úr öðrum heimum: enn stundum vakti hann upp dauða menn úr iörðu, edr settiz undir hánga: fyrir því var hann kalladr drauga-drottinn edr hanga-drottinn. Hann átti oc hrafna II. er hann hafði tamit við mál; flugu þeir víða um lönd, oc sögðu hönum mörg tíðindi: af

Þessum lutum varð hann stórliga fróðr. Allar þessar íþróttir kendi hann með rínum oc liódum, þeim er galldrar heita; fyrir því eru Æsir kalladir gall-dra-smidir. Odinn kunni þá íþrótt er mestr mátt fylgdi, oc framdi siálfr, er seidr heitir: enn af því mátti hann vita örlög manna oc ó-ordna luti, sva oc at göra mönnum bana edr óhamingiu, edr vanheilindi; sva oc at taka frá mönnum vit edr afl, oc gefa öðrum; enn þessi fiölkyngi, er framit er, fylgir sva mikil ergi, at eigi þótti karlmönnum skammlaust við at fara; oc var gydiunum kend sú íþrótt. Odinn vissi of allt iardfe, hvar fólgit var, oc hann kunni þau liód er nplaukz fyrir hönum iörðin, oc biörg oc steinar, oc haugarnir, oc batt hann með ordum einum þá er fyrir biuggu, oc geck inn oc tók þar slíkt er hann villdi. Af þessum kröptum varð hann miök frægr, óvinir hans óttuduz hann, enn vinir hans treystuz hönum, oc trúðu á krapt hans oc á siálfan hann; Enn hann kendi flestar íþróttir sínar blótgodunum; voru þeir næst hönum um allan fróðleik oc fiölkyngi. Margir adrir námu þó mikit af; oc hefir þadan af dreifz fiölkyngin vida, oc halldiz lengi. Enn Odinn oc þá höfðingia XII. blótudu menn, oc kölludu god sín, oc trúðu á lengi sidan. Eptir Odins nafni var kalladr Audon, oc hetu menn sva sonu sína; enn af Þórs nafni er kalladr Þórir edr Þórarinn; edr dregit af öðrum heitum til, sva sem Steinþór edr Hasþór, edr enn breitt á fleiri vega.

CAP. VIII.

LAGASETNING ODINS.

Odinn setti lög í landi sínu, þau er gengit höfðu fyrir með Asum; sva setti hann, at alla dauda menn skyldi brenna, oc bera á bál með þeim eign þeirra: sagði han sva at með þvílíkum audæfum skyldi hverr koma til Valhallar sem hann hafði á bál: þess skyldi hann oc nióta, er hann siálfr hafði í iörd grafit: Enn öskuna skyldi bera út á siá, edr grafa nidr í iörd. Enn eptir göfga menn skyldi haug gera til minningar. Enn eptir alla þá menn, er nokot mans mót var at, skyldi reisa bautasteina; oc hellz sá sidr lengi sídan. Þá skyldi blóta í móti vetri til árs; enn at midium vetri blóta til gródrar; et þridia at sumri; þat var sigr-blót. Um alla Svíþiód gulldu menn Odni skattpenning fyrir nef hvert; enn hann skyldi veria land þeirra fyrir úfridi, oc blóta þeim til árs.

CAP. IX.

KVANFANG NIARDAR.

Niördr feck konu þeirrar er Skadi het, hun villdi ecki vid hann samfarar, oc giptiz sídan Odni, áttu þau marga sonu: einn þeirra het Sæmingr, um hann orti Eyvindr Skálldaspillir þetta:

Þann skialld blætr
skattfæri gat

Asa midr
 við jarnvidin.
 Þá er þau meirr
 í mannheimum
 skattna vinr
 oc Skadi bygdu
 Sævar beins
 oc sonu marga
 öndr dys
 við Odni gat.

Til Sæmings talldi Hákon Jarl hinn Ríki langfedga kyn sitt. Þessa Svíþíód kölludu þeir Mannheima, enn hina Miklu Svíþíód kölludu þeir Godheima; úr Godheimum sögdu þeir mörg tíðindi, oc mörg undur.

CAP. X.

DAUDI ODINS.

Odinn varð sótt dauðr í Svíþíód; oc er hann var at kominn bana, let hann marka sic geirs oddi, oc eignadi ser alla vapnbitna menn: sagdi hann sic munda fara í Godheim, oc sagna þar vinum sínum. Nú hugdu Svíar, at hann væri kominn í hinn forna Asgard, oc mundi þar lifa at ey lifu. Hófz þá at nýu átrúnadr við Odinn, oc áheit. Opt þótti Svíum hann vitrazi ser, ádr stórar orustur yrði; gaf hann þá sumum sigr, enn sumum baud hann til sin: þótti hvarrtveggi kostur góðr. Odinn var brendr dauðr, oc var sú brenna giör allveglig. Þat var trúa þeirra, at því hærra sem reykin lagdi í loptit upp, at því háleitari væri sá i himninum, er brennuna átti; oc þess audgari, er meira fe brann með hönum.

CAP. XI.

FRÁ NIRDÍ

Niördr af Nóatúnnum gerdiz þá vallds-mádr yfir Svíum, oc hellt upp blótum; hann kölladu Svíar þá drottinn sinn; tók hann þá skattgíafir af þeim. A hans dögum var fridr allgóðr, oc allskonar ár sva mikít, at Svíar trúdu því, at Niördr redi fyrir ári, oc fyrir fesaclu manna. A hans dögum dó flestir Díar, oc voru allir brendir oc blótadir síðan. Niördr vard sótt dauðr, let hann oc marka sic Odni áðr hann dó: Svíar brendu hann, oc gretu allir miök yfir leidi hans.

CAP. XII.

DAUDI FREYS.

Freyr tók þá við ríki eftir Niörd; var hann kalladr drottinn yfir Svíum, oc tók skattgíafir af þeim; hann var vinsæll oc ársæll sem faðir hans. Freyr reisti at Uppsölum hof mikít, oc setti þar höfutsstað sinn; lagði þar til allar skyllðir sínar, lönd oc lausan eyri: þá hófz Uppsala auðr, oc hefir halldiz æ síðan. A hans dögum hófz Fróða fridr; þá var oc ár um öll lönd: kendu Svíar þat Frey. Var hann því meir dyrkadr enn önnur godin, sem á hans dögum vard lands fólkit auðgara enn fyrr, af fridinum oc ári. Gerðr Gymis dóttir het kona hans; sonr þeirra het Fiölnir. Freyr het Yngvi öðru nafni; Yngva

nafn var síðan haft í hans ætt fyrir tignar nafn: oc ynglingar voru síðan kalladir hans ættmenn. Freyr tók sótt; enn er at hönum leid sóttin, leitudu menn ser ráds, oc letu fá menn til hans koma; enn biugu haug mikinn, oc leto dyr á, oc III. glugga. Enn er Freyr var daudr, báru þeir hann leyniliga í hauginn, oc sögdu Svíum at hann lifdi, oc vardveittu hann þar III. vetr. Enn skatt öllum helltu þeir í hauginn, í einn glugg gullinu, enn í annann Sylfrinu, í hinn þridia eyr-penningum. Þá hellz ár oc fridr.

CAP. XIII.

FRÁ FREYU OC DÆTRUM HENNA.

Freyja hellt þá upp blótum, þvíat hun ein lifdi þá eftir godanna, oc vard hun þá hin frægasta, sva at med hennar nafni skyldi kalla allar konor tignar, sva sem nú heita fruvor. Sva heitir oc hver freya yfir sinni eigu, enn sú húsfreyja er bú á. Freya var helldr marglynd; Odr het bóndi hennar; dætur hennar hetu Hnoss oc Gersimi; þær voru fagarar miök: af þeirra nafni eru sva kalladir hinir dyrstu gripir. Þá er allir Svíar vissu at Freyr var daudr, enn hellz ár oc fridr, þá trúdu þeir at sva mundi vera, medan Freyr væri á Svíþíód, oc villdu eigi brenna hann, oc kölludu hann veralldar god, blótadu hann mest til árs oc fridar alla æfi síðan.

CAP.

CAP. XIV.

DAUDI FIÖLNIS KONUNGS.

Fiölnir son Yngvi-Freys red þá fyrir svíum oc Uppsala audi; hann var ríkr oc ársæll oc fridsæll: þá var Fridfródi at Hledru: þeirra í millum var vinfengi mikit oc heimbod. Þá er Fiölnir fór til Fróða á Selund, þá var þar fyrirbúin veizla mikil, oc bodit til víða um lönd. Fródi átti mikinn húsabæ; þar var gert ker mikit margra álna hátt, oc okat med stórum timbrstockum: þat stóð í undirskemmu, enn lopt var yfir uppi, oc opit gólfþilit, sva at þar var nidr helkt leginum; enn kerit blandit fullt miadar; þar var dryckr furdu sterkr. Um kvelldit var Fiölmi fylgt til herbergis í et næsta lopt, oc hans sveit med hönum. Um nóttina geck hann út í svalir at leita ser stadar; var hann svefn-ærr oc dauda druckinn: Enn er hann sneriz aptr til herbergis, þá geck hann fram eptir svölumum oc til annara lopt dyra, oc þar inn, misti þá fótum, oc fell í miadar-kerit, oc tyndiz þar. Sva segir Þiódolfr hinn Hvinverski:

Vard framgengt
 þar er Fródi bió
 feigdar ord
 er at Fiölmi kom:
 oc sikling
 svigdis geira
 vagr vindlaus
 of víða skyldi.

CAP. XV.

FRÁ SVEGDI.

Svegdir tók ríki eptir födur sinn; hann strengdi þess heit at leita Godheims, oc Odins ens gamla; hann fór med XII. menn víða um heiminn. Hann kom út í Tyrkland oc í Svíþíód ena Miklo, oc hitti þar marga frændur sína, oc var í þessi för V. vetr. Þá kom hann aptr til Svíþíóðar, dvalldiz hann þá enn heima um hrið. Hann hafði fengit konu þá er Vana het, út í Vanaheimi, var þeirra son Vanlandi. Svegdir fór enn at leita Godheims; oc í austan-verdri Svíþíód het bær mikill at Steini, þar er steinn sva mikill sem stórt hús. Um kvelldit eptir sólar fall, þá er Svegdir geck frá dryckiu til svefn-búrs, sá hann til steinsins, at dvergr sat undir steininum: Svegdir oc hans menn voru miök drucknir, oc runnu til steinsins: dvergrinn stóð í durom, oc kalladi á Svegdi, bad hann þar inn ganga, ef hann villdi Odinn hitta. Svegdir lióp í steininn; enn steininn laukz þegar aptr, oc kom Svegdir eigi aptr. Sva segir Þíóðolfr hinn Hvinverski:

Enn dag-sciarr
 Durnis nidia
 salvördodr
 Svegdi velti;
 þá er í stein
 enn stórgedi
 dulsa konr
 ept dy ergi lióp:

oc salbiartr
þeirra Söcmímis
jötun-bygdr
vid jöfri gein.

CAP. XVI.

FRÁ VANLANDA.

Vanlandi het sonr Svegdis, er ríki tók eptir hann, oc red fyrir Uppsala aud: han var hermadr mikill, oc hann fór vða um lönd. Hann þá vetr vist á Finnlandi með Sniá hinum gamla, oc feck þar dóttur hans Drífu. Enn at vari fór hann á brott, enn Drífa var eptir; oc het hann at koma aptr á þriggia vetra fresti; enn hann kom eigi á X. vetrum. Þá sendi Drífa eptir Huld seidkonu, enn sendi Visbur, son þeirra Vanlanda, til Svíþíóðar. Drífa keypti af Huld seidkonu, at hun skyldi síða Vanlanda til Finnlands, edr deyða hann at öðrum kosti. Enn er seidr var framidr, þá var Vanlandi at Uppsölum: þá gerdi hann fúsan at fara till Finnlands: enn vinir hans oc ráðamenn bönnudu hönum, oc sögðu at vera mundi fiólkyngi Finna í farfysi hans. Þá gördiz hönum svefn höfugt, oc lagdiz hann til svefns. Enn er hann hafði lítt sofnat, kalladi hann, oc sagdi, at mara trad hann. Menn hans fóru til, oc villdu hialpa hönum; enn er þeir tóku uppi til höfudsins, þá trad hun fótleggina, sva at nær brotnudu: þá tóku þeir til fótanna, þá kafði hún höfudit, sva at þar dó hann. Svíar tóku lík hans, oc yar hann brendr

við á þá, er Skuta heitir. Þar voru settir bauta steinar hans. Sva segir Þjóðolfr:

Enn á vit
 Vilia bróður
 vitta vettr
 Vanlanda kom;
 oc tröll-kund
 of troða skyllði
 lids grimhildr
 líóna бага;
 oc sá braun
 á bedi Skútu
 men-glötudr
 er mara qvalldi.

CAP. XVII.

DAUDI VISBURS.

Visbur tók arf eptir Vanlanda födur sinn; hann geck at eiga dóttur Auda ens Audga, oc gaf henni at mundi III. stórbæi, oc gullmen. Þau áttu II sonu Gisl oc Öndur. Enn Visbur let hana eina, oc feck annarar konu; enn hun fór til födur síns með sonu sína. Visbur átti son er Domaldi het; stiupmódir Domallda let síða at hönum ógæfu. Enn er synir Visburs voru XII. vetra oc XIII. fóru þeir á fund hans, oc heimtu mund móður sinnar; enn hann villdi eigi giallda. Þá mæltu þeir, at gull-menit skyllði verða at bana hinum besta manni í ætt hans, oc fóru í brott oc heim. Þá var enn fengit at seid, oc sídit til þess, at þeir skylldu mega drepa födur sinn. Þá sagði Hulldr völvu þeim, at hun mundi

sva síða, oc þat med, at ættvig skylldu ávallt vera í ætt þeirra Ynglinga síðan: þeir iáttu því. Eptir þat samnodo þeir lidi, oc komo at Visbur um nótt á óvart, oc brendu hann inni. Sva qvad Þiódolfr:

Oc Visburs
 Vilja byrði
 sævar níðr
 svelgia knátti,
 Þá er meimþiof
 markar öttu
 setr veriendur
 á sinn födur;
 oc allvalld
 í aren-kiöle
 glóða garmr
 glymiande beit.

CAP. XVIII.

DAUDI DOMALLDA.

Domalldi tók arf eptir födur sinn Visbur, oc ræð löndum. A hans dögum giördiz í Sviþíód sulltr mikill oc seyra. Þá efldo Sviar blót stór at Uppsölum; it fyrsta haust blótudu þeir yxnóm, oc batnadi ecki árferd at helldr. Enn annat haust hófu þeir mannblót; enn árferd var sóm edr verri. Enn et þridia haust komu Sviar fiölmennt til Uppsala, þá er blót skylldu vera: þá áttu höfðingiar ráða giörd sína, oc kom þat ásamt med þeim, at hallærit mundi standa af Domallda konungi þeirra; oc þat med, at þeir skylldo hönum blóta til árs ser, oc veita hönum at-

gaungu oc drepa hann, oc rióða stalla blóði hans;
oc sva gerdu þeir. Sva segir Þiódolfr:

Hitt var fyrr
at folld rúðu
sverdberendur
sínnum drottni;
oc land her
á lífs vonann
dræng vapn
Domallda bar,
þá ár-gjörn
Jóta dólgi
Svíá kind
of sóa skyldi.

CAP. XIX.

DAUDI DOMARS.

Domar het sonr Domallda, er þar næst red ríki;
hann red lengi fyrir löndum, oc varð þá góð árferð
oc fridr um hans daga. Frá hönom er ecke sagt
annat, enn hann varð sóttlaundr at Uppsölum, oc
vár færðr á Fyris völlu, oc brendr þar á ár-backa-
num, oc eru þar bautasteinar hans. Sva segir Þiód-
olfr:

Oc ec þess opt
of Yngva hrær
fróða menn
of fregit hafða,
hvar Domar
á dynianda
bana háls
of borin væri.

Nú ec þat veit
 at verk-bitinn
 Fiöhlis nidr
 vid Fyri brann.

CAP. XX.

DAUDI DYGGVA.

Dyggvi het son hans, er þar næst red löndum, oc er frá hönum ecki sagt annat, enn hann vard sótttaudr; Sva segir Þiódolfr:

Kvedkat ec dul
 nema Dyggva hrær
 glitnis gná
 at gamni hefir;
 Þvíat jodís
 Uls oc narfa
 konungmann
 kíósa skyllði.
 Oc all-valld
 Yngva Þiódar
 loka mæR
 of leikiun hefir.

Módir Dyggva var Drótt, dóttir Danps konungs, sonar Rígs, er fyrstr var konungr kalladr á danska túngu: hans ættmenn höfdu ávallt sídan Konungs nafn fyrir et æzta tignar nafn. Dyggvi var fyrstr konungr kalladr sinna ættmanna; enn ádr voru þeir drottmar kalladir: enn konur þeirra drottningar, enn drótt hyrd-sveitin. Enn Yngvi edr Ynguni var kalladr hverr þeirra ættmanna alla æfi; enn Ynglingar allir saman. Drott drottning var systir. Dans konungs hins Mikil-láta, er Danmörk er vídkend.

CAP. XXI.

FRÁ DAG SPAKA.

Dagr het son Dyggva Konungs, er konungdóm tók eptir hann; hann var madr sva spakr, at hann skildi fugls rödd: hann átti spörr einn, er hönum sagdi mörg tíðindi; flaug hann á ymsi lönd. Þat var eitt sinn, at spörrinn flaug á Reidgota-land, á bæ þann, er á Vörva heitir: hann flaug í akr karls, oc feck þar matar. Karl kom þar, oc tók upp stein, oc laust spörrinn til bana. Dagr konungr vard illa við, er spörrinn kom eigi heim; geck hann þá til sonar blóts, til frettar, oc feck þau svör, at spörr hans var drepinn á Vörva. Sidan baud hann út her miklum, oc fór til Gotlands; enn er hann kom á vörva, geck hann upp med her sinn oc heriade: fólkit flydi víds vegar undan. Dagr konungr sneri herinum til skipa er qvöldadi, oc hafdi drepit margt fólk, oc margt handtekit. Enn er þeir fóro yfir á nockura, þar sem heitir Skiótans-vad edr Vapna-vad; þá rann fram úr skógi einn verk-þræll á ár-backann, oc skaut heytingu í lid þeirra, oc kom í höfut konungi skotit; fell hann þegar af hestinum, oc feck bana: fóru menn hans aptr til Svíþjóðar. Í þann tíma var sá höfðingi gramr kalladr er heriadi, enn hermennirnir gramir. Sva segir Þjóðolfr:

Frá ee at Dagr
danda orði
frægðarfús
of fara skyldi.

Þá er valteins
til Vörva kom
spakfrömudr,
spörs at hefna.

Oc þat ord
á austr-vega
vísa ferd
frá vígi bar,
at þann gram
öf geta skyldi
sleygu þref
sleipnis verdar.

CAP. XXII.

FRÁ AGNA.

Agni het sonr Dags, er konungr var eptir hann, ríkr madr oc ágætr; hermadr mikill, atgervi madr mikill um alla luti. Þat var eitt sumar, er Agni konungr fór med her sinn á Finnland, geck þar upp oc heriadi. Finnar drógu saman lid mikit, oc fóru til orustu. Frosti er nefndr höfdingi þeirra. Vard þar orosta mikil, oc feck Agni konungr sigr; þar fell Frosti, oc mikit lid med hönum. Agni konungr fór herskilldi um Finnland, oc lagdi undir sic, oc féck stórnikit herfang. Hann tók oc hafði med sér Skiálf dóttur Frosta, oc Loga bróður hennar. Enn er hann sigldi austan, lagdi hann til Stocksunda; hann setti tiölld sin sudr á fitina: þar var þá skógr. Agni konungr átti þá gull-menit, þat

er Vifbur hafði átt. Agni konungr geck at eiga Skiálf; hun bad hann at gera erfi eptir födur sinn. Hann baud þá til sín mörgum ríkismönnum, oc gerdi veitslu mikla; hann var allfrægr ordinn af för þessi: þá voru þar dryckiur miklar. Enn er Agni konungr gerdiz druckinn, þá bad Skiálf hann gæta vel mensins, er hann hafði á hálsi: hann tók til, oc batt ramliga menit á háls ser, ádr hann gengi at sofa; enn landtialdit stóð við skóginn, oc hátt tre yfir tialldinu, þat er skyla skyldi við sólar-hita. Enn er Agni konungr var sofnadr, þá tók Skiálf snæri, oc festi undir menit; menn hennar slógu þá landtialld-staungunum, enn köstudu lykiu snærisins upp í limar tressins; drógu síðan, sva at konungr heck næst uppi við limar oc var þar hans bani. Skiálf oc hennar menn liöpu á skip, ok reru í brott. Agni konungr var þar brendr, oc er þar síðan köllut Agnafit, á austanverdum taurinum, vestr frá Stocks-sundi. Sva segir Þiódolfr:

þat tel ec undr
 er Agna herr
 Skiálfar ráð
 at sköpum þóttu;
 þá er gæding
 með gullmeni
 Loga dís
 at lopti hóf.

Hinn er við taur
 temia skyldi
 svalan hest
 Signyar vers.

CAP. XXIII

FRÁ ALREKI OC EIRÍKI.

Alrekr oc Eiríkr hetu synir Agna, er konungar voru eptir hann; þeir voru ríkir menn oc hermenn miklir, oc iþróttá-menn. Þat var síðvenia þeirra, at ríða hesta, temja bæði við gang oc við laup; kunnu þeir þat allra manna best; lögðu þeir á þat et mesta kapp, hverr betr reid, edr betri hesta átti. Þat var eitt sinn, at þeir brædur ridu tveir frá öðrum mönnum hina bestu hesta sína, oc ridu út á völlu nockora, oc komu eigi aptr: var þeirra leita farit, oc funnuz þeir bádir daudir, oc lamit höfut á báðum; enn ecki vapn höfdu þeir nema bitlana af hestönum, oc þat hyggia menn at þeir hafi drepiz þar med. Sva segir Þjóðólfr:

Fell Alrekr
 þar er Eiríki
 bróður vapen
 at bana urðu.
 Oc luack-mars med
 höfut fetlum
 Dags frændur
 of drepaz kváðu.
 Frúat madr ádr
 eykia gævi
 Freys afspríng
 í fólk hafa.

CAP. XXIV.

FRÁ ALFI OC YNGVA.

Yngvi oc Alfr voru synir Alreks, er konungdóm tóku í Svíþíód þar næst. Var Yngvi hermadr mi-

kill oc allsigrsæll; frídr oc íþróttamadr hinn mesti, sterkr oc hinn snarpasti í orostum, mildr af fe, oc gledimadr mikill: af slíku öllu varð hann frægr oc vinsæll. Alfr konungr bródir hans sat at löndum, oc var ecki í hernadi, hann var kalladr Elfsi: hann var madr þögull, ríklundadr oc óþýdr. Módir hans het Dageidr, dóttir Dags konung hins Ríka, er Döglingar eru frákomnir. Alfr konungr átti konu er Bera het, kvenna frídust oc skörungr mikill, gledimadr hinn mesti. Yngvi Alreksson var þá enn eit haust kominn úr vikingu till Uppsala, oc var þá hinn frægsti; hann sat opt við dryckiu lengi um kvöldum: Alfr konungr geck opt snemma at sofa. Bera drottning sat opt lengi á kvöldum, oc töludu þau Yngvi ser gaman. Alfr ræddi opt um við hana, at hun skyldi eigi sitia sva leingi um aptana; bad hana fara fyrr at sofa, sagði at hann villdi ecki vaka eptir henni. Hun segir at sú kona væri sæl, er helldr skyldi eiga Yngva enn Alf: hann reiddiz því miök, er hun mælti þat opt. Eitt kvölld geck Alfr inn í höllina, þá er þau Yngvi oc Bera sátu í há-sæti oc töluduz vidr; hafði Yngvi um kne ser mæki; menn voru miök drucknir, oc gafu engan gaum at konungrinn kom inn. Alfr konungr geck at há-sætinu, brá sverdi undan skickio; oc lagði í gegnum Yngva bróður sinn: Yngvi lióp upp, oc brá mækinum, oc hió Alf banahög, oc fellu þeir bádir daudir á gólfít. Voro þeir Alfr oc Yngvi heygdir á Fyrisvöllum. Sva segir Þiódolfr:

Oc varð hinn
 er Alfr of vá
 vörðr vestallz
 ofvegiun liggia;
 er döglingr
 drærgan mæki
 öfund giarn
 á Yngva rand.

Vara þat bært
 at Bera skyldi
 valsæfendur
 vígs of hvetia;
 þá er brædur tveir
 at bönum urduz
 óþurfendur
 of afbryði.

CAP. XXV.

FALL HUGLEIKS KONUNGS.

Hugleikr het son Alfs, er konungdóm tók yfir Sví-
 um, eptir þá brædur, þvíat synir Yngva voro þá
 börn at alldri. Hugleikr konungr var engi hermadr,
 oc sat hann at löndum í kyrrsæti: hann var audigr
 miök, oc kalladr helldr sínkr af fe. Hann hafði miök
 í hird sinni allskonar leikara, harpara oc gígiara oc
 fídlara; hann hafði oc med ser seidmenn oc allsko-
 nar fiölkunnigt fólk. Haki oc Hagbardr hetu brædur
 tveir, oc voru ágætir miök, þeir voru síá-konungar,
 oc höfdo lid mikit; fóru stundum bádir samt, enn
 stundum ser hvarr þeirra: margir kappar voru med
 hvarum-tveggjum þeirra. Haki konungr fór med her
 sinn til Svíþjóðar, á hendur Hugleiki konungi, enn

Hugleikr konungr samnadi her fyrir: þá komu til lids við hann brædir II Svipdagr og Geigadr, ágætir menn bádir, og hinir mestu kappar. Haki konungr hafði með sér XII. kapp: þar var þá Starkadr hinn Gamli með hönum; Haki konungr var og hinn mesti kappi. Þeir hittuz á Fyrirsvöllum; varð þar orðsto mikil; fell brátt lid Hugleiks konungs. Þá sóttu fram kapparnir Svipdagr og Geigadr; enn kappar Haka gengu VI á móti hvarum þeirra, og urðu þeir handteknir: þá gekk Haki konungr inn í skjaldborg at Hugleiki konungi, og drap hann þar, og sonu hans tvo. Eftir þat flyðu Svíar, enn Haki konungr lagði nú lönd undir sig, og gördiz konungr yfir Svíum. Hann sat þá at löndum III. vetur; enn í því kyrrsæti fóru kappar hans frá hönum, og í viking, og fengu sér sva fiár.

CAP. XXVI.

DAUDI GUDLAUGS KONUNGS.

Jörundr og Eiríkr voru synir Yngva Alrekssonar; þeir lágu úti á herskipum þessa hríð alla, og voru hermenn miklir. Á einu sumri heriudu þeir í Danmörk, og þá hitto þeir Gudlaug Háleyia konung, og áttu við hann oröstu; og lauk sva at skip Gudlaugs var hrodit, enn hann varð handtekinn: þeir fluttu hann til lands á Straumeyarnes, og heingdo hann þar: urpu menn hans þar haug eftir hann. Sva segir Eyvindr Skaldaspillir:

Enn Guðlaugr
 gríman tamdi
 við ofrkapp
 austr konunga
 Sigars jó,
 er synir Yngva
 menglötud
 við meid reido.
 Oc ná-reidr
 á nesi drupir
 vinga meidr
 Þar er víkar deilir.
 Þar er fiölkynt
 um fylkis hrær
 steini merkt
 Straumeyarues.

CAP. XXVII.

FRA HAKA KONUNGI.

Eiríkr oc Jörundr brædur urdo af verki þessu fræ-
 gir miök, þóttuz þeir miklu meiri menn enn ádr.
 Þeir spurdo at Haki konungr í Svíþjóð hafði sent
 frá ser kappu sína; þá hallda þeir til Svíþjóðar, oc
 draga sídan her at ser. Enn er Svíar spyrja at
 Ynglingar eru þar komnir, fer fiölldi lids til þeirra.
 Sídan leggja þeir í Lögin upp, oc hallda til Upp-
 sala, á hendur Haka konungi; enn hann fer í móti
 þeim á Fyrsvöllo, oc hafði lid miklo minna: vard
 þar mikill orusta, geck Haki konungr fram sva hart,
 at hann felldi alla, þá er hönum voru næstir, oc at
 lyktum felldi hann Eirík konung, oc hió nidr merki
 þeirra brædra. Þá flydi Jörundr konungr til skipa, oc

allt lid hans. Haki konungr feck sva stór sár, at hann sá at hanns lífdagar mundo eigi lágir verda: Þá let hann taka skeid er hann átti, oc let hlada daudum mönnum oc vápnom, let þá flytia út til hafs, oc leggja styrir í lag, oc draga upp segl, enn leggja elld í tyr-vid, oc göra bál á skipinu. Vedr stóð af landi: Haki var þá atkominn dauda edr dandr, er hann var lagidr á bálit: geck skipit logandi út um eyar í haf, oc var þetta allfrægt lengi síðan.

CAP. XXVIII.

DAUDI JÖRUNDAR

Jörundr son Yngva konungs vard konungr at Uppsölum, hann red þá löndum, oc var optliga á sumrum í hernadi. A einhverju sumri fór hann með her sinn til Danmerkur; hann heriadi um Jótland, oc fór um haustit inn í Limafjörð, oc heriadi þar; hann lá lidi sínu í Oddasundi. Þá kom þar með her mikinn Gylaugr Haleyia konungr, sonr Gudlaugs konungs, er fyrr var getit; hann leggr til orustu við Jörund. Enn er landsmenn urdu þess varir, drífa þeir til úr öllum áttom, bæði með stórom skipom oc smám: Verdr þá Jörundr konungr ofrlidi borinn, oc hrodit skip hans; lióp hann þá á sund, oc vard hann handtekinn, oc leiddr á land upp: let þá Gylaugr konungr reisa gálga, leidir hann Jörund þar til, oc lætr hengia hann. Lykr sva hans æfi. Sva segir Þiódolfr:

Vard

Vard Jörundr
 hinn er endr of dó
 lífs of lattr
 í Límafirdi.
 Þá er hábióstr
 Hörva sleipnir
 bana Guðlaugs
 of bera skyldi;
 oc Hagbards
 hersa valldi
 haudno leif
 at hálsi geck.

CAP. XXIX.

DAUDI ÁNS KONUNGS.

Ön edr Áni het sonr Jörundar, er Konungr var yfir Svíum eptir födur sinn; hann var vitr madr oc blót-madr mikill; engi var hann hermadr, oc sat at löndum. Í þann tíma er þessir konungar voro at Uppsölum, er nú var frásagt, var yfir Danmörku fyrst Danr hinn Mikilláti; hann var allgamall: þá sonr hans Fródi hinn Mikilláti, edr hinn Fridsaini: þá hans synir Hálfðan oc Fridleifr; þeir voru hermenn miklir. Hálfðan var ellri, oc fyrir þeim of allt: hann fór með her sinn til Svíþjóðar á hendur Ön konungi, oc áttu þeir orostor neckorar, oc hafði Hálfðan iafnan sigr; oc at lyktum flyði Ön konungr í vestrá Gautland: þá hafði hann verit konungr yfir Uppsölum XXV vetra. Hann var oc í Gantlandi XXV vetra, medan Hálfðan konungr var at Uppsölum. Hálfðan

konungr varð sóttlaundr at Uppsölum, oc er hann þar heygdr. Eptir þat kom Ön konungr enn til Uppsala, þá var hann LX. Þá gerdi hann blót mikit, oc blet til lánglífis ser, oc gaf Odni son sinn, oc var hönum blótinn. Ön konungr feck þau andsvör af Odni, at hann skyldi enn lifa LX vetra: Ön var þá enn konungr at Uppsölum V vetra oc XX. Þá kom Ali hinn Frækni med her sinn til Svíþóðar, sonr Frilleifs konungs, á hendur Ön konungi, oc átto þeir orustur, oc hafdi Ali iafnan sigr. Þá flyði Ani konungr í annat sinn ríki sitt, oc fór í vestra Gautland. Ali var konungr at Uppsölum XXV vetra, ádr Starkadr hinn Gamli drap hann. Eptir fall Ala fór Ön konungr enn aptr til Uppsala, oc red þar ríkinu enn XXV vetra. Þá gerdi hann blót mikit til lánglífis ser, oc blótadi öðrum syni sínum: Þá svarar Odinn hönum, at han skyldi æ lifa, medan hann gæfi Odni son sinn et tíunda hvert ár; oc þat med, at hann skyldi heiti gefa nockuru heradi í landi sínu, eptir tölu sona sinna, þeira er hann blótadi til Odins. Enn þá er hann hafdi blótat VII sonum sínum, þá lifdi hann X vetra, sva at hann mátti ecki ganga; var hann þá á stóli borinn. Þá blótadi hann enum VIII syni sínum, oc lifdi hann þá enn X vetra, oc lá þá í kör. Þá blótadi hann enum IX syni sínum, oc lifdi þá enn X vetra: Þá drack hann horn sem lébarn. Þá átti hann einn son eptir, oc villdi hann þá blóta þeim, oc þá villdi hann gefa Odni Uppsali, oc þau herud er þar liggja til, oc láta kalla þat

tíundaland. Svíar bönnudu hönum þat, oc varð þá ecki blót. Síðan andadiz Ön konungr, oc er hann heygdr at Uppsölum. Þat er síðan köllut Ana-sótt, er madr deyr verklaus af elli. Sva segir Þiódolfr:

Knátti endr
at Uppsölum
Ana sótt
Ön of standa;
oc þrálífr
Þiggia skyldi
jóds adal
öðru sinni.

Oc sveiduds
at ser hverfdi
mækis lut
enn miávara.
Er ocreins
áttunga róðr
lögdis odd
liggiande drack.

Máttit hárr
Mæki hiardar
austr-konungr
upp of hallða.

CAP. XXX.

FRÁ EGLI TUNNA DÓLGI.

Egill het son Öns hins Gamla, er konungr var eptir födur sinn í Svíþiód; hann var engi hermadr, oc sat at löndum í kyrrsæti. Tunni het þræll hans, er verit hafði med Ana hinum Gamla, ráðagiordamadr oc fehyrdir hanns. Enn er Ani var audadr,

Þá tók Tunni of lausafiár oc grof í iörd nidr. Enn er Egill var konungr, þá setti hann Tunna med þrælum öðrum: hann kunni því stórilla, oc lióp í biott, oc med hönum margir þrælar, oc tóko þá upp lausafeit er Tunni hafdi fölgit; gaf hann þat mönnum sínum, enn þeir tóko hann til höfðingja. Síðan dreif til hans mart illþydis fólk; lágu þeir úti á mörkum, enn stundum hliópu þeir í heröð, oc ræntu menn eda drápu. Egill konungr spurdi þetta, oc fór at leita þeirra med lidi sínu; enn er hann hafdi tekit ser náttstad á cinni nótt, þá kom þar Tunni med lidi sínu, oc lióp á þá óvara, oc drapu lid mikit af konungi. Enn er Egill konungr vard var vid úfrid, þá sneriz hann til vidtöku, oc setti upp merki sitt; enn lid flydi mart frá hönum, þvíat þeir Tunni sóttu at diarft: sá þá Egill konungr engan annan sinn kost enn flya. Þeir Tunni ráku þá flóttann allt til skógar; síðan fóro þeir aptr í bygðina, heriudo oc ræntu, oc fengu þá enga mótstöðu. Fe þat allt er Tunni tók í heradinu, gaf hann lidsmönnum sínum; vard hann af því vinsæll oc fiölmennr. Egill konungr samnadi her, oc fór til orosto í móti Tunna; þeir börduz, oc hafdi Tunni sigr, enn Egill konungr flydi, oc let lid mikit. Þeir Egill konungr oc Tunni áttu VIII orostur oc hafdi Tunni sigr í öllum. Eptir þat flydi Egill konungr landit, oc hellt til Danmerkur í Selund, til Fróða hins Frækna: hann het Fróða konungi til lids skatti af Svíum: feck þá Fróði hönum her oc kappu sína;

fór þá Egill konungr til Sviþióðar. Enn er Tunni
 spyr þat, fór hann í móti hönum með lid sitt; varð
 þá orusta mikil: þar fell Tunni, enn Egill konungr
 tók þá við ríki sínu, enn Danir fóru aptr. Egill
 konungr sendi Fróða konungi góðar gíafir oc stórar,
 á hveriom misserum, enn gallt engan skatt Dönum,
 oc hellz þó vinfeingi þeirra Fróða. Síðan er Tunni
 fell red Egill konungr einu ríkinu III vetur. Þat
 varð í Sviþióðu, at gridungr sá er til blóts var æt-
 ladr, var gamall oc alinn sva kappsamliga, at hann
 hann var mannygr; enn er menn vildu taka hann,
 þá lióp hann á skóg oc varð galinn, oc var lengi á
 vidum, oc hinn mesti spellvirki við menn. Egill
 konungr var veidimadr mikill; hann reid um daga
 optliga á markir, dyr at veida. Þat var eitt sinn;
 at hann var ridinn á veidar við menn sína. Konungr
 hafði allt dyr eitt lengi, oc hleypti eptir í skóginn
 frá öllum mönnum: þá verðr hann varr við gridun-
 ginn, oc reid til, oc vill drepa hann; Gridungrinn
 sneyri í móti, oc kom konungr lagi á hann, oc skar
 ur spiótit: Gridungrinn stack hornunum á síðu he-
 stinum, sva at hann fell þegar flatr, oc sva konun-
 grinn. Þá lióp konungr á fætur, oc vill bregða sverdi,
 Gridungrinn stack þá hornunum fyrir brióst hönum,
 sva at á kafi stóð. Þá komo at konungs menn, oc
 drápu gridunginn. Konungr lifði litla hríd, oc er
 hann heygdr at Uppsölum. Sva segir Þiódolfr:

Oc lofsæl

úr landi fló

tys áttungr
 Tinnu ríki;
 Einn flæming
 farra trióno
 Jötunn eykr
 á Agli rand
 sá er of aust-mörk
 áðan hafði
 brúna hörg
 of borinn lengi.
 Einn skidlaus
 skilfinga nid
 hæfis hiörr
 til hiarta stóð.

CAP. XXXI.

FRÁ OTTARI VENDILKRÁKU.

Ottar het son Egils, er ríki oc konungdóm tók eptir hann: hann vingadiz ecki vid Fróða konung. Þá sendi Fróði konungr menn til Ottars konungs, at heimta skatt, þann er Egill hafði heitit hönum. Ottar svaradi sva, at Svíar hefdo alldrei skatt goll-dit Dönum; segir at hann mundi oc sva gera: fóro aptr sendimenn. Fróði var hermadr mikill: þat var á einu sumri, at Fróði fór med her sinn til Sví-þjóðar; görði þar upprásir oc heriadi; drap mart fólk, enn sumt hertók hann; feck hann þar allmikit herfang; hann brendi oc víða bygdina, oc gerdi et mesta hervirki. Annat sumar fór Fróði konungr at heria í Austrveg; þar spurdi Ottar konungr, at Fróði konungr var eigi í landino. Þá stiger hann á her-

skip, oc fer út í Danmörk, oc heriar þar; oc fær enga móttöðu. Hann spyr, at samnadr mikill var á Selundi; stefnir hann þá vestr í Eyrarsund, siglir þá sudr til Jotlands, oc leggr í Limafjörð, oc heriar þá á Vendli; brennir þar, oc görir miök aleyda landit, þar sem þeir komu. Vötr oc Fasti hetu Jarlar Fróla, þá hafði Fródi sett til landvarnar í Danmörk, medan hann var úr landi; Enn er Jarlar spurdu, at Svía konungr heriadi í Danmörk, þá samna þeir her, oc laupa á skip, oc sigla sudr til Limafjardar; koma þar miök á úvart Ottari konungi, leggja þegar til orosto; taka Svíar vel í mót, fellr lid hvarratveggio. Enn sva sem lid fellr af Dönum, kom ænnat meira þar or herodum, oc sva var til lagt öllum skipum þeim er í nánd voro. Lykr sva orosto, at þar fell Ottar konungr, oc mestr luti lids hans. Danir tóku lík hans, oc fluttu til lands, oc lögdu upp á haug einn, oc letu þar rífa dyr oc hrafna hræin. Þeir gera af tre kráko eina, oc sendo til Svíþjóðar, oc segia at eigi var meira verdr Ottar konungr þeirra, þeir kölludu síðan Ottar Vendilkráko; Sva segir Þjóðolfr:

Fell Ottar
und ara greipar
duganligr
fyrir Dana vapnom;
þann hergammr
hrægum fæti
vitz borinn
á Vendli sparn .

þau fra ee verk
 Vötz oc Fasta
 sænskri þjóð
 at sögum verða;
 at eylands
 Jarlar Fróða
 víg framad
 of veginn höfdo.

CAP. XXXII.

KVANFÁNG ADILS KONUNGS.

Adils het son Ottars konungs, er konungdóm tók eptir hann; hann var lengi konungr, oc vard miök audigr, var hann oc nockor sumor í víking. Adils konungr kom med her sinn til Saxlands: þar redi fyrir konungr er Geirþjófr het, enn kona hans het Alöf hinn ríka; ecki er getit barna þeirra; konungr var eigi í landinu. Adils konungr oc menn hans runnu upp til konungs bæiar, oc ræntu þar; sumir reka ofan hiörd til strandarhöggs. Hiardarinnar hafdi gætt ánaudigt fólk, karlar oc konur, oc hafdu þeir þat allt med ser. I því lidi var mæc ein, undarliga fögur; sú nefndiz Yrsa. Fór þá Adils konungr heim med herfang. Yrsa var ecki med ambáttum; Brátt fanz þat, at hun var vitr oc vel ordum farin, oc allra luta vel kunnandi; fanz mönnum mikit um hana, oc þó konungi mest; kom þá sva at Adils gerdi brullaup til hennar. Var Yrsa þá drottning í Svíþjóð, oc þótti hun hinn mesti skörungr.

CAP. XXXIII.

DAUDI ADILS KONUNGS.

Helgi konungr Halfdanar son red þá fyrir Hleidro; hann kom til Sviþióðar með her sva mikinn, at Adils konungr sá engan annan sinn kost, enn flya undan. Helgi konungr gekk þar á land með her sinn, oc heriadi, feck mikit herfang; hann tók höndum Yrsu drottning, oc hafði með sér til Hleidar, oc gekk at eiga hana; þeirra son var Rólfr Kraki. Enn er Rólfr var þrevetr, þá kom Alöf drottning til Danmerkur; sagði hun þá Yrsu drottningu, at Helgi konungr madr hennar, var oc fadir hennar, enn Alöf módir hennar. Fór þá Yrsa aptr til Sviþióðar til Adils konungs, oc var þar drottning meðan hun lifði síðan. Helgi konungr fell í hernaði; Rólfr Kraki var þá VIII vetra, oc var þá til konungs tekinn at Hleidro. Adils konungr átti deilur miklar við konung þann er Ali het hinn Upplenski; hann var úr Noregi. Þeir Adils konungr oc Ali konungr áttu orostu á Vænis ísi; þar fell Ali konungr, enn Adils hafði sigr. Frá þessari orosto er langt sagt í Skiöldunga Sögu, oc sva frá því, er Rólfr Kraki kom til Uppsala, til Adils; þá seri Rólfr Kraki gullinu á Fyrisvöllu. Adils konungr var miök kær at gódom hestom: hann átti ena bestu hesta í þann tíma: Slöngvir het hestr hans, enn annarr Hrafn; þann tók hann af Ala dauðum, oc þar var undir alinn annar hestr, er Hrafn het, þann sendi hann

til Hálogalands Godgesti konungi; þeim reid Godgestr konungr, oc feck eigi stöðvat ádr hann fell af baki, oc feck bana; þat var í Ömd á Hálogalandi. Adils konungr var at Dísar blóti, oc reid hesti um dísar salinn; hestrinn drap fótum undir hönum, oc fell, oc konungr af fram, oc kom höfud hans á stein, sva at hausinn brotnadi, enn heilinn lá á steininum; þat var hans bani. Adils dó at Uppsölum, oc er þar heygdr: kölludu Svíar hann ríkan konung. Sva segir Þíódolfr:

Þat frá ec em
at Adils fiörvi
vitta vettr
of vida skvildi.

Oc dádgiarn
af drasils bógon
Freys áttungr
falla skyldi.

Oc vid aur
ægir hiarna
braguings burs
of blandinn vard.

Oc dádsæll
deya skyldi
Ala dólgr
at Uppsölum.

CAP. XXXIV.

FALL ROLFS KRAKA.

Eysteinn het son Adils, er þarnæst red Svíavelli; á hans dögum fell Rólfr Kraki at Hleidrø. I þann

tíma heriudu konungar miök í Svía velldi, bæði Danir oc Nordmenn. Voro margir sækonungar þeir er redu lidi miklu, oc áttu engi lönd: þótti sá einn med fullu heita mega sækonungr, er hann svaf alldri undir sótkum ási, oc drack alldri at arinshorni.

CAP. XXXV.

FRA EYSTEINI OC SÖLVA JÓTA
KONUNGI.

Sölvi het Sækonungr, sonr Höгна í Niardey, er þá heriadi í austrveg: hann átti oc ríki á Jotlandi; hann hellt lidi sínu til Svíþjóðar. Þá var Eysteinn konungr at veitzlu í heradi, þar er í Lofönd heitir: þar kom Sölvi konungr á óvart um nótt, oc tók hús á konungi, oc brendi hann inni med hird sína alla. Þá ferr Sölvi til Sigtúna, oc beidir ser Konungs nafns oc vidrtöku; enn Svíar samna her, oc vilia veria hönum landit, oc vard þar orosta sva milkil, at þat er sagt at eigi sleit á XI dægum. Þar feck Sölvi konungr sigr, oc var hann þá konungr yfir Svíavelldi langa hríd, allt þar til er Svíar sviko hann, oc var hann þar drepinn. Sva segir Þjóðólfr:

Veit ec Eysteins
enda fólginu
lokins lífs
á Lofundi;
at sikling
med Svíum kváðu
Jotska menn
inni brenna.

Oc bit-sótt
 í brand-nói
 hlíðar þánga
 á hilmí rann.
 Þá er timbrfastr
 toptar neqvi
 flotna fullr
 of fylki braunn.

CAP. XXXVI.

DRÁP YNGVARA KÖNUNGS.

Yngvar het son Eysteins konungs, er þá var konungr yfir Svíavelli; hann var hermaðr mikill, oc var opt á herskipum: þvíat þá var áðr Svíaríki miök harscátt, bæði af Dönum oc Austrvegs-mönnum. Yngvar konungr gerði fríd við Dani; tók þá at heria um austrvegu. Á einn sumri hafði hann her úti, oc fór til Eistlands, oc heriadi þar um sumarit, sem het at Steini; þá komu Eistir ofan með mikinn her, oc áttu þeir orostu; var þá landherinn sva driúgr, at Svíar fengu eigi móttöðu veitt; fell þá Yngvar konungr, enn líð hans flyði: hann er heygðr þar við síá sialfan; þat er á Adalsyslu. Fóru Svíar heim eftir ósigr þenna. Sva segir Þjóðolfr:

Þat stöck upp,
 at Yngvari
 Syslukind
 of sóat hefði.
 Oc líós-hömmum
 við lagar hiarta

her Eistneskr
at hilmí vá.
Oc aust-marr
iöfri sænskum
gymís liód
at gamni hvedr.

CAP. XXXVII.

FRÁ BRAUT ÖNUNDI KONUNGI.

Önundr het son Yngvars, sá er næstr tók konungdóm í Svíþíód. Um hans dagar var fridr godr í Svíþíód, oc vǫrd hann miök audigr at lausa fe. Önundr konungr fór med her sinn til Eistlands, at hefna födur síns; geck þar upp med her sinn, oc heriadi víða um landit, oc feck herfång mikit; fer aptr um haustit til Svíþíódar. Um hans daga var ár mikit í Svíþíód. Önundr konungr var allra konunga vinsælstr. Svíþíód er markland mikit, oc liggia þar sva eydimerkur, at margar dagleidir eru yfir. Önundr konungr lagdi á þat kapp mikit oc kostnad, at rydia markir, oc byggia rudinn: hann let oc leggia vego yfir eydimerkur, oc funnuz þá víða í mörkonom skóglaus lönd, oc bygduz þar þá stór herod. Vard af þessum hætti vidt land bygt, þvíat landsfolkit var gnægt til lands bygdarinnar. Önundr konungr let brióta vego um alla Svíþíód, bædi um markir oc myrrar oc fiallvego: fyrir því var hann Braut-Önundr kalladr. Önundr konungr setti bú sinn í hvert stórhærad á Svíþíód; oc fór um allt landit at veizlum.

CAP. XXXVIII.

FRÁ INGIALLDI ILLRÁDA.

Braut-Önundr átti son er Ingialldr het. Þá var konungr á Fiadryndalandi Yngvar. Hann átti sonu tva vid konu sinni, het annar Alfr, enn annar Agnar. Þeir voru miök iafnalldrar Ingiallds. Vida um Svíþjóð voro í þann tíma herads-konungar Brant-Önundar, oc red fyrir Tiunda-landi Svipdagr Blindi. Þar eru Uppsalar; þar er allra Svía þing; voro þar þá blót mikil; sóttu þannug margir konungar; var þat at midium vetri. Oc einn vetr þá er komit var at midium vetri, var fiölmennt komit til Uppsala; var þar Yngvar konungr oc synir hans: þeir voro VI vetra gamlir Alfr son Yngvars konungs oc Ingialldr son Önundar konungs. Þeir esldu til sveina leiks, oc skylldi hvarr ráða fyrir sínu lidi; oc er þeir lekuz vidr, var Ingialldr ósterkari enn Alfr, oc þótti hönum þat sva illt, at hann gret af miök sva. Þá kom til Gautvidr fóstbródir hans, oc leiddi hann í brott til Svipdags Blinda fósturfödur hans, oc sagdi hönum at allilla hafdi atfarit, oc hann var ósterkari oc óþróttkari í leiknum enn Alfr son Yngvars konungs. Þá svarar Svipdagr, at þat væri mikil sköm. Annan dag eptir let Svipdagr taka hiarta úr vargi, oc steika á teini, oc gaf síðan Ingialldi konungs syni at eta; oc þadan af vard hann allra manna grimmastr, oc verst skaplundadr. Oc er Ingialldr var roskinn, þá bad Önundr kono til handa hönom,

Gauthilldar dóttir Algauta konungs; hann var son Gautrekskonungs hins Millda, sonar Gauts, er Gautland er vidkent. Algautr konungr þóttiz vita at hans dóttir mundi allvel gipt, ef hun væri syni Önundar konungs gefin, ef hann hefði skaplyndi föður sins: oc var mærin send till Svíþíódar, oc görði Ingialldr brullaup til hennar þegar er tími er til þess.

CAP. XXXIX.

DAUDI ÖNUNDAR.

Önundr konungr fór milli búa sinna á einu hausti, med hird sinni oc fór þann veg sem kalladr er Himinheidr, þat eru fiall-dalir nockurir þraungvir, enn há fiöll tveim megin; þá var mikit regn, enn ádr hafði snjá lagt á fiöllin. þar lióp ofan skrida mikil med grióti oc leiri, þar vard fyrir Önundr konungr co lid hans; fær konungr bana, oc mart lid med hönum. Sva segir Þíóðolfr:

Vard Önundr
Jonakurs bura
harmi heptra
und himin-fiöllum:
oc of væg
Eistra dólgi
heipt hrisungs
at hendi kom:
Oc sá frömudr
folldar beinum
höguna hrærs
of horfinn var.

CAP. XL.

BRENNA AT UPPSÖLUM.

Þá tók konungdóm Ingíalldr son Önundar konungs yfir Svium. Uppsala konungar voru æztir konunga í Svíþíód, þá er þar voru margir herads-konungar, frá því er Odinn var höfðingi í Svíþíód. Voru einvallds höfðingar þeir er at Uppsölum sátu, um allt Svíavellði, til þess er Agni dó; enn þá kom ríkit fyrst í brædra skipti, sva sem fyrr er ritit: enn síðan dreifðiz ríki oc konungdómr í ættir, sva sem þær greinduz: enn sumir konungar ruddu marklönd stór, oc bygdu þar, oc jóku þannug ríki sitt. Enn þá er Ingíalldr konungr tók ríkit oc konungdóm, voru margir heradskonungar, sem fyrr er ritit. Ingíalldr konungr let búa yeitzlu mikla at Uppsölum, oc ætladi at erfa Önundr konung födr sinn; hann let búa sal einn; engum mun minna, edr úvegligra, enn Uppsals var, er hann kalladi VII konunga sal; þar voru í gör VII háseti. Ingíalldr konungr sendi menn um alla Svíþíód, oc baud til sín konungom oc Jörlom, oc öðrom merkis-mönnom. Til þess erfis kom Alganti konungr mágr Ingíallds, oc Yngvar konungr af Fíadryndalandi, oc synir hans tveir Alfr oc Agnar; Sporsniallr konungr af Næríki; Sigvatr konungr af Attundalandi; Granmar konungr af Sudrmanalandi var eigi kominn. Þar var VI konungum skipat í hinn nya sal. Var þá eitt háseti audt, þat er Ingíalldr

gialldr konungr hafði búa látit. Öllu lidi því er til var komit, var skipat í hinn nya sal. Ingialldr konungr hafði skipat hird sinni oc öllu lidi sínu í Uppsál. Þat var sidvenia í þann tíma, þar er erfi skyldi giöra eptir konunga edr jarla, þá skyldi sá er gerdi erfit, oc til arfs skyldi leida, sitia á skörinni fyrir hásetinu, allt þar til er inn væri borit full, þat er kallat var Bragafull; skyldi sá þá standa upp í móti Bragafulli, oc streingia heit, drecka af fullit sídan: sídan skyldi hann leida í háseti þat, sem átti fadir hans; var han þá kominn til arfs alls eptir hann. Nú var sva her gört, at þá er Bragafull kom inn, stód upp Ingialldr konungr, oc tók við einu dyrshorni miklu, streingdi han þá heit, at hann skyldi auka ríki sit halfu í hveria höfud átt, edr deya ella; drack af sídan af horninu. Oc er menn voru drucknir um kvölldit, þá mællti Ingialldr konungr til Folkvidar ok Hylvidar sona Svipdags, at þeir skyldu vopnaz oc lid þeirra, sem ætlat var um kvelldit: þeir gengu út, oc til ins nya sals, baru þar elld at; oc því næst tók salrinn at loga, oc brunnu þar inni VI konungar, oc lid þeirra allt: enn þeir er út leitadu þá voru skiótt drepnir. Eptir þetta lagdi Ingialldr konungr undir sik ríki þessi öll, er konungar þessir höfdu átt, oc tók skatta af.

CAP. XLI.

KVANFANG HIÖRVARÐAR.

Grannmar konungr spurdi þessi tíðindi, oc svik

Þessi öll; þá þóttiz hann vita at hönum mundi slíkr kostur hugaðr, ef hann gylldi eigi varúð vid. Þat sama sumar kemr með lidi sínu Hiörvardr konungr, er Ylfingr var kalladr, til Svíþjóðar, oc lagdi í fiörd þann er Myrkva fiördr heitir. Enn er Granmar konungr spyr þat, sendi hann menn til hans, oc bydr hönom til veizlo, oc öllu lidi hans. Hann þectiz þetta; þvíat hann hafdi ecki heriat á ríki Granmars konungs. Oc er hann kom til veizlunnar þá var þar fagnadr mikill; oc um kvældit er full skyllði drecka, var þat síðvenia konunga þeirra er at löndum sátu, eða veizlum, er þeir letu göra, at drecka skyllði á kvældum tvímenning, hvar ser karlmadr oc kona, sva sem inniz; enn þeir ser er fleiri væri saman. Enn þat voru víkinga lög, þótt þeir væri at veizlom, at drecka sveitar-dryckiu. Hásæti Hiörvardz konungs var búit gagnvart hásæti Granmars konungs, oc sátu allir hans menn á þann pall. Þá mællti Granmar konungr vid Hilldigunni dóttur sína, at hun skyllði búa sik, oc bera öl vikingum; hun var allra qvenna fríduz; þá tók hun silfur-kalk einn oc fyllti, oc geck fyrir Hiörvard konung oc mællti: heilir allir Ylfingar at Rolfs minni Kraka! oc drack af til háls, oc selldi Hiörvardi konungi. Nú tók hann kalkinn oc hönd hennar með, oc mællti, at hun skyllði gánga at sitia hiá hönum. Hun seigr þat ecki vikinga síð, at drecka hiá konum tvímenning. Hiörvardr svarar, let þess vera meiri von, at hann mundi þat skipti á gera, at láta helldr víkinga lögin,

oc drecka tvímenning við hana. Þá settiz Híldigudur hía hönum, oc drucku þau bæði saman, oc töludu mart um qvældit. Eptir um daginn, er þeir konungarnir hittuz, Granmar oc Híörvardr, þá hóf Híörvardr upp bönord sitt, oc bad Híldigudar. Granmar konungr bar þetta mál fyrir konu sína Híldi, oc adra rikismenn; oc segir at þeim mundi vera mikit traust at Híörvardi konungi; oc nú varð rómur at; oc þotti þetta öllum ráðligt; oc lauk sva, at Híldigudr var föstnod Híörvardi konungi, oc gerdi hann brullaup til hennar; skyldi þá Híörvardr konungr dveliaz með Granmari konungi, fyrir því at hann átti engan son til rikis at varðveita með sér.

CAP. XLII.

OROSTAÍSVÍPIÓÐINGIALLDSDOC
ÞEIRRA MÁGA GRANMARS OC
HÍÖRVARDS.

Þat sama haust samnadi Ingialldr konungr sér lidi, oc ætlar á hendur þeim mágum; hann hefir her úti af öllum þeim rikiom, er ádr hafði hann undir sic lagt. Oc er þat spyria þeir mágar, samna þeir lidi í síno ríki, oc kemr til lids við þá Högni konungr oc Híldir son hans, er redu fyrir Eystra Gautlandi: Högni var fadir Híldar, er átti Granmar konungr. Ingialldr konungr geck á land upp með öllum her sínum, oc hafði lid miklo meira; sígr þá saman orusta, oc var hin hardasta. Enn er litla hríð hafði-

bariz verit, þá flyia þeir höfðingjar, er redu fyrir Fiadryndalandi, oc Vestr Gautum, oc af Næríki, oc Attundalandi; oc allr sá her er af þeim löndum hafði farit, oc fóru til skipa sinna. Eptir þetta vard Ingialldr konungr staddr nauduliga, oc feck sár mörg, oc komst vid þetta á flótta til skipa sinna. Enn þar fell Svipdagr Blindi föstri hans, oc synir hans bádir Gautvidr oc Hyldvidr. Ingialldr konungr fór aptr vid sva búit til Uppsala, oc undi illa sinni ferd; oc þóttiz þat finna, at hönum mundi vera her sá útrúr, er hann hafði or síno ríki, því er hann feck med hernadi. Eptir þetta var ófridr mikill millum Ingiallds konungs oc Granmars konungs. Nu er langar hridir hafði þannug framfarit, komu vinir beggia því vid, at þeir sættuz, oc lögdu konungar stefnu med ser, oc hittuz, oc gerdo frid millum sin, Ingialldr konungr oc Granmar konungr, oc Hiörvardr konungr mágr hans: skyllði fridr sá standa millum þeirra, medan þeir lifdi III konungar; var þat bundit eidum oc trygdum. Eptir um vorit fór Granmar konungr til Uppsala at blóta, sem sidvenia var til, móti sumri, at fridr væri. Fell hönum þá sva spánn, sem hann mundi eigi lengi lifva: fór hann þá heim í ríki sitt.

CAP. XLIII.

DAUDI KONUNGANNA GRANMARS
OC HIÖRVARDAR.

Um haustit eptir fór Granmar konungr oc Hiör-

varðr konungr mágr hans at taka veizlu í ey þeirri er Sili heitir, at búom sínum: oc þá er þeir voru at veitslonni, kemr þar Ingialldr konungr med her sinn á einni nótt, oc tók hús á þeim, oc brendi þá inni med öllu lidi sínu. Eptir þat lagdi hann undir sic ríki þat allt, er átt höfdu konungar, oc setti yfir höfðingia. Högni konungr oc Hilldir son hans ridu opt upp í Sviavelldi, oc drápu menn Ingiallds konungs, þá er hann hafði sett yfir þat ríki er átt hafði Granmar konungr mágr þeirra. Stóð þar lánga hrud mikil deila millom Ingiallds konungs oc Högna konungs; feck Högni konungr þó halldit ríki sínu fyrir Ingialldi konungi allt til dauda dags. Ingialldr konungr átti II börn vid konu sinni, oc het hit ellra Asa, enn annat Olafr Tretelgia; oc sendir Gauthilldr, kona Ingiallds konungs, sveininn til Bóva fóstra síns í vestra Gautland, hann var þar uppfæddr, oc Saxi son Bóva, er kalladr var Flettir. Þat er sögn manna at Ingialldr konungr dræpi XII. konunga, oc svi-ki alla í gridum: hann var kalladr Ingialldr hinn Illráði: hann var konungr yfir mestum lut Sviþjóðar. Asu dóttur sína gipti hann Gudrödi konungi á Ská-ni, hun var skap-lik fedur sínum. Asa olli því er Gudrödr drap Halfdan bróður sinn. Halfdan var fadir Ivars ens Vidfadma. Asa red oc bana Gud-rödi konungi bóanda sínum, oc flydi síðan til fö-dur síns; hun var köllut Asa hin Illráða.

CAP. XLIV.

DAUDI INGIALLDS ILLRÁÐA.

Ivar hinn Vidfadmi kom á Skáni, eptir fall Gudrödar födur-bróður síns, oc dró þegar her mikinn saman; fór þegar upp á Sviþíód: Asa hin Illráða var ádr farin á fund födur síns. Ingialldr konungr var þá staddr á Ræningi at veizlo, er hann spurdi at her Ivars konungs var þar nær kominn; þóttiz Ingialldr engan styrk hafa til at beriaz við Ivar; hönum þótti oc sá synn kostur, ef hann legdiz á flóttu, at hvadan æva munda fiandmenn hans at drífa. Tóku þau Asa þat ráð, er frægt er orðit, at þau gerdu fólk allt dauda druckit; síðan letu þau leggja elld í höllina; brann þar höllin, oc fólk allt, þat er inni var með Ingialldi konungi oc Asu. Sva segir Þíóðolfr:

Oc Ingialld
í fiörvan trad
reves rösuðr
á Ræningi.
Þá er háspíófr
hyriar leistum
god konung
í gögnom steig.

Oc sá urdr
allri þíódo
siallgælastr
með Svíum þótti,
er hann síálfr
síno fiörvi
frækno fyrstr
of fara villdi.

CAP. XLV.

FRÁ IVARI VIDFADMA.

Ivar Vidfadmi lagdi undir sic allt Svíavelldi; hann eignadiz oc allt Danavelldi, oc mikinn lut Saxlands, oc allt austr-ríki, oc inn fimta lut Englands. Af hans ætt eru síðan komnir Dana konungar oc Svía konungar, þeir er þar hafa einvalld haft. Eptir Ingialld inn Illráða hvarf Uppsala velldi ur ætt Ynglinga, þat er at langfedgum mætti telia.

CAP. XLVI.

FRÁ OLAFI TRETELGIU.

Olafr son Ingiallds konungs, þá er hann spurdi fráfall födur sins, þá fór hann med þat lid er hönnun villdi fylgia á Næríki; þviat allr múgr Svía lióp upp med einu samþycki, at rækia ætt Ingiallds konungs, oc alla hans vini. Enn er Svíar spurdu til hans, þá mátti hann ecki þar vera: fór hann þá vestr mark-leidi, til ár þeirrar er nordan fellr í Væni, oc Elfr heitir. Þar dveliaz þeir; taka þar at rydia mörkina oc brenna, oc byggia síðan. Urdu þar brátt stór heröd, oc kölludu þeir þat Vermaland: þar voru all gódir lands kostir. Enn er spurdiz til Olafs í Svíþíod, at hann rydr markir, kölludu þeir hann Tretelgiu, oc þótti hædiliggt hans ráð. Olafr feck komn þeirrar er Sólveig het edr Solva, dóttir Halfdanar Gulltannar vestan af Sóleyum. Halfdan var son Sólva,

Sölvars sonar, Sölva sonar hins Gamla, er fyrstr ruddi Sóleyár. Módir Olafs Tretelgiu het Gauthilldr; enn hennar módir Alof, dóttir Olafs ens Skygna, konungs af Næríki. Olafir oc Sölva áttu tva sonu, Ingjalld oc Hálfðan; Hálfðan var uppfæddr í Sóleyom med Sölva módurbrædur sínum; hann var kalladr Hálfðan Hvitbein.

CAP. XLVII.

BRENDR INNI OLAFR TRETELGIA.

Þat var mikill mannfjölldi, er útlagi fór or Sviþjóð fyrir Ivari konungi; spurdu þeir at Olafir Tretelgia hafði lands-kosti góða á Vermalandi, oc dreif þannug til hans sva mikill mannfjölldi, at landi feck eigi borit; gerdiz þar hallæri mikit oc sulltr; kendu þeir þat konungi sínum, sva sem Svíar eru vanir at kenna konungi bæði ár oc hallæri. Olafir konungr var lítill blótmaðr; þat líkadi Svíum illa, oc þótti þadan munda standa hallærit: drogu Svíar þá her saman, gördu för at Olafi konungi, oc tóku hús á hönum, oc brendu hann inni, oc gáfu hann Odin, oc bletu hönum til árs ser; þat var vid Væni. Sva segir Þjóðolfr:

Oc vid vág
hinu er vidiar
hræ Olafs
hof-gyllðir svaig
oc glóð-fialgr
görvar leysti

sonr Forniótz
 af Svía iöfri.
 sá áttkonr
 frá Uppsölum
 lofda kyns
 fyrir laungu hvarf.

CAP. XLVIII.

HÁLFDAN HVITBEIN TIL KON-
UNGS TEKINN.

Þeir er vitrari voru af Svíum, fundu at þat olli hallærim, at mannfólkit var meira enn landit mætti bera, enn konungr hafði engu um valldit. Taka nu þat ráð, at þeir fara með herinn allan vestr yfir Eydaskóg, oc koma fram í Sóleyum miök á óvart: þeir drapu Sölva konung, enn tóku höndum Hálf-dan Hvitbein; þeir taka hann til höfðingia yfir sic, oc gefa hönum konungs nafn: lagði hann þá undir sic Sóleyar. Síðan fór hann með herinn út á Rau-ma-riki, oc heriar þar, oc feck hann fylki þat af hernadi.

CAP. XLIX.

FRÁ HALFDANI HVÍTBEIN.

Hálfdan Hvitbein var konungr ríkr; hann átti Asu dóttur Eysteins hins hardráða, Upplendinga konungs; hann red fyrir Heidmörk: þau Hálfdan áttu II sonu, Eystein oc Gudröd. Hálfdan eignadiz mikit af Heid-

mörk, oc þotn oc Hadaland, oc mikit af Vestfolld: hann vard gamall madr, oc vard fóttdaur á þotni, oc var sidan fluttr út á Vestfolld, oc heygdr þar sem heitir Skæreid í Skiringssal. Sva segir þiódólfur:

Þat fra hverr
at Hálfðanar
söc midlendr
sakna skylldu.
Oc hallvarps
hlifi nauma
þiód-konung
á þotni tók.
Oc Skæreid
í Skiringssal
of brynialfs
beinom drupir.

CAP. L.

FRÁ INGIALLDI BRÓÐUR HALFDANAR

Ingialldr bródir Hálfðanar var konungur í Vermalandi; Enn eptir dauda hans lagði Hálfðan konungur Vermaland undir sic, oc tók skatta af, oc setti þar Jarla yfir, medan hann lifði.

CAP. LI.

DAUDI EYSTEINS KONUNGS.

Eysteinn, son Hálfðanar Hvítbeins, var konungur eptir hann á Rauma-riki oc á Vestfolld; hann átti Hildi dóttur Eiríks Agnar sonar, er konungur var á Vestfolld. Agnar fadir Eiríks, var sonur Sigtryggs

konungs á Vindli. Eiríkr konungr átti engan son, hann dó þá er Hálfðan konungr Hvítbein lifði. Tóku þeir fedgar Hálfðan oc Eysteinn þá undir sic alla Vestfold; red Eysteinn Vestfold meðan hann lifði. Þá var sá konungr á Vörno er Skiölldr het, hann var allmiök fjölkunnigr. Eysteinn konungr fór með herscip nockor yfir á Vörnu, oc heriadi þar, tók slíkt er fyrir var klædi oc adra gripi, oc gögn bóanda, oc hiöggo strandhögg; fóro í brott síðan. Skiölldr konungr kom til strandar með her sinn; var Eysteinn konungr þá í brottu, oc kominn yfir fjördinn, oc sá Skiölldr segl þeirra; þá tók hann möttull sinn, oc veifdi, oc bles við. Þá er þeir sigldu inn um Jarlsey, sat Eysteinn konungr við styri; skip annat sigldi nær þeim; báru-skot nokkut var í, oc laust beiti á sinn af öðru skipi konung fyrir bord; þat var hans bani. Menn hans náðu líkinu; var þat flutt inn á Borro, oc orpinn haugr eftir á röðinni, út við siá, við Vöðlu. Svá segir Þjóðolfr:

Enn Eysteinn
fyrir ási fór
til byleistis
bróður meyar.
Oc nú liggr
und lagar beinum
reiks lödudr
á raðar broddi;
þar er elkalldr
hiá iöfur Gauzcom
Vöðlo straumr
at vagi kemr.

CAP. LII.

FRÁ HALFDANI KONUNGI MILLDA
OC MATARILLA.

Halldan het sonr Eysteins konungs, er konungdóm tók eptir hann; hann var kalladr Halldan hinn Milldi oc hinn Matar-illi. Sva er sagt, at hann gaf í mála mönnum sínum jam-marga gullpeninga, sem adrir konungar silfrpeninga; enn hann sveilti menn at mat. Hann var herinadr mikill, oc var laungum í vikingu, oc feck ser fiár. Hann átti Hlíf dóttur Dags konungs af Vestmörum. Holttar á Vestfold var höfútbær hans; þar vard hann sóttdaudr, oc er hann heygdr á Borro. Sva segir Þiódolfr:

Oc til þings
 þridia iöfri
 Hvedrungs mæ
 or heimi baud.
 þá er Háldan,
 sá er á Holtti bió,
 norna dóms
 of notit hafði.
 Oc budlung
 á Borroe
 sigr-hafendr
 síðan fálo.

CAP. LIII.

FRÁ GUDRAUDI VEIDI-KONUNGI.

Gudreydr het sonr Háldanar, er konungdóm tók eptir hann; hann var kalladr Gudreydr hinn Mikilláti,

enn sumir kölludu hann Veidi-konung; hann átti þá konu er Alfhilldr het, dóttir Alfarins konungs úr Alfheimum; oc hafði med henni halfa Vingulmörk. Þeirra son var Olafr, er síðan var kalladir Geirstada-Alfr. Alfheimar voru þá kalladir milli Raunel-far oc Gautelfar. Enn er Alfhilldr var öndut, þá sendi Gudreydr konungr menn sína vestr á Agdir til konungs þess er þar red fyrir, sá er nefndr Haralldr hinn Gran-raudi; skylldo þeir bidia Aso dóttur hans til handa konungi; enn Haralldr syniadi; komu sendimenn aptr, oc sögdu konungi sitt erendi. Enn noekoro síðar skaut Gudraudr konungr skipum á vatn, fór síðan med lidi miklu út á Agdir; kom miök á úvart, oc veitti þegar upprás; kom um nótt á bæ Harallds konungs. Enn er hann varð var við, at her var kominn á hendur hönum, þá geck hann út med þat lid sem hann hafði; varð þar oro-sta, enn lids munr var allnikill: þar fell Haralldr konungr oc Gyrdr sonr hans. Tók Gudrödr konungr herfang mikit; hann hafði heim med ser Asu, dóttur Harallds konungs, oc gerdi brullaup til hennar: Þau áttu son er Halfdan het. Enn þá er Halfdan var vetr gamall, þat haust fór Gudrödr konungr at veizlum; hann lá med skipi sínu í stíflu sundi, voru þar dryckiur miklar, var konungr miök druckinn. Oc um kveldit er myrkt var, geck konungr af skipi; enn er hann kom á bryggjuspord, þá lióp madr at móti hönum, oc lagði spióti í gögnum hann; var þat hans bani; sá madr var þegar drepinn. Enn um

morguninn eptir er lióst var, þá var madr sá kendr, var þat skósveinn Asu drottningar; duldi hun þá ecki, at þat voru hennar ráð. Sva segir Þjóðolfr:

Var Guðröðr
hinn göfugláti
lómi beitr
sá er laungu var
oc um ráð
at ölom stilli
höfnd heipt rækt
at hilmí dró.

Oc lannsigr
hinn lómgedi
Aso árr
af iöfri bar.
Oc budlungr
á bedi fornóm
Stiflosunds
of stúnginn var.

CAP. LIV.

DAUDI OLAFS KONUNGS.

Olafr tók konungdóm eptir födur sinn; hann var ríkr madr oc hermadr mikill; hann var allra manna frí-dastr oc sterkastr, oc mikill vexti; hann hafði Vest-folld: Þvíat Alfgeir konungr tók þá undir sic Vín-gulmörk alla; setti hann þar yfir Gandalf konung son sinn. Þá gengu þeir fedgar miök á Raumaríki, oc eignuduz mestan lut þess rikis oc fylkir. Högni het son Eysteins hins Ríka, Upplendinga konungs; hann lagði þá undir sic Heidmörk alla, oc þotn oc

Hadaland; þá hvarf oc undan þeim Gudreydar sonum Vermaland, oc sneruz þeir þá at skaltgiöfum undir Svía konung. Olafr var þá á tvitogs alldri, er Guðrödr andadiz: enn er Halfdan bródir hans geck til rikis með hönum, þá skipto þeir rikino með ser; hafði Olafr inn eystra lut, enn Halfdan inn sydra. Olafr konungr hafði atsætu á Geirstöðum; hann tók fótur verc, oc andadiz þar af; oc er hann heygdr á Geirstöðum. Sva qvad Þjóðolfr:

Oc nið kvísl
í Noregi
þróttar þros
of þróaz hafði.
Reð Olafr
ofsa forðum
vídri grund
of Vestmari.
Uns fótverkr
við folldar þröm
vígmidlung
of víða skyldi.
Nú liggr gunn-díarfr
á Geirstöðum
her-konungr
laugi ausinn.

CAP. LV.

FRÁ RÖGNVALLDI HEIDUM HÆRRÁ:

Rögnvalldr het sonr Olafs konungs er konungr var á Vestfolld eptir föður sinn. Hann var kalladr

Heidum hærri; um hann orti Þiódolfr enn Hvinverski
Ynglinga tal; þar segir hann sva:

Þat veit ec bazt
und blam himni
kenni-nafn,
sva at konungr eigi,
er Rögnvalldr
reidar stióri
Heidum-hárr
of heitinn er.



II. SAGA

II.

SAGA HALFDANAR SVARTA.

CAP. I.

HALFDAN BERZ VID GANDÁLF OC SIGTRYGG.

Hálfðan var vetr gamall, þá er fadir hans fell; Asa módir hans fór þegar með hann vestr á Agdir, oc settiz þar þegar til ríkis þess, er átt hafði Haralldr fadir hennar. Þar óx upp Hálfðan oc var brátt mikill oc sterkr oc svartr á hár; hann var kalladr Hálfðan svartí. Þá var hann XVIII vetra, er hann tók konungdóm á Ögdum. Fór hann þegar á Vestfollð, oc skipti ríki við Ólaf bróður sinn, sva sem fyrr er ritat. Sama haust fór hann með her á Vingulmörk, á hendur Gandálfi konungi, oc áttu þeir margar orostur, oc höfðu ymsir sigr; enn at lýðum sættuz þeir: skyldi Hálfðan hafa Vingulmörk hálfa, sem ádr hafði haft Guðraudr fadir hans. Eptir þat fór Halðan konungr upp á Raumaríki, oc lagði undir sic: þat spurdi Sigtrygg konungr, son Eysteins konungs; hann hafði þá atsetu á Heid-

mörc, oc hafði áðr Raumaríki undir sic lagt: Fór þá Sigtryggr konungr med her móti Hálfðani konungi, oc var þar orosta mikil, oc hafði Hálfðan konungr sigr. Enn er flótti brazt, þá var Sigtryggr konungr lostinn öru undir höndina vinstri, oc fell hann þar. Síðan lagði Hálfðan undir sic allt Raumaríki. Eysteinn het annar sonr Eysteins konungs, bródir Sigtryggs konungs, hann var þá konungr á Heidmörc: Enn er Hálfðan konungr var farinn út á Vestfolld, þá fór Eysteinn konungr med her sinn út á Raumaríki, lagði þar þá víða land undir sic.

CAP. II.

OROSTA HALFDANAR OC EYSTEINS.

Hálfðan Svarti spurdi at ófridr var á Raumaríki: dró hann þá her saman, oc fór á Raumaríki til móts við Eystein konung, oc áttu þeir orustu, oc hafði Hálfðan sigr, enn Eysteinn flyði upp á Heidmörc. Hálfðan konungr fór med her sinn eptir hönum upp á Heidmörc, oc áttu þeir þar adra orostu, oc hafði Hálfðan sigr; enn Eysteinn flyði norðr í Dala, á fund Gudbrands hersis: hann efdiz þadan at lidi, fór síðan um vetrinn út á Heidmörc; hann hitti Hálfðan Svarta í eyinni miklu, er liggir í Miörs; áttu þeir þar orostu; þar fell mart manna af hvarom tveggja, oc hafði Hálfðan sigr. Þar fell Guthormr sonr Gudbrands hersis, er mannvænstr

þótti vera á Upplöndum. Þá flydi Eysteinn konungr enn norðr í Dala; þá sendi hann Hallvard Skálc frænda sinn á fund Hálfðanar konungs, at leita um sættir. Enn fyrir frændsemis sakir, þá gaf Hálfðan konungr upp Eysteini konungi hálfa Heidmör, sva sem þeir frændur höfðu fyrr átt. Enn Hálfðan lagði undir sic þotn, oc þar sem Land heitir: Þá eignadiz hann oc Hadaland; þvíat hann heriadi víða: var hann þá oc allrikr konungr.

CAP. III.

KVANFANG HALFDANAR SVARTA.

Hálfðan Svarti feck konu þeirrar, er nefnd er Ragnhilldr dóttur Harallds Gullskeggs; hann var konungr í Sogni: þau áttu son, er Haralldr konungr gaf nafn sitt, oc fæddiz sá sveinn upp í Sogni með Haralldi konungi móður-fedur sínum. Enn er Haralldr var örvasi at alldri, var hann sonlauss; þá gaf hann Haralldi dóttur-syni sínom ríki sitt, oc let hann taka til konungs. Litlu síðar andadiz Haralldr Gullskeggr. Þann sama vetr andadiz Ragnhilldr dóttir hans; enn eptir um vorit varð sóttðauðr Haralldr konungr úngi í Sogni; hann var þá X vetra gamall. Þegar er Hálfðan Svarti spurdi andlát hans, þá byriar hann ferd sína með lidi miklo, oc fer norðr til Songs; var þar við hönom vel tekit: taldi hann þar til ríkis oc arfs eptir son sinn: oc var þar

eingi vidrstada. Lagdi hann undir sic ríki þat. Þá kom til hans Atli Jarl hinn Mióvi af Gaulum: hann var vin Hálfðanar konungs. Konungr setti Atla Jarl yfir Sygna-fylki, at dæma þar landslög, oc heimta saman skatta til handa konungi. Fór þá Hálfðan konungr til Upplanda í ríki sitt.

CAP. IV.

OROSTA HALFDANAR OC GANDALFS SONA.

Hálfðan konungr fór um haustit út á Vingulmörc. Þat var á einni nátt, þar er Hálfðan konungr var á veizlo, at um midnætti kom til hans madr sá, er hest-vörd hafði halldit, oc sagði hönum, at her var kominn nær bænum: konungr stóð upp þegar, oc bad menn sína vopna sic, gengr þegar út í garðinn, oc fylkir. Því næst kvamo þar synir Gandalfs, Hysingr oc Helsingr, med lid mikit, vard þar oro-sta mikil. Enn fyrir því at Hálfðan konungr var ofrlidi þorinn, þá flyði hann til skógar, oc let mart manna: þar fell Ölfer hinn Spaki fósturfadir hans. Eptir þat dreif til lid Hálfðanar konungs: fór hann þá at leita Gandalfsona: oc hittuz þeir á Eydi, vid Eyna-skær, oc beriaz þar; þar fell Hysingr oc Helsingr; enn bródir þeirra Haki hom á flóttu. Eptir þat lagdi Hálfðan konungr undir sic alla Vingulmörc, enn Haki flyði í Alfheima.

CAP. V.

SÍDARA KVANFANG HALFDANAR;
ER HANN FECK DÓTTUR SIGUR-
DAR HIARTAR.

Sigurd Hiörtr er nefndr konungr á Hringaríki; hann var meiri oc sterkari enn hverr madr annara: allra manna var hann oc frídastr synom. Fadir hans var Helgi hinn Hvassi, enn módir hans Aslaug, dóttir Sigurdar Orms í Auga, Ragnars sonar Lodbrókar. Sva er sagt, at þá var Sigurdr XII vetra gamall, er hann drap Hildibrand berserk í einvígi, oc þá XII saman; mörg vann hann þrekvirki, oc er laung saga frá hönum. Sigurdr átti tvo börn; Ragnhildr het dóttir hans: hun var allra kvenna sköruligust; hun var þá á tvítugs alldri: enn Guthormr bródir hennar, hann var á ungmennis alldri. Enn þat er sagt frá atferd Sigurdar kongs, at hann reid einnsaman út á eydimerkur, hann veiddi stór dyr oc mann-skiæd; lagði hann á þat kapp mikit iafnan. Þat var einn dag at Sigurdr reid einn saman út á merkur, sem vandi hans var til, oc er hann var lánga leid ridinn, kom hann fram í ryd nockorr, í nándir Hadalandi; þá kom þar móti hönum Flak; berserkr, með XXX manna, þar barduz þeir: fell þar Sigurdr Hiörtr, enn af Haka XII menn, enn siálfr hann let hönd sína, oc hafdi III sár önnur. Eptir þat reid Haki við menn sína til búss Sigur-

dar, oc tók þar Ragnhilddi dóttur hans, oc Guthorm bróður hennar, oc hafði braut með sér, oc fé mikit, oc marga dyrgrip, oc hafði heim á Hadaland: þar átti hann bú stór. Þá let hann efna til veizlo, oc ætladi at göra brudlaup til Ragnhilddar; enn þat dvalldiz, fyrir því at sár hans höfduz illa. Haki Hada-berserkr lá í sárum um haustit, oc öndverdan vetr: Enn of jól var á Heidmörc Halfdan konungr á veizlo: hann hafði spurt öll þessi tidindi. Þat var einn morgin snimma er konungr var klæddr, at hann kalladi til sín Hárek Gand, sagði at hann skyldi fára yfir á Hadaland, oc færa hönum dóttur Sigurðar Hiartar Ragnhilddi. Hárekr bióz oc hafði hundrat manna; stillti sva ferdinni, at þeir kvamo yfir vatnit í ótto til bæiar Haka, tóku dyr allar oc skála, er húskarlar svafo í: síðan gengo þeir til svefnbúrs þess, er Haki svaf í, oc brutu upp, oc tóku í brott Ragnhilddi, oc Guthorm bróður hennar, oc allt fe þat er þat var; enn þeir brendu skálann, oc alla menn þá er inni voru: þeir tiölldudu vagn einn allvegligan, oc settu þar í Ragnhilddi, oc Guthorm, fóru síðan til issins. Haki stóð upp, oc geck eptir þeim um hrid; enn er hann kom at vatz ísinum, þá sneri hann nidr hiölltum á sverdinu, enn lagðiz á blóðrefilinn, sva at sverdit stóð í gegnum hann: feck han þar bana, oc er hann þar heygdr á vatz-backanom. Halfdan konungr sá er þeir fóru um vatz-ísinn, þvíat hann var manna skygnztr; oc er hann sá vagn tialldadan, þóttiz hann vita, at eyrindi þeir-

ra mundi ordit vera, þat sem hann villdi: let hann þá setja bord sitt, oc sendi menn víða um bygdina, oc baud til sín mörgum mönnum, oc var þar þann dag veizla góð: oc at þeirri veizlo feck Hálfðan konungr Ragnhíldar oc var hun síðan rík drottning. Móðir Ragnhíldar var Þýrri, dóttir Klack Harallds konungs af Jotlandi, systir Þýri Danmarkar bótar, er átti Gormr hinn Gamli Ðana konungr, er þá red Ðanavellði.

CAP. VI.

FRÁ ÐRAUMÓM RAGNHÍLLÐAR.

Ragnhíllði drottningu dreymdi drauma stóra: hun var spök at víti. Sá var einn draumr hennar, at hun þóttiz vera stöðð í grasgardi sínom, oc taka þorn einn or serk ser: oc er hun hellt á, þá óx hann sva, at þat varð teinn einn mikill; sva at annar endir tók í iörd níðr, oc varð brátt rótfastr; enn annar endir tresins tók hátt í loptit upp, oc því næst syndiz henni tred sva mikit, at hon feck varla sed yfir upp: þat var oc furðu dígurt: enn nðsti lutr tresins var raurð sem blóð; enn þá leggrínn upp fagr-grænn; enn límar nar hvítar sem sníár. Þar voru kvístir á trenu margir oc stórir, sumir ofarr, enn sumir nðarr: límar tresins voru sva miklar, at henni þóttu dreifaz um allan Noreg, oc enn miklo víðara.

CAP. VII

DRAUMR HALFDANAR.

Hálfðan konungr dreymdi alldrey; hönum þótti þat undarligt, oc bar þat fyrir þann mann er nefndr er Þórleifr enn spaki, oc leitadi ráða, hvat at því myndi mega gera. Þórleifr sagði hvat hann gerði, ef hann forvitnadi nockurn lut; at hann færi í svínabæli at sofa, oc bráuz hönum eigi draumar, oc konungr gerði þat, oc birtiz hönom draumr þessi: Hönom syndiz at hann væri allra manna best hærdr, oc var hár hans allt med lockom, sumir sídir sva at tók till iardar; sumir í midian legg, sumir á kne, sumir í miodm, eda midia síðu, sumir á hals; enn sumir ecki meir enn sprotnir upp or hausi sem knyflar. Enn á lockum hans var hver-skyns litr, enn einn lockr sigradi alla við fegurð oc med liósleik oc mikilleik. Þórleifi sagði hann þann draum; enn hann þýddi sva, at mikil afspríngr mundi af hönum koma, oc myndi hans ættmenn löndum ráða med miklum veg, oc þó eigi allir med jam-miklum; enn einn mundi sá af hans ætt koma, at öllum mundi meiri oc æðri. Oc hyggia menn þat, at sá lockr iartegndi Olaf konung hinn Helga. Hálfðan konungr var vitr madr, oc sanninda madr oc iafnadar, oc setti lög, oc gætti siálfr, oc þrysti öllum til at gæta. Oc at eigi mætti ofsi steypa lögunum, gerði hann siálfr saktal oc skipadi bótum, hverium

eptir sínum burd og metordum. Ragnhildr drottning ól son, og var sá vatni ausinn, og nefndr Haralldr; han var brátt mikill og hinn frídasti. Óx hann þar upp, og gerdiz þegar íþrótta-madr snemma, og vel viti borinn: módir hans unni hönum mikit, enn fadir hans minna.

CAP. VIII.

MATAR HVARF HALFDANAR.

Hálfðan konungr var á iólavist á Hadalandi; þar varð undarligr lutr ióla aptan, þá er menn voru til borda gengnir, og var þar allmikit fiölmenni, at þar hvarf vist öll af bordum, og allt munngát: sat konungr ryggur eptir, enn hverr annara sótti sín heimili. Enn til þess at konungr mætti viss verða hvað þessum atburð olli, þá let han taka finn einn, er margfróðr var, og villdi neyða hann til sadrar sögu, og þindi hann, og fekk þó ecki af hönum. Finnurinn het þannoc miök til hialpar, er Haralldr var sonr hans, og Haralldr bað hönum eyrdar, enn fekk eigi, og hleypti Haralldr hönum þó í brot, at úvilja konungs, og fylgdi honum siálfr. Þeir komu þar farandi, er höfðingi einn hellt veizlo mikla, og var þeim at syn þar vel fagnat. Og er þeir höfðu þar verit til vors, þá mælti höfðinginn einn dag til Harallds: furðu mikit torrek görir fadir þinn ser at, er ec tók vist nockura frá hönum í vetr; enn ec mun þer þat launa með fegin sögu: fadir þinn er nú dauðr, og

skalltu heim fara; muntu fá ríki þat allt, er hann hefir átt, oc þar med skallto eignaz allan Noreg.

CAP IX.

DAUDI HALFDANAR KONUNGS.

Hálfðan Svarti ók frá veizlo á Hadalandi, oc bar sva til leid hans, at hann ók um vatnit Rönd: þat var um vár, þá voro sólbrád mikil. Enn er þeir óku um Rykinsvík, þar höfðu verit um vetrinn nau-ta brunnar; enn er mykrin hafði fallit á ísinn, þá hafði þar grafit um, í sólbráðinu; enn er konungr ók þar um, þá braz nidr ísinn, oc tyndiz þar Hálf-dan konungr, oc lid mikit med hönum. Þá var hann fertogr at alldri. Hann hafði verit allra konunga ársælstr. Sva mikit gordo menn ser at um hann, at þá er þat spurdiz, at hann var daudr, oc lík hans var flutt á Hríngaríki, oc var þar til graptar ætlat, þá fóru ríkismenn af Raunaríki oc Vestfolld oc Heidmörk, oc beiddoz allir at hafa líkit med ser, oc heygia í sínu fylki, oc þótti þat vera árvænt þeim er nædi. Enn þeir sættuz sva, at líkino var skipt í fióra stadi, oc var höfudit lagit í haug at Steini á Hríngaríki. Enn hverir fluttu heim sinn luta, oc heygdo; oc eru þat allt kalladr Hálfðanar hangar.

III.

HARALLDS SAGA ENS HARFAGRA.

CAP I.

OROSTA HARALLDS VID HAKA OC GANDALF FÖDUR HANS.

Haralldr tók konungdóm eptir födur sinn þá er hann var X vetra gamall: hann var allra manna mestr oc sterkastr oc fridastr synom, vitr madr oc skörungr mikill. Guthormr módurbródir hans gerdiz forstióri fyrir hirdinni, oc fyrir öllum landrádom; hann var oc hertogi fyrir hird-lidinu. Eptir líflát Halldanar Svarta gengo margir höfðingiar á ríki þát er hann hafdi leift; var þar hinn fyrsti madr Gandálfr konungr, oc þeir brædur Högni oc Fródi, synir Eysteins konungs af Heidmörk; oc Högni Káruson geck vidda yfir Hringaríki. Þá byriar ferd sína Haki Gandálfs son út á Vestfold med CCC manna, oc fór it efra um dali nockura, oc ætladi at koma á úvart Haralldi konungi: enn Gandálfr konungr sat at löndum med her sinn, oc þar ætladi hann þá at flytiaz yfir fiördinn med her sinn á Vestfold. Enn er þat spyrr Guthormr hertogi, samnar hann her, oc fer med Haralldi konungi. Fara þeir

Guthormr móti Haka upp á land, oc finnaz þeir í dal nockurum; vard þar orosta, oc feck Haralldr konungr sigr, enn þar fell Haki konungr, oc mikil luti lids hans. Þar heitir síðan Hakadalr. Eptir þat vanda þeir aptr Haralldr konungr oc Guthormr hertogi, enn þá var Gandálfr konungr kominn á Vestfold, oc fara nú hvarir móti öðrum; oc er þeir finnaz verdr orosta hörd; þadan flydi Gandálfr konungr, oc let mestan luta lids síns, oc komz við sva búit í ríki sitt. Oc er þessi tíðindi spyria synir Eysteins konungs á Heidmörk, vænto þeir ser skiótt hers; þeir gera ord Högna Károsyni, oc Gudbrandi hersi, oc leggja stefno sína á Heidmörk, á Ríngisakri.

CAP. II.

HARALLDR KONUNGR VINNR FIM
HÖFDINGIA.

Eptir þessar orostor ferr Haralldr konungr oc Guthormr hertogi, oc allt líd þat er þeir fá, oc vanda til Upplanda oc fara miök markleidir: þeir spyria hvar Upplendinga konungar hafa lagt stefnu sína, oc koma þar um midnætti: oc verða eigi vardmenn fyrr varir við, enn lidit var komit fyrir þá stofu, er inni var Högni Káruson, oc sva þá er Gudbrandr svaf í, oc lögdo elld í hvaratveggio: enn Eysteins synir komuz út með menn sína, oc börduz of hríd, oc fellu þar bádir Högni oc Fródi. Eptir

fall þessara IV höfðingja, eignadiz Haralldr konungr með krapt og framkvæmd Guthorms frænda síns Hringaríki og Heidmörk, Gudbrandsdali og Hada-lands, Þotn og Raumaríki, Vingulmörk allan hinn nordra lut. Eptir þat höfðu þeir Haralldr konungr og Guthormr hertogi úfrid og orostor við Gandálf konung, og lauk með því, at Gandálf konungr fell í hinni síðustu orusto; enn Haralldr konungr eignadiz ríki allt suður til Raum-elfar.

CAP. III.

FRÁ GYDU EIRÍKS DÓTTUR.

Haralldr konungr sendi menn sína eptir meyo einni, er Gyda het, dóttir Eiríks konungs af Höðalandi; hun var at fóstri á Valldresi, með rikum bóanda. Villdi konungr hana hafa til fridlo ser; þvíat hun var alfrid mæð, og helldr stórlát. Enn er sendimenn komu þar, þá baro þeir upp erindi sín fyrir meyna; hun svarar á þessa lund: at eigi vill hon spilla meydómi sínom til þess, at taka til manns þann konung, er eigi hefir meira ríki enn nockor fylki til forráða; enn þat þicki mer undarligt, segir hun, er engi er sá konungr, sva vili eignaz Noreg, og vera einvalldi yfir, sem Gormr konungr at Danmörku, edr Eiríkr konungr at Uppsölum. Sendimönnom þickir hun svara furðu stórliga, og spyria hana máls um, hvar til svör þessi skulu koma? segia, at Haralldr er kon-

ungr sva ríkr, at henni er fullrædi í; enn þó at hun svari á annan veg þeirra eyrindum, enn þeir mundo vilja, þá síá þeir eingan sinn kost til þess at sinni, at þeir mundo hana í brott hafa, nema hennar vili væri till þess; oc búaz þeir þá ferdar sinnar. Enn er þeir ero búnir, leida menn þá út; þá mælti Gyda við sendimenn: segit þau mín ord Haralldi konungi, at ec mun því at eins iáta, at geraz eigin-kona hans, ef hann vill þat gera fyrir minar sakir ádr, at leggja undir sic allan Noreg, oc ráda því ríki iafnfriálsliga, sem Eiríkr konungr Sviavelldi, edr Gormr konungr Danmörk: þvíat eing þicki mer, segir hon, hann mega heita þjóðkonungr.

CAP. IV.

HEITSTRENGING HARALLD'S KONUNGS.

Sendimenn fara nú aptr til Haralld's konungs, oc segia hanom þessi ord meyarinnar, oc segia at hon væri furdu diörf oc úvit; oc telia þat makligt, at konungr sendi eptir henni með fölmenni, oc göra til hennar nockura ósæmd. Þá svarar Haralldr konungr, at eigi hefði þessi mær illa mællt, edr gert, sva at hefnda vóri fyrir verdt, oc bad hana hafa mikla þöck fyrir ord sín, hún hefir mint mik þeirra luta, segir hann, er mer þickir nú undarligt, er ec hefi þetta eigi fyrr hugleitt. Oc enn mælti hann: þess streingi ec heit, oc því skyt ec til Guds þess er mic skóp, oc öllo rædr, at alldri skal skera hár mitt ne kemba, fyrr enn ec hefi eignaz allan Noreg,

med sköttum oc skyldum oc forráði, enn deya at öðrum kosti. Þessi ord þackadi hönum miök Guthormr hertogi, oc let þat vera konunglicet verk at efna ord sin.

CAP. V.

OROSTA Í ORKADAL.

Eptir þetta samna þeir frændur lidi miklo, oc búa ferd sína á Upplönd, oc sva norðr um dali, oc þaðan norðr um Dofrafiáll, oc þá er hann kom ofan í bygdina, þá let hann drepa menn alla, enn brenna bygdina. Enn er fólkit varð þessa víst, þá flyði undan hverr er mátti; sumir ofan til Orkadals, sumir til Gaulardals, sumir á markir, sumir leitudu gríða; oc þat fengo allir þeir er á konungs fund komu, oc gerduz hans menn. Þeir fengu enga mótstöðu, fyrr enn þeir komu til Orkadals; þar var samnadr fyrir þeim, oc þar átto þeir ena fyrsto orosto við konung þann er Grytingr het: Haralldr konungr feck sigr, enn Grytingr varð handtekinn, oc drepit mikit lid af hanom, enn hann geck til handa Haralldi konungi, oc svardi hönum trúnaðar eida: Eptir þat geck allt fólk undir Haralld konung í Orkdæla-fylki, oc gerduz hans menn.

CAP. VI.

LANDS-RETTR HARALLDS KONUNGS.

Haralldr konungr setti þann rett allt þar er hann

vann ríki undir sic, at hann eignadiz ódöl öll, oc let alla bóendar giallda ser landskylldir, bædi ríka oc úríka; hann setti Jarl í hverio fylki, þann er dæma skyllði lög oc landsrett, oc heimtasakeyri oc landskylldir, oc skyllði Jarl hafa þridiung skatta oc skyllða, til bords ser oc kostnadar: Jarl hverr skyllði hafa undir ser IV hersa edr fleiri, oc skyllði hverr þeirra hafa XX marka veizlo. Jarl hver skyllði fá konungi í her LX hermanna af sínum einom kostnadi; enn hersir hver XX manna. Enn sva mikít hafði Haralldr konungr aukít á lögör oc landskylldir, at Jarlar hans höfðu meira ríki enn konungar höfðu fyrrom. Enn er þetta spurdiz um þrándheim, þá sóttu til Harallds konungs margir ríkis menn, oc gerdoz hans menn.

CAP. VII.

OROSTA Í GAULDARDAL:

Þat er sagt, at Hákon Jarl Griótgarðs son kom til Harallds konungs utan af Yrium, oc hafði líð mikít til fulltingis við Haralld konung. Eptir þat fór Haraldr konungr inn í Gaulardal, oc átti þar orosto, oc felldi þar tva konunga; oc eignadiz síðan ríki þeirra: enn þat var Gauldæla-fylki oc Strinda-fylki. Þá gaf hann Hákoní Jarlí yfir-sókn um Strinda-fylki. Eptir þat fór Haraldr konungr inn í Stióradal, oc átti þar ena þridio orosto, oc hafði sigr,

oc

oc eignadiz þat fylki. Eptir þat sömnuduz saman Inn-þrændir, oc voro komnir saman IV konungar med her sinn: sá einn er red fyrir Veradal; annar fyrir Skön; þridi á Sparbyggia fylki; fiórði af Eynni idri; sá átti Eyna fylki. Þessir IV konungar fóru med her sinn móti Haralldi konungi; enn hann hellt orostu vid þá, oc feck sigr: enn þessir konungar fellu sumir, enn sumir flydu. Haralldr konungr átti allz í Þrándheimi VIII orostor edr fleiri, oc at fell-dom VIII konungom eignadiz hann allan Þrándheim.

CAP. VIII.

HARALLDR VANN NAUMDÆLA-FYLKI.

Nordr í Naumudal voro brædur tveir konungar, Herlaugr oc Hrollaugr; þeir höfdu verit at þriú sumur at gera haug einn: sá haugr var hladinn med grióti oc limi, oc vidum gör; enn er haugrinn var algörr, þá spurdu þeir brædur þau tíðindi, at Haralldr konungr fór á hendur þeim med her. Þá let Herlaugr konungr aka til haugsins vist mikla oc dryck; eptir þat geck Herlaugr konungr í hauginn med tolfsta mann; síðan let hann kasta aptr hauginn. Hrollaugr konungr fór upp á haug þann, er konungar voru vanir at sittia á, oc let þar búa konungs há-sæti, oc settiz þar í: þá let hann leggja dynur á fótpallinn, þar er Jarlar voru vanir at sitia á; þá velltiz hann or há-sætinu oc í Jarls-sæti, oc gaf ser

siálfr Jarlsnafn. Eptir þat fór Hrollaugr móti Haralldi konungi, oc gaf hönum allt ríki sitt, oc baud at göraz hans madr, oc segir hönum alla sína medferd. Þá tók Haralldr konungr sverð, oc festi á linda hönum. Þá festi hann skiöld á háls hönum, oc gerdi hann Jarl sinn, oc leiddi hann í háseti: Þá gaf hann hönum Naundæla-fylki, oc setti hann þar Jarl yfir.

CAP. IX.

FRÁ SKIPAN HARALLDS KONUNGS.

Haralldr konungr fór þá aptr til Þrandheims, oc dvalldiz þar um vetrinn, oc kalladi heimili sitt íafnan síðan; þar setti hann hinn mesta höfútbæ sinn, er Ladir heita. Þann vetr feck hann Asu dóttur Hákonar Jarls Griótgards sonar, oc hafdi Hákon þá mestan metnad af konunginum. Um varit red Haralldr konungr ser til skipa. Hann hafdi gera látit um vetrinn dreka mikinn, oc blúinn hit vegligsta: þar skipadi hann á hird sinni oc berserkium. Stafn-búar voru mest vandadir; þvíat þeir höfðu merki konungs: aptr frá stafninum till austrúms, var kallat á rausn; þat var skipat berserkium. Þeir einir náðu hirdvist med Haralldi konungi, er afreksmenn voru, bædi at afli oc hreysti, oc allsconar atgörvi: þeim einom var skipat hans skip, þvíat hann átti þá góð vól at kíosa ser hirdmenn or hveriu fylki. Haralldr konungr hafdi her mikinn oc mörg stór

skip, oc margir ríkismenn fylgdo hanom. Þess getr Hornklofi í Glymdrapu, at Haralldr konungr hafði fyrir bariz á Uppdals skogi við Orkndælinga, enn hann hafði leidánger þenna úti.

Hilmar red á læði
 hialldr seids þrumugalldra
 óðr við æski meidi
 ey vebrantar heya.
 Aðr gnapsalar grímnis
 gnystarandi særi
 rausnar samr til rimmo
 ríðvígs lagar skíðum.
 Gerði glamma ferðar
 gnyþrottr í orusto dróttar
 hel kamaudi hlenna
 hlym ræks um trud glymia.
 Aðr út á mar mætir
 mannscæðr lagar tanna
 ræsi naðr oc rausnar
 rak vebrantar nöckva.

CAP. X.

OROSTA VIÐ SOLSKEL.

Haralldr konungr hellt lidi síno út or þrandheimi, oc sneri suðr á Mæri. Hunþjófr er nefndr konungr, sá er red fyrir Mæra-fylki; Sölfi Klofi het sonr hans; þeir voru hermenn miklir. Enn sá konungr er red fyrir Raumsdal, er nefndr Nöckvi; hann var móðurfadir Sölfa. Þessir höfðingiar drógu saman her mikinn, er þeir spyria til Harallds konungs, oc fara móti hönum, oc hittaz þeir við Sölskel; varð þar

oroosta mikil, oc hafði Haralldr konungr sigr. Þessarar oroosto getr Hornklofi:

Þar sva at bars at bordi
 bord Hölkvis rak nordan
 hlífar valldr til hilldar
 hreggs döglinga tveggja.
 Oc allsnæfrir iöfrar
 ordalaust at mordi,
 endiz raudra randa
 rödd dynseotum kvödduz.

Bádir konungar fello, enn Söllvi komz vid flóttan undan; lagði Haralldr konungr þá undir sic þessi tvö fylki, oc dvalldiz þar lengi um sumarit, oc skipaði þar rettum med mönnum, oc setti þar forráðamenn, oc treysti ser fólk. Enn um haustit bióz hann at fara norðr til Þrandheims. Rögnvalldr Mæra Jarl, sonr Eysteins Glumru, hafði þá of sumarit görz madr Harallds konungs. Haralldr konungr setti hann höfðingia yfir þessi tvö fylki, Nordmæri oc Raumsdal, oc feck hönum þar styrk til, bæði af rikismönnum oc bóndum, sva oc skipa-kost, at veria landit fyrir ófríði: hann var kalladr Rögnvalldr enn Ríki, edr inn Ráðsvinni; oc segia menn at hvartveggja væri sann-nefni. Haralldr konungr var um vetrinn eptir í Þrandheimi.

C A P. X I.

F A L L A R N V I D S O C A U D B I A R N A R K O N U N G A.

Eptir um varit bió Haralldr konungr her mikinn

or Þrándheimi, oc segir, at hann mundi þeim her stefna á Sunnmæri. Sölli Klofi hafði um vetrinn legit úti á herscipom, oc heriat á Nordmæri, oc drepit þar marga menn Harallds konungs, enn suma rænta, enn brent fyrir sumum, oc gert hit mesta hervirki; Enn stundum um vetrinn hafði hann verit á Sunnmæri med Arnvidi konungi, frænda sinum. Enn er þeir spyria at Haralldr konungr var á scip kominn, oc hafði her mikinn, þá samna þeir lidi, oc verda fiölmennir; Þvíat margir þóttuz eiga Haralldi konungi heiptir at giallda. Sölli Klofi fór sudr í Fiördo á fund Andbiarnar konungs, er þar red fyrir, oc bad hann lids, at hann skyldi fara med her sínum til styrks vid þá Arnvid konung, segir han sva: Öllum oss er nú siá kostr audsærr, at ver risim allir upp í móti Haralldi konungi; manom ver þá hafa nógan styrk, oc man þá audna ráda sigri. Enn hinn er annar kostr, oc er þat þó engi kostr þeim mönnom, er eigi ero ótignari at nafni enn Haralldr, at geraz þrælar hans. Þótti födur minom sá kostr betri, at falla í bardaga í konungdómi sínom, enn gánga siálfkrafa í þiónustu vid Haralld konung; edr þola eigi vapn, sem Naundæla konungar gerdo; kom Sölli sva rædom sínom, at Andbiörn konungr het ferdinni; oc dro hann þá her saman, oc fór norðr til fundar vid Arnvid konung; höfdo þeir þá allmikinn her. Þeir spurdu þá til Haralds konungs, at hann var þá nordan kominn; þeir hittuz fyrir innan Sólskel. Þat var þá sidvani,

er menn börduz á skipom, at tengia skyldi skipin, oc beriaz um stafna; var þar sva gert; lagdi Haralldr konungr skip sitt móti skipi Arnvidar konungs: vard sú orosta en snarpasta, oc fell mikitt fólk af hvarom tveggjom. Oc at lyktum vard Haralldr konungr sva ódr oc reidr, at hann geck fram á rausn á skipi síno, oc bardiz þá sva snarpliga, at allir frambyggvar á skipi Arnvids hrucko aptr till siglu, enn sumir fellu: geck Haralldr konungr þá upp á skipit, leitudu þá menn Arnvids konungs á flötta; enn hann siálfr fell á skipi síno. Þar fell oc Audbiörn konungr; enn Sölfi flydi. Sva segir Hornklofi:

Háði gramr þar er gnúdu
geira hregg vid seggi
raud snysti ben blódi
brun gögl, í dyn sköglar:
þá er á rausn fyrir ræsi
red egglitundr seggir
æfr gall hiörr vid hlífar
hnigo fiörvanir sigri.

Þar fell or lidi Harallds konungs Asgautr, oc Asbiörn Jarlar konungs, oc Griótgardr oc Hrollaugr, mágar hans, synir Hákonar Hlada Jarls. Sölfi var sídan víkingr mikill lánga hrid, oc gerdi opt mikinn skada á ríki Harallds konungs.

CAP. XII.

BRENNA VEMUNDAR KONUNGS.

Eftir þat lagdi Haralldr konungr undir sic Summæri. Vemundr bródir Audbiarnar konungs hellt

Fyrda-fylki. Þetta var síðla um haust, oc gera menn þat ráð med Haralldi konungi, at han skyldi eigi fara suðr um Stad. Þá setti Haralldr konungr Rögnvalld Jarl yfir Mæri hyaratveggio oc hafdi hann þá um sic mikit fiölmenni. Haralldr konungr sneri þá norðr aptr til Þrándheims. Þann sama vetr fór Rögnvalldr Jarl hit idra um Eid, oc sva suðr um Fiördo. Hann hafdi niösn af Vemundi konungi, oc kom um nótt þar sem heitir Naustdalr; var Vemundr konungr þar á veizlo. Rögnvalldr Jarl tók hús á þeim, oc brendi konung inni, med XC manna. Eptir þat kom Berðlu-Kári till Rögnvallds Jarls med lángeip alskipat, oc fóru þeir bádir norðr á Mæri. Tók Rögnvalldr Jarl skip þau, er átt hafdi Vemundr konungr, oc allt lausa fe þat er hann feck. Berðlu-Kári fór norðr til Þrándheims á fund Harallds konungs, oc gerðiz hans madr; han var berserkr mikill.

CAP. XIII.

FALL HÁKONAR JARLS OC ATLA
JARLS HINS MIÓVA.

Um varit eptir fór Haralldr konungr suðr med landi med skipa her, oc lagdi undir sic Firdafylki; síðan sigldi hann austr med landi, oc kom fram í Vik austr. Enn hann setti eptir Hákon Jarl Griót-gards son, oc feck hönum yfirsókn í Firda-fylki. Þá sendi Hákon Jarl ord Atla Jarli hinum Mióva,

att hann skyldi fara brott or Sogni, oc vera Jarl á Gaulom, sem hann hafði fyrr verit, en kvad Haralld konung hafa veitt ser Sygna-fylki. Atli Jarl sendi þau ord í móti, at hann mun hallda Sygna-fylki; oc sva Gaulum, þar til er hann finnr Haralld konung. Jarlarnir þreytlo þetta med ser, þar til er bádir samna her: þeir hittaz á Fiölum í Stafanessvagi, oc áttu þar orostu mikla, þar fell Hákon Jarl, enn Atli Jarl varð sárr til ólífis, oc föro menn hans til Atleyar med hann, oc andaðiz hann þar. Sva segir Eyvindr Skáldaspillir:

Vard Hákon
högna meyar
viðr vapnberr
er vega skyldi.
Oc sinn allr
í odða gny
Freys áttungr
at Fiölum lagði.
Oc þar varð
er vinir fello,
mágar Hallgardz
manna blóði
Stafaness
við stóran gny
vinar lödurs
vagr of blandinn.

CAP. XIV.

FRÁ HARALLDI KONUNGI OC EIRÍKI
SVÍA KONUNGI.

Haraldr konungr kom lidi sínu austr í Vík, oc

lagdi inn til Tunsbergs; þar var þá kaupstadr: hann hafði þá dvaliz í Þrándheimi IV vetur, oc komit eigi á þeirri stundu í Víkina. Hann spurdi þar þau tíðindi, at Eiríkr Svía konungr, Eymundar son, hafði lagt undir sic Vermaland, oc tók þar skatta af öllum mark-bygdum: oc hann kalladi Vestra Gautland allt norðr til Svínasunds, oc it vestra allt með hafi, þá kalladi Svía konungr þat allt sitt ríki, oc tók skatta af. Hann hafði þar sett yfir Jarl, er kalladr var Hrani Gauzki; hann hafði ríki milli Svínasunds ok Gautelfar; hann var ríkr Jarl. Haralldi konungi var sva sagt frá orðom Svía konungs, at hann skyldi eigi fyrr af láta, enn hann hefði íanmikit ríki í Víkinni, sem fyrr hafði Sigurðr, edr Ragnar Lodbrók son hans; enn þat var Raumaríki oc Vestfólld, allt út til Grenmars; sva Vingulmörk, oc allt suðr þadan. Hafði þá um þessi fylki snúiz til hlydni við Svía konung margir höfðingiar, oc mikit fólk annat. Þetta líkadi Haralldi konungi stór-illa, oc stefndi þegar þing við bændor þar á Fólldinni, oc bar sakar á hendur þeim um landráð við sic. Bændor qvamo þar sumir syn fyrir sic; sumir gulldu fe; sumir sættu refsingum. Fór hann sva um sumarit of þat fylki. Um haustit fór hann upp á Raumaríki, oc fór þar allt at sama hætti, at hann lagði undir sic þat fylki. Þá spurdi hann öndverðan vetr, at Eiríkr Svía konungr reid um Vermaland at veizlum með hird sína.

CAP. XV.

KONUNGAR ÞIGGIA VEIZLO A'T ÁKA,
OC UM DRÁP HANS.

Haralldr konungr byr ferd sína austr um Eydas-kóg, oc kem fram í Vermalandi; let hann þar búa veizlor fyrir ser. Aki het madr, hann var ríkastr bóndi á Vermalandi, stóraudigr, oc þá gamall at alldri. Hann sendi menn til Haralldz konungs, oc baud hönum til veizlo. Konungr het ferdinni at áqvednum degi. Aki baud oc Eiríki konungi til veizlo, oc lagdi hönum inn sama stefnodag. Aki átti mikinn veizloscála, oc var þá forn; hann let þá gera annan nyan veizloscála, eigi minna, oc vanda sem mest; hann let þann scála tiallda allau nyum búnadi; enn hinn forna scála med fornodom búnadi. Enn er konungar komo till veizlunnar, þá var skipat Eiríki konungi med sinni hird í inn forna scála, enn Haralldi í inn nya scala med sínu lidi. Þannog var skipt bordbúnadi öllum, at Eiríkr konungr oc hans menn höfdo forn ker oc horn, oc þó gyllt oc allvel búinn; enn Haralldr konungr oc hans menn höfdo öll ny ker oc horn, oc búinn öll med gulli: þau voru öll líkud, oc skygd sem gler; enn dryckr var hvartveggi inn besti. Aki bóndi hafdi fyrr verit madr Hálfðanar konungs Svarta. Enn er sá dagr kom, er veizlan var öll, þá biugguz konungar til brottferdar, voro þá reidsciótar búnir; þá geck Aki fyrir Haralld konung, oc leiddi med ser

son sinn XII vetra gamlan, sá het Ubbi. Aki mælti: Ef yður þickir, herra, vinattu vert fyrir góðvillia minn, er ec hefi lyst við yður í heimbodi minn, þá launi þer syni minum; hann gef ec þer til þíonostomans. Konungr þackadi hanom með mörgum fögrum orðum sinn fagnad, oc het hanom þar í mót fullkominni sinni vinatto. Síðan greiddi Aki fram stórar gíafir, er hann gaf konungi. Síðan mintiz Aki við konung. Eftir þat geck Aki til Svía konungs, var þá Eiríkr konungr klæddr, oc búinn til ferðar, oc var hann helldr úkátr. Aki tók þá góða gripi, oc gaf konungi. Konungr svarar fá, oc steig á hest sinn. Aki geck á leid með konungi, oc taladi við hann. Skógr lá nær bænum, oc lá þar vegrinn yfir. Enn er Aki kom á skóginn, þá spurdi konungr hann: hví skiptir þú sva fagnadi með ockur Haralldi konungi, at hann skyllði hafa af öllu inn betralut, oc veiztu at þú ert minn madr. Ec hugda, segir Aki, at yður, konungr, oc ydra menn, mundi engan fagnat skort hafa at þessi veizlo; enn at þar var forn búnaðr, er þer druckut, þá velldr þat því, at þer erut nú gamlir; enn Haralldr konungr er nú í blóma alldurs; feck ec hönum af því nýan búnat. Enn þar er þú mintir mic, at ec væri þinn madr, þá veit ek hitt eigi síðr, at þú ert minn madr; þá brá konungr sverdi oc hió hann banahögg: reid braut síðan. Enn er Haralldr konungr var búinn at stíga á hest sinn, bad han kalla til sín Aka bóanda; enn er menn leitodo hans, þá runno

sumir þannog sem Eiríkr konungr hafði ridit: fundu þeir þar Aka daudan. Fóro þeir aptr, oc sögðu Haralldi konungi. Enn er hann spyr þetta, heitir hann á menn sína at þeir skuli hefna Aka bóanda; ridr þá Haralldr konungr oc menn hans þannog, er ádr hafði ridit Eiríkr konungr, til þess er hvarir verða varir við adra; þá ríða hvarir sem mest mego, til þess er Eiríkr konungr kemr á skóg þann, er skílr Gautland oc Vermaland; þá snýr Haralldr konungr aptr á Vermaland, leggrr hann þá land allt undir sic, enn drap menn Eiríks konungs, hvar sem hann stóð þá. Fór Haralldr konungr um vetrinn aptr á Raunaríki oc dvalldiz þar um hríð.

CAP. XVI.

FERD HARALDS KONUNGS TIL
TUNSBERGS.

Haralldr konungr fór um vetrinn út til Tunsbergs til skipa sinna; byr hann þá skipinn, oc helldr austr yfir fiördinn, leggrr þá undir sic alla Vingulmör; hann er úti á herscipum allan vetrinn, oc heriar á Ránríki. Sva segir Þórbiörn Hornklofi:

Úti vill jól drecka,
 ef skal einn ráða,
 fylkir inn frammyndi,
 oc Freys leik heya.
 Ungr leiddiz elldvelli
 oc inni at sitia,
 varma dyngio
 eða vöttu díns fulla.

Gantar höfðu samnat fyrir allt um landi.

CAP. XVII.

OROSTA Á GAUTLANDI.

Enn um varit er ísa leysti, stikudu Gautar Gautelfi, at Haralldr konungr skyldi eigi mega leggja skipom sínom upp í landit. Haralldr konungr lagdi skipom sínom upp í elfina, oc lagdiz vid stikin, heriadi þá á bædi lönd, oc brendi bygdina. Sva segir Hornklofi:

Grennir þraung at gunni
gunnmás fyrir haf sunnan
sá var gramr oc gunnum
gedvörðr, und sic jördo;
oc biálm tamidr hilmir
hólm reidar let ólman
lindi hiört fyrir landi
lund prúdr vid stic bundinn.

Sídan rido Gautar ofan med her mikinn, oc helldu orostu vid Haralld konung, oc vard þar allmikitt mannfall, oc lauk sva, at Haralldr konungr hafdi sigr. Sva sigr Hornklofi:

Ríki þreifz reiddra eyxa
rymr, knátto spiorglymía
svart skygd bito seggi
sverd piód konungs ferdar;
þá er hugfyllðra höllda
hlaut annscoti Ganta
hár var saungr of svíram
sigr flugbeiddra vigra.

CAP. XVIII.

FALL RANA GAUTSKA.

Haralldr konungr fór vída um Gautland herskilldi,

oc átti þar margar orostor, tveim megin elfarinnar; oc feck hann optaz sigr. Enn í einhverri orosto fell Rani Gauzci. Síðan lagdi Haralldr konungr land allt undir sic fyrir nordan elfina, oc fyrir vestan Væni, oc Vermaland allt. Enn er hann sneriz þaðan í brott, þá setti hann þar eptir til landgæzlo Guthorm hertuga, oc lid mikit med hanom; enn Haralldr konungr sneriz þá til Upplanda, oc dvall-diz þar um hríd; fór síðan nord um Dofra fiall til Þrándheims, oc var þar enn lángar hrídir. Haralldr konungr tók þá at eiga börn; þau Asa atto IV syni: Guthormr var ellztr; Hálfðan Svarti oc Hálfðan Hvíti voru tvíburar; Sigfröðr hinn fiórði. Þeir voru allir uppfæddir í Þrándheimi med miklum sóma.

CAP. XIX.

OROSTA Í HAFURSFIRÐI.

Þau tíðindi spurduz sunnan or landi, at Hörðar oc Rygir, Egdir oc þilir sömnuduz saman, oc gerdo uppreist bæði at skipom oc vapnom, oc fiölmenni: Voru þeir upphafsmenn Eiríkr Hörðalands konungr, Sulki konungr af Rogalandi, oc Sóti Jarl bróðir hans, Klötvi hinn Audgi, konungr af Ögdom, oc Þórir Haklángs sonr hans; af Þelamörk brædur tveir Róalldr Hrygg, oc Haddr hinn Hardi. Enn er Haralldr konungr varð þessa tíðenda viss, þá dró hann her saman, oc skaut skipom á vatn, bióz síðan med li-dit oc fer med landi sudr, oc hafði mart manna or

hverio fylki. Enn er hann kemr sudr um Stad, þá spyr þat Eiríkr konungr; hafði hann þá oc sam-
mankomit því lidi, er hanom var ván. Fer hann
þá sudr í móti því lidi, er hann vissi at austan
mundi koma til fulltingis við hann: mættiz þá her-
inn allr fyrir nordan Jadar, oc leggja þá inn til
Hafursfiardar; þar lá fyrir Haralldr konungr með
her sinn. Tókz þegar orosta mikil; var sú bæði
hörd oc laung: Enn at lyktom varð þat at Haralldr
konungr hafði sigr, enn þar fello þeir Eiríkr kon-
ungr oc Sulki konungr, oc Söti Jarl bródir hans:
Þórir Haklángur hafði lagt skip sit í móti skipi Har-
allds konungs; var Þórir berserkr mikill; var þar
allhörd atsókn, ádr Þórir Haklángur fell; var þá ro-
dit allt skip hans. Þá flyði Kiötví konungr út í
hólma nockorn, þar er vígi var gott. Síðan flyði
allt lid þeirra; sumt á skipum, enn sumt lióp á land
upp, oc sva it efra sudr um Jadar. Sva segir Horn-
klofi:

Heyrdir þú í Hafursfirði

hve hízig bardiz

konungr hinn kinstóri

við Kiötva hinn Auðga:

Kuerrir komo austan

kapps of lystir

með gínondom höfdom

oc gröfnom tínglom:

Hladnir voro þeir hölda

oc hvítra skillda

vígra Vestrænna

oc Valsæra sverða:

greniðo berserkir
 guðr var þeim á sinnom;
 emiaðo ulfhednar
 oc isarn gullo.

Freistodo hins framráða
 er þeim flya kendi
 allvalldz austmanna
 er byrr at Utsteini:
 stödom nöckva brá stillir
 er hönum var styriar væni:
 hlömmön var á hlífom
 áðr Haklángr felli.

Leiddiz þá fyrir Lúfa
 landi at hallda
 hilmí inom háls-dígra
 hólm let ser at skialldi:
 slógoz und sess þilior
 er sárir voro,
 leto upp stiölo stupa;
 stungu í kiöl höfdom.

A baki leto blikia
 bardir voru grióti
 svafnis salnefrar
 seggir hyggiandi:
 Æstoz audkylfor
 oc of Jadar liópo
 heim or Hafursfirði
 oc hugdo á miöddryckio!

CAP. XX.

HARALLDR KONUNGR VERDR EIN- VALLDR ATNOREGI, OC UM EYDI- LANDA BYGGING.

Eptir orosto þessa feck Haralldr konungr engar
 mót-

mótstöðo í Noregi; voro þá fallnir allir mótstöðomenn oc hinir mesto fiandmenn hans; enn sumir flydo or landi; oc var þat alniskill mannsfölli: þviat þá bygdoz stór eydlönd: þá bygdiz Janitaland oc Helsingialand, oc var þó ádr hvartveggja nockot bygt af Nordmönnom. I þeim úfridi, er Haralldr konungr geck til landz í Noregi, þá sunnuz oc bygduz útlönd, Færeyar oc Island: þá var oc mikil ferd af Nordmönnom til Hialtlands, oc margir ríkismenn af Noregi flydo útlaga fyrir Haralldi konungi, oc fóro í vestrvíking: voru í Orkneyum eda Sudreyum á vetrom, enn á sunrom heriade þeir í Noregi, oc gerdo þar mikin landzskada. Margir voru þeir oc ríkismenn, er gengu til handa Haralldi konungi oc gerdoz hans menn, oc bygdo lönd med hanom.

CAP. XXI.

FRA BÖRNUM HARALLDS KONUNGS
OC KVANFÖNGUM.

Haralldr konungr var nú einvalldi ordinn alls Noregs, þá minntiz hann þess er mærin sú hin mikilláta hafdi mælt til hans: hann sendi þá menn eptir henni, oc let hana hafa til sín, oc lagdi hana hiá ser; þessi voro börn þeirra: Alof var ellzt, þá var Hrærekr, þá Sigtryggr, Fródi oc Þórgills. Haralldr konungr átti margar konur oc mörg börn: hann feck þeirrar kono er Ragnhilldr het, dóttir

Eiríks konungs af Jotlandi; hun var köllot Ragnhildr hin Ríka: þeirra son var Eiríkr Blóðöx. Enn átti hann Svanhildr dóttur Eysteins Jarls; þessir voru synir þeirra: Olafr Geirstada-Alfr, Biörn oc Ragnar Ryckill. Enn átti Haralldr konungr As-hildr, dóttur Hrings Dags sonar ofan af Hringaríki; þeirra börn voro: Dagr oc Hríng, Gudrödr Skírja oc Ingigerdr. Sva segia menn, at þá er Haralldr konungr feck Ragnhildr Ríka, at hann leti þá af IX konum sínum. Þess getr Hornklofi:

— Hafdadi Holmrygiom
oc Hörda meyom
hverri þinni Heinverscu
oc Hölga ættar
konungr hinn kynstóri
er tók konuna Dönsko.

Börn Harallds konungs voru þar hver uppfædd, sem móðerni áttu. Guthormr hertogi hafði vatni ausit hinn ellzta son Harallds konungs, oc gaf nafn sitt; hann knesetti þann svein oc fóstradi, oc hafði með sér í vík austr: fæddiz hann þar upp með Guthormi hertoga. Guthormr hertogi hafði alla stjórn landsins um víkina, oc um Upplönd, þá er Haralldr konungr var eigi nær.

CAP XXII.

VESTRFERD HARALLD'S KONUNGS.

Haralldr konungr spurdi at víða um mitt-landit heriádo víkingar, þeir er á vetrum voru fyrir vest-

an haf; hann hafði þá leidangr úti hvert sumar, oc kannadi eyar oc útscer. Enn hvar sem vikingar urdu varir vid her hans, þá flydo allir, oc flestir á haf út. Enn er konungi leiddiz þetta starf, þá vard þat á einu sumri, at Haralldr konungr sigldi med her sinn vestr um haf; kom hann fyrst vid Hialltland, oc drap þar alla víkinga þá er eigi flydo undan. Síðan siglir Haralldr konungr suðr til Orkneya, oc reinsadi þar allt af vikingom. Eptir þat fer hann allt í Sudreyar, oc heriðr þar: hann drap þar margar víkinga, þá er fyrir lidi redo ádr. Hann átti þar margar orostur, oc hafði iafnan sigr. Þá heriðdi hann á Skotland, oc átti þar orostur. Enn er hann kom vestr í Mön þá höfdo þeir ádr spurt hvern hernad hann hafði giört fyrrum þar í landi, þá flydi allt fólk inn á Skotland, oc var þaraleyda af mönnum: braut var oc flutt allt fe þat er mátti. Enn er þeir Haralldr konungr gengu á land, þá fengu þeir ecki herfang. Sva segir Hornklofi:

Menfergir bar margar
ma gspakr midar varga
lundr vann sókn á sandi
sandmens í b/ randir;
ádr fyrir ælian fródom
allr her scota þverri
lögdis æids af ládi
læbrautar vard flæia.

I þessom orostom fell Ivar son Rögnvallds Mæra Jarls, enn í bætur þess gaf Haralldr konungr Rögnvalldi Jarli, er hann sigldi vestan, Orkneyar oc

Hialltland; enn Rögnvalldr gaf þegar Sigurdi bróður sínom bæði löndin, oc var hann vestr eptir. Haralldr konungr gaf Sigurdi Jarldom, ádr konungr sigldi austr. Þá þom til lags við hann Þórsteinn Raudi, sonr Olafs Hvíta oc Audar hinnar Diúpaudgu; þeir heriádo á Skotland, oc eignuduz Katanes, oc Sudrland allt til Eckialsbacka. Sigurdr Jarl drap Melbrigða Tönn, Jarl skotskan, oc batt höfut hans við slagálar ser, oc laust kycqva vöðva sínom á tönnina, er skagdi or höfdino, kom þar í blástr í fótinn, oc feck hann af því bana, oc er hann heygdr á Eckialsbacka; þá red löndom Guthormr sonr hans einn vetr, oc dó hann barnlaus. Síðan settuz í löndin víkingar margir Danir oc Nordmenn.

CAP. XXIII.

SKORIT HÁR HARALLDS KONUNGS.

Haralldr konungr var á veizlo á Mæri, at Rögnvalldar Jarls; hafdi hann þá eignaz land allt; þá tók Haralldr konungr laugar, oc þá let hann greiða hár sitt, oc þá skar Rögnvalldr Jarl hár hans, enn ádr hafdi verit úskorit oc úkembt X vetur; var hann ádr kalladr lúfa, enn síðan gaf Rögnvalldr hönum Kenningar-nafn, oc kalladi hann Haralld hinn Hár-fagra, oc sögdo allir, er sá, at þat var et mesta sann-nefni; þvíat hann hafdi hár bæði mikit oc fagrt.

CAP. XXIV.

GAUNGU-ROLFR ÚTLÆGR GIÖRR.

Rögnvalldr Mæra Jarl var hinn mesti ástvin Harallds konungs, oc konungr virði hann mikils. Rögnvalldr Jarl átti Hildi, dóttur Rólfs Nefu: synir þeirra voru þeir Rolfr oc Þórir. Rögnvalldr Jarl átti oc frillo syni þrjá; het einn Halladr, annar Einar, hinn þridi Hrollaugr; þeir voru rosknir, þá er hinir skírborño brædur þeirra voro börn. Rolfr var víkingr mikill: hann var sva mikill madr vexti, at engi hestr mátti bera hann, oc geck hann hvargi sem hann fór: hann var kalladr Gaungo Rolfr. Hann heriadi miök í Austrvegu. A eino sumri, er hann kom or víking austan í vikina, þá hió hann þar strandhögg. Haralldr konungr var þá í víkinni; hann varð miök reidr, þá er hann spurdi þetta, þvíat hann hafði mikit bann álagt, at ræna innanlandz. Konungr lysti því á þingi, at hann gerði Rolf útlaga of allan Noreg. Enn er þat spurdi Hildir módir Rólfs, þá fór hun á fund konungs, oc bad fridar Rolfi; konungr var sva reidr, at henni tyði ecki at bidia. Þá kvad Hildir þetta:

Hafnit Nefio nafna
nú rekit gand or landi
horsean höllda barma.
hví bellit því stillir?
Illt er við úlf at ylfaz
yggs val-bríkar slíkan
muna við hilmis hiardir
hógr ef hann rennr til seógar.

Gaungu-Rolfr fór síðan vestr um haf í Sudreyar, oc þadan fór hann vestr í Valland, oc heriadi þar, oc eignadiz þar Jarls ríki mikit, oc bygdi þar miök Nordmönum oc er þar síðan kallað Nordmandi. Sonr Gaungu-Rolfs var Vilialmr, faðir Rikardar, födur annars Rikardar, födur Rodberts Laungu-spada, födur Vilialms Bastardar Engla konungs; frá hönom ero síðan komnir Engla konungar allir. Af Rolfs ætt ero oc komnir Jarlar í Nordmandi. Ragnhilldr drotning hún Ríka lifði III vetur síðan er hún kom í Noreg. Enn eptir dauda hennar, fór Eiríkr sonr þeirra Haralds konungs til fósturs í Fiördo til þóris hersis Hroalldssonar, oc fæddiz hann þar upp.

CAP. XXV.

FRA SVAÞA JÖTNI OC HARALLDI
KONUNGI,

Haralldr konungr fór einn vetr at veizlom um Upplönd, oc lét búa sér til jóla veizlo á þoptum. Jola aptan kom Svasi fyrir dyr, þá er konungr sat yfir bordum; hann sendi konungi þod, at hann seyllði útganga til hans; enn konungr bráz reidr við þessom sendibodum, oc bar hinn sami maðr reidi konungs út, sem hönum hafði þorit bodin inn. Enn Svasi bað bera eigi at síðr annat sinn erindit, oc qvad sio vera þann Finnin, er konungr hafði iátat at sækia gamma sinn þar annan veg breckunnar. Enn konungr geck út, oc varð hönum þess játsi at

fara heim með hönum, og geck yfir breckuna í gamna hans, með áeggian sunra sinna manna, þótt sumir letti. Þar stóð upp Snæfrídr, dóttir Svasa, qvenna fríduzt, og byrladi konungi ker fullt miadar, enn hann tók allt saman kerit og hönd hennar, og þegar var sem elldz hiti qvæmi í hörund hönum, og villdi þegar hafa samræði við hana á þeirri nótt: Enn Svasi segir, at þat mundi eigi vera, nema at hönum naudgum, nema konungr festi hana, og fengi at lögum; Enn Haralldr konungr festi Snæfrídi, og feck hennar; og unni sva með ærslom, at ríki sit tyrirlet hann, og allt þat er konungs tign byriadi. Þau áttu IV sonu; einn var Sigurdr Rísi, Halfdan Hálegg, Guðrödr Liómi, Rögnvalldr Rettilbeini. Síðan dó Snæfrídr, enn lítr hennar skipadiz á engan veg; var hun þá íamríód, sem þá er hun var kvik. Konungr sat æ yfir henni, og hugdi at hun mundi lifna: fór sva fram III vetur, at hana syrgdi hana dauda; enn allr landz lydr syrgdi hann villtan. Enn þessa villu at lægia kom til lækna Þorleifr Spaki, er með viti lægdi þá villu; fyrst með eptirmæli, sva mælandi: Eigi er, konungr, kynliet, at þú munir sva frída kono og kynstóra, og tignir hana á dúni, og á gudvefi, sem hun bad þic: einn tign þín er þó minni enn hæfir, og hennar í því, at hun liggr ofrlengi í sama fatnadi, og er miklo sannligra, at hun se hrærd, og se skipt undir henni klædom. Enn þegar er hun var hrærd or reckionni, þá slær yllo og óþefan og hverskyns

illum fnyk af líkamanom; var þá hvatat at báli, oc var hon brend; blánadi ádr allr hennar búkr, oc ullu út or ormar oc edlor, froscar oc pöddor, oc allzkyns illyrmi; seig hun sva í ösko, enn konungrinn steig til vitsko, oc hugdi af heimsco; styrði síðan ríki síno, oc styrktiz oc gladdiz hann af þegnom sínom, enn þegnar af hánom, ríkit af hvaro-
tveggja.

CAP. XXVI.

FRÁ ÞIÓDOLFI OR HVINI.

Eftir þat er Haralldr konungr hafði reynt svik Finnunnar, þá varð hann sva reidr, at hann rak frá sér sono sína oc finnurnar, oc villdi eigi síá þá. Enn Guðrödr Liemi fór á fund Þiódolfs hins Hvinversca, fóstrefðor síns, oc bad hann fara með sér til konungs; þviat Þiódolfr var ástvin Harallds konungs, enn konungr var þá á Upplöndum. Þeir fóro síðan: Enn þeir komo til konungs síð aptans, oc settu nidr utarlíga, oc dulloz. Konungr gekk á gólfinu, oc sá á beckina; enn hann hafði veitzlo nockura, oc var miödr blandinn; þá qvað hann þetta fyrir munni sér:

Miök ero míair reckar
til miöd giarnir fornir,
oc her komnir hárir
hví eru æfar margir?

Þá svarar Þiódolfr:

Höfdom ver í höfði
 högg at eggja leiki
 með vell-brota vitrom,
 varom at þá til margir.

Þiódolfr tók þá ofan höttinn af höfði ser, oc kendi konungr hann þá, oc fagnadi hönnu vel. Þá bad Þiódolfr konung, at hann skyldi eigi fyrirlíta sonu sína; þvíat fúsir mundi þeir at eiga betra móðerni, ef þu hefdir þeim þat fengit. Konungr iátadi hönnu því, oc bad hann hafa Guðröd heim með ser, sva sem hann hafði fyrr verit; enn Sigurd oc Hálf-dan bad hann fara á Hringaríki, enn Rögnvalld bad hann fara á Hadaland. Þeir gera sva sem konungr baud. Gerduz þeir allvaseligir menn, oc vel búnir at íþróttum. Haralldr konungr sat þá um kyrt innan lands, oc var fridr gódr oc árferd.

CAP. XXVII.

UPPHAF TÖRF-EINARS JARLS Í ORKNEYUM.

Rögnvalldr Jarl á Mæri spurdi fall Sigurðar bróður síns, oc þat at þá sátu í löndonom víkingar; þá sendi hann vestr Hallad son sinn, oc tók hann ádr Jarls nafn, oc hafði lid mikit. Enn er hann kom til Orkneya, þá settiz hann í löndin; enn bædi á haust oc um vetr, oc um vár, fóro víkingar um eyarnar, oc námo nesnám oc hioggo strandhögg. Þá leiddiz Halladi Jarli at sitia í eyonom, velltiz

hann þá or Jarldóminom, oc tók höllds rett; fór hann síðan austr i Noreg. Enn er Rögnvalldr Jarl spurdi þetta, let hann illa yfir ferd Halladar, segir at synir hans mundi verða úlíkir forellri sino. Þá svarar Einar: Ek hefi lítin metnad af þer; á ec vid litla ást her at skilið: mun ec fara vestr til eya, ef þú villt fá mer styrk nockuru; mun ec því heita þer, er þer mun allmikill fagnadr á vera, at ec mun eigi aptr koma til Noregs. Rögnvalldr Jarl svarar, at þat líkadi hönum vel, at hann qvæmi eigi aptr; þvíat mer er lítils ván, at frændom þínom se sænd at þer; þvíat módurætt þín öll er þrælborin. Rögnvalldr Jarl feck Einari eitt lǫngscip alscipat. Sigldi Einar um hausti vestr um haf. Enn er hann kom til Orkneya, þá lágu þar fyrir víkingar tveim skipum, Þórir Treskegg oc Kalfr Skurfa. Einar lagdi þegar til orosto vid þá, oc sigradiz, enn þeir fello bádir. Þá var þetta qvedit:

Þá gaf hann Treskegg tröllom

Torf-Einar drap Scurfo.

Hann var fyrir því kalladr Torf-Einar, at hann let skera torf, oc hafði þat fyrir elldi-vid, þvíat engi var skógr i Orkneyom. Síðan gerdiz Einar Jarl yfir Eyonom, oc var hann ríkr madr: hann var líótr madr oc einsynn, oc þó manna scygnastr.

CAP. XXVIII.

ANDLÁT EIRÍKS KONUNGS EYMUNDAR SONAR.

Guthormr hertogi sat optaz i Tunsbergi, oc hafði

yfir-sókn allt um víkina, þá er konungr var eigi nær, oc hafði þar landvörn; var þar þá miök her-scátt af vikingom; enn úfridr var upp á Gautland, medan Eiríkr konungr lifdi, Eymundarson; hann andadiz þá er Haralldr konungr hinn Hárfagri hafði verit X vetur konungr í Noregi.

CAP. XXIX.

DAUDI GUTHORMS HERTOGA.

Eftir Eirík var konungr í Svíþjóð Biörn sonr hans L vetra; hann var faðir þeirra Eiríks ens Sigrsæla, oc Olafs födur Styrbiarnar. Guthormr hertogi varð sóttandur í Tunsbergi. Þá gaf Haralldr konungr yfir-sókn ríkis þess alls Guthormi syni sínum; oc setti hann þar höfðingia yfir,

CAP. XXX.

BRENNA RÖGNVALLDS MÆRA JARLS

Þá er Haralldr konungr var XL at alldri, þá voru margir synir hans vel á legg komnir; þeir voru allir bráðgorvir: kom þá sva, at þeir undo illa við, er konungr gaf þeim eigi ríki, enn setti Jarl í hverio fylki, oc þótti þeim Jarlar vera smá-bornari enn þeir voro. Þá fóro þeir til á eino vári, Hálfðan Háleggr ok Guðröðr Liómi, við mikla sveit manna, oc komo á úvart Rögnvalldi Mæra Jarli, oc tóku hús á hönom, oc brendo hann inni við LX manna. Þá tók Hálfðan lánscip III oc skipadi, oc siglir

síðan vestr um haf; enn Guðröðr settiz þar at löndum sem áðr hafði haft Rögnvaldr Jarl. Enn er Haraldr konungr spurdi þetta, þá fór hann þegar með líði miklo á hendur Guðröði, oc sá Guðröðr engan annan sinn kost, enn gefaz upp á valld Harallds konungs, oc sendi konungr hann austr á Agdir. Enn Haraldr konungr setti þá yfir Mæri Þóri son Rögnvallds Jarls, oc gipti hönom Alöfo dóttur sína, er köllut var Arbót. Þórir Jarl þegiandi hafði þá ríki því líkt, sem haft hafði Rögnvaldr Jarl fadir hans.

CAP XXXI.

DAUDI HÁLFÐANAR HÁLEGG'S.

Hálfðan Hálegg kom vestr til Orkneya, oc miök á úvart; oc flyði Einar Jarl þegar or eyonóm, oc kom aptr þegar um haustit, oc kom þá á úvart Hálfðani. Þeir hittuz, oc vard skómm orosta, oc flyði Hálfðan, oc var þat við nótt síálfa; lágu þeir Einar tialldalausir um nóttina. Enn um morguninn er lýsa tók, fóro þeir at leita flóttamanna um eyarnar, oc var hverr drepinn þar er stadinn vard. Þá mællti Einar Jarl: Eigi veit ec, segir hann, hvert ec se út á Rinans ey, mann edr fugl, stundum hefz upp, stundum leggz niðr. Síðan fóro þeir þannog til, oc fundu þar Hálfðan Hálegg, oc tóko hann höndom. Einar Jarl kvad víso þessa um aptaninn, áðr hann lagði til orosto:

Sekat ek Hrólfs or hendi,
 ne Hrollangi flúga
 dörr á dólga mengi,
 dugir oss fëdor hefua:
 enn í qvölld þar er kuyom
 at kerstraumi rómo
 þegiandi sitr þetta
 þórir Jarl á Mæri.

Þá geck Einar Jarl til Hálfðanar; hann reist örn á
 bak hönom vid þeima hætti, at hann lagdi sverdi
 á hol vid hrygginn, oc reist rifin öll ofan allt á
 lendar, oc dró þar út lúngun; var þat bani Hálf-
 ðanar. Þá qvad Einar:

Rekit hefi ec Rögnvallds; dauda,
 enn redo því Nornir;
 nú er fólk-stuðill fallinn
 at fiordungi mínom.
 Verpit snarpir sveinar!
 þvíat sigri ver ráðunk,
 skatt vel ec hönom hardan,
 at háfæto grióti.

Síðan tók Einar Jarl at ser Orkneyar sem fyrr hafði
 hann haft. Enn er tíðindi þessi spyriaz í Noreg,
 þá kunna þesso stórilla bræðor Hálfðanar, oc köl-
 lodo hefnda fyrir vert, oc margir sönnudu þat adrir.
 Enn er Einar Jarl spyr þetta, þá qvad hann:

Eru til míns fiörs margir
 menn of sannar deildir
 or ymissom áttom,
 ó-smábornir giarnir.
 Enn þó vito þeigi
 þat ádr mic hafa felldan
 hverr ilþorna arnar
 undir hlytr at lúta.

CAP. XXXII.

SÆTTHARALLDS KONUNGS OC
EINARS JARLS.

Haralldr konungr baud lidi út, oc dró saman her mikinn, oc fór sidan vestr til Orkneya. Enn er Einar Jarl spurdi, at Haralldr konungr var austan kominn; þá ferr hann yfir á nes. Þá kvad hann víso þessa:

Margr verdr sekr of sandi
seggr med fögro skeggi;
enn ec at úngs í eyom
allvallds sonar falli.
Hætt segja mer hölldar
vid hugfullan stilli;
Harallds hefi ec skard í skilldi,
scalat ugga þat, höggvit.

Þá fóro menn oc orðsendingar millom konungs oc Jarls; kom þá sva, at þar vard á komit steinulagi, oc finnaz þeir siálfir, oc festi þá Jarl allt í konungs dóm. Haralldr konungr dæmdi á hendur Einari Jarl, oc öllom Orkneyingom, at giallda LX marka gulls. Bondum þótti gialld ofmikit. þá baud Jarl þeim at hann mundi einn saman giallda, oc skylldi hann eignaz þá ódol öll í eyonom. þessu iátudo þeir allir, mest fyrir þá sök, at hinir snaudu áttu litlar iardir, enn hinir audgu hugduz mundu leysa sin ódol, þegar er þeir villdu; leysti Jarl allt gialldit vid konung; Fór konungr þá austr aptr um haustit; Var þat lengi sidan í Orkneyom, at Jarlar

átto ódol öll, allt þar til er Sigurdr Lödvisson gaf aptr ódulin.

CAP. XXXIII.

FALL GUTHORMS OC HÁLFÐANAR
HVÍTA, SONA HARALLDS
KONUNGS.

Guthormr sonr Harallds konungs hafði landvörn fyrir vikinni, oc fór hann með herscipom et ytra; enn er hann lá í Elfvar-kvíslom, þá kom þar Sölvi Klofi, oc lagði þegar til orosto við hann; þar feli Guthormr. Hálfðan Svarti oc Hálfðan Hvíti lögðu í hernaði, oc heriáðu um austrveg. Þeir átta orosto mikla á Eistlandi. Þar fell Hálfðan Hvíti.

CAP. XXXIV.

QVANFÁNG EIRÍKS KONUNGS.

Eiríkr Harallds son var at föstri með þóri Hersi Hroallds syni í Fiördum; hanom umni Haralldr konungr mest sona sinna, oc virði hann mest. Þá er Eiríkr var XII vetra gamall, fekk Haralldr konungr hönom V lánscip, oc fór hann í hernað, fyrst í Austrveg, oc þá suðr um Danmörk, oc um Frisland oc Saxland, oc dvalldiz í þeirri ferd IV vetur. Eftir þat fór hann vestr um haf, oc heriáði um Skotland, Bretland, Irland oc Valland, oc dvalldiz þar adra IV vetur. Eftir þat fór hann norðr á Finnsmörk,

oc allt til Biarmalands, oc átti hann þar orostu mikla, oc hafdi sigr. Þá er hann kom aptr á Finn-mörk, þá fundu menn hans í gamna einom konu eina, þá er þeir höfðu einga sed jamvæna; hun nefndiz fyrir þeim Gunnhilldr, oc sagdi at faðir hennar bió á Hálogalandi, er het Ötzorr Tóti. Ec hefi her verit til þess, segir hon, at nema kunnosto af Finn-
nom tveim, er her ero fróðastir á mörkinni: nú ero þeir farnir á veidar; enn báðir þeir vilja eiga mic; enn þeir ero sva visir, at þeir rekia spor sem hundar, bæði á þá oc á hiarni. Þeir kunna oc sva vel á skídom, at eigi má fordaz þá hvarki menn ne dyr; hvatki er þeir skióta til þá hæfa þeir; Sva hafa þeir fyrir komit hveriom manni, er her hefr komit í nánd; oc ef þeir verda reidir, snyz iord um fyrir siónum þeirra; enn ef nockot qvict verdr fyrir siónum þeirra, þá fellr dautt nidr. Nú megut þer fyrir engan mun verda á veg þeirra; mun ec fela ydr her í gammanom; skulut þer þá freista, ef ver sámdrepiþ þá; þeir þecktuþ þetta. Síðan fal hon þá; hon tók línseck einn, oc hugdo þeir at asca væri i; hon tók þat í hendi ser, oc seri því um gamman utan oc innan. Litlu síðar koma Finnar heim: þeir spyria hvat þar er komit; hon segir, at þar er ecki komit. Finnom þickir þat undarligt, þar er þeir höfðu rakit spor allt at gammanom, enn síðan finna þeir ecki. Þá gera þeir ser elld oc matbúa; enn er þeir voro mettir, þá byr Gunnhilldr reckio sína.

Enn

Enn sva hafði ádr farit III nætur, at Gunnhilldr hefir sofit, enn hverr þeirra hefir vakat yfir öðrum, fyrir abrydis sakir. Þá mælti hon til Finna: farit nú hegat, oc liggi á sína hlid mer hvarr yckarr. Þeir urdu þesso fegnir, oc gerdo sva: hun hellt sinni hendi um háls hvarunn þeirra; þeir sofna þegar, enn hun vegr þá; oc enn brálliga sofna þeir, oc sva fast, at hun fær varliga vakit þá; oc enn sofna þeir; oc fær hon þá fyrir engan mun vakit þá; oc þá setr hon þá upp, oc enn sofa þeir; hun tekr þá selbelgi tva mikla, oc steypir yfir höfud þeim, oc bindr at sterkliga fyrir nedan hendurnar: þá gerir hon bending konungs monnom, laupa þeir þá fram, oc bera vapn á Finna oc fá hláðit þeim, draga þá út or gammanom. Um nóttina eptir voro reidar-þrumur sva stórar, at þeir máttu hvergi fara. Enn at morni fóro þeir til skips, oc höfðu Gunnhilldi með ser, oc færdu hana Eiríki. Fóro þeir Eiríkr þá suðr til Hálogalandz; hann stefndi þá til sín Ötzori Tóta; Eiríkr segir, at hann vill fá dóttur hans; Ötzor iátti því: fær þá Eiríkr Gunnhilldar, oc hefir með ser suðr í land.

CAP. XXXV.

HARALLDR SKIPTIR RÍKI MED
SONUM SÍNUM.

Haralldr konungr var þá fimmtogr at alldri er synir hans voru margir rosenir, enn sumir daudir:

Þeir gerdoz þá margir ofstopa menn miklir innan-lands, oc voro siállir ósáttir. Þeir ráku af eignum Jarla konungs, enn suma drápu þeir. Haralldr konungr stefnir þá þing fiolment sudr í landi, oc baud til öllum Upplendingum: þá gaf hann sonom sínom öllum konunga nöfn, oc setti þat í lögoni, at hans ættmenn skyldo hverir konungdóm taka eptir födur sinn; enn Jarldóm sá er kvennsifr væri af hans ætt kominn. Hann skipti landi med þeim: Vingulmörk, Raumaríki, Vestfolld, þelamörk, þat gaf hann Olafi, Sigtryggvi, Fróða, þórgilsi; enn Heidmörk oc Gudbrandzdali gaf hann Dag oc Hring oc Ragnari; Snæfrídar sonum gaf han Hringaríki, Hadaland, þotn, oc þat er þar liggr til. Guthormi hafdi hann gefit til yfir-sócnar frá Elfi til Svínasunds, oc Ráuríki; hann hafdi hann sett til landvarnar austr vid landsenda, sem fyrr er ritat. Haralldr Konungr siálfr var optaz um mitt land. Rærekr oc Gudrödr voro iafnan innan hirdar med konungi, oc höfdo veizlor stórar um Hördaland oc Sogn. Eiríkr konungr var med Haralldi konungi fedr sínom; honum unni hann mest sona sinna, oc virði hann mest; hönom gaf hann Hálogaland, oc Nordmæri oc Raumsdal. Nordr í þrándheimi gaf hann yfir-sócn Hálfdani Svarta oc Hálfdani Hvíta oc Sigrödi; hann gaf sonom sínom í hverio þesso fylki hálfar tekior vid sic, oc þat med, at þeir skyldo sitia í hásæti, skör hærra enn Jarlar, enn skör lægra enn hann siálfr. Enn þat sæti ætladi ser hverr sona hans eptir hans dag, enn hann

siálfr ætladi þat Eiríki; enn þrændur ætlodo þat Hálf-dani Svarta; enn Víkverir oc Upplendingar unnu þeim best ríkis er þeim voro undir hendi. Af þesso vard mikít sundrþycki enn af nyo millom þeirra brædra. Enn með því at þeir þóttu hafa litit ríki, þá fóro þeir í hernad; sva sem sagt er, at Guthormr fell í Elfarqvíslom fyrir Sölva Klofa. Eptir þat tók Olafr við því ríki, er hann hafði haft. Hálfðan Hvíti fell á Eistlandi. Hálfðan Háleggr fell í Orkneyom. Þeim Þórgílsi oc Fróða gaf Haralldr konungr her-scip, oc fóro þeir í Vestrvíking, oc heriádo um Scot-land oc Bretland oc Írland: þeir eignodoz fyrst Nord-manna Dyflinni. Sva er sagt, at Fróða væri gefinn banadryckr; enn Þórgíls var lengi konungr yfir Dyflinni, oc var svikinn af Írom, oc fell þar

CAP. XXXVI.

DAUDI RÖGNVALDS RETTILBEINA.

Eiríkr Blóðöx ætladi at vera yfir-konungr allra brædra sinna, oc sva villði Haralldr konungr vera láta; voro þeir fedgar laungom á samt. Rögnvalldr Rettilbeini átti Hadaland; hann nam fiólkyngi, oc ger-diz seidmadr. Haralldi konungi þóttu illir seidmenn. Á Hörðalandi var sá seidmadr, er het Vitgeirr; Konungr sendi hanom ord, oc bad hann hætta seid: hann segir, oc qvad víso þessa:

þat er vá lítil
þótt ver síðim

karla börn
 oc kerlinga;
 er Rögnvalldr sídr
 Rettilbeini
 hródmögr Haralldz
 á Hadalandi.

Enn er Haralldr konungr heyrði þetta sagt, þá fór at hans ráði Eiríkr Blodöx til Upplanda, oc kom á Hadaland: hann brendi inni Rögnvalld bróður sinn med LXXX seidmanna, oc var þat verk lofat miök.

CAP. XXXVII.

FEIGD GUDRÖDAR HARALLDS SONAR.

Gudröda Liómi var um vetrinn med Þiódolfi í Hvini fóstorfödur sínom, á kynnis sócn, oc hafði skúto alscipada, oc villdi hann fara norðr á Rogaland. Þá lögduz á stormar miklir, enn Gudrödi var ant um ferd sína, oc let hann illa um dvölinu. Þá qvad Þiódólfr:

Farit er ádr fleya
 flatvöllr hedan batnar,
 verpr geitis vegr grióti,
 Gudrödr, um siá stóran:
 vindbysna skalltu vísi
 víðfrægr hedan bíða,
 verit med oss uns verði
 vedr, nú er brim fyrir Jadrí.

Gudrödr fór sem hann ætladi, hvat sem Þiódólfr mællti. Enn er þeir komo fyrir Jadar, þá kafði skipit undir þeim, oc letoz þar allir.

CAP. XXXVIII.

FALL BIARNAR KAUPMANS.

Biörn sonr Harallds konungs red þá fyrir Vestfold, oc sat optaz í Tunsbergi, enn var lítt í hernadi. Til Tunsbergs sóttu mïök kaupscip, bædi þar um vikina, oc nordan or landi, oc sunnan or Danmörk oc af Saxlandi. Biörn konungr átti oc kaupscip í ferdum til annara landa, oc afladi ser sva dyrgripa, eda annara fanga þeirra er hann þóttiz hafa þurfa. Brædur hans kölludo hann farmann eda kaupmann. Biörn var vitr madr ok vel stilltr, oc þótti vænn til höfðingia; hann feck ser gott kvanfang oc makliet; hann gat son er Guðrödr het. Eiríkr Blódöx kom or austrvegi med herscip oc lid mikit; hann beiddiz af Birni bróður sínum at taka við sköttum ok skyldum þeim er Haralldr konungr átti á Vestfold; enn hinn var ádr vandi, at Biörn færði sialfr konungi skatt, edr sendi menn med; villdi hann enn sva vera láta, oc villdi eigi af höndum greida; Enn Eiríkr þóttiz vista þurfa, oc tiallda oc dryckiar. Þeir brædor þreytto þetta med kappmælum, oc feck Eiríkr eigi at helldr, oc fór brott or bænom. Biörn fór oc brott or bænum um qvelldit, oc upp á Sæheim: Eiríkr hvarf aptr um nóttina eptir Birni, oc kom á Sæheim, er þeir Biörn sátu yfir dryckio. Eiríkr tók hús á þeim, enn þeir Biörn gengo út oc börduz. Þar fell Biörn oc mart manna med hönom. Eiríkr tók þar herfang mikit,

oc fór norðr í land. Þetta verk líkadi stórilla Víkverium, oc var Eiríkr þar miök úþockaðr. Fóru þau ord um, at Oláfr konungr mundi hefna Biarnar bróður síns, ef hönom giæfi færi á. Biörn konungr liggr í Farmanshaugi á Sæimi.

CAP. XXXIX.

SÆTT KONUNGA.

Eiríkr konungr fór um vetrinn eptir norðr á Mæri, oc tók veizlo í Sölva, fyrir innan Agdanes. Enn er þat spurdi Hálfðan Svarti, fór hann til með her, oc tók hús á þeim. Eiríkr svaf í útiscemmo, oc komz til scógar við fimta mann; enn þeir Hálfðan brendo upp bæinn, oc lid allt þat er inni var; kom Eiríkr á fund Harallds konungs með þessom tíðindom. Konungr varð þessu ákalliga reidr, oc samnadi her saman, oc fór á hendur þrændom; enn er þat spyr Hálfðan Svarti, þá bydr hann út lidi oc scipom, oc verdr allfiölmennr, oc lagdi út til Stads, fyrir innan Þórsbiörg. Haralldr konungr lá þá lidi síno út við Reinsletto. Fóro þá menn milli þeirra. Guthormr Sindri het einn göfígr madr; hann var þá í lidi með Hálfðani Svarta, enn fyrr hafði hann verit með Haralldi konungi, oc var hann ástvinr beggia þeirra. Guthormr var scállð mikill; hann hafði ort sitt qvæði um hvern þeirra fedga; þeir höfðo honom bodit laun fyrir, enn hann neitti, oc beiddiz at þeir skyldu veita hanom bæn eina; oc höfðo þeir því heitit. Hann fór þá á

fund Harallds konungs, oc bar sættarord millum þeirra, oc bad þá hvarntveggja þeirra bænar, oc þess at þeir skyldo sættaz. Enn konungar gerdo sva mikinn metnad hans, at af hans bæn sættoz þeir. Margir adrir göfgir menn fluttu þetta mál med hanom. Var þat at sætt, at Hálfðan skyldi hallda ríki öllu því er áðr hafði hann haft; skyldi hann oc láta óhætt við Eirík bróður sinn. Eptir þessi sögu orti Jorunn scálldmær nockur erendi í sendibit:

Haralldr frá ec Hálfðan spyrja
herdi brögd en lögdiz;
syniz svart-leikr reyni
síá bragr hinn Hárfagra.

CAP. XL.

FÆDDR HÁKON GÓDI.

Hákon Griótgardsson Hlada Jarl hafði alla yfir-sócn í þrandheimi, þá er Haralldr konungr var annar-stadar í landi, oc hafði Hákon mestan metnad í þrandalögom af konungi. Eptir fall Hákonar tók Sigurdr sonr hans ríki, oc gerdiz Jarl í þrandheimi; hann hafði atseto á Hlöðom. Med hanom fædduz upp synir Harallds konungs Hálfðan Svarti oc Sig-rödr; enn áðr voro þeir undir hendi Hákonar Jarls föður hans: þeir voro miök íafnalldrar synir Harallds oc Sigurdr. Sigurdr Jarl feck Bergliótar, dóttur þóris Jarls þegianda; módir hennar var Alöf Arbót, dóttir Harallds Hárfagra: Sigurdr Jarl var allra manna vítrastr. Enn er Haralldr konungr tók at

elldaz þá settiz hann optliga at stórbúum, er hann átti á Hördalandi, á Alrekstödom, edr á Sæimi, á Fitiom, edr á Útsteini, edr á Ögvalldsnesi í Körmt. Þá er Haralldr konungr var nær siörædum, gat hann son vid kono þeirri er þóra er nefnd Morstrstaung; hun var æscod ur Morstr; hun átti góða frændor, oc var í frændsemis tolo vid Hörða Kára: hun var kvinna mest oc hin fridasta: hun var köllut konungs ambátt. Voro þá margir þeir konongi lydscyldir, er vel voro ættbornir, bædi karlar oc konor. Sá var þá sidr um göfigra manna börn, at vanda menn miök til at ausa vatni, oc gefa nafn. Enn er at þeirri stundo kom, er þóro var ván, at hun mundi barn ala, þá villdi hun fara á fund Harallds konungs; han var þá norðr á Sæimi, enn hun var í Morstr; hun fór þá norðr á skipi Sigurdar Jarls. Þau lágo um nóttina vid land, þar ól þóra barn upp á hellunni vid bryggjuspord; þat var sveinbarn. Sigurdr Jarl iós sveininn vatni oc kalladi Hákon eftir fedur sínom Hákoní Hlada Jarli. Sá sveinn var snimma frídr oc mikill vexti, oc miök líkr födur sínom. Haralldr konungr let sveininn fylgia móður sinni, oc voro þau at konungs búum medan sveinnin var úngr

CAP. XLI.

ORDSENDING ADALSTEINS KONUNGS.

Adalsteinn het þá konungr í Englandi, er þá hafdi

nytekit við konungdómi; hann var kalladr hinn sigrsæli og hinn trúfasti. Hann sendi menn til Noregs á fund Harallds konungs, með þesskonar sending, at sendimadr geck fyrir konung; hann selr konungi sverd gullbúið með hiöllum og meðalkafla, og öll ungerd var búinn með gulli og silfri, og sett dyrligum gimsteinum. Sendimadrinn vendi sverds-hiöllumunum til konungsins, og mælti: her er sverd, er Adalsteinn konungr sendi þér og mælti, at þú skyldir við taka; Tok konungr meðalkaflann; og þegar mælti sendimadrinn: Nú toktu við sverdino, sem varr konungr villdi, og nú skaltu vera þegn hans, er þú toktu við sverdi hans. Haralldr konungr skildi nú at þetta var með spotti gert; enn hann villdi einskis neðas þegn vera: enn þó minntiz hann þess, sem hans hátt var, at hvert sinn er skiót æði edr reidi liöp á hann, at hann stillti sik fyrst, og let sva renna af sér reidina, og leit á sakar úreidr. Nú gerir hann enn sva, og bar þetta fyrir vini sína, og fiona þeir allir saman her ráð til, þat et fyrsta, at lata sendimenn heimfara úspillta.

CAP. XLII.

FERD HAUKS TIL ENGLANDS.

Annar sumar eptir sendi Haralldr konungr scip vestr til Englands á fund Adalsteins konungs, og feck til stýrimann Hauk Hábróc; hann vaðr kappi mikill, og hinn kiærtsi konungi: hann feck í hönd

hönom Hákon son sinn. Haukr fór þá vestr til Englands, oc fann konung í Lundunom. Þar var þá bod fyrir oc veizla virdulig. Haukr sagdi sínom mönnum, þá er þeir koma at höllinni, hvernog þeir skolo hátta inngongonni; segir, at sá skal sidarst útganga, er fyrst gengr inn, oc allir standa jamnfram fyrir bordinu, oc hverr þeirra hafa sverd á vinstri hlid, oc festa sva yfirhöfnina at eigi siái sverdit. Sídan ganga þeir inn í höllina; þeir voro XXX manna. Geck Haukr fyrir konung, och qvaddi hann; konungr bidr hann vel kominn. Þá tók Haukr sveininn Hákon, oc setr á kne Adalsteini konungi; konungr ser á sveininn, oc spyr Hauk, hví hann fer sva. Haukr segir: Haralldr konungr bad þik fóstura hönom ambáttar barn. Konungr vard reidr miök, oc greip til sverds, er var hiá hönom, oc brá, sva sem hann villdi drepa sveininn. Haukr mælti: knesett hefir þú hann nú, oc máttu myrda hann, ef þú vill; enn eigi muntu med því eyða öllom sonom Harallds konungs. Geck Haukr sidan út, oc allir hans menn, oc fara leid sína til scips, oc hallda í haf, er þeir voro at því búnir, oc komo aptr til Noregs á fund Harallds konungs, oc likadi hönom nú vel; þvíat þat er mál manna, at sá væri útignari, er ödrom fóstradi barn. I þvílíkum vidscriptum konunga fannz þat á, at hvarr þeirra vill vera meiri enn annarr, oc vard eigi misdeili gert tignar þeirra at helldr, fyrir þessar sakir; hvartveggi var yfirkonungr síns ríkis til daudadags.

CAP. XLIII.

SKÍRDR HÁKON ADALSTEINS FÓSTRI.

Adalsteinn konungr let skíra Hákon, oc kenna rétta trú, oc góða síðo med allsconar íþróttom. Adalsteinn konungr unni hönom sva mikít meira enn öllum frændom sínum; oc út í frá unni honom hver madr er hann kuuni: hann var síðan kalladr adalsteins Fóstri. Hann var hinn mesti íþróttamadr, meiri oc sterkari oc frídari, enn hver madr annara; hann var vitr madr oc ordsniallr, oc vel cristinn. Adalsteinn konungr gaf Hákoní sverd þat er hiölltín voro or gulli, oc medalkaslinn; enn brandrinn var þó betri: þar hió Hákon med kvernstein einn til augans; þat var síðan kallat kvernbitr. Þat sverd hefir best komit til Noregs; þat átti Hákon til dauðadags.

CAP. XLIV.

LEIDDR EIRÍKR TIL RÍKIS.

Haralldr konungr var þá áttædr at alldri; gerdiz hann þá þungfær, sva at hann þóttiz eigi mega fara yfir land, edr stiórna konungs málom. Þá leiddi hann Eirík son sinn til háætis sins, oc gaf hönom valld yfir landi öllo. Enn er þat spurdo adrir synir Harallds konungs, þá settiz Hálfðan Svarti í konungs háæti; tók hann þá til forráða allan þrándheim; hurfo at því ráði allir þrændir med hönom.

Eptir fall Biarnar kaupmans tók Olafr bródir hans ríki yfir Vestfold, oc til fósturs Guðröd son Biarnar. Tryggvi het sonr Olafs, oc voro þeir Guðröðr fóstbrædur, oc miök jafnalldra, oc bádir hinir esniligsto, oc atgeryimenn miklir. Tryggvi var hvernig manní meiri oc sterkari. Enn er Víkveriar spurdo, at Hördar höfðo tekit til yfirkonungs Eirík, þá tóko þeir Olaf til yfirkonungs í Víkinni, oc hellt hann því ríki; þetta líkadi Eiríki stórilla. Tveim vetrom síðar varð Hálsdan Svarti bráð dandr inn í Þrándheimi at veizlo nockorri, oc var þat mál manna, at Gunnhilldr konunga módir hefði keypt at siöl-kunnigri kono, at gera hönom bana-dryck. Eptir þat tóko Þrændir Sigröd til konungs.

CAP. XLV.

DAUDI HARALLDS KONUNGS.

Haralldr konungr lifdi III vetur síðan er hann hafði gefit Eiríki einvalld ríkis síns; var hann þá á Rogalandi, edr á Hördalandi, at stórbúum er hann átti. Eiríkr ok Gunnhilldr átto son er Haralldr konungr iós vatni, oc gaf nafn sitt; segir sva, at sá skyldi konungr vera eptir Eirík födur sinn. Haralldr konungr gipti flestar dætur sínar innanlands Jörlom sínom, oc ero þadan komnar miklar kynkvíslir. Haralldr konungr varð sótt dandr á Rogalandi, oc er hann heygdr á Haugum vid Karmtsund. I Haugasundi stendr nú kirkia, enn vid siölfan kir-

kiugardinn í útnordr er haugr Harallds konungs ens Hárfagra; enn fyrir vestan kirkiuna liggur legsteinn Harallds konungs, sá er lá yfir legi hans í hauginum, oc er steinninn hálfis fiórtanda fets lángr, oc nær II álna breidr. I midiom hanginom var leg Harallds konungs; þar var settr steinn annarr at höfði, enn annarr at fótom, oc lögd þar hellan á ofan; enn hlaðit grióti tveim megin utan undir. Þeir steinar standa nú þar í kyrkiugardinom, er þá voro í hauginom, oc nú var frá sagt. Sva segia fródir menn, at Haralldr hinn Hárfagri hafi verit allra manna fridastr synom, oc sterkastr oc mestr, hinn örvasti af fe, oc allvinsæll við sína menn; hann var hermadr mikill öndverda æfi; oc þyda menn þat nú at vitat hafi um tre þat et mikla, er móður hans syndiz í draumi, fyrir burds hans, er hinn nedsti lutr tresins var raudr sem blóð; enn þá var leggrinn upp frá fagr oc grænn, at þat iartegndi blóma ríkis hans; enn at ofanverdo var hvítt treit, þá syndiz þat, at hann mundi fá elli oc hæro; kvistir oc limar tresins bododo afqvæmi hans, er um allt land dreifdiz; oc af hans ætt hafa verit iafnan síðan konungar í Noregi.

CAP. XLVI.

FALL OLAFS OC SIGRÖDAR.

Eiríkr konungr tók allar tekior þær sem konungr átti um mitt land, inn næsta vetr eptir andlát Harallds konungs; enn Olafr austr um Vikina; enn Sigrödr bródir þeirra hafdi allt um þrændalög. Eiríki

líkadi þetta stórilla, oc fóro þau ord um, at hann mundi med styrk eptirleita við brædur sína, ef hann mætti fá einvalldsriki yfir landi öllu, sva sem fadir hans hafdi gefit hönom. Enn er Olafr oc Sigrödr spyria þetta, þá fara sendimenn milli þeirra; því næst gera þeir stefnolag sitt, oc ferr Sigrödr um várit austr til Víkur, oc finnaz þeir Olafr brædur í Tunsbergi, oc dvölldoz þar um hrid. Þat sama vár bydr Eiríkr út lidi miklu, oc scipom, oc snyr austr til Víkur. Eiríkr konungr feck radbyri sva mikit, at hann sigldi dag oc nótt, oc fór engi niösn fyrir hönom. Oc er hann kom til Tunsbergs, þá gengo þeir Olafr oc Sigrödr med lid sitt austr or bænum á breckuna, oc fylkto þar. Eiríkr hafdi lid miklu meira, oc feck hann sigr; enn þeir Olafr oc Sigrödr fello þar bádir, oc er þar haugr hvarstveggja þeirra á breckunni, sem þeir lágo fallnir. Eiríkr konungr fór þá um Víkina, oc lagdi undir sic, oc dvalldiz þar lengi um sumarit. Tryggvi oc Gudrödr flydo þá til Upplanda. Eiríkr var mikill madr oc fridr, sterkr oc hreystimadr mikill, hermadr mikill oc sigrsæll, ákafamadr í scapi, grimmr, úþydr oc fálátr. Gunnhilldr kona hans var kvenna fegrst; vitr oc margkunnig, gladmællt oc undirhyggjumadr mikill, oc hin grimmasta. Þau voro börn þeirra Eiríks konungs oc Gunnhilldar: Gamli var ellstr, þá Guthormr, Haralldr, Ragnfrödr, Ragnhilldr, Erlingr, Gudrödr, Sigurdr Sleva. Öll voro börn þeirra Eiríks fríd oc mannvæn.

IV.

SAGA HAKONAR GODA.

CAP. I.

HÁKON TIL KONUNGS TEKINN.

Hákon Adalsteins fóstri var þá á Englandi, er hann spurdi andlát Harallds konungs födur síns; bióz hann þá þegar til ferðar: feck Adalsteinn konungr hönom þá lid, oc góðan skipa kost, oc bió hans för allvegliga; oc kom hann um haustit til Noregs. Þá spurdi hann fall brædra sinna, oc þat med, at Eiríkr konungr var þá í Víkinni. Sigldi þá Hákon norðr til Þrándheims, oc fór á fund Sigurðar Hlada Jarls, er allra spekinga var mestr í Noregi, oc feck þar góðar viddökur, oc bundu þeir lag sitt saman. Het Hákon hönom miklo ríki, ef hann yrði konungr. Þá leto þeir stefna þing siölmennt, oc á þingino taladi Sigurðr Jarl af hendi Hákonar, oc baud bándom hann til konungs. Eptir þat stóð Hákon siálfr upp oc taladi; mællto þá tveir oc tveir sín í milli, at þar væri þá kominn Haralldr hinn Hárfagri, oc ordinn úngr í annat sinn. Hákon hafði þat upphaf sins máls, at hann beiddi bændor viddöko oc gefa ser konungs nafn; oc þat med, at veita ser fullting oc styrk til at hallda konungdóminom. Enn þar í mót baud hann þeim at gera alla bændur ódalborna,

oc gefa þeim ódol sín, er byggja. At þessu eyrin-
di vard rómr sva mikill, at allr bónda múgrinn æpti
oc kalladi, at þeir villdo hann til konungs taka, oc
var sva gert, at Þrændir tóku Hákon til konungs
um allt land, oc var þá Hákon XV vetra: tók hann
ser þá hird, oc fór yfir land. Þau tíðindi spurduz
á Upplönd, at Þrændir höfðu ser konung tekit slik-
an at öllu sem Haralldr hinn Hárfagri var, nema
þat skilldi, at Haralldr hafði allan lyd í landi áþiád,
enn þessi Hákon villdi hveriom manni gott, oc baud
aptr at gefa bændom ódol sín, þau er Haralldr ko-
nungr hafði af þeim tekit. Vid þau tíðindi urðu
allir gladir, oc sagði hverr öðrom: flaug þat sem
sino elldr allt austr til lands enda. Margir bændur
föro af Upplöndon, at hitta Hákon konung; sumir
sendu menn; sumir gerdu ordsendingar oc iartegnir;
enn allir til þess, at hans menn villdo geraz. Ko-
nungr tók því þacksamliga.

CAP II.

YFIRFERD HÁKONAR KONUNGS.

Hákon konungr fór öndordan vetr á Upplönd,
stefndi þar þing, oc dreif allt fólk á hans fund, þat
er komað mátti. Var hann þá till konungs tekinn
á öllum þingom: fór hann þá austr til Víkur: þar
komu til hans Tryggvi oc Gudrödr brædra-synir
hans, oc margir adrir er upptölldu harma sína, er
hlotiz

hlotiz höfdo af Eiríki konungi bróðor hans. Eiríks úvinsælld óx æ því meir, sem allir menn gerdo ser kærri við Hákon konung, oc helldr höfdo ser traust til at mæla sem þótti. Hákon konungr gaf konungs nafn Tryggva oc Guðrödi, oc ríki þat sem Haralldr konungr hafði gefit fedrum þeirra: Tryggva gaf hann Ránríki oc Vingulmörk; enn Guðrödi Vestfold. Enn fyrir því at þeir voro úngir oc bernscir, þá setti hann til göfga menn oc vitra, at ráða landi með þeim. Gaf hann þeim land með þeim scildaga, sem fyrr hafði verit, at þeir scylldi hafa helming scyllna oc scatta við hann. Fór Hákon konungr norðr til Þrándheims er varadi et efra um Upplönd.

CAP. III.

FERD EIRÍKS OR LANDI.

Hákon konungr dró saman her mikinn í Þrándheimi, er varadi, oc red til scipa. Víkveriar höfdo oc her mikinn úti, oc ætlodo til mótz við Hákon. Eiríkr konungr baud oc lidi út um mittland, oc varð hanom illt til lids, þvíat ríkismenn margir scutoz hönom, oc fóro til Hákonar. Enn er hann sá engi efni til mótsödo í móti her Hákonar, þá sigldi hann vestr um haf, með því lidi er hönom villdi fylgia. Fór hann fyrst til Orkneya, oc hafði þaðan með ser lid mikit. Síðan sigldi han suðr til Englandz, oc heriadi um Scotland, hvar sem hann

kom við land; hann heriadi og allt norðr um Eng-land. Adalsteinn Engla konungur sendi orð Eiríki, og bauð hánom at taka af sér ríki í Englandi; sagði sva, at Haralldr konungur faðir hans var mikill vin Adalsteins konungs, sva at hann villði þat virða við son hans. Fóro þá menn í millom þeirra konunganna, og sættuz á þat með einka málum, at Eiríkr konungur tók Norðimbraland at hallda af Adalsteini konungi; skyllði hann veria þar landit fyrir Dönom og öðrom víkingom. Eiríkr scyldi þá láta scíraz, og kona hans, og börn þeirra, og allt lid hans, þat er hönom hafði fylgt þáingat. Tók Eiríkr þenna kost: var hann þá scídr, og tók retta trú. Norðimbraland er kallat fíntungr Englands. Eiríkr hafði atsetu í Jorvík, þar sem menn segia at fyrr hafí settit Lodbrókar synir. Norðimbraland var mest bygt af Norðmönnum. Síðan er Lodbrókar synir unno landit, heriadu Danir og Norðmenn optliga þáingat, síðan er valld landsins hafði undan þeim gengit. Mörg heiti landsins ero þar gefin á Norræna túngo, Grímsbær og Hauksfliót og mörg önnor.

CAP. IV.

FALL EIRÍKS KONUNGS.

Eiríkr konungur hafði fiölmenni mikít um síc; héllt hann þar fiöllda Norðmanna, er austan hafði farít með hánom, og enn komo margir vinir hans síðan af Noregi. Enn er hann hafði land lítít, þá fór

hann íafnan í hernad á sumrom: hann heriadi um Scotland oc Sudreyar, Irland oc Bretland, oc afla-
di ser sva fiár. Adalsteinn konungr varð sóttendr,
þá hann hafði verit konungr XIV vetur, oc VIII
vikur oc III daga. Síðan var konungr í Englandi
Jatmundr bróðir hans, var hönom ecki um Nord-
menn; var Eiríkr konungr eigi í kærleikom við hann;
oc fóro þá þau ord um af Jatmundi konungi, at
hann mundi annan höfðingia setia yfir Nordimbra-
land. Enn er þat spurdi Eiríkr konungr, þá fór
hann í Vestryking, oc hafði or Orkneyum með ser
Arkel oc Erlend Jarla, sono Torf-Einars. Síðan
fór hann í Sudreyar, oc voro þar margir víkingar
oc herkonungar, oc redur til lids með Eiríkr kon-
ungi: hellt hann þá öllu líðino fyrst till Irlandz, oc
hafði þadan líd slíkt er hann feck. Síðan fór hann
till Bretlands, oc heriadi þar. Eptir þat sigldi hann
súdr undir England, oc heriadi þar sem í öðrom
stödom; enn allt líd flyði undan þar sem hann fór.
Oc með því at Eiríkr var hreystimadr mikill, oc
hafði her mikinn, þá treystiz hann sva vel líði síno,
at hann geck langt á land upp, oc heriadi, oc lei-
tadi eptir mönnom. Olafur het konungr sá, er Jat-
mundr konungr hafði þar sett til landvarnar; hann
dró saman her úvigan, oc fór á hendur Eiríki kon-
ungi, oc varð þar orosta mikil; fello miök Ensir-
menn; enn þar er einn fell, komo III af landi ofan
í stadinn; oc hinn efra luta dagsins snyr mannfal-
linu á hendur Nordmönnom, oc fellr þar mikit fólk.

Oc at lýctom þess dags fell Eiríkr konungr, oc V konungar med hanom. Þessir ero nefndir: Guthormr oc synir hans II, Ivar oc Hárekr: þar fell oc Sigurdr oc Rögnvalldr; þar fell oc Arnkell oc Erlendr, synir Torf-Einars. Þar vard oc allmikít mannfáll af Nordmönnom, enn þeir er undan komuz, fóro til Nordimbraland, oc sögdo Gunnhilldi oc sonom hennar þessi tíðindi.

CAP. V.

FERD GUNNHILLDAR SONA.

Enn er þau Gunnhilldr urdo þessa vör, at Eiríkr konungr var fallinn, oc hann hafdi ádr heriat land Englakonungs, þá þyckiaz þau vita, at þeim mun þar vera eigi fríðvænt. Búaz þau þá þegar í brott af Nordimbralandi, oc hafa scíp þau öll, er Eiríkr konungr hafdi átt, oc líd þat allt er þeim villdi fylgia, oc of lausafjár, er þar hafdi samandregiz í scöttom á Englandi; enn sumt hafdi fengiz í hernaði. Þau hallda lídi síno fyrst norðr til Orkneya, oc stadfestoz þar um hrið; þá var þar Jarl Þorfinnr Hausakliúfr, son Torf-Einars. Tóko þá synir Eiríks undir sic Orkneyar oc Hialltland, oc höfdo scatta af, oc sátu þar of vetrom, enn fóro í Vestrvíking á sumrom, oc heríodo um Scotland oc Irland. Þess getr Glumr Geirason:

Hafdi för til ferio
fróðr scáneyar góða

black ridandi bæka
 barnungr þadann farna.
 Rógeiso vaun ræsir
 ráðvandr á Scotlandi;
 sendi seggia kindar
 sverd bautin her gauti.

Dólgeiso rak dísar
 drott komi mörg á flóttu
 gunna vinur at gamni
 giódom Irscrar þjóðar.
 Follidar raud oc felldi
 Freyr í manna dreyra
 sunnr á sigr of hliðinn
 seggi mækis eggjar.

CAP. VI.

OROSTA Á JOTLANDI.

Hákon konungr, Adalsteins fóstri lagdi, undir sig allan Noreg, þá er Eiríkr konungr brodir hans hafði brott stockit. Hákon konungr sótti inn fyrsta vetr vestr í landi, eptir þat norðr í Þrándheim, oc sat þar. Enn fyrir þær sakir at eigi þótti frídvenliet, ef Eiríkr konungr leitadi vestan um haf med her siun, sat hann fyrir því med lid sitt um mitt land, í Firdafylki, eda Sogni, edr Hördalandi, eda Rogalandi. Hákon setti Sigurd Hlada-Jarl yfir öll Þrændalög, sva sem hann hafði fyrr haft, oc Hákon fadir hans, af Haralldi konungi enum Hárfagra. Enn er Hákon konungr spurdi fall Eiríks bróður sins, oc þat med, at synir hans höfdo eigi traust í Englandi, þá þótti hönum lítil ógn af þeim standa;

fór þá með lidi sínu á einu sumri austr í Vík. Í þann tíma heriðo Danir miök í Víkina, oc gerdu þar opt mikinn scada; Enn er þeir spurdu, at Hákon konungr var þar kominn með her mikinn, þá flyðu allir undan, sumir sudr til Jotlands edr Hallands; enn þeir er nær meir voro Hákon konungi stefndu út á hafit, oc sva sudr til Jotlands. Enn er Hákon konungr vard þessa var, þá sigldi hann eptir þeim öllum herinum. Enn er hann kom til Jotlands, heriar hann þar, enn er landsmenn urdu við þat varir, þá draga þeir her saman, oc vilia veria land sitt, oc ráða til orosta við Hákon konung. Vard þar orosta mikil; bardiz Hákon konungr sva diarfliga, at hann geck fyrir framan merki, oc hafði hverki hialm ne brynio. Hákon konungr hafði sigr, oc rak flóttu langt á land upp. Sva segir Guthormr Sindri í Hákonar drápe:

Bifröknum trad beckiar
 blá röst konungr árom
 mætr hlód milldingr jótom
 mistar nifs í drífo.
 Svan gædir rak síðan
 seiótt iálfadar flotta
 hrot gilia þar hylia
 hramn vins at mun sínom.

CAP. VII.

OROSTA Í EYRARSUNDI.

Síðan hellt Hákon konungr lidi síno sunnan til Selundar, oc leitadi víkinga; hann reri með II snecc-

kium fram í Eyrarsund: þar hitti hann XI víkinga-
sneckior, oc lagdi þegar til orostu við þá, oc lauk
sva, at hann hafði sigr, oc raud öll víkingascipin.
Sva segir Guthormr Sindri:

Almdrósar fór eisu
el runnr mörom sunnan
trióno tings á græna
tveim einum sel meina
þá er ellifu allar
allreidr Dana sceidar
val sendir raud vandar
viðfrægr at þat síðan.

CAP. VIII.

HERNADR HÁKONAR KONUNGS
Í DANMÖRK.

Eptir þat heriadi Hákon konungr víða um Selund
oc rænti mart fólk, enn drap sumt, enn sumt her-
tók hann, oc tók giöllð stór af sunum: feck þá en-
ga móttöðu. Síðan fór Hákon konungr austr fyrir
Scáneyar síðu, oc heriadi allt, oc tók giöllð oc scatta
af landino, oc drap alla víkinga, hvar sem hann
fann, bæði Dani oc Vindur. Fór hann allt austr
fyrir Gautland, oc heriadi þar, oc feck þar stór
giöllð af landino. Sva segir Guthormr Sindri:

Selund náði þá síðan
sócn hegr und sic leggja
vals oc Vinda frelsi
við Scáneyar síðu.
Seattgillda vann seylldir
scaut Jalfadar Gauta

gullskyflir vann giöflaztr
geir vedr í för þeirri.

Hákon konungr fór aptr um haustit með lid sitt oc hafði fengit úgrynni fiár; hann sat um vetrinn í Vikinni við áhlaupom, ef Danir edr Gautar gerdi þar.

CAP. IX.

FRÁ TRYGGVA KONUNGI.

Þat sama haust kom Tryggvi konungr, Olafs sonþ or vestrvíking; hafði hann þá ádr heriat um Írland oc Scotland. Um vórit fór Hákon konungr norðr í land, oc setti Tryggva konung bróður sinn yfir Víkina, at veria fyrir úfrídi, oc eignaz slíkt er hann mætti, af þeim löndom í Danmörko, er Hákon konungr hafði et fyrra sumarit scattgyllt. Sva segir Guthormr Sindri:

Oc sócn hattar setti
svellríóðr at því flíódi
Onars eiki græno
austr geðbæti hraustan:
þann er ádr frá Írom
íðvaðr of kom scídoni
salbrygdandi svegðis
svan vángs líði þángat.

CAP. X.

FRÁ GUNNHILLDAR SONOM.

Haralldr konungr Gormsson red þá fyrir Danmörko; hönom líkadi stórilla þat er Hákon konungr hafði heriat í ríki hans, oc fóro þau ord um, at

Dana konungr mundi hefnað vilia; enn þat varð þó ecki sva bráðliga. Enn er þetta spurdo Gunnhilldr oc synir hennar at úfridr var millom Danmerkor oc Noregs, þá byria þau ferd sína vestan; þau gipto Ragnhilldi dóttur Eiríks konungs Arnfinni, syni Þórfíðs Hausakliúfs. Settiz þá enn Þórfíðr Jarl at Orkneyom, er Eiríks synir fóro í brott. Gamli Eiríksson var þeirra nockoro ellri, oc var hann þó eigi roscinn madr. Eunn er Gunnhilldr kom til Danmerkur med sonom sínom, þá fór hun á fund Haralldskonungs, oc feck þar góðar vidtekiur. Feck Haralldr konungr þeim veizlor í ríki síno, sva miklar, at þau fengo vel halldit sic, oc menn sína; Enn hann tók til fósturs Haralld Eiríksson oc knesetti hann; fæddiz hann þar upp í hird Danakonungs. Sunir Eiríks synir fóro í hernad, þegar er þeir höfdo alldr til, oc öflodo ser fiár; þeir heriado um austrveg; þeir voro snemma menn fridir, oc fyrr roscnir at asli oc atgervi, enn vetra tali. Þess getr Glúmr Geira son í Gráfelldardrápo:

Austr-löndom fekz undir
allvalldr, sá er gaf skalldom,
hann feck gagu at gunni
gunn hörða lög mörgom;
slíðr túngr let syngia,
sverdleiks regin ferdir
sendi gramr at grundo
gullvarpadr snarpar.

Eiríks synir sneroz þá oc med her sinn norðr í Vikina, oc heriado þar, enn Tryggvi konungr haf-

di her úti, oc helld til mótz við þá, oc áttu þeir orostor margar, oc höfdo ymsir sigr; heriado Eiriks synir stundom í Vikina, enn Tryggvi stundom um Siáland oc Halland.

CAP. XI.

LUND OC LAGASETNING HÁKONAR
KONUNGS.

Þá er Hákon var konungr í Noregi, var fridr gódr með bændom oc kaupmönnum, sva at engi grandaði ödrom ne annars fe; þá var oc ár mikit bædi á siá oc á landi. Hákon konungr var allra manna gladastr oc málsniallastr oc lítillátaztr; hann var madr stórvitr, oc lagdi mikinn hug á lagasetning. Hann setti Gulaþings lög með ráði Þorleifs Spaka; hann setti oc Frostþings lög, með ráði Sigurðar Jarls, oc annara þrænda, þeirra er vitrastir voro. Enn Heidsævis lög hafði fyrst sett Hálfðan Svarti, sem fyrr er ritit.

CAP. XII.

FÆDDR HÁKON JARL HINN RÍKI.

Hákon konungr hafði Jólaveizlo í Þrándheimi; þessa veizlo hafði Sigurðr Jarl báit fyrir hanom á Lödom. Hina fyrsto Jóla-nótt ól Bergliót kona Jarls sveinbarn; Eptir um daginn iós Hákon konungr sveinn þann vatni, oc gaf nafn sitt, oc óx sveinn sá upp,

oc varð síðan ríkr madr oc göfgr, oc varð Jarl eptir Sigurð föðor sinn. Sigurðr Jarl var hinn kærsti vin Hákonar konungs.

CAP. XIII.

FRÁ EYSTEINI ILLA.

Eysteinn Upplendinga konungr, er sumir kalla hinn Ríka, enn sumir hinn Illa, hann heriadi í Þrándheim, oc lagði undir sic Eyna-fylki oc Sparbyggiafylki, oc setti þar yfir son sinn, er het Öundur, enn þrændir drápo hann. Eysteinn konungr fór annat sinn herför í Þrándheim, oc heriadi þá víða, oc lagði undir sic. Þá bauð hann þrændom, hvert þeir villdo heldr hafa at konungi þræl hans, er het Þórir Faxe, eða hund, er Saurr het; enn þeir kuro hundinn, þvíat þeir þóttu þá munda sialfráða vera. Þeir leto síða í hundinn þriggia manna vit, oc gó hann til tveggja orða, en mællti et þridia. Helsi var hanom gert oc víðiar af gulli oc silfri. Enn þegar er saurugt var, báro hirdmenn hans hann á höndom sér. Hásæti var hanom búit, oc hann sat á haugi sem konungr, oc bió í Eyonni ídri, oc hafði atseto, þar sem heitir Saurr haugr. Þat er sagt at hönom varð at bana, at vargar lögðu á hiörd hans, enn hirdmenn eggjodo hann at veria fe sitt; hann lióp af haugiom, oc fór móti vörgonom; enn þeir rífo hann þegar í sundr. Mörg undor önnor gerði Eysteinn konungr við þrændi. Af þeim hernadi oc

úfrid flydo margir höfðingar, oc mart fólk flydi ódol sín.

CAP. XIV.

BYGGING JAMTALANDS OC
HELSINGIALANDS.

Ketill Jamti, sonr Önnundar Jarls or Sparabúi, fór austr um Kiöl oc mikill mannfölldi med hönom, oc höfdo búferli sín med ser. Þeir ruddo markir, oc bygdo þar stór heröd; þat var síðan kallat Jamtaland. Sonarson Ketils var Þórir Helsingr; hann fór fyrir víga sakir af Jamtalandi, oc austr yfir markir þær er þar verda, oc bygdi þar, oc sótti þannog fiölldi manna med hanom; var þat kallat Helsingialand; gengr þat allt austr til sjávar. Helsingialand bygdo Svíar allt hit eystra med hafino. Enn er Haraldr konungr hinn Hárfagri ruddi ríki fyrir ser, þá stöck enn fyrir hanom fiölldi manna or landi, þrændir oc Naumdælir, oc gerdoz þá enn bygdir austr um Jamtaland, oc sumir fóro allt í Helsingialand. Helsingiar höfdo kaupferdir sínar til Sviþjóðar, oc voro þannog lydscylldir at öllo; enn Jamtur voro miök alls í millom, oc gaf þeim engi gaum, fyrr enn Hákon setti frid oc kaupferdir til Jamtaland, oc vingæddiz þar við ríkismenn. Þeir sóttu síðan austan á hans fund, oc iátodo hanom hlydni sinni oc scattgiöfom, oc gerdoz hans þegnar; þvíat þeir spurdo gott til hans: villdo þeir helldr þydaz

undir hans konungdóm, enn undir Svíakonung, þvíat þeir voro af Nordmanna æt komnir; enn hann setti þeim lög oc landsrett. Sva gerdo oc allir Helsingiar, þeir er æscadir voro um kiöl nordan.

CAP. XV.

KRISTNI-HALLD OC BODAN HÁKONAR
KONUNGS.

Hákon konungr var vel kristinn er hann kom í Noreg; enn fyrir því at þar var land allt heidit, oc blótscaþr mikill, oc stórmenni mart, en hann þóttiz lids þurfa miök, oc alþydo vinsælld, þá tók hann þat ráð, at fara leyniliga med kristniinni, heilt sunnodaga oc friádaga fösto, oc minning hinna stærsto hátida; hann setti þat í lögom, at hefja Jólahalld þann tíma sem kristnir menn, oc seyllði þá hverr madr eiga mælis öl, enn giallda fe ella, enn hallda heilaðt medan jólin ynniz; Enn ádr var Jólahalld heft Höggju nótt, þat var mids vetrar nótt, oc halldin þriggia náttu jól. Hann ætladi sva, er hann festiz í landino, oc hann hefði friálsliga undir sic lagt allt land, at hafa þá fram kristnibod. Hann gerdi sva fyrst, at hann lockadi þá menn, er hanom varo kærstir til kristni; kom sva med vinsælld hans, at miök margir leto scíraz, enn sumir leto af blótom. Hann sat laungom í Þrándheimi, þvíat þar var mestr styrkr landsins. Enn er Hákon konungr þóttiz fengit hafa styrk af nockorom ríkismönnom at hallda

upp kristniinni, þá sendi hann til Englands eptir biskupi og öðrum kennimönnum; og er þeir komu í Noreg, þá gerdi Hákon konungur þat bert, at hann villdi bióða kristni of land allt; enn Mærir og Rarundælir scuto þannog síno máli sem þrændir voro. Hákon konungur let þá vígia kirkior nockorar, og setti þar presta til. Enn er hann kom í þrándheim, þá stefndi hann þang við bændur, og baud þeim kristni. Þeir svara sva, at þeir vilja þesso máli scióta til Frosto-þings, og vilja þá at þar komi menn or öllum fylkiom, þeim sem ero í þrændalögom; segia at þá mæno þeir svara þesso vandmæli.

CAP. XVI.

FRÁ BLÓTOM.

Sigurdr Illada Jarl var hinn mesti blót-madr, og sva var Hákon fadir hans; hellt Sigurdr Jarl upp blót-veizlom öllum af hendi konungs, þar í þrændalögom. Þat var forn sidr, þá er blót scylldi vera, at allir bændur scylldo þar koma sem hof var, og flytia þannog föng sín, þau er þeir scylldo hafa meðan blótveizlan stóð. At veizlo þeirri scylldo allir menn öl eiga: þar var og drepinn allsconar smali, og sva hross; enn blót þat allt, er þar kom af, þat var kallat hlaut, enn hlautbollar þat er blóð þat stóð í; enn hlaut-teinar, þat var sva gert sem stöklar; með því scylldi rióða stallana öllo saman, og sva veggj hofsins utan og innan, og sva stöckva

hlautino á mennina; enn slátrit seyllði sióða til
 manufagnadar. Elldar seylldo vera á midio golfi í
 hofino, oc þar katiar yfir, oc seyllði full of elld
 bera. Enn sá er gerdi veizlona oc höfðingi var,
 þá seyllði hann signa fullit, oc allan blót-matinn;
 seyllði fyrst Odins full drecka til sigurs oc rikis
 konungi sínom; enn sidan Niardar full oc Freys full
 til árs oc fridar. Þá var mörgom mönnum títt at
 drecka þar næst Bragafull. Menn drucko oc full
 frænda sinna, þeirra er göfgir höfðo verit, oc voro
 þat minni köllot. Sigurdr Jarl var manna örvastr;
 hann gerdi þat verk, er frægt var miök, at hann
 gerdi mikla blótveizlo at Lödom, oc hellt einn upp
 öllom kostnadi. Þess getr Kormakr Ögmundar son
 í Sigurdar-drápo:

Hafit madr asc ne esci
 afspríng med ser þíngat
 se færanda at færa
 fæz velto god þíaza.
 Hver mani vess vid valldi
 vægia kind of bægiáz
 Þvíat fun rögni fagnar
 fens vá gramr til menía.

CAP. XVII.

ÞÍNG Á FROSTO.

HÁkon konungr kom til Frostþings, oc var þar
 komit allfölmennit af bændom. Enn er þíng var
 sett, þá taladi Hákon konungr; hefir þar fyrst, at
 þat væri bod hans oc bæn vid bændur oc búþegna,

ríka oc uríka, oc þar með við alla alþýdo, únga menn oc gamla, sælan oc vesælan, konor sem karla, at allir menn scylldo cristnaz láta, oc trúa á einn Gud, Christ Marioson, enn hafna blótum öllum, oc heidnom Godom, hallda heilact hinn VII hvern dag, við vinnom öllum, fasta oc hinn VII:da hvern dag. Enn þegar er konungr hafði þetta uppborit fyrir alþýdo, þá var þegar kur mikill, oc kurrudo bændor um þat, er konungr villdi vinnor taka af þeim, oc sva átrúnad, oc sogdo at við þat mátti landit eeki byggia, enn verka-lydr oc þrælar kölludo þat, at þeir mætti eigi vinna, ef þeir scylldo eigi mat hafa. Sögdo oc at þat var scaplöstr Hákonar konungs, oc födor hans, oc þeirra frænda, at þeir voro illir af mat sinom, þótt þeir væri milldir af gulli. Asbiörn af Medalhúsom or Gaulardal stód upp, oc svarar örendi konungs, oc mælti: þát hugdo ver bændor, Hákon konungr, segir hann, at þá er þú hafdir it fyrsta þing haft her í þrándheimi, oc hófom þic til konungs, oc þágom af þer ódol vor, at ver hefðim þá himin höndom tekit; enn nú vito ver eigi hvert helldr er, at ver munom frelsi þegit hafa, eda munto nú vilia þrælka oss af nyo með undarligom hætti, at ver manom hafna átrúnadi vorom, þeim er fedor vorir hafa haft fyrir oss, oc allt forrellri, fyrst um Bruna-ölld, oc nú um Hauga-ölld; oc hafa þeir verit miklo göfgari enn ver, oc hefir oss þó dugat þessi átrúnadr. Ver höfom lagt til ydar

sva

sva mikla ástúd, at ver höfom þic ráða látit med oss öllum lögum í landino, oc landsrett. Nú er þat vili var oc samþycki bondanna, at hallda þau lög sem þú settir oss her á Frostaþingi, oc veriátadom þer; viliom ver allir þer fylgia, oc þic til konungs hallda medan einnhverr vor er lífs bóndanna, þeirra er her ero nú á þingino, ef þú konungr villt nockot hóf vid hafa, at beida oss þess eins, er ver megom veita þer, oc oss se eigi ógeranda. Enn ef þu villt þetta mál taka med sva mikilli freko, at deila asli oc ofríki vid oss, þá höfom ver bændur gert ráð vort, at sciliaz allir vid þic, oc taka oss amnan höfðingia, þann er oss halldi til þess, at ver munim í frelsi hafa þann átrúnað sem oss er at scapi. Ná scalltu, konungr, kíosa of kosti þessa, ádr þing se slitit. At erindi þesso gerdo bændor róm mikinn, oc segia at þeir vilia sva vera láta, sem nu er sagt. Enn er hliód feckz, þá svarar Sigurdr Jarl: þat er vili Hákonar konungs, at samþyckia vid ydor, bændor, oc lata alldri scilia ydra vinatto. Bændor segia, at þeir vilia at konungr blóti til árs þeim oc fridar, sva sem fadir hans gerdi; stadnar þá kurrin, oc slita þeir þingino. Sidan taladi Sigurdr Jarl vid konung, oc bad hann ej nemaz med öllu at gera sem bændor villdo, segir at eigi mundi annat lyda, enn svegia til nockot vid bændor; er þetta, konungr, sem siálfir þer mattot heyra, vili oc ákafi höfðingia, oc þar med alls fólks. Sculo ver, konungr,

her finna til gott ráð nockot; oc samdið þat með þeim konungi oc Jarli.

CAP. XVIII.

BÆNDOR ÞREYNGIA HÁKONI TIL
BLÓTA

Um haustit at vetri var blótveizla á Lødom, oc sótti þar till konungr; hann hafði iafnan fyrr verit vanr, ef hann var staddr þar er blót voro, at mataz í litlo húsi við fá menn; enn bændor töldo at því, er hann sat eigi í háseti síno, þá er mestr var mann-sagnadr. Sagði Jarl, att hann scyllði eigi þá sva gera. Var þá sva, at konungr sat í háseti síno. Enn er it fyrsta full var skeinkt, þá mællti Sigurdr Jarl fyrir minni, oc signaði Oðni, oc drack af hornino till konungs. Konungr tók við, oc gerði kross-marc yfir; þá mællti Kár af Gritingi: Hví fer konungrinn nú sva; vill hann eigi enn blóta? Sigurdr Jarl svarar: Konungr gerir sva sem þeir gera allir er trúa á mátt sinn oc megin, oc signa full sitt þór, hann gerði hamars-marc yfir ádr hann drack; Var þar þá kyrt um qvældit. Eptir um daginn er menn gengo til borda, þá þusto bændor at konungi, sögdo at hann scyllði eta þá hrossa-slátr. Konungr villði þat fyrri engan mun: þá báðu þeir hann drecka sodit; hann villði þat eigi: þá báðu þeir hann eta flotit; hann villði þat oc eigi: oc hellt þá við atgöngo. Sigurdr Jarl villði sætta þá, oc bad

Þá letta storminom: oc bad hann konung gína yfir Ketil-höddona, er sodreykinn hafdi lagt upp af hrossa-slátrino, oc var smiörog haddan. Þá geck konungr till, oc brá lindúk um ketilhöddona, oc gein yfir, oc geck sídan til hásetis, oc líkadi hvarigom vel.

CAP. XIX.

BLÓTVEIZLA Á MÆRI.

Um vetrinn eptir var búit til Jóla-veizlo konungi inn á Mærinni. Enn er at leid jólonom, þá lögdo þeir stefno med ser VIII höfðingiar, er mest redo fyrir blótom í öllom þrændalögom. Þeir voro IV utan or þrándheimi: Kár af Grytingi, Asbiörn af Medalhúsom, Þórberg af Varnesi, Ormr af Lioko. Enn af Innþrændom: Blotólfr af Ölvishaugi, Narfi af Staf or Veradal, Þrandr Haka af Eggio, Þórir Skegg af Húsabæ í Eynni idri. Þessir VIII menn bundoz í því, at þeir IV af Utþrændom scylldo eyda kristindominom í Noregi, enn þeir IV af Innþrændom scylldo neyda konung til blóta. Utþrændir fóro IV scipom sudr á Mæri, oc drápo þar presta III oc brendo kirkior III, fóro aptr sídan. Enn er Hákon konungr oc Sigurdr Jarl komo inn á Mæri med hird sína, þá voro bændor þar komnir allfiölmenn. Hinn fyrsta dag at veizlonni þegar herdo bændor at konungi, oc bádo hann blóta, enn heto hanom afarkostom ella. Sigurdr Jarl bar þá sáttmál í millom þeirra, oc kemr

Þá sva at Hákon konungr át nockora bita af hrosslifor, drack hann oc þá öll minni krossalaust, þau er bændor skenktu hanom. Enn er veizlo þessari var lokit, fór konungr oc Jarl þegar út á Hladir. Var konungr allúkátr, oc bióz þegar í brott med öllo lidi sino or Þrándheimi, oc mællti sva, at hann scylldi fiölmennari koma í annat sinn í Þrándheim, oc giallda þá bændom þenna fiandscap, er þeir höfdo til hans gert. Sigurdr Jarl bad konung gefa þrændom þetta eigi at söc, segir sva, at konungi muni eigi þat duga at heitaz, edr heria á innanlandz fólk, þar sem mestr styrkr er landsins, sem í Þrándheimi var. Konungr var þá sva reidr, at ecki mátti ordom vid hann koma. Fór hanu í brott or Þrándheimi, oc sudr á Mæri, dvalldiz þar um vetrinn, oc á vorit fram. Enn er sumradi, dró hann lid at ser: Voro þau ord á, at hann mundi fara med her þann á hendor þrændom.

CAP. XX.

OROSTA Á ÖGVALLDSNESI.

Enn er Hákon konungr var á scip kominn, oc hafdi lid mikit; þá komo hanom þau tidindi sunnan or landi, at synir Eiríks konungs væro komnir sunnan af Danmörk í Vikina, oc þat med, at þeir höfdo ellt af scipom Tryggva konung Olafsson austr vid Sótanes; höfdo þeir þá víða heriat í Vikiinni, oc höfdo margir menn undir þá gengit. Enn er Hákon

konungr spurdi þessi tíðindi, þá þóttiz hann lids þurfa; sendi hann þá ord Sigurdi Jarli at koma til sín, oc sva öðrom höfðingiom, þeim er hanom var lids at ván. Sigurdr Jarl kom til Hákonar konungs oc hafði allmikil lid: voro þar þá allir þrændir, þeir er um vetrinn höfðo mest gengit at konunginóm, at pinda hann til blóta. Voro þeir þá allir í sætt teknir, af fortölom Sigurdar Jarls. Fór Hákon konungr þá sudr með landi. Enn er hann kom sudr um Stad, þá spurdi hann at Eiríks synir voro komnir á Nordr-Agdir; fóro þá hvarir í moti öðrom; vard fundr þeirra á Körmt: gengo þá hvarir tveggio af scipom, oc börðoz á Ögvalldsnesi: voro hvarirtveggio þá allhölmennir; var þar orosta mikil. Sótti Hákon konungr hart fram, oc var þar fyrir Guthormr konungr Eiríks son, með sína sveit, oc eigaz þeir höggva scipti við; þar fell Guthormr konungr, oc var merki hans nidrhöggvit; fell þar þá mart lid um hann. Því næst kom flótti í lid Eiríkssona, flyðo þeir til scipanna, oc rero í brótt, oc höfðo látit mikil lid. Þess getr Guthormr Sindri:

Valþögnir let vegnom
 víg nect saman bresta
 handar nafs of höfðom
 hlým millðingom gilldir.
 Þar geck niörðr af nirdi
 hadds há mána raddar
 valbrandz vidra landa
 vapnundadom sunda.

Hákon konungr fór til scipa sinna; oc hellt austr eptir Gunnhildar sonom: fóro þá hvarirtveggio sem

mest máttu, þar til er þeir komu á austr-Agdir. Þaðan sigldu Eiríks synir á haf, oc sudr til Jotlands. Þess getr Guthormr Sindri:

Alm drogur var ægis
 opt sinn þess ec minnumz
 barma ölld fyrir balldri
 bensícs vita ríkis.
 Bödsækir hellt bricar
 brædur síns oc rac flæda
 undan allar kindir
 Eirecks á haf sneckiom.

Síðan fór Hákon konungr norðr aptr till Noregs: enn Eiríks synir dvölldoz þá enn í Danmörk lánga hríd.

CAP. XXI.

LAGASETNING HAKONÁR KONUNGS.

Eptir þessa orosto setti Hákon konungr þat í lög-om um allt land með siá, oc sva langt á land upp, sem lax gengr ofarst í vatn, at hann scipadi allri bygd, oc scripti í scipreidor; enn hann scripti scipreidom í fylki. I hverio fylki var þá áqvædit, hverso mörg scip voro, edr hversso stór scylldi útgera or fylki hverio, þá er almenningr væri úti: oc scylldi almenningr vera scylldr út at gera, þegar er utlendr her væri í landi. Þat scylldi oc fylgia útboði því, at vita scylldi gera á hám fiöllum, sva at hvern mætti siá frá öðrom. Segja menn sva, at á VII nóttom fór herbodit frá enom synzta vita; í ena nörzto þinghá á Hálogalandi.

CAP. XXII.

FRÁ EIRÍKS SONOM.

Eiríks synir voro miök í hernadi í Austrvegi, enn stundom heriada þeir í Noregi, svo sem fyrr er ritat. Enn er Hákon konungr red Noregi, var þá oc árferd gód í landi, oc gódr fridr; hann var oc hinn vinsælazti. Þá er Hákon hafdi verit konungr í Noregi XX vetur, komo sunnan or Danmörko synir Eiríks, oc höfdo allmikit lid. Þat var mikit lid er þeim hafdi fylgt í hernadi, enn þó var miklo meiri Dana her, er Haralldr konungr Gormson hafdi fengit þeim í hendur; þeir fengu radbyri mikit oc sigldo út af Vendli, oc komo utan at Ögdum; höfdo sidan norðr med landi dag oc nótt. Enn vitom var eigi uppscotit fyrir þá söc, at sú var sidvenia at vitar fóro austan eptir landi; enn austr þar hafdi ecki ordit vart vid ferd þeirra. Þat bar oc enn til, at konungr hafdi vidrlög mikil, ef vitar væri rángt uppbornir, þeim mönnom er kunnir oc sannir urdo at því: fyrir þá söc, at herscip oc vikingar fóro um úteyar oc hugdo landsmenn, at þar mundo fara synir Eiríks; Var þá vitom rángt uppscotit, oc vard herlaup um land allt; Enn Eiríks synir fóro aptr til Danmörkor, oc höfdo engan Dana her haft, nema sitt lid. Enn stundom voro þat annarskonar víkingar. Vard Hákon konungr þesso miök reidr, er starf oc fekostnadr vard af þesso, enn ecki gagn. Bændor töldo oc at því fyrir sína hönd, er svo fór; oc var þessi

söc til, er engi niósn fór fyrir um ferð Eiríkssona, fyrr enn þeir komu norðr í Ulfasund; þeir lágo þar VII nætor, fór þá niósn et efra um eydit, oc norðr um Mæri. Enn Hákon konungr var þá á Sunnmæri, í ey þeirri er Fræði heitir, þar sem heitir Birkiströnd, at búi síno, oc hafði eigi lid nema hird sína oc bændor, þá er verit höfðo í bodi hans.

CAP. XXIII.

FRÁ AGLIULLSERC

Niósna-menn komu til Hákonar konungs, oc sögðu hanom at Eiríks synir voro með her mikinn fyrir sunnan Stad. Þá let hann kalla til sín þá menn er þar voro vitrastir, oc leitadi ráðs við þá, hvert hann scyllði beriaz við sono Eiríks, þótt lidsmunr se mikill, edr scyllði hann fara norðr undan, oc fá ser lid meira. Egill Ullserkr er nefndr bóndi einn er þar var; hann var þá gamladr miök, enn hafði verit meirí oc sterkari hvaríou manni, oc hinn mesti orosto madr; hann hafði lengi borit merki Harallds konungs hins Hárfagra. Egill svarar rædo konungs: var ec í nockorom orostom með Haralldi konungi fedor ydrom; bardiz hann stundom við meira lidi, stundom við minna; hafði hann iafnan sigr. Alldregi heyrda ec hann leita þess ráðs, at vinir hans scylldo kenna hönom at flya: manom ver oc eigi þer þat ráð kenna, konungr, þvíat ver þíckiomz eiga höfðingia röscvan: þer sculot oc eiga tra-

usta fylgdina af oss. Margir adrir studdo oc þá þetta mál, Konungr segir oc sva, at hann var þess fúsari, at beriaz med lid þat er tilfengiz. Var þat þá rádit; let konungr þá scera upp herör, oc senda alla vega frá ser, feck hann brátt mikit lid. Þá mællti Egill Ullserer: þat óttudunz ec of hríd, er fridr þessi hinn mikli var, at ec mundi verda ellidaudr inni á pall-stráim mínom, enn ec villda helldr falla í orosto, oc fylgia höfðingia mínom: kann nú oc vera, at sva megí verda, um þat er lykr.

CAP. XXIV.

OROSTA VID FRÆDARBERG.

Synir Eiríks helldo norðr um Stad, þegar er leidi gaf. Enn er þeir komo norðr um Stad, þá spyria þeir hvar Hákon konungr var, oc hallda til móts vid hann. Hákon konungr hafdi IX scíp; hann lagdiz norðr undir Frædarberg í Freyarsundi; enn Eiríks synir lögdo at fyrir sunnan bergit; þeir höfðo meir enn XX scíp. Hákon konungr sendi þeim ord, oc bad þá á land gánga, segir at hann hafdi þeim völl haslat á Rastar-kálfi; þar ero slettir vellir oc miklir, enn fyrir ofan gengr brecka laung oc helldr lág. Gengo Eiríks synir þá af scípom sínom, oc norðr yfir hálsinn, fyrir innan Frædarberg, oc sva fram á Rastarkálf. Þá mællti Egill til Hákonar konungs, bad hann fá ser X menn oc X merki. Konungr gordi sva. Gangr þá Egill med menn sína

upp undir breckuna; enn Hákon konungr geck upp á völlinn með lid sitt, setti upp merki, oc fylkti, oc segir sva: Ver sculom hafa fylking lánga, sva at þeir kringi eigi um oss, þótt þeir hafi lid meira; gerdo þeir oc sva: varð þar orostra mikil, oc en snarpasta sócn. Egill Ullserkr let þá setia upp merki þau X er hann hafdi, oc scipadi sva mönnum þeim er baro, at þeir scylldo gánga sem næstir breckonni, oc láta stundarhríð í millom hvars þeirra. Þeir gerdo sva, oc gengo fram með breckonni sem næst, sva sem þeir mundo vilia koma á bak þeim Eiríks sonom. Þat sá þeir er efstir stódo í fylking Eiríkssona, at merki mörg fóro ódfluga, oc gnæfo fyrir ofan breckuna, oc hugdo at þar mundi fylgia lid mikit, oc mundi vilia koma á bak þeim, oc milli scipanna. Gerdiz þar þá kall mikit, sagdi hverr ödrom hvat títt var: því næst kom flótti í lid þeirra. Enn er þat sá konungarnir þá flydo þeir. Hákon konungr sótti þá hart fram með sínom mönnum, oc ráko þeir flóttann oc felldo lid mikit.

CAP. XXV.

FRÁ GAMLA KONUNGI.

Gamli Eiríksson þá er hann kom upp á hálsinn fyrir ofan bergit, þá sneriz hann aptr, oc sá þá at ecki lid fór eptir þeim meira, enn þat er þeir höfdo ádr bariz vidr, oc þetta var prettr einn; þá let Gamli konungr blása herblástr, oc setia upp merki

sitt, oc scaut á fylking: hrfo at því allir Nordmenn, enn Danir flydo til scipanna. Enn er Hákon konungr oc hans lid kom þar at, þá varð þar orosta en snarpasta í annat sinn. Hafði þá Hákon konungr meira lid; lauk sva at Eiríks synir flydo: sóttu þeir þá sudr af hálsinom, enn sumt lid þeirra opadi sudr á bergit, oc fylgdi Hákon konungr þeim. Völlr slettr er austan af hálsinom, oc vestr á bergit, oc þá hamrar brattir vestr af. Þá opodo menn Gamla upp undan á bergit, enn Hákon konungr sótti at þeim sva snarp-liga, at hann drap suma, enn sumir liópo vestr af bergino, oc voro hvarirtveggio drepnir: oc scildiz Hákon konungr sva fremi við, er hverr madr var drepinn.

CAP. XXVI.

FALL GAMLA KONUNGS OC ULLSERCS.

Gamli Eiríksson flyði af hálsinom ofan á iöfno, fyrir sunnan bergit. Þá sneriz Gamli konungr enn í mót, oc hellt upp orosto: kom þá enn lid til hans. Þá komo oc allir bræðor hans með miklar sveitir. Egill Ullserer var þá fyrir Hákonar mönnom, oc veitti harda atgaungo, oc sciptoz þeir Gamli konungr höggom við; feck Gamli konungr sár stór, enn Egill fell, oc mart lid með hanom. Þá kom at Hákon konungr með þær sveitir er hönom höfðo fylgt; varð þá enn ny orosta. Sótti þá enn Hákon konungr hart fram, oc hió menn til beggia handa

ser, oc felldi hvern yfir annan. Sva segir Guthormr Sindri:

Hræddr fór hiörva raddar
 her fyrir málma þverri,
 rógeyso geck ræsir
 rádsterer frammar merkiom.
 Gerra gramr í snerro
 geir vífa ser hlífa
 hinn er yfirnu gat jöfra
 óds kváunar byr mána.

Eiríks synir sá menn sína alla vega falla fyrir ser; þá snúaz þeir á flótta til scipa sinna; enn þeir er fyrri höfdo flyit á scipin, þá höfdo þeir úthrundit sciponom, enn sum scipin voro þá uppi fiörot. Þá hliópo allir Eiríks synir á sund, oc þat lid er þeim fylgdi. Þar fell Gamli Eiríksson, enn adrir brædor hans nádo sciponom, oc helldo brott sídan med þat lid er eptir var, oc helldo sídan sudr til Danmörkor, oc dvölldoz þar um hríd, oc undo illa vid sína ferd.

CAP. XXVII.

HEYGDR EGILL ULLSERCR:

Hákon konungr tók þar scíp þau öll er uppi höfdo fíarat, er átt höfdo Eiríks synir, oc let draga á land upp; þar let Hákon konungr leggja Egill Ullserc í scíp, oc med hanom alla þá menn, er af þeirra lidi höfdo fallit, let bera þar at iörd oc griót. Hákon konungr let oc fleiri scíp uppsetia, oc bera á valinn, oc ser þá hauga enn fyrir sunnan Frædar:

berg. Eyvindr Skáldaspillir orti víso þessa, þá er Glumr Geirason hældiz í sinni víso um fall Hákonar konungs:

Fyrr raud Fenris varra
 flugvarr konungr sparra,
 málmhríðar svall meidom
 móðr í Gamla blóði.
 Þá er ústirfin arsa
 Eirícs oc rac geira
 nú tregr gæti gauta
 grams fall á síá alla.

Háver bautasteinar standa hiá hangi Egils Ullseres.

CAP. XXVIII.

HERSAGA TIL HÁKONAR KONUNGS.

Þá er Hákon konungr Adalsteins fóstri hafði verið konungr í Noregi XXVI vetor, sidan er Eiríkr bróðir hans fór or landi, þá varð þat til tíðinda, at Hákon konungr var staddr á Hördalandi, oc tók veizlo í Stord á Fitium; hafði hann þar hird sína oc bændor marga í bodi síno. Enn er konungr sat yfir Dagverdar bordi, þá sá varðmenn, er úti voro, at scip mörg sigldo sunnan, oc átto eigi langt til eyarinnar. Þá mællti hverr við annan, at segia scyllði konungi, at þeir hugdo, at her mundi at þeim fara; enn þat þótti engom dælt, at segia konungi hersögo; þvíat hann hafði þar mikit vidlagt, hveriom er þat gerdi. Enn þat þótti þo úgeranda, at konungr vissi eigi þetta. Þá gengr einnhvorr

Þeirra inn í stofna, oc bad Eyvind Finnsson gánga út með ser sciótt, segir at hin mesta naudsyn var á. Eyvindr geck þegar þannig, er siá mátti til scipanna; þá sá hann þegar, at þar fór her mikill; Geck aplr þegar í stofno, oc fyrir konung oc mælti: lítill er lídandi stund, enn laung matnáls stund. Konungr leit móti hanom, oc mælti: hvat ferr? Eyvindr qvad:

Blóðöxar tíá ee beida
bryn þings fetil stínga
oss geraz hnept ens hvassa
hefnendr seto efni:
helldr er vant, enn ee villda
veg þinn, konungr, segia,
farom til forura vapna
fliótt hersögo drottui.

Konungr segir: Erto sva góðr drengr, Eyvindr, at þú mant eigi hersögo segia, nema sönn se. Þá segia margir, at sú saga se sönn. Let þá konungr taka ofan bordin; geck hann þá út oc sá til scipanna, sá þeir þá at þat voro herscip. Konungr spyr þá menn sína, hvert ráð taka scylldi; hvert beriaz skuli með líd þar er þeir hafa, eda gánga til scipa, oc sigla norðr undan. Er oss þat audsætt, segir hann, at ver munom nú beriaz við lidsmon miklo meira, enn fyrr höfom ver átt, oc hefir oss þó iafnan þótt mikill misiafnadr lids vars þá er ver höfom orosto átt við sono Gunnhilddar. Menn veitto her eigi sciótan orscurd; þá svarar Eyvindr máli konungs:

Samira niördr enn norðar
 naeldregns hvötom þegni
 ver getom bili at bölvá
 hordmærar skæ færa:
 nú er þat er rekr á rakna
 rymleid flota breidan
 grípom ver í greipar
 gumubord Haralldr sunnan.

Konungr svarar: Raustliga er þetta mællt, Eyvindr, oc nær scaplyndi mino; enn þó vil ec heyra fleiri manna úrscurd of þetta mál. Enn er menn þóttos skilia hversu konungr villdi vera láta, þá svörudo margir, at helldr villdo falla med drengscap, enn flya fyrir Dönom, at úreyndo; sögdo at opt höfdo þeir sigr fengit, þá er þeir höfdo bariz vid minna lid. Konungr þackadi þeim vel ord sín, oc bad þá vapnaz; oc sva gera menn. Konungr steypir brynio á sic, oc gyrdir sic med sverdino kvernbít, setr á höfot ser hiálm gullrodinn, tekr kesio í hönd ser, oc sciölld á hlid. Þá scipar hann hirdinni í eina fylking, oc bóndom þar med, oc setti upp merki sín.

CAP. XXIX.

FRÁ FYLKINGU EIRÍKSSONA.

Haralldr konungr Eiríksson var þá höfdingi yfir þeim brædrom eptir fall Gamla: Þeir brædur höfdo þar her mikinn sunnan af Danmörk. Þar voro þá í lidi med þeim móðorbrædur þeirra, Eyvindr Screya oc Alfr Asemadr; þeir voro sterkir menn oc raustir, oc hinir mesto manndrápa menn. Eiríks

synir helldo scipom sínom til eyarinnar, oc gengo á land upp, oc fylkto, oc er sva sagt, at eigi væri minni lidsmunr, enn VI menn mundo vera um einn, at Eiriks synir mundo fiölmennari.

CAP XXX.

FRÁ FYLKINGO HÁKONAR KONUNGS.

Hákon, konungr hafdi þá fylkt lidi síno, oc segia menn sva, at hann steypti af ser brynionni, ádr orostan tókz. Sva segir Eyvindr Scálldaspillir í Hákonar málom (vid. vers. II. III. IV. Cap. XXXIII).

Hákon konungr valdi menn miök í hird med ser, at afli oc reysti, sva sem gört hafdi Haralldr konungr fadir hans. Þórálfr inn sterki Skolmsson var þar, oc geck á adra hlid konungi; hann hafdi hiálm oc sciöll, kesio oc sverd, þat er kallat var Fetbreidr. Þat var kallat, at þeir Hákon væri jammsterkir: Þess getr Þorðr Siáreksson, í drápo þeirri, er hann orti um Þórálfr:

Þar er böðhardir börðoz
bandz ió draugar landa,
lystr geck her til hiörva
hmitz, í Sterd á Fitiom:
Oc gymsleyngvir ganga
gífrs hlemána drífo
nausta blacs et næsta
Nordmannu gram þordi:

Enn er Fylkingar gengo saman, varð þar orosta hörd oc mannsæd. Enn er menn höfdo scotit spió-
tom

tom, þá brugdo menn sverdom, geck þá Hákon konungr, oc Þórálfr med hanom, fram um merkin, oc hiuggo til beggia handa. Sva segir Eyvindr Skálldaspillir i Hakonar málom. (vid. vers. V. VI. Cap. XXXII).

CAP. XXXI.

FALL EYVINDAR SKREYO OC ALFS ASKMANNS.

Hákon konungr var audkendr, meir enn adrir menn; lysti oc af hiálmum, er sólin skein á: var vapnaburdr mikill at hanom. Þá tók Eyvindr Finnsson hött, oc setti yfir hiálm konungs. Eyvindr Skreya kalladi þá hátt: leyniz Nordmanna konungr nú? edr hefir hann flyt, edr hvar er nú gullhiálmrinn? Eyvindr geck þá fram, oc Alfr bróðir hans med hanom, oc hiuggo til beggia handa, oc leto sem ódir eda galnir væri. Hákon konungr mælti hátt til Eyvindar: hallto sva fram stefnunni ef þá villt finna Nordmanna konung. Sva segir Eyvindr Skálldaspillir:

Badat valgrindar vinda
vedr heyandi Skreyo
gumnom hollr ne gulli
gesnar sinni stefno.
Ef sviþkenni svinnan
sigr minnigr villt finna,
fram hallto niótr at nytom
Nordmanna gram þannig.

Var þá oc scant at bíða, ádr Eyvindr kom þar oc reiddi upp sverdit, oc hió til konungs. Þórálfr scant vid hanom scildinom, oc stakradi Eyvindi vid: enn konungr tók sverdit kvernbit tveim höndom, oc hió til Eyvin-

dar ofan í hiálminn, oc klauf hiálminn oc höfudit allt í herdar nidr. Þá drap Þórálfr Alf Asmann. Sva segir Eyvindr Skalldaspillir:

Veit ec at beit hinn bitri
byggving medal dyggvan
búlca scíds or bádom
benvöndr konungs höndom.
Ufælinn klauf ála
eldraugr scarar hauga
gullhiólltödom galltar
grandrádr Dana brandi.

Eptir fall þeirra brædra geck Hákon konungr sva hart fram, at þá hröck allt fólk fyrir hanom. Slær þá í lid Eiríks sona, felmt oc flóttu því næst: enn Hákon konungr var í öndverdri sinni fylkingo, oc fylgdi fast flóttamönnom, oc hió titt oc hart: þá faug ör ein, er fleinn er kalldr, oc kom í handlegg Hákonu konungi, upp í músina, fyrir nedan öxl. Oc er þat margra manna sögn, at scósveinn Gunnhilldar, sá er Kispingr er nefndr, lióp fram í þysinom, oc kalladi: gefit rúm konungs bananom, oc scaut fleininom til Hákonar konungs. Enn sumir segia, at engi viti hvern scaut: má þat oc vel vera, þvíat örvar oc spiót oc allskonar scotvopn flugo sva þyckt, sem drífa. Fiölldi manns fell af Eiríks sonom, bædi á vigvellingom, oc á leid til scipanna, oc sva í fiörunni; oc fiölldi lióp á kaf. Margt komz á scipin, allir Eiríks synir, oc rero þegar undar, enn Hákonar menn eptir þeim. Sva segir Þorðr Siáreksson:

Vardi varga myrdir
vitt, sva skal fríd slíta

iöfor villdot þann elldaz,
 öndvert fólk at löndom.
 Starf hófz upp þar er aifi
 ótta vanr á flótta
 gulls, enn grainr var fallinn,
 Gunnhilldar kom sunnan.

Þrótt var synt þar er settoz
 sinn róðrs vid þröm stinnan,
 madr let önd oc annarr,
 ófár búendr sárir.
 Afreks veit þat er iöfri
 allríkr í styr slikom
 göndlar niördr sá er gerdi
 geck næst, lugins drecko.

CAP. XXXII.

DAUDI HAKONAR KONUNGS.

Hákon konungr geck út á skeid sína, let þá binda sár sitt, enn þar rann blód sva mikit, at eigi feck stöðvat. Oc er áleid dag, þá úmætti konung. Segir hann þá mönnom sínom, at hann vill fara norðr á Alrekstadi, til bús síns. Enn er þeir komo norðr at Hákonarhello, þá lögdo þeir þar at, oc var þá konungr nær lifláti; kalladi hann þá til sín vini sína, oc segir þeim skipan þá er hann vill gera of ríkit; hann átti dóttor eina barna, er Þóra er nefnd, oc eingan son; hann bad þá senda þau ord Eiríks sonom, at þeir scylldo konungar vera yfir landi; enn hann bad af þeim vincta vinom sínom oc frændom. Enn þótt mer verdi lífs audit, segir hann, þá man ec af landi fara til kristinna manna, oc

bæta þat er ec hefi brotit við Guð: Enn ef ec dey her í heidni, þá veiti mér her grópt þann er yðr syniz. Litlu síðar andadiz Hákon konungr, þar á hellunni, sem hann hafði fæddr verit. Hákon konungr var sva miök harmadr, at bæði vinir oc lívinir greto dauda hans, oc kölludo at eigi mundi íafn-góðr konungr koma aptr í Noreg. Vinir hans flutto lík hans norðr á Sæheim á Norðrhördaland, oc urpo þar haug mikinn, oc lögdo þar í konung með alvæpni sitt, oc hinn besta búnað sinn, enn eeki fe annat. Mællto þeir sva fyrir grepti hans, sem heidinna manna var síðr til; oc vísodo honum til Valhallar.

CAP. XXXIII.

HÁKONAR-MÁL.

Eyvindr Skalldaspillir orti qvæði eitt um fall Hákonar konungs, oc sva þat, hversu hönom var fagnat í Valhöll; þat ero köllot Hákonar-mál, oc er þetta Upphaf:

I. Göndol oe Seögol
sendi Gauta Tyr
at kíosa of konunga,
hverr Yngva ættar
scyllði með Odni fara,
í Valhöll at vera.

II. Bróðor fundo þar Biarnar
í brynio fara,
konung hinn kóstsama
kominn und gnuofána;

drupdo dólgar,
enn darrar hristiz,
upp var þá
hilldr of hafin.

III. Met á Hólmrygi,
sá er her kallar,
Jarla einbani,
fór til orosto.
Gott hafði hinn gjöfli
gengi Nordmanna,
ægir Ey-dana,
stód und ár hiálmi.

IV. Hrandz or hervádom,
hratt á völl brynio,
vísi verdungar,
ádr til vígs tæki.
Lek við liódmögo,
scylldi land veria,
gramr hinn gladværi
stód und gull-hiálmi.

V. Sva beit þá sverd
or Siklings hendi
vadir vafadar
sem í vatn brygdi.
Brökodo broddar,
brotnodo scildir,
glumrudo glym-ríngar
í gotna hansom.

VI Tröddoz törgor
fyrir tys oc bauga
hiallta hardfótom
hausar Nordmanna.
Róma vard í eyo,
rudo konungar
scírar scialldborgir
í scatna blódi.

VII. Brunnno ben-elldar
 í blóðgom undom;
 luto langbardar
 at lyda fiörvi.
 Svarradi sár gýmir
 á sverdanesi;
 fell flód fleina
 í fiöro Stordar.

VIII. Blendoz við roðnar
 und randar himni,
 Scöglar vedr leko
 við seys um bauga;
 umdo odd-lár
 í Odins vedri,
 hneig mart manna
 fyrir mækis strauði.

IX. Sáto þá döglingar
 með sverd um togin,
 með scarda sciölldo
 oc scotnar brynior;
 vara sá her í hugom
 er átti til Val-hallar vega,

X. Gondol þat mælti,
 studdiz geir scapti:
 vex nú gengi Goda,
 er Hákoní hafa
 með her mikiinn
 heim bönd of bodit:

XI. Vísir þat heyrdi
 hvat Valkyrrior mæltu
 mærar af mars baki:
 hyggiliga leto,
 oc hiálmadar sáto
 oc höfðoz hlifar fyrir.

XII. Hví þú sva gunni (qvad Hákon)
 sciptir Geirscögol,

varom þó verdir gagns fra Godom;
 Ver því völdom (qvad Scögol)
 er þú velli hellz,
 enn þinir standr flugo.

XIII. Ríða ver nu sculom,
 (qvad hin ríka Scögol)
 græna heima Góða,
 Odni at segia
 at nú mun allvalldr koma
 oc hann siálfan at síá.

XIV. Hermódr oc Bragi
 (qvad Hropta Tyr)
 gángit í gögn grami;
 þvíat konungr ferr,
 sá er kappi þyckir,
 til hallar hinnig.

XV. Ræsir þat mælti;
 var frá rómo kominn,
 stöð allr í dræra drifinn:
 illúdigr miök
 þickir oss Odinn vera
 síám ver hans of hugi.

XVI. Einheria grid
 skallt þú allra hafa,
 þigg þú at Asom öl;
 Jarla bægi,
 þú átt inni her
 átta brædor, (qvad Bragi.)

XVII. Gerdar várar
 (qvad hinn góði konungr)
 vilíom ver síálfir hafa:
 hiálm oc brynio
 skal hirda vel;
 gott er til geirs at taka.


XVIII. Þá þat kyndiz;
 hve sá konungr hafði

vel of þyrmt veom,
er Hákon bádo
heilán koma
ráð öll oc regin.

XIX. Gódo dægri verdr
sá granur of borinn,
er ser getr slíkan sefa;
hans alldar
æ mun vera
at gódo getit.

XX. Man ó-bundinn
á yta siót
Fenris-úlfr of fara,
ádr jafn-gódr
á auda tröð
konung madr komi.

XXI. Deyr fe,
deya frændor,
eydiz land oc lád:
siti Hákon
med heidin god:
mörg er þíód of þiád.



V.

SAGA AF HARALLDI KON- UNGI GRAFELLD OC HA- KONI JARLI SIGUD- AR SYNI.

CAP. I.

FRÁ UPPHAFI EIRIKS SONA, OC EYVIND SKALLDASPILLI.

Eiríks synir tóko þá konungdóm yfir Noregi, síðan er Hákon konungr var fallinn: var Haraldr mest fyrir þeim bræðrum at virðing, oc hann var ellztr þeirra er þá lifdo. Gunhildr módir þeirra hafði miök landráð med þeim; hon var köllot konungamódir. Þá voro höfðingar í landino, Tryggvi Olafsson austr í landi, oc Gudrodr Biarnarson á Vestfold, Sigurdr Hlada Jarl í þrándheimi: enn Gunnhildar synir höfdo mittland hinn fyrsta vetr. Þá fóro ord oc sendimenn milli Gunnhildarsona, oc þeirra Tryggva oc Gudrodar, oc var þar allt mælt til sætta, at þeir scylldo hafa þvilikan lut ríkis af Gunnhildar sonom, sem þeir höfdo ádr haft af Ha-

koni konungi. Glúmr Geirason er madr nefndr, hann var scálld Harallds konungs, oc reysti-madr mikill; hann orti víso þessa eptir fall Hákonar konungs:

Vel hefir hefnt, en hafna
 hiörs ben draugar fiörvi
 folkrackr of vant fylkir
 framliæt, Haralldr Gamla.
 Er döckvalir drecka
 dölg brands, fyrir ver handan
 rodinn frá oc raudra benia
 reyr, Hákonar dreyra.

Þessi vísa vard allkær. Enn er þetta spyr Eyvindr Finusson, qvad hann víso, er fyrr er ritin: .

Fyrr rand Fenris varra &c. (Cap. XXVII. Sag.
 Hakon. God.)

Var sú vísa oc miök flutt. Enn er þat spyrr Haralldr konungr, þá gaf hann þat Eyvindi at dauda sök, allt til þess er vinir þeirra sætlo þá, med því at Eyvindr scylldi geraz scálld hans, sva sem hann hafdi ádr verit scálld Hákonar konungs. Var frændsemi þeirri mikil, sva at Gunnhilldr var módir Eyvindar, dóttir Hálfðanar Jarls; enn módir hennar var Ingibiörg, dóttir Harallds konungs ens Hárfagra. Þá orti Eyvindir víso um Haralld konung:

Lítt qváo þic láta
 landvördr er brast Hörda
 brynio hágl í beniom
 buggoz álmar, ged fálma.
 Þá er úfolgiun ylgjar
 endr or þinni hendi
 Fetla svell til fyllar
 full egg, Haralldr, gullo.

Gunnhilldar synir sátu mest um mitt land, þvíat bæði þótti þat eigi trúlikt, at sitia undir hendi þrændom, edr Vikveriom, er mestir höfðu verit vinnir Hákonar konungs; enn Stórmenni mart var í hvaromtveggja stad. Þá fóru menn með sættarbodum í milli þeirra Gunnhildar sona oc Sigurdar Jarls; þvíat þeir fengu engar scylldir ádr or þrándheimi, oc varð þat at lyktom, at þeir gerðu sætt sína konungar oc Jarl, oc bundu þat swardögom. Seyldi Sigurdr Jarl hafa ríki slíkt af þeim í þrándheimi, sem hann hafði fyrr haft af Hákonu konungi; voru þeir þá sáttir kalladir. Allir synir Gunnhildar voru kalladir menn sínkir, oc var þat mælt, at þeir fæli lausa fé í iördo. Um þat orti Eyvindr Skallaspil-ir víso:

Bárom ullr of alla
ímon lauks á hanka
fiöllom Fyrisvalla
fræ Hákonar æsi.
Nú hefir Fólks-strídir Fróða,
fáglyadra þya
melldr í móður holldi
mello dólgs of fólginu.

Oc enn:

Fyllar scein á fiöllom
fallsól braa vallar
ullar kiöls of allan
alldr Hákonar scáldom.
Nú er álfrödoll elfar
jötna dólgs of fólginu,
ráð ero ramrar þjóðar
rík, í móður líki.

Þá er Haralldr konungr spyurdi um vísor þessar satt, þá sendi hann ord Eyvindi at hann scyldi koma á sinn fund. Enn er Eyvindr kom á konungs fund, þá bar konungr sakar á hann, oc kalladi hann vera úvin sinn, oc samir þer þat illa, segir han, at veita mer útrúnat, þviat þú hefir ádr gerzt minn madr. Þá qvad Eyvindr víso:

Einu drottinn hefi ec áttan,
jöfr dyrr, enn þic fyrri,
bellr braguingr elli,
bid ec eigi mer ens þridia.
Trúr var ec tiggia dyrom,
tveim sciölldom lek ec alldri,
fylli ec flokk þinn stillir,
fells á höud mer elli.

Haralldr konungr let Eyvind festa ser fyrir mál þetta sinn dóm. Eyvindr átti gullhring mikinn oc góðan, er kalladr var Molldi; hann hafdi verit tekinn laungo ádr or iördo; hring þann segir konungr at hann vill hafa, oc var þá eigi annarr kostr á. Þá qvad Eyvindr:

Skyllða ec skeria folldar
scídrennandi síðan
þursa bæs fyrir þvísa
þinn góðan byr finna.
Er valiardar verdom
veliandi, þer selia
lyngva mens þat er lengi
láttr, minn fadír átti.

För þá Eyvindr heim, oc er eigi þess getit, at hann finði Haralld konung síðan.

CAP. II.

FRÁ GUNNHILLDAR SONOM OC CRISTNI-
HALLDI ÞEIRRA.

Gunnhillðar synir tóko cristni á Englandi, sem fyrr var rítt; enn er þeir komo til forráða í Noregi, þá fengo þeir eigi áleidis komit at cristna menn í landino; enn allt þar er þeir komo því við, þá bruto þeir nidr hof, oc spillto blótum, oc fengo af því mikla úvinátto. Var þat brátt á þeirra dögum, at árterð spilltiz í landino, þvíat konungar voro margir, oc hafði hverr þeirra hird um sic; þurftu þeir mikils við oc um kostnad, oc voro þeir inir fegiörnztu. Enn ecki helldo þeir miök lög þau er Hákon konungr hafði sett, nema þat er þeim þótti fellt. Þeir voro allir hinir friduztu menn, sterkir oc stórir, iþrottamenn miklir. Sva segir Glúmr Geirason í drápo þeirri er hann orti um Haralld Gunnhillðarson:

Kunni XII sá er tanna
tíðom hallin-scíða
ógnar stafr of iðfra
iþróttir fram sótti.

Optliga fóro þeir bræðor allir saman, enn stundom ser hverr: þeir voro menn grimmir oc raustir, oro-sto-menn miklir, oc miök sigrsælir.

CAP. III.

RÁÐAGIÖRD GUNNHILLDAR OC SONA
HENNAR.

Gunnhillðr konungamódir oc synir hennar voro

opt á tali oc málstefnom, oc redo landrádom. Oc eitt sinn spyr Gunnhilldr sono sína: hvernig ætli þer at láta fara um ríki í Þrándheimi? þer berit konunga nöfn, sva sem fyrr höfdo haft lánǵfedgar ydrir, enn þer hafit lítit lid oc land, oc erot margir til scriptis. Vikina austr hafa þeir Tryggvi oc Gudrödr, oc hafa þeir þar nockora tiltölo, fyrir ættar sakir. Enn Sigurdr Jarl rædr einn fyrir öllum Þrándalögom, oc veit oc eigi hver scylda ber till þess, at láta Jarl einn ráða ríki sva miklo undan ydr. Þycki mer þat undarliçt, er þer farit hvert sumar í viking á önnor lönd, enn látit Jarl innanlands taka af ydr födor-leifd ydra. Lítit mundi Haralldi konungi þyckia, er þú ert eptir heitinn, födor-föдор þínom, at setia Jarl einn af ríki oc lífi, er hann vann allan Noreg undir sic, oc red síðan til elli. Haralldr svarar: þat er eigi sva módir, sagdi hann, audvellt, at taka Sigurdr Jarl af lífdögom, sem at skera kid eda kálf; Sigurdr Jarl er ættstór oc frændmargr, vinsæll oc vitr; vætti ec, ef hann spyr at sönno, at hann á úfridar van af oss, þá ero þar allir þrændir sem hann er. Eigo ver þar þá ecki erindi nema illt eitt. Lítz mer sva sem engom varom brædra þycki tryggt, at sitia undir hendi þeim Þrándom. Þá segir Gunnhilldr: ver skulom þá fara allt annan veg med varo rádi, gera oss minna fyrir. Haralldr oc Erlingr skulo sitia í haust á Nordmæri, má ec oc fara med ydr: skulo ver þá öll saman freista hvat atsysliz. Nú gera þau á þessa leid.

CAP. IV. .

RÁDAGERD GUNNHILLDAR SONA OC
GRIÓTGARDS.

Bródir Sigurdar Jarls het Griótgardr; hann var yngri miklo þeirra, oc virdr minna, hafði hann oc eigi tignar-nafn; enn hann hellt þó sveit, oc var í víking á sumrom, oc feck ser fiár. Haralldr konungr sendi menn inn í þrándheim á fund Sigurdar Jarls, med vingiöfom oc vinmælom. Sendimenn sögdo, at Haralldr konungr vill leggja við hann þvilika vinátto, sem ádr hafði Hákon konungr haft við Sigurd Jarl. Þat fyllgdi oc ordsendingo, at Jarl scyllði koma á fund Harallds konungs, scylldo þeir þá binda at fullo vinátto sina. Sigurdr Jarl tók vel sendimönnom oc vinátto konungs, enn segir at hann mátti eigi fara á fund konungs fyrir fiölscylldom sínom: enn sendi konungi vingiafir oc ord góð oc blid í móti vinátto hans; Fóro sendimenn í brott. Þeir fóro oc á fund Griótgards, oc flutto til hans et sama erindi, vinátto Harallds konungs oc heim-bod, oc þar med góðar giafir. Enn er sendimenn fóro heim, þá het Griótgardr ferd sinni: oc at á-qvednom degi kemr Griótgardr á fund Harallds konungs oc Gunnhilldar; var þar við hönom tekit all-feginsamliga. Var hann þar hafdr í enom mistom kærleikom, sva at Griótgardr var hafdr við einka mál, oc marga leynda luti: kemr þar nidr, at sú ræða var uppi höfd til Sigurdar Jarls, sem þau höf-

do ádr samit konungr oc drottning: töldo þau fyrir Griótgardi, hverso Sigurdr Jarl hafði hann lengi lítinn mann gervan; eðr hvert hann mundi vilja fara at Jarli med þeim bræðrom. Enn ef hann vildi vera í þesso ræði med þeim, þá segir konungr, at Griótgardr scyllði vera Jarl hans, oc hafa ríki þat allt er ádr hafði Sigurdr Jarl haft: kom sva, at þau sömdu þetta med einka málom, at Griótgardr scyllði hallda niösn til, nær líkaz væri at veita atferdr Sigurdi Jarli, oc gera þá ord Haralldi konungi. Fór þá Griótgardr heim vid sva búit, oc þá góðar gíafir af konungi.

CAP. V.

BRENNA SIGURDAR JARLS.

Sigurdr Jarl fór um haustit inn í Stióradal, oc var þar á veizlom; þadan fór hann út á Oglo, oc scyllði þar taka veizlor. Jarl hafði íafnan mikit siölmenni med ser, þvíat hann trúði illa konungom. Enn med því, at þá höfdo farit vinátto mál med þeim Haralldi konungi, þá hafði hann nú ecki mikla sveit manna. Griótgardr gerdi þá niösn Harallds konungs, at eigi mundi í annat sinn vænna at fara at Jarli; oc þegar á sömo nótt fóro þeir konungarnir Haralldr oc Erlingr inn eptir þrándheimi, oc höfdo scip IV oc lid mikit; sigla inn um nóttina vid stiörnoliós; kom þá Griótgardr til móts vid þá; komo þeir

Þeir ofanverda nótt á Oglo, þar sem sigurdr Jarl var á veizlo. Þeir lögdo þar elld í hús, oc brendo bæinn, oc Jarl inni, með öllo lidi sino; fóro braut þegar árdegis um morguninn, út eptir firði, oc sva sudr á Mæri, oc dvölldoz þar lánga hríd.

CAP. VI.

UPPHAF HÁKONAR JARLS SIGURDAR
SONAR.

Hákon sonr Sigurdar Jarls, var þá inn í Þrándheimi, er hann spurdi þessi tíðindi. Var þegar herhlaup mikit um allan Þrándheim; var þar á vatn dregit hvert scíp, er herfært var. Enn er her sá kom saman, þá tóko þeir til Jarls oc höfðingia yfir lidit Hákon, son Sigurdar Jarls: helldo þeir lidi því út eptir Þrándheimi. Enn er þetta spyria Gunnhildar synir, þá fara þeir sudr í Raumsdal, oc á Sunnmæri; hallda þá hvarir niósnon til annara. Sigurdr Jarl var drepinn II vetrom eptir fall Hákonar konungs. Eyvindr Skálldaspillir segir sva í Háleygia-tali:

Oc Sigurd hinn
er svönöm veitti
hróca biór
haddingia vals,
farma tys
fiörvi næmðo
jardráðendor
á Ogloe.

Oc ödlingr
 í ölon iardar
 álnar orms
 ófælinn vard
 lífs of lattr;
 þar er landrecar
 Tys áttung
 í trygd sviko.

Hákon Jarl hellt Þrándheimi með styrk frænda sinna þrjá vetr, sva at Gunnhilldar synir fengo engar tekior í Þrándheimi. Hákon átti margar orostor vid Gunnhilldar syni, oc drapoz marga menn fyrir hvaromtveggjom. Þess getr Einar Skálaglam í Velleklo, er hann orti um Hákon Jarl:

Oc oddneytir úti
 eidvandr flota breidan,
 gladr í Göndlar vedrom
 gamr svafdi bil, hafdi.
 Oc rand mána reynir
 rógsegl Hedins bóga
 upphóf iöfra kappi
 etio lund at setia.

Oc enn qvad hann:

Varat of byriar örva
 odda vífs ne drífo
 sverda sverri fiardar
 svan glyadi at frya.
 Brak-rögnir scók bogna
 barg óþyrmir varga
 hagi or Hlackar seglom
 hiörs racliga fiörvi.

Mart vard el ádr ála
 austr lönd at mun banda
 randar lauks af ríki
 ræki lundr of tæki.

Enn getr Einar, hvernog Hákon Jarl hefndi födor síns:

Ber ec ferir hefnd þá er hrafna
hljóms lof toginn scióma
þat nam vörðr at vinna
vann síns födor hrauna.

Rígið hiðrs af hersa
hrídremmis fiör víða
þrimlundr ofiðe þundi
þegns gnótt oc menn regni.
Oc halldvidr höllda
haf Faxa let vaxa
lausu vedr at lifom
lifkölld Hárs í drífo.

Eptir þetta fóro milli beggia vinir, oc báro sættar-ord milli þeirra, þvíat bændom leiddiz hernadr oc úfridr innanlands; oc kemr sva med ráði vitra manna, at sætt var görr milli þeirra, sva at Hákon Jarl scyllði hafa þvíliðt ríki í Þrándheimi, sem hafði Sigurdr Jarl fadir hans; enn konungar scylldo hafa þvíliðt ríki, sem Hákon konungr hafði haft fyrir þeim, oc var þat þá bundit fullom trúnadi. Þá gerðiz kærleikr mikill med þeim Hákon Jarli, oc Gunnhillði, oc stundom beittoz þau velrædom; leid sva fram adra III vetor; sat þá Hákon um kyrt í ríki síno.

CAP. VII.

FRÁ GRÁFELLD.

Haralldr konungr sat optaz á Hördalandi oc Rogalandi, oc sva þeir fleiri brædor; þeir sátu optliga

í Hardangri. Þat var á einu sumri, at hafscip kom af Islandi, er átto Islenskir menn; þat var hláðit af varar-felldom, oc helldo þeir scipino til Hardangrs, þvíat þeir spurdo at þar var fiölmenni mest fyrir. Enn er menn komu til kaupa við þá, þá villdi engi kaupa varar-felldina. Þá fer stýrimadr á fund Harallds konungs, þvíat hönom var hann ádr málkunnigr, oc segir hanom til þessa vandræða. Konungr segir at hann mun koma til þeirra, oc hann gerir sva. Haralldr konungr var madr lítillátr, oc gledimadr mikill; hann kom með scúto alscipa, oc leit á varning þeirra, oc mællti við stýrimann: villto gefa mér einn gráfelldinn? Giarna, segir stýrimadr, þett fleiri væri. Þá tók konungr einn gráfelldinn, oc sciðti sic; síðan geck hann ofan í sciútuna. Enn ádr þeir rero í brott, hafði hver hans manna felld keyptan. Fám dögum síðar kom þar sva mart manna þeirra, er hver villdi felld kaupa, at eigi fengo hálsfir þeir er hafa villdo. Síðan var hann kalladr Haralldr Gráfelldr.

CAP. VIII.

FÆDDR EIRÍKR JARL.

Hákon Jarl fór einn vetr til Upplanda, oc á nokkora gisting; þá vard sá atburdr, at hann lagðiz með kono einni, oc var sú litillar ættar. Enn þá er þadan lido stundir, geck sú kona með barnir; enn er barn þat var alit, var þat sveinn, oc var

vatni ausinn, oc kalladr Eiríkr. Módirin flutti sveininn til Hákonar Jarls, oc segir at hann var fadri-
 ríinn. Jarl let sveininn uppfædaz med manni þeim er
 kalladr var Þórleifr hinn Spaki; hann bió upp í
 Medaldal; hann var ríkr madr oc audigr, oc vin
 mikill Jarls. Var Eiríkr brátt manuvænn, hinn frí-
 dasti synom, mikill oc sterkr snemma. Jarl let fátt
 um til hans. Hákon Jarl var allra manna fríðastr
 synom, ecki hárr madr, vel sterkr, oc íþróttamadr
 mikill, spakr at viti, oc hermadr hinn mesti.

CAP. IX.

DRÁP TRYGGVA KONUNGS.

Þat var á eino hausti at Hákon Jarl fór til Upplanda;
 enn er hann kom út á Heidmörk, þá kemr þar í
 móti hönom Tryggvi konungr Olafsson, oc Gudrödr
 konungr Biarnarson, þar kom oc Dala-Gudbrandr.
 Þeir átto stefnolag med ser, oc sátu lengi á einmæli,
 enn þat kom upp, at hverr þeirra scylldi vera vin
 annars, oc scilíaz síðan; fór hverr heim til síns rí-
 kis. Þetta spyr Gunnhíldr oc synir hennar, oc er
 þeim grunr á, at þeir muni hafa gert landráð noc-
 kor vid konungana; tala þau optliga sín á milli.
 Enn er varadi, þá lysa þeir Haralldr konungr oc Gud-
 rödr konungr bródir hans því, at þeir mano fara í
 viking um sumarit vestr um haf, edr í austrveg, sem
 þeir voro vanir. Þá draga þeir lid at ser, oc hrin-
 da scipom á vatn, oc búaz síðan. Enn er þeir drucko
 brottferdar-öl sitt, þá voro dryckior miklar, oc mart

mællt við dryckinn; þá kom þar er mannjafnadr varð, og þá var rætt um konunga siálfa. Mællti maðr, at Haralldr konungr væri framastr þeirra bræðra at öllum lutom. Því reiddiz Guðröðr konungr miök, segir sva, at hann skal í engo hafa minna lut, enn Haralldr; segir, at hann er búinn at þeir reyni þat. Var þá brátt hvarrtveggi þeirra reidr, sva at hvarr bauð öðrom til vigs, og liópo til vappa. Enn þeir er vitrir voro, og miðr drucknir, stöðvado þá, og liópo í milli þeirra; Fóro þá hvarir til scipa sinna, enn engi var van þá, at þeir mætti allir saman fara. Sigldi þá Guðröðr austr með landi, enn Haralldr stefndi til hafs út, og sagði at hann mundi sigla vestr um haf. Enn er hann kom út um eyar, þá stefndi hann austr með landi hafleid. Guðröðr konungr sigldi þiódleid austr til vikor, og sva austr yfir Follidina. Þá sendi hann Tryggva konungi ord, at hann scyllði koma til móts við hann og færi þeir bádir um sumarit í austrveg at heria. Tryggvi konungr tók því vel og líkliga; hann spurði at Guðröðr konungr hafði lítit lid; fór þá Tryggvi konungr á fund hans með eina scúto. Þeir funnoz fyrir austan Sótanes við Veggina. Enn er þeir gengo á málstefno, þá liópo at menn Guðröðar konungs, og drápo Tryggva konung, og XII menn með hannom; og liggr hann þar sem nú er kallað Tryggva hrer.

CAP. X.

FALL GUÐRÖÐAR KONUNGS.

Haralldr konungr sigldi miök útleid; hann stefndi

inn í Vikina, oc kom um nótt til Tunsberg, þá spurdi hann at Gudrödr var á veizlo þar scamt upp á land. Fóro þeir Haralldr konungr upp þannog, komo þar um nóttina, oc taka hús á þeim. Þeir Gudrödr konungr ganga út; vard þar skömm vidr-taka, ádr Gudrödr konungr fell, oc mart manna med hanom. Ferr þá Haralldr konungr í brott til fundar vid Gudrödr konung bródir sinn, leggja þeir þá undir sic Vikina alla.

CAP. XI.

FRÁ HARALLDI GRENSKA.

Gudrödr konungr Biarnarson hafdi ser fengit gott qvanfång oc maklið: þau átto son er Haralldr het; hann var sendr til fósturs upp á Grenland til Hróa ens Hvita, lendsmanns; son Hróa var Hrani hinn Vidförli; voro þeir Haralldr miök iafnalldrar oc fóst-brædor. Eptir fall Gudrödar födor síns flydi Haralldr, er kalladr var hinn Grensci, fyrst til Upplanda, oc med hönom Hrani fostbródir hans, oc fáir menn med þeim; dvalldiz Haralldr þar um hrid med frændom sínom. Eiríks synir leitodo miök eptir þeim mönnum, er í söcom voro bundnir vid þá, oc þeim öllom mest, er þeim var uppreistar af ván. Þat redo Haralldi frændor hans oc vinir, at hann færi or landi í brott. Haralldr Grensci fór þá austr til Sviþíódar, oc leitadi ser scipanar, at koma ser í sveit med þeim mönnum, er í hernad fóro at alla

ser fiár: Haralldr var hinn gerviligsti madr. Tosti het madr í Svíþjóð, er einn var ríkastr oc göfgastr í því landi, þeirra, er eigi bæri tignarnafn. Hann var hinn mesti hermadr, oc var laungom í hernadi; hann var kalladr Scöglar-Tosti. Haralldr Grensci kom ser þar í sveit, oc var med Scöglar-Tosta um sumarit í víkingo, oc virdiz Haralldr hveriom manni vel. Haralldr var eptir um vetrinn med Tosta. Haralldr hafdi verit II vetor á Upplöndom, enn V vetor med Tosta. Sigrídr het dóttir Tosta, úng oc fríd, oc svarkr mikill; hun var síðan gipt Eiríki Sviakonungi inom Sigrsæla, oc var þeirra son Olafr Sænski, er síðan var konungr í Svíþjóð. Eiríkr konungr vard sóttdaur at Uppsölom, X vetrom síðar enn Styrbiörn fell.

CAP. XII.

HERNADR HÁKONAR JARLS.

Gunnhilldar synir budo út lidi miklo or Víkinni, fara sva norðr med landi, oc hafa lid oc scip or hverio fylki. Gera þeir þá bert, at þeir mano her þeim stefna norðr til Þrándheims á hendor Hákon Jarli. Þessi tíðindi spyr Jarlinn, oc samnar her saman, oc rædr til scipa. Enn er hann spyr til hers Gunnhilldar-sona, hversu mikinn þeir hafa, þá helldr hann lidi síno sudr á Mæri, oc heriar allt þar er hann fór, oc drap mikit mannfólk, bædi ríka oc úríka. Síðan sendi hann aptr til Þrándheims

bóanda-lidit allt; enn hann fór herscilldi um Mæri hvaratveggio, oc Raumsdal, oc hafði niósnir allt fyrir sunnan Stad um her Gunnhilldarsona; oc er hann spurdi, at þeir voro komnir í Fiördo, oc bido byriar at sigla norðr um Stad, þá sigldi Hákon Jarl nordan fyrir Stad útleid, sva at ecki sá af landi segl hans; let sva gánga hafleidis austr með landi, oc kom fram í Danmörk; sigldi þá í austrveg, oc heriadi þar um sumarit. Gunnhilldar synir helldo lidi síno norðr til Þrándheims, oc dvölldoz þar miök lengi um sumarit; tóko þar skatta alla oc skylldir. Enn er áleid sumarit þá settoz þar eptir Sigurdr Sleva oc Gudrödr, enn Haralldr oc adrir þeir bræðor fóro austr í land, oc leidangurs lid þat er farit hafði með þeim um sumarit.

CAP. XIII.

FRÁ HÁKONI JARLI OC GUNNHILLDAR SONOM

Hákon Jarl fór um haustit til Helsingialands, oc setti þar upp scip sín, fór síðan landveg um Helsingialand oc Jamtaland, oc sva austan um Kiöl ofan í Þrándheim: dreif þegar lid mikit til hans, oc red hann til scipa. Enn er þat spyria Gunnhilldar synir, þá stíga þeir á scip sín, oc hallda út eptir firði; enn Hákon Jarl fer út á Hladir, oc sat þar um vetrinn; enn Gunnhilldar synir sátu á Mæri, oc veitto hvarir ödrom árásir, oc drápoz menn fyrir. Hákon Jarl hellt ríki síno í Þrándheimi, oc var þar optaz á vetrom, enn fór á sumrom stundom austr

á Helsingialand, oc tók þar scip sín, oc fór í austrveg, oc heriadi þar á sumrom. Enn stundom sat hann í Þrándheimi, oc hafði her úti, oc helldoz þá Gunnhilldar synir eigi fyrir nordan Stad.

CAP. XIV.

DRÁP SIGURDAR SLEFO.

Haralldr Gráfelldr fór á eino sumri med her sinn norðr til Biarmalands, oc heriadi þar, oc átti orosto mikla við Biarma á Vinobacka; þar hafði Haralldr konungr sigr, oc drap mart fólk: heriadi þá víða um landit, oc feck ofa mikit fe. Þess getr Glúmr Geirason:

Austr raud iöfra þrystir
ordrackr fyrir by nordan
brand, þar er Biarmscar kindir
breunanda sá ec renna.
Gott hlaut gumna sættir,
geirvedr í för þeirri
ödlingi fecz úngom,
ord á Vínobordi.

Sigurðr konungr Slefá kom til búss Klyps hersis, hann var son Þórdar Hörða-Kárasonar; hann var ríkr madr oc kynstór. Klyppr var þá eigi heima, enn Alof kona hans tók vel við konungi, oc var þar veizla góð, oc dryckior miklar. Alof var Asbiarnar dóttir, systir Jarnsceggja, nordan af Yriom. Hreidar var bróðir Asbiarnar, fadur Styrkars, födur Endrida, födur Einars Þambascelfis. Konungr geck um nóttina til hvílo Alofar, oc lá þar at úvilja hennar;

síðan fór konungr í brott. Eptir um haustit fóro þeir Haralldr konungr oc Sigurdr bródir hans upp á Vörs, oc stefndo þar þing vid bændor. Enn á þingino veitto bændor þeim atför, oc villdo drepa þá, enn þeir komoz undan, oc fóro í brott síðan. Fór Haralldr konungr í Hardánger, enn Sigurdr konungr fór á Alreccstadi. Enn er þat spyrr Klyppr hersir, þá heimtaz þeir saman frændor, oc veita atferd konungi, oc var höfðingi fyrir lidino Vemundr Völubriótr. Enn er þeir koma á bæinn, veita þeir konungi atsócn; er sva sagt, at Klyppr lagdi konung med sverdi í gögnom, oc vard þat bani hans. Enn þegar í stad drap Erlingr Gamli Klypp.

CAP. XV.

FALL GRIÓTGARDS.

Haralldr konungr Gráfelldr oc Gudrödr konungr bródir hans draga saman her mikinn austan or landi, oc helldo lidi því norðr til þrándheims. Enn er þat spyrr Hákon Jarl, samnadi hann lidi at ser, oc hellt sudr á Mæri oc heriar. Þá var þar Griótgardr födor-bródir hans, oc scylldi hafa landvörn af Gunnhildar sonom; hann baud her út, sva sem konungar höfdo ord tilsent. Hákon Jarl hellt til fundar vid hann, oc til bardaga: þar fell Griótgardr, oc II Jarlar med hanom, oc mart lid annat. Þess getr Einar Scálaglaminn:

Hialm grapi vann hilmir
hardr lopz vinar barda

Því kom vöxtr í Vín
 Vínheims fiandor sína.
 At forsniallir fello
 furs íþrottar scíðrom
 Þat fær þjóðar snytri
 Þrír Jarís synir, tírar.

Síðan sigldi Hákon Jarl út til hafs, oc sva útleid; sudr med landi: hann kom fram sudr í Danmörk, oc fór á fund Harallds Gormsonar Dana konungs; fær þar góðar vidtökor; dvalldiz med hanom um vetrinn. Þá var oc med Dana konungi madr sá er Haralldr het; hann var sonr Knúts Gormssonar, bróðorson Harallds konungs: hann var kominn or viking, hafdi lengi heriat, oc fengit þar of lausafjár; hann var kalladr Gull-Haralldr; hann þótti vel til kominn at vera konungr í Danmörk.

CAP. XVI.

FALL ERLINGS KONUNGS.

Haralldr konungr Gráfelldr, oc þeir bræðor hell-do lidi síno norðr til Þrándheims, oc fengo þar einga mótstöðo; tóko þar scatt oc scyllð, oc allar konungs tekior, oc leto bændor giallda stór giölld; þvíat konungar höfðo þá lánga hrid lítit fe fengit or Þrándheimi, er Hákon Jarl hafdi þar setit med fiölmenni miklo, oc átti úfrid vid konunga. Um haustit fór Haralldr konungr sudr í land, med þat lid flest, er þar átti heimili; enn Erlingr konungr sat eptir med síno lidi; hann hafdi þá enn miklar krafir vid bændor, oc gerdi hardan rett þeirra; enn

bændor kurrudo illa, oc báro eigi vel scada sinn. Oc um vetrinn somnodoz bændor saman, oc fá lid mikit; stefna síðan at Erlingi konungi, þar sem hann var á veizlo, oc hallda við hann orosto: fell Erlingr konungr þar, oc mikil sveit manna með hanom.

CAP. XVII.

HALLÆRI Í NOREGI.

Þá er Gunnhildar synir redo fyrir Noregi, gerdiz hallæri mikit, oc var því meira at, sem þeir höfðu lengr verit yfir landi; enn bændor kendo þat konungom, oc þat með, at konungar voro fegiarnir, oc vard hardr gerr rettr bænda. Sva kom um síðir, at nálíga misti landsfólk víðast korns oc físcá. A Hálogalandi var sva mikill sulltr oc séyra, at þar óx nálíga ecki korn, enn sníár lá þar á öllo landi, at midio sumri, oc bú allt var inn bundit at midio sumri. Sva qvad Eyvindr Scálldaspillir; hann kom út, oc dreif miök:

Snyr á svölnis varo
sva höfom inn sem Finnar
birki hind of bundit
brums, at midio sumri.

CAP. XVIII.

FRÁ ISLENDINGOM OC EYVINDI SCALLDASPILLI.

Eyvindr orti drápo um alla Islendinga, enn þeir

launodo hanom sva, at hverr bóndi gaf hanom scatt-penning þann er stóð III peninga silfrs vegna, oc hvitr í scör. Enn er silfrit kom fram á alþingi, þá redo menn þat af, at fá smida til at scíra silfrit: síðan var gerr af felldardálkr; enn þar af var greitt smidarkaupt; þá stóð dálkrinn L marca: hann sendo þeir Eyvindi. Enn Eyvindr let höggva í sundr dálkinn, oc keypti ser bú med. Þá kom oc þar um vár þat, vid útver nockor, broddr af silld. Eyvindr scipadi róðrarferio húscörlom sínom oc landsbúom, oc reri þannog til, sem silldin var rekin: hann qvad:

Látom lángra nóta
lög sóta ver fútom
at spá þernom sporna
spórd fiðrodom nordan.
Vita ef akar mútor
elldgerdar falar verdi,
ít þær er upp um róta
unn svín vinom mínom.

Oc sva vendiliga var uppgengit allt lausafe hans, at hann hafdi keypt til bords ser; hann keypti silldina med bogascoti síno; hann qvad:

Fengom Felldar stínga
fiörd oc gallt vid hiörðo.
þann er ál-himins utan
oss lendingar sendo
mest sellda ec minar
mæ vid örom sævar,
Hallærit velldr hvaro,
hlaupsilldr egils gaupna.

VI.

SAGA AF OLAFI KONUNGI TRYGGVASYNI.

CAP I.

FÆDDR OLAFR TRYGGVASON.

Astrídr het kona sú er átt hafði Tryggvi konungr Olafsson; hun var dóttir Eiríks Biódaskalla er bió á Ofrostödom, ríks mans. Enn eptir fall Tryggva flydi Astrídr á brott, oc fór á launungo med lausafe þat er hun mátti med ser hafa. Henni fylgdi fostorfadir hennar, sá er Þorólfr lúsasceggr het; hann scilldiz alldregi við hana, enn adrir trúnadarmenn hennar fóro á niósn, hvat er spurdiz af úvinom hennar, edr hvat þeir fóro. Astrídr geck med barni Tryggva konungs; hun let flytia sic út í vatn eitt, oc leyndiz þar í hólma nockurom við fá menn. Þar fæddi hon barn; þat var sveinn; enn er hann var vatni ausinn, var hann kalladr Olaf, eptir lödorsfödur sínom. Þar leyndiz hon of sumarit. Enn er nótt myrredi, oc dag tók at scemma, enn vedr at kólna, þá byriadi Astrídr ferd sína, oc Þorólfr med henni, oc fátt manna, fóro þat eina med bygdom, er þau leyndoz of nætor, oc funno enga menn. Þau komo fram einn dag at qvelli, til Eiríks á

Oprostödom, föðor Astríðar; þau fóro leyniliga; Sendi Astríðr menn til bæarins, at segia Eiriki, enn hann let fylgia þeim í eina scemmo, oc setia þeim bord vid enom bestom faungom. Enn er þau Astríðr höfðo þar dvaliz litla hríd, þá fór brott för- uneyti hennar, enn hon vard eptir, oc II þiönusto- konor hennar, oc sonr hennar Olaf, þórolfr lúsa- skegg oc Þórgils son hans, VI vetra gamall; voro þau þar um vetrinn.

CAP. II.

FRÁ GUNNHILLDAR SONOM.

Haralldr Gráfelldr oc Gudröðr bróðir hans fóro; eptir dráp Tryggva Olafssonar, til búa þeirra, er hann hafði átt; enn þá var Astríðr í brott, oc spur- do þeir eigi til hennar. Sá pati kom fyrir þá, at hon mundi vera med barni Tryggva konungs; fóro þeir of haustit norðr í land, sva sem fyrr er ritit. Enn er þeir funno Gunnhilldi móðor sína, sögdo þeir alla atburði um þessi tíðindi, er þá höfðo gerz í för þeirra. Hon spurdi at vendiliga, þar sem var Astríðr; þeir segia slíkan qvitt þar af, sem þeir höfðo heyrt; enn fyrir þá söc, at þat haust et sama áttu Gunnhilldar synir deilo vid Hákon Jarl, oc sva um vetrinn eptir, sem fyrr er ritit, vard þá engi ep- tirleitan höfð um Astríði oc son hennar, á þeim vetri.

CAP.

CAP. III.

FERD ÁSTRÍÐAR.

Eptir um v́́́́́́ sendi Gunnhilldr ń́́́́́-menn til Upplanda, oc allt í Vikina, at ń́́́́́ um þat, hvat um hag Astrídar mundi vera. Enn er sendimenn koma aptr, þá kunno þeir þat hellzt at segia Gunnhilldi, at Astrídr mundi vera við fedr sínom Eiríki; segia oc þess meiri van, at hon man þar uppfæda son þeirra Tryggva konungs. Þá gerir Gunnhilldr þegar sendimenn, oc byr þá vel at vapnom oc hestom, oc hafa þeir XXX manna, oc var þar til forráða ríkr madr, vin Gunnhilldar, er Hákon er nefndr; hon bad þá fara á Oprostadi til Eiríks, oc hafa þadan son Tryggva konungs, oc færa henni; þá fara sendimenn alla leið sína. Enn er þeir átto scamma leið til Oprostada, verda varir við ferd þeirra vinir Eiríks, oc báro hánom þegar ń́́́́́ um ferd sendimanna, at qvelli dags. Enn þegar um nóttina bió Eiríkr brottferð Astrídar, feck henni góða leiðtoga, oc sendi hana austr til Svíþjóðar á fund Hákonar ens Gamla, vinar síns, ríks manns; Fóro þau í brot, er mikit lifdi nætor; þau komu at qvelli dags í herað þat er Skön heitir, oc sá þar bæ mikinn, oc fóro þannog til, oc bádo ser nætor vistar; þau duldoz, oc höfdo vand klædi. Sá bóndi er nefndr Biörn Eitrqveisa, audigr madr oc illr þegn;

hann rak þau í brott; fóro þau of qvelldit í annat þorp scant þadan, er het í Vizcom: Þórsteinn het þar bóndi, sá er þau herbergdi, oc veitti þeim góðan forbeina um nóttina, oc sváfo þau í gódom umhúnadi. Hákon oc þeir menn Gunnhilldar komo á Oprostadi snemma um morgin, oc spyria at Astríði oc syni hennar. Eiríkr segir, at hun er ecki þar. Þeir Hákon ransöcodo bæinn allann, oc dvölldoz þar lengi um daginn, oc fá nockora niósn um ferd Astrídar; Ríða þá sömo leid, oc koma síðla um qvelldit til Biarnar Eitrqveiso í Skön, taka þar gisting. Þá spyr Hákon Biörn ef hann kynni hanom nockot segia til Astrídar; hann segir, at þar komo menn um daginn, oc bádo gistingar; enn ec rak þau brott, oc mano þau vera herbergd her nockorstadar í þorpino. Verkinadr Þórsteins fór um qvelldit or scógi, oc kom til Biarnar; þviat þat var á leid hans; vard hann var vid at gëstir voro þar edr hvert erindi þeira var; hann segir Þórsteini bónda. Enn er líði þridiungr nætor, vakti Þórsteinn upp gesti sína, oc bad þau brott fara; mællti styggliga. Enn er þau voro komin á veg út or gardinom, þá segir Þórsteinn þeim, at sendimenn Gunnhilldar voro at Biarnar, oc fóro at leita þeirra. Þau bádo hann hialpar nockorar; hann feck þeim leidtoga, oc vist nockura, oc fylgdi sá þeim fram á scóginn, þar sem var vatn nockot, oc hólmi í reyri vaxinn. Þau máttu vada í hólmann út; þar fálo þau sic í reyrnom. Snimuna dags reid Hákon frá Biarnar í bygdina, enn

hvar sem hann kom, spurdi hann eptir Astrídi, enn er hann kom til Þórsteins, þá spyr hann ef þau se þar komin; hann segir at þar væri menn nockorir, oc fóro þegar á móti degi austr á scóginn. Hákon bad Þórsteinn fara med þeim er hanom var leid kunnig edr leyni. Þórsteinn fór med þeim; enn er hann kom í scóginn, vísadi hann þeim þvert frá því sem Astrídr var; Fóro þeir þann dag allan at leita, oc funno þau hvergi; Fara aptr sídan, oc segia Gunnhilldi sitt erindi. Astrídr oc hennar föroneyti fóro leid sína; komo fram í Svíþjóð til Hákonar Gamla; dvalldiz Astrídr þar oc sonr hennar Olafur lánga hríð, í gódom fagnadi.

CAP. IV.

SENDIFERD HÁKONAR TIL SVÍARÍKIS.

Gunnhilldr konunga-módir spyr, at Astrídr oc Olafur sonr hennar ero í Svíavelldi, þá sendi hon enn Hákon, oc gott föruneysi med hanom austr til Eiríks Svíakonungs, med góðar gíafir oc vináttumál. Var þar vid sendimönnum vel tekit, voro þeir þar í góðo yfirlæti. Síðan ber Hákon upp fyrir konungi erindi sín, segir at Gunnhilldr hafdi til þess ord send, at konungur scylldi styrk fá hanom, sva at hann hafi vid ser Olaf Tryggvason til Noregs; vill Gunnhilldr fóstura hann. Konungur fær hanom nienn, oc ríða þeir á fund Hákonar Gamla; bydr Hákon Olafi at fara vid ser, med vinsæmligom orðom mörgom. Há-

kon Gamli svarar vel, oc segir at módir hans scal ráða ferd hans; enn Astrídr vill fyrir engan mun, at sveininn fari: Fara sendimenn í brott, oc segia sva búit Eiríki konungi. Síðan búaz sendimenn til heimferdar, bidia enn konung at fá ser styrknockorn, at hafa sveininn brott, hvart sem Hákon Gamli vill, edr eigi: fær konungr þeim enn sveit manna: koma sendimenn til Hákonar Gamla, oc krefia þá at sveininn fari við þeim; enn er því var seint tekit, þá hafa þeir frammi mikilmæli, oc heita afarkostom, oc láta reiduliga. Þá leypr frammi þræll einn, er Bursti er nefndr, ocvill liósta Hákon, oc koma þeir nauduliga í brott óbardir af þrælinom; fara síðan heim til Noregs, oc segia sína ferd Gunnhildi, oc sva at þeir hafa set Olaf Tryggvason.

CAP. V.

FRÁ SIGURDI EIRÍKSSYNI.

Sigurdr het bródir Astrídar, son Eiríks Bióðascalla; hann hafði þá lengi verit af landi á brott austr í Gardaríki, með Valldimar konungi; hafði Sigurdr þar metnad mikinn: fystiz Astrídr nú at fara þannog til Sigurðar bróðor síns: feck Hákon Gamli henni gott föroneyti, oc öll faung góð: fór hon með kaupmönnum nockorom. Þá hafði hon verit II vector með Hákon Gamla; Olaf var þá þreyetr. Enn er þau helldo austr í haf, þá komo at þeim víkingar; þat voro Lístir; hertóko þeir bæði menn oc fe;

enn drápo suma; enn sumom scipto þeir með sér til ánaugar. Þar scildiz Olafur við móður sína, og tók við hanum Klerkon Eistneskr maður, og þeim Þóroldi og Þorgilsi. Klerkon þótti Þóroldur ofgamall til þræls, þótti og ecki forvera í hanum, og drap hann, enn hafði sveinana með sér, og selldi þeim manni er Klerkur hét, og tók fyrir hafr einn vel góðan. Hinn þridi maður keypti Olaf, og gaf fyrir vest gott eður slagning; sá hét Reas, kona hans hét Rekon, enn sonur þeirra Rekon. Þar var Olafur lengi, og vel halldinn, og unni bóandi hanum mikit. Olafur var VI vetur á Eistlandi í þessari útlegd.

CAP. VI.

FRELSTR OLAFUR AF EISTLANDI.

Sigurður Eiríksson kom til Eistlands í sendiferð Valldimars konungs af Hólmgarði, og scyldi hann heimta þar í landi scatta konungs. Fór Sigurður ríkuliga með marga menn og fé mikit. Hann sá á torgi svein fríðan miök, og scildi hann, at sá mundi þar útlendr, og spyrr hann at nafni og ætt sinni; hann nefndi síð Olaf, enn Tryggva Olafsson föður sinn, enn móður sína Astríði, dóttur Eiríks Bjóðascalla: þá kannadiz Sigurður við, at sveininn var systerson hans. Þá spurði Sigurður sveininn, hví hann væri þar kominn? Olafur sagði hanum alla atburði um sitt mál. Sigurður bað hann fylgia sér til Reas bóanda. Enn er hann kom þar, þá keypti hann sveinana báða

Olaf oc Þórgils, oc hafði með sér til Hólmgarðs, oc let eigi upp vist fyrzt um ætt Olafs, enn hellt hann vel.

CAP. VII.

DRÁP KLERKONS.

Olafr Tryggvason var staddr einn dag á torgi; var þar fiölmenni mikit; þar kendi hann Klerkon, er drepit hafði fóstura hans Þórólf Lúsarscegg. Olafr hafði litla öx í hendi, oc setti í höfot Klerkon, sva at stóð í heila nidri; tók þegar á hlaup heinn til herbergis, oc segir Sigurdi frænda sínom, enn Sigurdr kom Olafi þegar í herbergi drottningar, oc segir henni tíðindin; hon het Allogia; bad Sigurdr hana hiálpa sveininom; hon svarar, oc leit á sveininn, segir, at eigi má drepa sva fríðan svein, oc bad kalla menn til sín með alvæpni. Í Hólmgarði var sva mikil fríðhelgi, at þat voro lög, at drepa scyllði hvern, er mann drap ódæmdan. Þeystiz allr lydr eptir síð þeirra oc lögom, oc leitadi eptir sveininom, hvar hann væri kominn. Þá var sagt, at hann var í garði drottningar, oc þar her mans alvaprætur: var þá sagt konungi, geck hann þá til með síno lidi, oc villði eigi at þeir berðiz, kom þá gríðom á, oc því næst sættom; dæmdi konungur bætor, enn drottning hellt giölldom upp; síðan var Olafr með drottningo, oc var hon allkær til hans. Þat voro lög í Gardaríki, at þar scylldo eigi vera konungbornir menn,

nema at konungs ráði; þá segir Sigurdr drottningo, hvernar ættar Olafur var, edr fyrir hveria sök hann var kominn, at hann mátti eigi vera í síno landi fyrir úfrídi; bad hana þetta ræða við konung; hon gerdi sva, bad konung hialpa við konungs syni þessom, sva hardliga sem hann var leikinn, oc komo sva færtölur hennar, at konungur iátti henni þesso, tók þá Olaf í sitt valld, oc hellt hann vegliga, sva sem konungs syni byriadi at vera halldinn. Olafur var IX vetra, er hann kom í Gardaríki, enn dvalldiz þar med Valldimar konungi adra IX vetor. Olafur var allra manna frídastr oc mestr oc sterkastr, oc umfram alla menn at íþróttom, þá er frá er sagt af Nordmönnom.

CAP. VIII.

FRÁ HÁKONI HLADA-JARLI.

Hákon Jarl Sigurdarson var med Haralldi Gorms-syni Dana konungi, um vetrinn eptir, er hann hafdi stockit or Noregi fyrir Gunnhilldar sonom. Hákon Jarl hafdi sva sterkar áhyggior um vetrinn, at hann lagdiz í reckio, oc hafdi andvökor miklar, át oc drack þat eino, er hann mátti hallda við styrk sínom. þá sendi hann menn sína leyniliga norðr í þrándheim til vina sinna, oc lagdi þat ráð fyrir þá, at þeir scylldo drepa Erling konung, ef þeir mætti við komaz, oc sagdi, at hann mundi aptr hverfa til rikis síns, þá er sumradi. þann vetr drápo þræn-

dir Erling, sem fyrr er ritat. Med Hákon og Gull-Haralldi var kær vinátta, bar Haralldr fyrir Hákon ráðagerdir sínar; segir Haralldr, at hann vill þá setjaz at landi, og vera eigi lengr á herscipom; spurdi hann Hákon, hvat hann hygdi, hvert Haralldr konungr mundi vilja scipta ríki við hann, ef hann krefdi. Þat hygg ec segir Hákon, at Dana konungr mun engra varna þer rettinda; enn þó veizto þá görr þetta mál, ef þú rædir fyrir konungi; vetti ec, at þú fáir eigi ríkit, ef þú krefr eigi. Brátt eptir þessa rædo taladi Gull-Haralldr við Haralld konung, sva at nær voro margir ríkismenn beggia vinir, og krafði þá Gull-Haralldr Haralld konung, at hann scipti ríkinu við hann í helminga, sva sem burdir hans voro til og ætt, þar í Danavelldi. Við þetta ákall varð Haralldr konungr reidr miök, segir, at engi madr krefdi þess Gorm konung födor hans, at hann scyllði geraz hálfkonungr yfir Danavelldi; eigi helldr hans födor Hörðaknútr, edr Sigurd Orm í auga, edr Ragnar Lodbrók: gerdi sic þá sva reidan og ódan, at ecki mátti við hann mæla.

CAP. IX.

FRÁ GULL-HARALLDI.

Gull-Haralldr undi þá miklo verr enn ádr, at hann hafði þá eigi ríki helldr enn fyrr, enn reidi konungs; kom hann þá til Hákonar vinar síns, og kærði sín vandræði fyrir hanom, og bad hann heilla

ráða, ef til væri, þau er hann mætti ríki ná; sagði, at hann hafði þat hellz huxat, at sækja ríkit með styrk ok vapnom. Hákon bad hann þat fyrir engom manni mæla, sva at spurdiz; liggr þar líf ydart við, hugsa þá með siálfom þer, til hvers þú mant færri verða; þarf til slíkra stórræða, at madr se diarfr oc uruggr, spara hvarki til góða luti ne illa, at þá megi framganga þat er upp er tekit: enn hitt er úfært, at hefja upp stór ráð, oc leggja niðr síðan með úsæmd. Gull-Haralldr svarar: sva skal ec þetta upptaka tilkallit, at eigi skal ec mínar hendur til spara, at drepa konung siálfan, ef ec kem í færi með því er hann vill synia mer þess ríkis, er ec á at hafa at retto: scilia þer þá ræðo sína. Haralldr konungr geck þá til fundar við Hákon Jarl, oc taka þeir tal með sér; segir konungr Jarli, hvat ákall Gull-Haralldr hefir haft við hann til ríkis, oc svör þau er hann veitti; segir sva, at hann vill fyrir engan mun minka ríki sitt. Enn ef Gull-Haralldr vill nockot hallda þesso tilkalli, þá er mer lítit fyrir, at láta drepa hann; þvíat ec trúi hanom illa, ef hann vill eigi af þesso láta. Jarl svarar: þat bygg ec, at Haralldr hafi sva fremi þetta uppkvedit, at hann mun eigi þetta láta niðrfalla; er mer þess van, ef hann reisir úfríd her í landi, at hanom verði gott tillids, oc mest fyrir sakir vinsællda föðor hans; enn þat er yðr hin mesta úhæfa, at drepa frænda yðarn; þvíat allir menn munu kalla hann saclausan at sva búno.

Eigi vil ec oc þat mitt ráð kalla, at þú gerir þic minna konung, enn fadir þinn var Gormr, jók hann oc miök sitt ríki, enn minkadi í engan stad. Þá segir konungr: hvert er þá ráð þitt, Hákon, ef ec skal eigi midla ríki, oc ráða ei af hendi mer ugg þenna. Vid sculom finnaz nockorom dögom sídar, segir Hákon Jarl; vil ec hugsa ádr þetta vanda mál, oc veita þá nockorn orscurd: Geck þá konungr í brott, oc allir hans menn.

CAP. X.

RÁDAGERD HARALLDS KONUNGS
OCH HÁKONAR JARLS.

Hákon Jarl hafði nú af nyo enar mesto áhyggior oc ráðagerdir, oc let fá menn vera í húsino hiá ser. Fám dögom sídar kom Haralldr til Jarls, oc taka þeir þá tal; spyr þá konungr, ef Jarl hafi huxat þá rædo, er þeir komo á fyrra dags. Þar hefi ec, segir Jarl, vakat um nótt oc dag sídan, oc finz mer þat hellzt ráð, at þú hafir oc styrir ríki því öllo, er þú tókt eptir födor þinn, enn fáir Haralldi frænda þínom í hendor annat konungs ríki, þat er hann megí sæmdr madr af verda. Hvert er þat ríki, segir konungr, er ec má heimliga fá Haralldi, ef ec hefi úscert Danavellði. Jarl segir: þat er Noregr; konungar þeir er þar ero, ero illir öllo landsfólki; vill hver madr þeim illt, sem vert er. Konungr segir: Noregr er land mikit, oc hart fólk, oc er illt at

sækia við útlendan her: gafz oss sva, þá er Hákon vardi landit; leto ver lid mikit, enn vard engi sigr unninn: er Haralldr Eiríksson fósterson minn oc kne- setningr. Þá segir Jarl: laungo vissa ec þat, at þer höfðot opt veittan styrk Gunnhíldar sonom, enn þeir hafa ydr þó engo launat, nema illo. Ver scul- om komaz miklo lettligar at Noregi, enn beriaz til med allan Danaher. Sento bod Haralldi fóstursyni þanom, oc biód hanom at taka af þer land oc len, þat sem þeir hafdo fyrr her í Danmörk: stefn hön- om á þinn fund. Nú má Gull-Haralldr þá litla stund alla ríkis í Noregi af Haralldi konungi Gráfelld. Konungr segir, at þetta mun kallat illt vere, at svi- kia fósterson sinn. Þat mano Danir kalla, segir Jarl, at betra er þat scipti, at drepa víking Norrænan, heldr enn bróðrson Dansean; Tala þeir nú her um lánga hrid, þar til er þetta semz med þeim.

CAP. XI.

SENDIBOD HARALLDS GORMS-
SONAR TIL NOREGS.

Gull-Haralldr kom enn til tals við Hákon Jarl, oc segir Jarl hönom, at hann hefir nú fylgt hans má- lom, sva at meiri van er, at nú muni konungs ríki liggja laust fyrir honom í Noregi; skulo við þá, se- gir hann, hallda felagscap ockrom, mun ec þá me- ga veita þer mikit traust í Noregi. Hafdo fyrst þat ríki; Haralldr konungr er nú gamall miök, enn hann

á þann einn son, er hann ann lítit, oc frillo son er. Talar Jarl þetta fyrir Gull-Haralldi, þar til er hann lætr ser þetta vell lika. Síðan tala þeir allir optliga, konungr oc Jarl, oc Gull-Haralldr. Síðan sendi Dana konungr menn sína norðr í Noreg, á fund Harallds Gráfellds; var sú ferd búinn allvegliga; fenggo þeir góðar vidtökor er þeir finna Haralld konung, segia hanom þau tíðindi, at Hákon Jarl er í Danmörk, oc liggr banvænn, oc nær örviti, oc þau önnor tíðindi, at Haralldr Dana konungr baud til sín Haralldi Gráfelld, fóstorsyni sínom, at taka þar af ser veizlor, sva sem þeir bræðor höfðo fyrr haft þar í Danmörk, oc bad Haralld koma til sín, oc finna sic á Jótlandi. Haralldr Gráfelldr bar þetta mál fyrir Gunnhilddi móðor sína, oc adra vini sína: lögðo menn þar allmisiafnt til; sumom þótti þessi för eigi trúlig, sva sem þar var mönnom fyrirscipat; hinir voro fleiri, er fysto at fara scylldi, þviat þá var sva mikill sulltr í Noregi, at konungar fengo varliga fætt lid sitt; þá seek fiörðrinn þat nafn, er konungar sátu optaz, at hann het Hardánger. Arferd var í Danmörk at nockori hlyto; hugðoz menn þá þar mundo faung fá, ef Haralldr konungr fengi þar len oc yfirsócn. Vard þat ráðit áðr sendimenn fóro í brott, at Haralldr konungr mundi koma til Danmerkr um sumarit, á fund Danakonungs, oc taka af hanom þenna kost, er Haralldr konungr baud hanom.

CAP. XII.

SVIKRÆDI HARALLDS KONUNGS OC HÁKONAR JARLS VID GULL-HARALLD.

Haralldr Gráfelldr fór um sumarit í Danmörk, oc hafði III lánscip; þar styrdo einn Arinbiorn hersír or Fiördom. Haralldr konungr sigldi út or Víkinni oc til limafiardar, oc lagðiz þar at Hálsi: var hanom sagt, at Danakonungr mundi þar koma brátt. Enn er þetta frá Gull-Haralldr, þá helldr hann þannog med IX scipom; hann hafði ádr búit lid þat at fara í viking. Hákon Jarl hafði þá oc búit sitt lid, oc ætladi oc í hernad; hafði hann XII scip, oc öll stór. Enn er Gull-Haralldr var brott farinn, þá mælti Hákon Jarl vid konung: nú veit ec eigi nema ver róim leidangrinn, oc gialldim leidvítit; nú mun Gull-Haralldr drepa Haralld Gráfelld; síðan mun hann taka konungdóm í Noregi: ætlar þú hann þer þá tryggvan, ef þú fær hanom sva mikinn styrk? enn hann mælti þat í vetr fyrir mer, at hann mundi drepa þic, ef hann qvæmiz í færi um. Nú mun ec vinna Noreg undir þic, oc drepa Gull-Haralld, ef þú vilt því heita mer, at ec scyla auðvelliga sættaz vid ydr fyrir þat; vil ec þá geraz Jarl ydar, oc binda þat svardögum, oc vinna Noreg undir ydr med ydrom styrk, hallda þá síðan landino undir ydrt ríki, oc giallda ydr scatta; oc erto þá meiri konungr enn fadir þinn, ef þú rædr II þjóðlöndom. Þetta semz med þeim

konungi oc Jarli; fer þá Hákon með lidi síno at leita Gull-Harallds.

CAP. XIII.

FALL HARALLDS KONUNGS GRÁFELLD
AT HÁLSI.

Gull-haralldr kom til Háls í límafiörd; baud hann þegar Haralldi Gráfelld til orosto. Enn þótt Haralldr hafdi lid minna, þá geck hann þegar á land, oc bióz til orosto, oc fylkdi lidi síno; enn ádr fylkingar gengi saman, þá eggjar Haralldr Gráfelldr hart lid sitt, oc bad þá bregda sverdom, hlióp þegar fram í öndverda fylkin, oc hió til beggia handa. Sva segir Glúmr Geirason í Gráfelldardrápo:

Mælti mætra hialta
málm ódin sá blódi
þróttar ord, er þordi
þíódom völl at rióða.
Vidlendr of bad vinda
verðung Haralldr sverdom,
frægt þótti þat flotnom
fylkis ord, at mordi.

Þar fell Haralldr konungr Gráfelldr: sva segir Glúmr Geirason:

Vard á víðo bordi
viggiom hollr at liggja
gætir glamma sóta
gards eylimafiardar.
Sendir fell á sandi
sævar báls at Hálsi;

olli iðfra spialli

ordheppinn því mordi.

Þar fell flest lid Harallds konungs med hanom; þar fell Arinbiörn hersir. Þá var lidit frá falli Hákonar konungs Adalsteins fóstura XV vetor; enn frá falli Sigurðar Hlada-Jarls XIII vetor. Sva segir Ari prestur inn Fródi, at Hákon Jarl væri XIII vetor Jarl yfir föðorleifð sinni í Þrándheimi, ádr Haralldr Gráfelldr fell; enn VI vetor ena sidorsto, er Haralldr Gráfelldr lifði, segir Ari, at Gunnhilldar synir oc Hákon börðoz, oc stucko ymsir or landi.

CAP. XIV.

DAUDI GULL-HARALDS.

Hákon Jarl oc Gull-Haralldr fundoz litlo síðar enn Haralldr Gráfelldr fell: leggr þá Hákon Jarl til orosto vid Gull-Haralld. Fær Hákon þar sigr, enn Haralldr var handtekinn, oc let Hákon hann festa á gálga. Síðan fór Hákon á fund Dana konungs, oc sættiz vid hann audvelliga, um dráp Gull-Harallds frænda hans.

CAP. XV.

LANDA-SCRIPTI Í NOREGI.

Síðan bydr Haralldr konungr her út um allt sit ríki, oc fór med DC scipa; þar var þá med hanom Hákon Jarl Sigurðarson, oc Haralldr Grænski, son

Gúðrödar konungs, oc mart annarra ríkis-manna, þeirra er flyit höfðo ódöl sín fyrir Gunnhilldar sonom af Noregi: Helld Dana konungr her sinom sunnan í Vikina, oc geck landsfólk allt undir hann. Enn er hann kom til Tunsbergs, þá dreif til hans mikit fiölmenni, oc feck Haralldr konungr lið þat allt í hendur Hákon Jarl er til hans hafði komit í Noregi, oc gaf hanom til forráða Rogaland oc Hörðaland, Sogn, Firdafylki, Sunnmæri oc Raumsdal oc Nordmæri. Þessi VII fylki gaf Haralldr konungr Hákon Jarli til forráða, með þvilikom fornála, sem Haralldr hinn Hárfagri gaf sonom sinom. Nema þat scildi, at Hákon scyllði eignaz þar, oc sva í Þrándheimi, öll konungsbú oc landscyldir oc hafa konungsfe sem hann þyrfti, ef her væri í landi. Haralldr konungr gaf Haralldi Grænsca Viingulmörk, Vestfolld oc Agdir til Lídandisness, oc konungs nafn, oc let hann þar hafa ríki með öllo slíko, sem at fono höfðo haft frændor hans, oc Haralldr hinn Hárfagri gaf sonom sinom. Haralldr Grænsca var þá XVIII vetra, oc vard síðan frægr madr: Ferr þá Haralldr Dana konungr heim með allan Dana her,

CAP. XVI.

FERD GUNNHILLDAR SONA OR LANDI:

Hákon Jarl fór með lidi síno norðr með landi: enn er Gunnhilldr oc synir hennar spurdo þessi tíðindi, þá

Þá samna þau her, oc varð þeim illt til lids. Tóko þau enn et sama ráð sem fyrr, sigla vestr um haf, með þat lid er þeim vill fylgia, fara fyrst til Orneya, oc dvölldoz þar um hríd; þar voro ádr Jarlar, synir Þórsfinns Hausakliúfs, Lödver oc Arnvidr, Liótr oc Skúli. Hákon Jarl lagdi þá land allt undir sic, oc sat þann vetr í Þrándheimi. Þess getr Einar Scálaglamm í Velleklo:

Siö fylkiom kom silkis
snúuadr var þat brúna
geymir grundar síma
grandvarr und sic landi.

Hákon Jarl, er hann fór sunnan með landi um sumarit, oc landsfólk geck undir hann, þá baud hann þat um ríki sitt allt, at menn scylldo hallda upp hofom oc blótom, oc var sva gert. Sva segir í Velleklo:

Öll let senn hinn svinni
sönn Eindrida mönnom
heriom kunnr of heriot
hofs lönd oc ve banda.
At veg iótna vitni
valfallz of síá allan
þeim styra god geira
gardz Hlóridi fardi.
Oc herþarfir hverfa
hlaccar mótz til blóta,
raud brícar fremse rækir
ríkr ásmegi slíco.
Nú grær iörd sem áðan
aptr geirbrúar Hapta

andryrir lætr áro
 óhryggia ve byggia.
 Nú liggr allt und Jarli
 ímon bordz fyrir nordan
 vedr gædis stendr víða
 vík Hákonar ríki.

Hinn fyrsta vetr er Hákon red fyrir landi, þá geck silld upp um allt land, oc ádr um haustit hafði korn vaxit, hvar sem sáit hafði verit; enn um várit öflodo menn ser frækorna, sva at flestir bændor sero iardir sinar, oc vard þat brátt árvænt.

CAP. XVII.

OROSTA HÁKONAR JARLS OC RAGN-
 FREDAR KONUNGS GUNNHILLD-
 AR SONAR.

Ragnfrödr konungr sonr Gunnhilldar, oc Gudrödr annar sonr Gunnhilldar, þeir II voro þá á lífi synir Eiríks oc Gunnhilldar. Sva segir Glúmr Geirason i Gráfelldar drápo:

Fellunz hálf þá er hilmis
 hiördrífa brá lífi.
 Redat oss til andar
 andvan Haralldz dandi.
 Enn veit ec at hefir heitit
 hans bródir mer gódo,
 síá getr þar till sælo
 seggfiöld, hvadartveggi.

Ragnfrödr byriadi ferd sína um várit, þá er hann hafði einn vetr verit i Orkneyom: hellt hann þá

vestan til Noregs, oc hafdi frítt lid oc scip stór. Enn er hann kom í Noreg þá spurdi hann at Hákon Jarl var í Þrándheimi. Helt Ragnfródr þá norðr um Stad, oc heriadi um Sunnmæri. Enn sumt fólk geck undir hann, sem opt verdr, þá er hersfloc-
kar ganga yfir land; at þeir er fyrir ero, leita ser hialpar, hver þannog sem vænst þickir. Hákon Jarl spurdi þessi tidindi, at úfridr var sudr um Mæri; red Jarl þá til scipa, oc let scera upp herör, byze sem hvatligaz, oc helt út eptir firdi; vard hönom gott til lids: vard fundr þeirra Ragnfredar oc Hákonar Jarls á Sunnmæri norðarlíga; helt Hákon þegar til orosto: hann hafdi lid meira oc scip smærri. Orosta vard hörd, oc veitti Hákon þyngra; þeir börðoz um stafna, sem þar var sidr til: straumr var í sundino, oc hóf öll scipin saman inn at landino: Jarl let oc hamla at landino, þar er hanom þótti best til uppgaungo. Enn er scipin kendo nidr, þá geck Jarl, oc allt lid hans, af scipom, oc drógo upp, sva at úvinir þeirra scylldo eigi mega út draga. Síðan fylkti Jarl a vellinom, oc eggjadi Ragnfred til uppgaungo: þeir Ragnfredr lögdo at utan, oc skutoz á lánga hrid; villdi Ragnfredr eigi á land ganga oc scilldoz at sva búno: helt Ragnfredr lidi sino sudr um Stad, þvíat hann óttadiz landsher, ef drifi til Hákonar Jarls. Enn Jarl lagdi fyrir því eigi optar til orosto, at hanom þótti borda muir ofmikill; fór hann þá um haustit norðr til Þrándheims, oc var þar um vetrinn. Enn Ragnfredr konungr hafdi þá

allt fyrir sunnan Stad, Firdafylki, Sogn, Hördaland, Rogaland; hafði hann fiölmenni mikit um vetrinn, oc er váradi, baud hann leidangri út, oc feck lid mikit; fór hann þá um öll þau fylki, at afla ser lids oc scipa, oc annarra fanga; þeirra er hann þurt at hafa.

CAP. XVIII.

ÖNNOR OROSTA HÁKONAR JARLS OC
RAGNFREDAR KONUNGS I SOGNI.

Hákon Jarl baud lidi út, þá er váradi, allt norðr or landi; hann hafði mikit lid af Hálogalandi oc Naumodali, sva at allt frá Byrdo til Stads hafði hann lid af öllum Siálöndom. Hanom droze oc her um öll þrændalög, sva oc um Raumsdal. Sva er atqvedit, at hann hefði her af IV fólklöndom; hanom fylgdo VII Jarlar, oc höfdo þeir allir saman ógrynni lids. Sva segir í Velleklo:

Hitt var meirr at mæra
mordfikinn let nordan
Fólkveriandi fyrva
fór til Sogns ofgiörva.
Ytti freyr af fiórom
fólk-landom sá branda
ullr stóð af því allri
yrþiód, hedins byriar.
Oc til mótz á meita
miúe hardom fram þurdo
med svör gæli svarva
siö landrekar randa.

Glumdi allr þá er ullar
egg-þings Hedins veggjar,
gnótt flaut nás fyrir mesiom,
Noregr saman fóro.

Hákon Jarl hellt lidi þesso öllo sudr um Stad. Þá spurdi hann at Ragnfredr konungr med her sinn væri farinn inn í Sogn; sneri Jarl þá þannog síno lidi, oc vard þar fundr þeirra Ragnfredar; lagdi Jarl scipom sinom at landi, oc hasladi völl Ragnfredi konungi, oc tók orosto stad; sva segir í Velleklo:

Vard fyrir Vinda myrði
víðfrægt enn gramr sídan
gerdiz mest at mordi
mannfall vid styr annan.
Hlym Narfi bad hverfa
hlífar slagds oc lagdi
jáles vid öndort fylki
öndor förf at landi.

Þar vard allmikil orosta; hafði Hákon Jarl lid miklo meira, oc feck sigr. Þetta var á Þínganesi, þar er mætiz Sogn oc Hördaland. Ragnfredr konungr flydi til scipa sinna, enn þar fell af lidi hans CCC manna. Sva segir í Velleklo:

Straung vard gudr ádr gunnar
gammi nás und bramma
þreyngvi meidr of þryngvi
þrimr hundrodom lunda.
Knátti hafs at höfdom
hagnadr var þat bragna
fólk eflandi fylkir
fángxæll þadan gánga.

Eptir orosto þessa flydi Ragnfredr konungr or No-

regi, enn Hákon Jarl fridadi land, oc let fara aptr norðr her þann hinn mikla, er hanom hafði fylgt um sumarit; enn hann dvaldiz þar um haustit, oc sva um vetrinn.

CAP. XIX.

QVANFÁNG HÁKONAR JARLS.

Hákon Jarl geck at eiga kono þá er het Þóra, dóttir Skaga Skoptasonar, ríks mans. Þóra var allra qvenna fridoz; þeirra synir voro Sveinn oc Hemingr; Bergliót het dóttir þeirra, er síðan átti Einar Þambarscelfir. Hákon Jarl var qvenna-madr mikill, oc átti mörg börn; Ragnhilðr het dóttir hans; hana gipti hann Scopta Scagasyni, bróðor Þóro. Jarl unni Þóro sva mikit, at hann gerði ser miklo kærri, enn adra menn, frændor Þóro; oc var þó Scopti mágr hans mest metinn af öllom þeim. Jarl veitti hönom stórar veizlor á Mæri. Enn hvert sinn er þeir voro í leidangri, þá scyllði Scopti leggja scíp sitt næst scípi Jarls, enn aungom öðrom scyllði þat hlyða, at leggjanockot scíp milli scípa þeirra.

CAP. XX.

FALL TÍDINDA-SCOPTA.

Þat var einu sumri er Hákon Jarl hafði leidangr úti, þá styrði þar scípi með hanom Þórleifr Spaki. Eiríkr sonr Hákonar Jarls, var oc þar í för, var

hann þá X vetra edr XI. Enn er þeir lögdo til hafnar á qvelldom, þá let Eiríkr ser eigi líka annat, enn þeir legdi til lægir næst scipi Jarls. Enn er þeir komo sudr á Mæri, þá kom þar Scopti mágr Jarls med lángscip vel scipat. Enn er þeir róa at flotanom, þá kallar Scopti, at Þórleifr sculi ryma höfnina fyrir hanom, oc leggja or lægino. Eiríkr svarar sciótt, bad Scopta leggja í annat lægi. Þetta heyrði Hákon Jarl, at Eiríkr son hans þóttiz nú sva ríkr, at hann vill eigi vegia fyrir Scopta; kalladi Jarl þegar, bad þá leggja or lagino, segir at þeim mundi annarr kostur vera verri, oc þeir munda vera bardir brátt. Enn er Þórleifr heyrði þetta, het hann á menn sina, oc bad leggja scipit or tengslom, oc sva var gert. Lagdi þá Scopti í lagit, þat sem hann var vanr at hafa, næst scipi Jarls. Scopti scylldi segia tíðindi öll Jarli, þá er þeir voro bádir samt; enn Jarl sagdi Scopta tíðindi, ef hann spurdi fyrr; hann var því kalladr Tíðinda-Scopti. Um vetrinn eptir var Eiríkr med Þórleifi Fóstra sínom; enn um várit snimma feck Eiríkr ser sveit manna; Þórleifr gaf hönom scúto fimtán-sesso, med öllom reida, tiölldom oc vistom: hellt Eiríkr þá út eptir firdi, oc síðan sudr á Mæri. Tíðinda-Scopti fór med XV-sesso alszipada millom búa sínna, enn Eiríkr leggr til móts við hann, oc til bardaga; þar fell Scopti; enn Eiríkr gaf grid þeim mönnom er þá stódo uppi. Sva segir Eyolfir Dáðascalld í Bandadrápo:

Meita fór at móti
 miök síð um dag seíði
 úngr med iöfno gengi
 út vers frömom Hersi.
 Þá er ridloga reidir
 randvallar let falla
 úlfsteitir gaf áto
 opt blóðvöloom Scopta.

Hoddsveigir letz hníga
 harda ríkr þá er bardiz
 logreifiss brátto lífi
 landmann kiars handa.
 Stálægir nam stíga
 stafus flet hlackar hrafna
 af dynbeidi daudom
 dregr land at mun banda.

Síðan sigldi Eiríkr sudr med landi, oc kom fram í Danmörk, fór þá á fund Harallds konungs Gormssonar, oc var þar med hanom um vetrinn. Enn eptir um várit sendi Dana konungr Eirík norðr í Noreg, oc gaf hanom Jarldóm, oc þar med Víngulmörk oc Raumaríki til yfirsócnar, med þeim hætti, sem fyrr höfdo þar haft scattkonungar. Sva segir Eyolfir Dáðascalld:

Fólk styrir var fátta
 finuz ölknarrar linna
 sudr at siávar nadri
 setbergs gamall vetra;
 áðr at yggjar brúdi
 elhvetiandi setia
 hilldar hialmi falldinn
 hodd-milldingar villdo.

Eiríkr Jarl varð síðan höfðingi mikil.

CAP. XXI.

FERD OLAFS TRYGGVASONAR OR
GÖRDOM.

Olafr Tryggvason var þessar hridir allar í Gardaríki, oc hafði þar et mesta yfirlát af Valldimar konungi, oc kærleika af drottningo. Valldimar konungr setti hann höfðingia yfir herlid þat, er hann sendi til at veria landit: sva segir Hallarsteinn:

Tólf var elldz at alldri
ysetrs hati vetra
htranstr þá er herscip glæsti
Hörda vinr or Gördom.
Hlódo hamdis klælom
hiörva gnys oc skyom
hilmis menn sem hialmom
hlyr vigg enn mól styri.

Átti Olafr þar nockorar orostor, oc vard hönom herstiórnnin vél í hendi. Hellt hann þá siálfr sveit mikla hermanna af sínom kostnadi, þeim er konungr veitti hanom. Olafr var örr madr vid sína menn, vard hann af því vinsæll. Enn þá vard þat sem optliga kann verda, þar er útlendir menn hefiaz til ríkis, eda til sva mikillar frægðar, at þeir verði umfram innlendsca menn, at margir öfundudo þat, hverso kærri hann var konungi, oc eigi sidr drottningo; mællto menn þat fyrir konungi, at hann seyllði varaz at gera Olaf eigi ofstóran, fyrir því at slikr madr er þer hættastr, ef hann vill sic til þess líá, at gera ydr mein, edr ydro ríki; er hann sva búinn att íþróttom oc atgervi oc vinsælld: vitom ver

oc eigi hvat er þau drottning tala iafnan. Þat var sidr mikill hinna ríko konunga, í þann tíma, at drottning scylldi eiga hálfa hirdina, oc hallda med sínom kostnadi, oc hafa þar til scatta oc scylldir, sva sem þyrfti; var þar oc sva med Valldimar konungi, at drottning hafði eigi minni hird enn konungr, oc keptoz þau miök um ágætis menn, villdi hvartveggja til sín hafa. Nú gerdiz sva, at konungr festi trúnad á slícar rædor, sem mællt var fyrir hannom, oc gerdiz hann nockot fár oc styggr vid Olaf. Enn er Olafr fann þat, þá segir hann drottingo, oc þat med, at hann fystiz at fara í nordrlönd, oc segir, at frændor hans hafa þar fyrr ríki haft, oc, hannom þickir líkaz at þar mani þrosci hans mestr verda. Drottning bidr hann vel fara, segir at hann muni þar göfigr þickia sem hann væri. Síðan byr Olafr ferd sína, oc geck á scíp, oc hellt sva út í hafit í Eystra Sallt. Sva segir Marcus Skeggiason í Rekstefio:

Senn öll síðan runno
 Sneckio bord or Gördom
 her-mörg hala urgur
 hilldings und gram mildom.
 Vestrlönd virða kindar
 verfákom let heriat
 aldyggr arfi Tryggva
 Olafr, oc klauf stáli.

Enn er hann sigldi austan, þá kom hann vid Borgundarhólm, oc veitti þar upprás, oc heriadi, enn

landsmenn sóttu ofan, oc helldo orosto vid hann, oc feck Olafur sigr oc herfáng mikít.

CAP. XXII.

QVANFÁNG OLAFS KONUNGS TRYGGVA-
SONAR.

Olafur lá vid Borgundarhólm, oc fengo þeir vedor hvöss, oc storm siávar, oc mego þeir þar eigi vidfestaz, oc sigla þadan sudr undir Vindland, oc fá þar höfn góða, fara þar allt med frídi, oc dvölldoz þar um hrid. Burislafr het komungr í Vindlandi; hans dætor voro þær Geira, Gunnhilldr oc Astrídr; Geira konungs dóttir hafdi þar valld oc ríki, sem þeir Olafur komo at landi; Dixin er sá madr nefndr, er mest forráð hafdi med Geiro drottningo. Enn er þau höfdo spurt, at þar voro vid land komnit úkunir menn, þeir er tíguliga leto yfir ser, oc þeir fóro þar med frídi, þá fór Dixin á fund þeirra med ordsending Geiro drottningar, þá, at hon vill bióða þeim mönnom til vetr vistar, er þar voro komnir, þvíat þá var miök lidit á sumarit, enn vedráttu hörd, oc stormar miklir. Enn er Dixin kom þar, þá vard hann brátt þess varr, at þar red fyrir ágætr madr, bædi at æt oc á synom. Dixin segir þeim, at drottning baud þeim til sín med vinátto bodi; Olafur þektiz bod þetta, oc fór um haustit til Geiro drottningar, oc syndiz hvart þeirra ödro afarvel, sva at Olafur hefir uppi ord sín, oc bidr Geiro drottningar,

oc verdr þat at ráði gert, at Olafur fær Geiro drottningar þann vetr; gerdiz hann þar þá forráda-madr þess ríkis með henni. Hallfredr Vandræda-scalld getr þess í drápo þeirri er hann orti um Olaf konung:

Hilmir let at hólmi
bræscód roðin blóði,
hvatt of dylldi þess hölldar;
hörd, oc austr í Görðom.

CAP. XXIII.

HÁKON JARL GELLDREI SKATTA.

Hákon Jarl red fyrir Noregi, oc gallt engan scatt, fyrir þá sök, at Dana konungr veitti hönom skatta alla, þá er konungr átti í Noregi, til starfs oc kostnadar, er Jarl hafði til at veria landit fyrir Gunnhildar sonom.

CAP. XXIV.

ÚTBOD HARALLDS KONUNGS MÓTI
CRISTNIBODI OTTO KEISARA.

Örku keisari var þá í Saxlandi: hann sendi bod Haraldi Dana-konungi, at hann scyllði taka skírn oc trú retta, oc þat landsfólk allt, er hann styrði: enn at öðrom kosti, segir keisari, at hann mundi fara með her á hendur hanom. Þá let Dana konungr búa landvarnir sínar, let þá vel upphalda virki, oc búa herscip sín. Þá sendi hann bod í

Noreg Hákon Jarli at hann scylldi koma til hans snimma um várit, með allan her þann, sem hann fengi. Baud Hákon Jarl her út um várit af öllu ríki síno, og varð hann allfiölnedr, og hellt hann lidi því til móts við Dana-konung; Tók konungur allsæmiliga við hanom. Margir adrir höfðingar voru þá með Danakonungi, þeir er hanom veitto lid; hafði hann þá allmikinn her.

CAP. XXV.

HERNADR OLAFS KONUNGS TRYGGVASONAR.

Olafr Tryggvason hafði verið um vetrinn í Vindlandi, sem fyrr er ritat: hann fór um vetrinn til þeirra herada þar á Vindlandi, er legit höfðo undir Geiro drottningo, og höfðo þá undan horfit allri hlydni og skattgiöfom þannog. Þar heriar Olafr, og drap marga menn, enn brendi fyrir sunum, tók fe mikit, og lagði undir sic þau ríki; fór síðan apr til borgar sinnar. Snemma um várit bió Olafr scip sín, og sigldi síðan í haf; hann sigldi undir Scáni, veitti þar uppgaugo, enn landzmenn sömnodoz saman, og helldo orosto, og hafði Olafr sigr, og feck herfáng mikit. Síðan sigldi hann austr til Gotlands; þar tók hann kaupscip, er Jamtar átto; þeir veitto vörn mikla, og lauk sva, at Olafr raud scipit, og drap mart manna, og tók fe allt. Þridio orosto átti

hann á Gotlandi; hafði Olafr þar sigr, oc feck mikít herfáng. Sva segir Hallfredr Vandrædascauld:

Endr let Jamta kindir
allvalldr í styr falla,
vandiz hann oc Vinda
veggrimmr á þat snimma.
Hættir var hessa dróttinn
hiör diarfr Gota fiörvi
gullscerdi frá ec gerdo
geir-þey á Scáneyo.

CAP. XXVI.

OROSTA VID DANAVIRKI.

Otta keisari dró saman her mikinn; hann hafði lid af Saxlandi, oc Fracklandi, oc Fríslandi, oc Vindlandi. Fylgdi hanom Burisleifr konungr med mikinn her, oc í lidi var med hanom Olafr Tryggvason, mágur hans. Keisarinn hafði riddara her mikinn, enn miklo fleiri fótgaungo her; hann hafði oc af Holttsetalandi mikinn her. Haralldr Danakonungr sendi Hákon Jarl med Nordmanna her þann sem hanom fylgdi, sudr til Danavirkis, at veria þar landit. Sva segir í Velleklo:

Hitt var auc at eykir
aurbords á vit-nordan
und sigr runni svinnom
sumr Danmarcar runno.
Oc hólmsiötrs hiálmi
Hörda valldr of falldinn
Dofra Dansera iöfra
dróttinn fund of sótti.

Oc vid fyrst at freista
 femilldr konungr villdi
 myrk folldyniar marcar
 mord álfs þess er kom nordan;
 þá er valserkiar virki
 vedr hirdir bad stírdan
 fyrir hlynniördom Hörda
 Hagbarda gramr varda.

Otta keisari kom med her sinn sunnan til Danavir-
 kis; enn Hákon Jarl vardi med síno lidi borgar vegg-
 ina. Danavirki var sva háttat, at fírdur II gánga í
 landit, sínom megin lands hvarr, enn milli fiardar-
 botna höfdu Danir gert borgarvegg mikinn af grióti
 oc torfi oc vidom, oc grafit dyki breitt oc díúpt
 fyrir utan, enn kastalar fyrir borgar hlídom. Þá
 vard orosta mikil. Þess getr í Velleklo:

Vara í gögn þótt gerdi
 gard rögnir styr hardan
 gengilið at gánga
 geir rásar her þeirra.
 Þá er med Frísa fylki
 fór gunnvidor sunnan
 qvaddi vígs oc Vinda
 vags blackridi Fracka.

Hákon Jarl setti fylkingar yfir öll borgarhlidín, enn
 hitt var þó meiri lutr lids, er hann let fara allt med
 borgarveggionom, oc veria þar sem hellz var at
 sótt: fell þar mart manna af keisarans lidi; enn þeir
 fengo ecki unnit at borginni: Snýr þá keisari í brott
 oc leitadi þar ecki lengr til. Sva segir í Velleklo:

Þrym vid logs þar er lögdo
 leik midiungar þridia

arngreddir vard odda
 andvígr, saman randir:
 Sund fæxa kom Söxom
 sæki þróttr á flötta
 þar er sva granir með gumnom
 gærd yr þjódom vardi.

Eptir þessa orosto fór Hákon Jarl apr til scipa
 sinna, oc ætladi þá at sigla norðr aptr í Noreg, enn
 hönom gaf ecki byr, oc lá hann þá úti í Limafirdi.

CAP. XXVII.

SKÍRDR HARALLDR KONUNGR GORMS-
SON OC HÁKON JARL.

Otta keisari snýr þá þegar her sínom til Sles, dregr
 hann þar at ser scipa herin, flytr þar lidit yfir fiör-
 diun á Iótland. Enn er þat spýrr Haralldr Dana
 konungr, þá ferr hann í móti með her sinn, oc verdr
 þar orosta mikil, oc at lýctom fær keisarinn sigr,
 enn Dana konungr flydi undan til Limafíardar, oc
 fór út í Mårsey. Fóro þá menn milli þeirra kon-
 ungs oc keisara, oc var komit gridom á oc stefno-
 lagi, fundoz þeir Otta keisari oc Dana konungr í
 Mårsey. Enn þá bodadi Poppo biskop heilaga trú
 fyrir Haralldi konungi, oc hann bar iárn glóanda í
 hendi ser, oc syndi Haralldi konungi hönd sina ó-
 brunna. Sidan let Haralldr konungr scíraz með allan
 Dana her. Haralldr konungr hafdi ord send Hákon
 þá er hann sat í Mårsey, at Jarl scýllði koma til
 lidveizlo

lidveizlo við hann; var Jarl þá kominn til eyarinnar, er konungr hafði skiraz látið; þendir þá konungr orð, at Jarl skyldi koma til fundar við hann; enn er þeir hittaz, þá naudgar konungr Jarli til at láta skiraz var þá Hákon Jarl skírdur, oc þeir menn allir, er þar fylgdo hanom, feck þá konungr í hendur hönom presta oc adra lærda menn, oc segir at Jarl skal láta scira allan lyd í Noregi. Scilldoz þeir þá; fer Hákon Jarl út til hafs, oc bídr þar byriar.

CAP. XXVIII.

HÁKON JARL KASTAR TRÚ SINNI, BLÓTAR
OC HERIAR Á GAUTLAND.

ENN er vedr þat kemr, er hanom þótti sem hann mundi í haf bera, þá scaut hann á land upp öllum lærdom mönuom, enn hann sigldi þá út á haf, enn vedr gekk til útsudrs oc vesturs, siglir Jarl þá austr í gegnom Eyrarsund, heriar hann þá á hvartveggja land. Síðan siglir hann austr fyrir Scáneyar síðo oc heriadi þar, hvar sem hann kom við land. Enn er hann kom austr fyrir Gautascer, þá lagði hann at landi: gerdi hann þar blót mikit. Þá komo þar fliúgandi hrafnar tveir oc gullo hátt, þá þickiz Jarl vita, at Odinn hefir þegit blótið, oc þá mun Jarl hafa dag-rád til at beriaz. Þá brennir Jarl scip sín öll, oc gengr á land upp með lidi síno öllo, oc fór allt herscilldi. Þá kom á móti hönom Ottar Jarl;

hann red fyrir Gautlandi; átto þeir saman orosto mikla, fær þá Hákon Jarl sigr, enn Ottar Jarl fell, oc mikill luti lids med hönom. Hákon Jarl fær um Gautland hvarttveggja oc allt med herscildi, til þess er hann kemr í Noreg; fer síðan landveg allt norðr í Þrándheim. Frá þesso segir í Velleklo:

Flotta geck til frettar
felli niördr á velli
draugr gat dolga sogo
dagräd Hedins váða;
oc hald bodi hilldar
bræ gamma sá ramma
tyr villdi þá tyna
tein hlautar fiör Gauta.

Hádi Jarl þar er áðan
engi mannr und ranni
hyriar þing at heria
hiör lautar koin Sörla.
Bara máðr língs enn lengra
lopt vardadar barda
allt vann grammr of gengit
Gautland, frá síá randir.

Valföllum hlód völlu,
vard röгна konr gagni
hrídar ass at hrósa,
hlaut Odinn val, Fróða.
Hver se if nema iöfra
ætt ryri god styra
ramm aukinn qved ec ríki
rögn Hákonar magna.

CAP. XXIX.

HEIMFERD OTTO KEISARA.

Otta keisari fór aptr í Saxland í ríki sitt. Scilld-

oz þeir Dana konungr med vinátto. Sva segia menn, at Otta keisari gerdi gudsifjar vid svein, son Harallds konungs, oc gaf hönom nafn sitt, oc var hann sva seirdr, at hann het Otta-Sveinn. Haralldr konungr hellt vel kristni allt til daudadags. Burislafr konungr fór þá til Vindlands, oc med hanom Olafr mágur hans. Þessarar orosto getr Hallfredr Vandrædascalld i Olafsdrápo:

Böd serkiar hió birki
barklaust í Danmörko
hleypi meidr fyrir Heida
hlunn viggia bæ suman.

CAP. XXX.

FERD OLAFS KONUNGS AF VINDLANDI

Olafr Tryggvason var III vetur á Vindlandi, ádr Geira drottning tók sótt, þá er hana leiddi til bana. Olafi þótti þat sva mikill skadi, at hann festi eigi yndi á Vindlandi sidan: red hann ser þá til hersci-pa, oc fór þá enn í hernad: heriadi fyrst um Fris-land, þar næst um Saxland, oc allt í Flæmingia-land. Sva segir Hallfredr Vandrædascalld:

Tíð höggvit let Tiggi
Tryggva sonr fyrir styggvan
leiknar hest á lesti
líótvaðin hræ Saxa.
Vin hróðigr gaf víða
vísi margra Frísa
blöcko brúnt at drecka
blóð qvelldríðo stódi.

Rógs bar recca lægir
 ríkir valkæra líki,
 herstefnir let hröfnom
 holld Flæmingia golldit.

CAP. XXXI.

HERNADR OLAFS KONUNGS TRYGGVA
SONAR.

Síðan hellt Olafr Tryggvason til Englands, oc heriadi víða um landit; hann sigldi allt norðr til Norðimbraland, oc heriadi þar; þaðan hellt hann norðr til Skotlands, oc heriadi þar víða: þaðan sigldi hann til Sudreya, oc átti þar nockorar orostor; síðan hellt hann suðr til Manar, oc bardiz þar; hann heriadi oc víða um Írland; þá hellt hann til Bretlands, oc heriadi víða þat land, oc sva þar er kallat er Kumraland: þaðan sigldi hann vestr til Vallands, oc heriadi þar; þá sigldi hann vestan oc ætladi til Englands; þá kom hann í eyar þær er Syllingar heita, vestr í haf frá Englandi. Sva segir Hallfredr Vandræðascanld:

Gördiz ungr við Engla
 ofvægr komungr bægia
 naddskúrar red nærir
 Norðimbra sá mordi.
 Eyddi álfa greddir
 ógu blidr Scótom víða
 gerdi seims með sverdi
 sverdleik í Mön scerdir.
 Ydrógar let ægir

eyverskan her deya
 tyrr var tiörva dyrra
 tírargiarn, oc Ira.
 Bardi Brezkrar iardar
 byggvendr oc hió tiggi
 grádr þvarr geira hrídar
 gióði Kunskar piódir.

Olafr Tryggvason var IV vetor í þessom hernadi, síðan er hann fór af Vindlandi, til þess er hann kom í Syllingar.

CAP. XXXII.

SKÍRDIZ OLAFR KONUNGR TRYGGVASON Í SYLLINGOM.

Olafr Tryggvason, þá er hann lá í Syllingom spurdi hann at þar i eyonni var spámanadr nockorr, sá er sagdi fyrir úordna luti, oc þótti mörgom mönnum þat miök eptr ganga. Gerdiz Olafi forvitni á at reyna spádom mans þessa. Hann sendi þann af mannom sínom, er fridastr var oc mestr, oc bió hann sem vegligaz, oc bad hann segia at hann væri konungr; þvíat Olafr var þá frægr ordinn af því um öll lönd, at hann var fridari oc göfugligri oc meiri, enn allir menn adrir. Enn síðan er hann fór or Gardariki, hafði hann ei meir af nafni síno, enn kalladi sic Ola, oc qvadz vera Gerzer. Enn er sendimadr kom til spámanzins, oc sagdiz vera konungr, þá feck hann þessi andsvör: ecki ertú konungr, enn þat er ráð mitt, at þú ser trúr konungi þínom;

eigi segir hann fleira þessom manni: fór sendimadr aptr, oc segir Olafi, oc fysti hann þess at meirr at finna þenna mann, er hann heyrði slik andsvör hans, oc tók nú ifa af hanom, at hann væri eigi spámadr. Fór þá Olaf á hans fund, oc átti tal við hann, oc spurdi eptir hvat spámadr segdi Olafi fyrir, hvernog honom mundi veita at ganga til ríkis, edr annarar hamingio? Einsetomadrinn svarar með helgom spádómi: þú mant verða ágætr konungr, oc ágæt verk vinna, þú mant mörgom mönnum til trúar koma oc skírnar, manto bæði þer hialpa í því oc mörgom öðrom; oc til þess, at þú ifir eigi um þessi mín andsvör, þá máttu þat til marks hafa, þú mant við scíp þín svikom mæta oc flockom, oc mun á bardaga rætað, oc manto tyna nockuro lidi, oc siálfr sár fá, oc manto af því sári banvænn verða oc á scilldi til scips borinn; enn af þesso sári manto þó heill verða innan VII náttu, oc brátt við skírn taka. Síðan fór Olaf ofan til scipa sinna, oc þar mætti hann úfriðarmannom þeim er hann villdo drepa oc lid hans, oc varð þar bardagi, oc fóru þeirra viðscipti sva sem einsetomadr hafði sagt hönom, at Olaf var sár borinn á skilldi á skip út, oc sva, at hann varð heill á VII nóttom. Þóttiz þá Olaf vita, at þessi madr mundi hanom sanna luti sagt hafa, oc þat at hann var sannr spámadr, hvadan af sem hann hefði þann spádóm. Fór þá Olaf annat sinn at finna þenna spámann, taladi þá mart við hann, spurdi vendiliga, hvadan hönom kom sú speki, er hann

sagdi fyrir ú-ordna luti. Einsetomadr sagdi, at siálfir Guð kristinna manna let hann vita allt þat er hann forvitnadiz, oc sagdi hann þá Olafi mörg stórmerki almáttugs Guðs, oc af þeim fortölom játti Olafur at taka scírn, oc sva var, at Olafur var scírdur þar, oc allt föroneyti hans. Dvalldiz hann þar miök lengi, oc nam retta trú, oc hafði með sér presta, oc adra kærda menn.

CAP. XXXIII.

OLAFUR FECK GYDU.

Olafur sigldi or Syllingom um haustit til Englands; lá þar í höfn einni, oc fór þar með frídi, þvíat England var kristit, oc hann var oc kristinn orðinn. Enn þar fór um landit þingbóð nockot, oc allir menn scylldo till þings koma. Enn er þing var sett, þá kom þar drottning ein er Gyða er nefnd, systir Olafs Kvarans er konungur var á Irlandi í Díslinni; hon hafði gípt verit á Englandi Jarli einom ríkom, var sá þá andadr, enn hon hellt eftir ríkinu. Enn sá madur var í ríki hennar, er nefndur var Alvini, kappi mikill, oc hólmgango-madr; hann hafði bedit hennar, enn hon svarar sva, at hon villdi kiör af hafa, hvern hon villdi eiga, af þeim mönnum er í hennar ríki voro, oc var fyrir þá söc þings qvatt, at Gyða skyldi sér mann kíosa; var þar kominn Alvini, oc búinn með hinom besto klædom, oc margir adrir voro þar vel búnir. Olafur var þar

kominn, oc hafði vas-klæði sín, oc lodkápo ytzta, stód hann með sína sveit út ífrá ödrom mönnum. Gyda geck oc leit á sérhvern mann, þann er henni þótti nockot mans mót at vera. Enn er hon kom þar sem Olaf stód, oc sá upp í andlit hanom, spurdi hon, hver madr hann er; hann nefndi sic Ola; em ec útlendr madr her, segir hann. Gyda mællti: villto eigia mik, þá vil ec kíosa þic. Eigi vil ec neita þvi, segir hann. Hann spurdi, hvert nafn þeirrar kono var, ætt edr ödli. Gyda heiti ec, segir hon; dóttir konungs af Irlandi; var ec gipt hingat til lands Jarli þeim, er her red ríki. Nú síðan er hann andadiz, þá hefi ec styrt ríkinu, menn hafa bædit mín, oc engi sá er ec villda giptaz. Hun var úng kona oc allfrid. Tala þau síðan þetta mál, oc semia þat sín á milli; festir Olaf ser Gydo.

CAP. XXXIV.

HOLMGÁNGA ALFVINA OC OLAFS
KONUNGS.

Alfvina líkar nú afarilla. Enn þar var sidr á Eng-landi, ef H keptoz um einn lut, at þar sylldi koma til hólmgánga; bydr Alfvini Olafi Tryggva syni til hólmgango um þetta mál. Þeir leggja með ser stefnoiag til bardaga, oc sculo vera XII hvarir. Enn er þeir finnaz, mælir Olaf sva við sína menn, at þeir geri sva sem hann gerir; hann hafði öxi micla: enn er Alfvini villdi höggva sverdi til konungs, þá

laust hann sverdit or höndom hanom, oc annat högg siálfan hann, sva at Alfvini fell; síðan batt Olafr hann fast: Fóro sva allir menn Alfvina, at þeir voro bardir oc bundnir, oc leiddir sva heim til herbergia Olafs. Síðan bad hann Alfvina fara or landi brott, oc koma eigi aptr; enn Olafr tók allar eigor hans. Olafr feck þá Gydo, oc dvalldiz á Englandi, enn stundom á Irlandi:

CAP. XXXV.

OLAFR KONUNGR TRYGGVASON
FÆR HUNDINN VÍGIA.

Þá er Olafr var á Irlandi, var hann staddr í herferd nockorri, oc sóro þeir med scipom; oc þá er þeir þurftu strandhöggva, þá gánga nienn á land upp, oc reka ofan fiölda bú-smala: þá kemr þar eptir bóndi einn, oc bad Olaf gefa ser kyr þær, er hann átti. Olafr bad hann hafa kyr sínar, ef hann mætti kenna, oc dvel eigi ferd vora. Bóndi hafdi þar mikinn hiard-hund; hann visadi hundinom í nauta floekana, oc varo þar rekin mörg hundrot nauta; hundrinn lióp um alla nauta floekana, oc rac í brott jam-mörg naut, sem bóndi qvadz von eiga, oc voro þau öll á einn veg mörcot; þóttos þeir þá vita, at hundrinn mundi rett kent hafa. Þeim þótti hundr sá furdovitr. Þá spur Olafr, ef bóndi vill selia hanom hundinn? at helldr, segir bóndi, at

oc. vil giarna gefa þer. Olafur gaf hönom þegar í stad gullhring, oc het hanom vinátto sinni. Sá hundur het Vigi, oc var allra hunda bestr; átti Olafur hann lengi síðan.

CAP. XXXVI.

FRÁ HARALDI KONUNGI GORMSSYNI OC
HERNADI HANS TIL ISLANDS.

Haraldr Gormsson Dana konungr spurdi at Hákon Jarl hafði kastat cristni, enn heriat land Dana konungs víða. Þá bauð Haraldr Dana konungr her út, oc fór síðan í Noreg; oc er hann kom í þat ríki, er Hákon Jarl hafði til forráða, þá heriar hann þar oc eyddi land allt, oc kom lidino í eyar þær er Sólundir heita. Fimm einir bæir stóðu eptir í Læradal, enn fólk allt flyði á fiöll oc markir, með lausafe þat allt er með mátti komaz. Þá ætladi Dana konungr at sigla lidi því mikla til Islands, oc hefna nids þess, er allir Islendingar höfðu níðdan hann. Þat var í lögom haft á Islandi, at yrkia scyllði um Dana konung níðvíso fyrir nef hvert, er var á landino. Enn sú var söc til, at scip þat er Islendzkir menn höfðu átt, braut í Danmörk; enn Danir tóku upp se allt, oc köllodo vagrec, oc red fyrir því bryti konungs, er Birgir het; var níðit ort um þá báða. Þetta er í níðino:

Þá er sparn á mó mörnis
mordkunnur Haraldr sunnan,

varð þá vinda myrdir
 vax eitt í ham Fæxa.
 Enn bergsalar Birgir
 böndom rækr í landi
 þá sá ölld í iöllo
 úríkr fyrir líki.

CAP. XXXVII.

 HARALLDR KONUNGR SENDIR KUNGAN
 MANN HAMFÖROM TIL ÍSLANDS.

Haralldr konungr baud kungom manni at fara í hamförom til Íslands, oc freista hvart hann kynni segia hanom: sá fór í hvals líki. Enn er hann kom til landsins, þá fór hann vestr fyrir nordan landit; hann sá at fiöll öll oc hólar voro fullir af landvættom, sumt stórt enn sumt smátt. Enn er hann kom fyrir Vapnafiörd, þá hellt hann inn á fiördinn, oc ætladi á land at gánga; þá fór ofan or dalnom dreki mikill, oc fylgdo hanom margir ormar, pöddor oc edlor, oc bleso eitri á hann; enn hann lagdiz í brott, oc vestr fyrir land, allt fyrir Eyafiörd; fór hann inn eptir þeim firði; þar fór móti hanom fugl sva mikill, at vængirnir tóko út fiöllin tveggja vegna, oc fiölldi annara fugla, bæði stórir oc smáir. Braut fór hann þadan, oc vestr um landit, oc sva sudr á Breidafiörd, oc stefndi þar inn á fiörd; þar kom móti hanom gridungr mikill, oc ód á sæinn út, oc tók at gella ógurliga; fiölldi landvætta fylgdi hö-

nom. Brott fór hann þadan, oc sudr um Reykianes, oc villdi þar gánga upp á Vikar-skeidi. Þar kom á móti hanom bergrisi, oc hafdi járnstaf í hendi oc bar höfudit hærra enn Fiöllin, oc margir adrir jötnar med hanom. Þadan fór hann austr med endilaungo landi; var þá ecki, segir hann, nem sandar öræfi, oc brim mikit fyrir utan; enn haf æva mikit millom landanna, segir hann, at ecki er þar fært lánscipom. Þá var Brodd-Helgi í Vapnafirdi; Eyolfur Valgerdason í Eysafirdi; Þórdr Gellir í Breidafirdi; Þóróddr Godi í Olfusi. Síðan sneri Dana konungr lifði síno sudr med landi, oc fór síðan til Danmerkr; enn Hákon Jarl let byggja land allt, oc gallt enga skatta Dana konungi, medan hann lifdi.

CAP. XXXVIII.

FALL HARALLDR GORMSSONAR.

Sveinn sonr Harallds konungs, sá er síðan var kalladr Tiúguscegg, beiddiz rikis af Haralldi konungi födor sínom; enn þá var enn sem fyrr, at Haralldr konungr villdi eigi tvískipta Danavelli, oc vill ecki ríki fá hönom. Þá allar Sveinn ser herseipa, oc segir, at hann vill fara í viking; enn er lid hans kom allt saman, oc þá var kominn til lids við hann af Jomsvíkingom Pálnatóki, þá hellt Sveinn til Siálands, oc inn í Isafiörd; þá var þar fyrir med scipom sínom Haralldr konungr fadir hans, oc bióz at fara í leidángur. Sveinn lagdi þegar til orosto við

hann; varð þar bardagi mikill. Dreif þá lid sva mikit til Harallds konungs, at Sveinn varð ofrlidi borinn oc flydi. Þar feck Haralldr konungr sár þau, er haun leiddo til bana. Síðan var Sveinn til konungs tekinn i Danmörk. Þá var Sigvalldi Jarl yfir Jomsborg á Vindlandi: hann var son Strút-Harallds konungs, er rádit hafdi fyrir Scáni: Bræðor Sigvallda voro þeir Hemingr oc Þórkell enn Háfi. Þá var oc höfdingi yfir Jomsvíkingom Búi Digri af Borgundarhólmi oc Sigurdr bródir hans. Þar var oc Vagn son þeirra Aka oc Þórgunno, systorson þeirra Búa. Sigvalldi Jarl hafdi höndom tekit Svein konung, oc slutt hann til Vindlands til Jomsborgar, oc naudgadi hanom til sætta við Burislaf Vinda konung, oc til þess at Sigvalldi Jarl scylldi gera sætt milli þeirra. Sigvalldi Jarl átti þá Astrídi, dóttor Burislafs konungs. Enn at öðrom kosti segir Jarl, at hann mundi Svein konung fá í hendor Vindom. Enn konungr vissi þat, at þeir mundo qvelia hann til bana; játti hann fyrir því sættargerð Jarls. Sigvalldi Jarl dæmði þat, at Sveinn konungr scylldi fá Gunnhildi dóttor Burislafs konungs, enn Burislafr konungr scylldi fá þyri Harallds dóttor, systor Sveins konungs; enn hvartveggi þeirra scylldi hallda ríki síno, oc scylldi vera fridr milli landa. Fór þá Sveinn konungr heim í Danmörk með Gunnhildi kono sína. Þeirra synir voro þeir Haralldr oc Knútr hinn Ríki. I þann tíma heitodoz Danir miök at fara með her i Noreg á hendor Hákonu Jarli.

CAP. XXXIX.

HEITSTRENGING JOMSVÍKINGA.

Sveinn konungr gerdi mannbod ríkt, oc stefndi til sín höfðingjom öllum, þeim er voro í ríkinu. Hann scyllði erfa Haralldr föðor sinn. Þá hafði oc andaz litlo ádr Strút-Haralldr á Scáni, oc Veseti í Borgundarhólmi, fadir þeirra Búa Digra. Sendi Sveinn konungr þá ord þeim Jomsvíkingom, at Sigvalldi Jarl oc Búi, oc bræðor þeirra scylldo þar koma, oc erfa fedor sína, at þeirri veizlo, er konungr gerdi. Jomsvíkingar fóro til veizlonnar med öllo lidi sino, því er fræknaz var. Þeir höfdo XL scipa af Vindlandi, enn XX scip af Scáni. Þar kom saman allmikit fiölnenni. Fyrsta dag at veizlonni, ádr Sveinn konungr stígi í hásæti föðor síns, þá drack hann minni hans, oc strengdi heit, ádr III vetor værilidnir, at hann scyllði vera kominn med her sinn til Englands, oc drepa Adalráð konung, edr reka hann orlandi. Þat minni scylldo allir drecka, þeir er at erfino voro. Því næst var skeinkt fyrst höfðingjom Jomsvíkinga hin stærsto horn af enom sterkasta dryck, er þar var. Enn er þat minni var afdruckit, þá scyllði drecka Cristsminni allir menn, oc var Jomsvíkingom borit æ-fullast oc sterkastr dryckrinn. Hit þridia var Michials minni, oc drucko þat allir. Enn eptir þat drack Sigvalldi Jarl minni föðor síns, oc strengdi heit síðan, at ádr III vetor væri lidnir, scyllði hann vera kominn í Noreg, oc drepa Hákon

Jarl, eda reka hann or landi. Síðan strengdi heit Þórkell Háfi bróðir hans, at hann scyllði fylgia Sigvallda bróðor sínom til Noregs, oc flya eigi or orosto sva at Sigvalldi berdiz þá eptir. Þá strengdi heit Búi Digri, at hann mundi fara til Noregs með þeim, oc flya eigi or orosto fyrir Hákonu Jarli. Þá strengdi heit Sigurdr bróðir hans, at hann mundi fara til Noregs, oc flya eigi meðan meiri lutr Jomsvikinga berdiz. Þá strengdi heit Vagn Akason, at hann scyllði fara með þeim til Noregs' oc koma, eigi aptr, fyrr enn hann hefði drepit Þórkell Leiro, oc gengit í reckio hiá Ingibiörgu dóttur hans, utan frænda ráð. Margir höfðingiar adrir strengdo heit ymíssa luta. Drucko menn þann dag erfit. Enn eptir um morguninn, þá er Jomsvikingar voro údrucknir, þóttot þeir hafa fullmællt, oc hafa málstefnir sína, oc ráða ráðom, hvernog þeir sculo tilstillia um ferdina; ráða þat af, at búaz þá sem scyndiligaz. Búa þá þegar scip sín oc herlid: Vard þat allfrægt yda um lönd.

CAP. XL.

HERBOD ÞEIRRA EIRÍKS OC HÁKONAR
JARLA.

Eiríkr Jarl Hákonar son spyr þessi tíðindi; hann var þá á Raumaríki; dró hann þegar lid at ser, oc ferr til Upplanda oc sva norðr um Fíall til á Þrándheims, fund Hákonar Jarls föðor síns. Þess getr Þórdr Kolbeinsson i Eiríks-drápo:

Oc sannliga sunnan
 sásc vid bóendor háscá
 stríð of Stála meida
 Stór hersögur fóro.
 Súðlaungom frá ee Sveida
 sunnr af dregnom hlunni
 vangs á vatn of þrúngit
 viggoleid Dana sceidom.

Hákon Jarl oc Eiríkr láta scera upp herör umt öll
 þrændalög; senda oc bod á Mæri hvaratveggjo, oc í
 Raumsdal, sva norðr í Naumodal oc á Háogaland.
 Stefna síðan út öllum almenning, bæði at lidi oc
 scipom. Sva segir í Eiríksdrápo:

Miök let margar sneckior
 Mærder örr sem knörro,
 óðr vex scáldz, oc skeidar
 scialld lynr á brim dynia.
 Þá er ólitin utan
 elherdir fór gerða,
 mörg var lind fyrir landi,
 lönd síns föðor röndo.

Hákon Jarl hellt þegar sudr á Mæri í niösn, oc í
 lid samnat; enn Eiríkr Jarl dró saman herinn oc
 flutti nordan.

CAP. XLI.

FERD JOMSVIKINGA Í NOREG.

Jomsvíkingar helldo lidi síno til Limafiardar, oc
 sigldo þadan út á hafit oc höfðo LX scipa, oc
 komo utan at Ögðom; hallda þegar lidino norðr á
 Rogaland,

Rogaland, taka þá at heria þegar er þeir koma í ríki Hákonar Jarls, oc fara sva norðr med landi, oc allt við herscilldi. Geirmundr er sá madr nefndr, er fór med hleypiscúto eina, oc nockirir menn med hanom; hann kom fram norðr á Mæri, oc fann þar Hákon Jarl, geck inn fyrir bordit, oc segir Jarli tíðindi, at her var sudr í landi, kominn af Danmörk. Jarl spurdi, ef hann vissi sannindi á því. Geirmundr brá upp hendi annari, oc var þar afhöggvinn hreifinn, segir, at þar voro iartegnir, at her var í landino. Síðan spurdi Jarl inniliga um her þenna. Geirmundr segir, at þar voro Jomsvíkingar, oc höfðo drepit marga menn, oc víða rænt; fara þeir þó, segir hann, sciótt oc allákaflika; vætti ec, at eigi muni ádr langt líða, enn þeir muni her niðr koma. Síðan reri Jarl alla fiördo inn med ödro landi, enn út med ödro, oc feck ser lid, fór dag oc nótt, oc hafði niósn et efra um Eid, sva sudr í Fiördo; sva oc nord, þar er Eiríkr fór med herinn. Þess getr í Eiríksdrápo:

Setti Jarl sá er'atti
 ógnfródr á lög stóði
 hrefnis báfa stafna
 hót Sigvallda at móti.
 Margr scalf hlumr enn hvergi
 huggendr bana ugdo
 þeir er gato síá slíta
 sárgamms blödom ára.

Ferr Eiríkr Jarl med herinn sudr sem snúdoligaz.

CAP. XLII.

FRÁ JOMSVÍKINGOM OC ÞEIRA
HERNADI.

Sigvalldi Jarl hellt lidi síno norðr um Stad, lagði fyrst til Hereya. Þótt víkinga finni landsmenn, þá sögdo þeir alldri satt til hvat Jarlar höfðoz at. Jomsvíkingar heriado hvar sem þeir fóro; þeir lögdo utan at Höð, runno þar upp oc heriado, ráko til scipa bæði menn oc bú, enn drápo karla þá er vígt var at. Enn er þeir fóro ofan til scipa, þá kom þar til þeirra gángandi bóndi einn: enn þar fór nær sveit Búa. Bóndiinn mællti: þer farit óhermannliga, rekit till strandar kyr oc kálfa, væri ydr meiri veidr at taka biörninn, er nú er nær kominn á biarnbásinn. Hvát segir karl, segia þeir, kanto nockot segia oss til Hákonar Jarls? Bóndi sagði: hann fór í gær inn í Hiorundar fiörd, hafði Jarl eitt scip eda tvö, eigi voro fleiri, enn III, oc hafði ecki till ydar spurt. Þeir Búi taka þegar á hlaup til scipanna, oc láta laust allt herfáng. Búi mællti: Niótom ver nú, er ver höfom fengit niósn af Jarli oc verom næstir sigrinom. Enn er þeir koma á scipin, róa þeir þegar út. Sigvalldi Jarl kallar á þá, oc spurdi tíðinda. Þeir segia at Hákon Jarl var þar inn í fiördinn. Síðan leysir Jarl flotann oc róa fyrir nordan eyna Höð.

CAP. XLIII.

UPPHAF JOMSVÍKINGA OROSTO.

Hákon Jarl oc Eiríkr Jarl son hans lágo í Hall;

kellsvík; var þar saman kominn her þeirra allr; höfdo þeir hálft annat hundrat scipa, oc höfdo þá spurt, at Jomsvíkingar höfdo lagt utan at Höd: rero þá Jarlarnir sunnan at leita þeirra. Enn er þeir koma þar sem heitir Hiörunga-vágr, þá finnaz þeir: scipa þá hvarirtveggio lidi síno til atlögo. Var í midio lidi merki Sigvallda Jarls framborit: þar í mót scipadi Hákon Jarl til atlögo; hafdi Sigvalldi Jarl XX scíp enn Hákon Jarl LX scipa. I lidi Hákonar Jarls voro þessir höfdingiar: Þórir Hiörtr af Hálogalandi; annar Styrcár af Gimsom. I annan fylkingar-arm var Búi Digri oc Sigurðr bródir hans, med XX scipom. Þar lagdi í mót Eiríkr Jarl Hákonar son med LX scipa, oc med hönom þessir höfdingiar: Gudbrandr Hvíti af Upplöndom, oc Þorkell Leira, Wíkverscr madr. I annan fylkingararm lagdi fram Vagn Akason med XX scipom; en þar í móti Sveinn Hákonar son, oc med hanom Skeggi af Yriom af Upphaugi, oc Rögnvalldr or Ærvík af Stadi, med LX scipa. Sva segir í Eiríksdrápo:

Enn í gegn at gunni
 glæheims skrido mæar
 rendi langt med landi,
 leidángr, Dana skeidom,
 þær er Jarl und árom
 ærins gulls á mæri
 Barms rac vígg und vörmom
 valkesti, raud flestar.

Eyvindr Skaldaspillir segir oc sva í Háleygiatali:

þar vard minztr
 mein vinnöndom

Yngvi Freys
 ösverdan dag
 fagna fundr,
 er flota þeysto
 iadrádendor
 at cyððendom.
 Þá er sverd-álfr
 sunnan knyði
 lagar stóð,
 at lidi þeirra.

Síðan lögðu þeir saman flotann, og tókz þar enn grimmastu orösta, og fell mart af hvaromtveggjum, og mikló fleira af Hákonar lidi, þvíat Jomsvíkingar börðoz bæði hraustliga og diarfliga og snarpliga og scuto allt í gegnum sciölddona. Og sva mikill vapna-
 burðr var at Hákonu Jarli, at brynja hans var slitin til ónyts, sva at han kastadi af sér. Þess getr Finr Hallkelsson:

Varda Gims sem gerði
 gerðr biúglímom herða
 gnyr óx Fiölnis fura
 farlig sæing Jarli.
 Þá er hríngfám hánga
 hryusere vidorr brynio
 hrudoz ridmarar roda
 rastar vard at kasta.

Þars í sundr á sundi
 Sörla líós fyrir Jarli
 þess hefir seggia sessi
 sere hríngofin merki.

CAP. XLIV.

FLÓTTI SIGVALLDA JARLS.

Jomsvíkingar höfðu scíp stærri og bordmeiri, enn

hvarirtveggio sóttu et diarfasta. Vagn Akason lagdi sva hart fram at scipi Sveins Hákonarsonar, at Sveinn let á hömlo síga undan, oc hellt vid flóttan. Þá lagdi þannog til Eiríkr Jarl oc fram í fylking móti Vagni. Þá let Vagn undan síga, oc lágo scipin sem í fyrsto höfðu legit. Þá red Eiríkr aptr til lids síns, oc höfðu þá hans menn undanhamlat: enn Búi hafði þá höggvit tengslin, oc ætladi at reka flóttann. Þá lagdi Eiríkr Jarl síbyrt vid scip Búa, oc varð þá högg-orosta en snarpasta, oc lögðu þá II edr III Eiríks scip at Búa scipi eino; þá gerdi illvidri oc el sva mikit, at haglkorn eitt va eyri. Þá hió Sigvalldi tengslin, oc sneri undan scipisíno, oc villdi flya. Vagn Akason kallar á hann, oc bað hann eigi flya; Sigvalldi Jarl gaf eingan gaum at, hvat hann sagði; þá scaut Vagn spióti at hönom, oc laust þann er vid styrit sat. Sigvalldi Jarl rerir í brott med hálfan fiórða tug scipa, enn eptir lá hálfr þridi tug.

CAP. XLV.

BÚI DIGRI STEYPTIZ FYRIR BORD.

Þá lagdi Hákon Jarl sitt scip á annat bord Búa; var þá Búa mönnuom scant höggva í millom. Vigfús Víga-Grumsson tók upp nefstedia er lá á þilionom, er madr hafði ádr hnódit vid hugró á sverd síno; Vigfús var allsterkr madr; hann kastadi stedianom tveim höndom oc færði í höfot Asláki Hólm-scalla, sva at geirin stóð í heila nidri. Aslák höf-

do eigi ádr vapn bitit, enn hann hafði höggvit til beggia handa; hann var föstri Búa, oc stafnbúi. Enn annarr var Hávarðr Höggvandi: hann var enn sterkasti madr oc allfrækn. Í þessari atsócn gengo upp Eiríks menn á scíp Búa, oc aptr at lyptingunni at Búa. Þá hió Þórsteinn Midlángur til Búa um þvert nefit í sundr nefbiörgina, oc varð þat allmikít sár; enn Búi hió til Þórsteins utan á síðuna, sva at í sundr tók manninn í midio. Þá tók Búi upp kistor tvær fullar gulls, oc kalladi hátt: fyrir bord allir Búa lidar! steiptiz Búi þá utan bords med kisturnar, oc margir hans menn hliópo þá fyrir bord, enn sumir fello á scípino, þvíat eigi var gott grida at bidia; var þá hrodit allt scíp Búa med stöfnom, enn síðan hvert at öðro.

CAP. XLVI.

BUNDNIR JOMSVÍKINGAR Á STRENG.

Síðan lagði Eiríkr Jarl at scípi Vagns, oc var þar allhörd vidrtaka. Enn at lyctom var hrodit scíp þeirra, enn Vagn handtekinn, oc XXX manna med hönom, oc sluttir á land upp bundnir. Þá geck til Þórkell Leira, oc mællti: þess strengdir þú heit Vagn, at drepa mik; enn mer þíkir hitt nú líkara, at ec drepa þik. Þeir Vagn sátu á einni lág allir saman: Þórkell haldi eina mikla öxi, hann hió þann er yztr sat á láginni. Þeir Vagn voro sva bundnir, at einn strengur var snúinn at fótum þeim öllum,

enn lausar voro hendur þeirra. Þá mællti ein þeirra: dálk hefi ec í hendi, oc mun ec stinga í iördina, ef ec veit nockot, þá er höfot er af mer höggvit: höfot var af hönom höggvit, oc fell nidr dálkrinn or hendi hanom. Þá sat madr allfrídr oc hædr vel, hann sveipti hárino fram yfir höfot ser, oc retti fram hál-sinn oc mælti: gerit eigi hárit í blódi. Einn madr tók hárit í hönd ser oc hellt fast. Þórkell reiddi at öxina; víkingrinn kipti höfdino fast, laut sá eptir er hárino hellt, enn öxin reid ofan á bádar hendur hönom, oc tók af sva at öxin nam í iördo stad; þá mællti Vagn Akason oc hló: eigi ero enn allir Joms-víkingar daudir. Þá kom at Eiríkr Jarl oc spurdi: hverr er þessi madr hinn frídi? Sigurd kalla mik sveinar, segir hann, oc eni ec kenningarson Búa; Eiríkr segir: þú munt vera at visso sannr son Bua, villto hafa grid, segir Jarl. Þat sciptir hverr bydr, sagdi Sigurdr. Sá bydr, segir Jarl, er valld hefir till, Eiríkr Jarl. Vil ec þá, segir hann: var hann þá tekinn or strenginom. Þá mællti Þórkell Leira: villto, Jarl, þessa menn alla láta grid hafa, þá scal alldrei med lífi fara Vagn Akason; hleypr þá fram med reidda öxina, enn víkingr Skardi reiddi sik til falls í strenginom, oc fell fyrir fætor Þórkelli; Þórkell fell flatr um hann. Þá greip Vagn öxina, oc hió Þórkel med bana högg. Þá mællti Jarl: Vagn, villtu hafa grid. Vil ec, segir hann, ef ver höfom allir. Leysi þá or strenginom, segir Jarl, oc sva var gert. XVIII voro drepnir, enn XII þágo grid

CAP. XLVII.

DRÁP GISSURAR AF VALLDRESI.

Hákon Jarl oc margir menn með hanom sátu á tre eino, þá brast strengr á scipi Búa, enn ör sá kom á Gitzor af Valldresi, lendanmann; hann sat næst Jarli, oc var búinn allvegliga. Síðan gengo menn á skipit út, oc fundu þar Hávard Höggvanda, oc stód hann á kníám vid bordit út, þvíat fætornir voro af hönom höggðir; hann hafði boga í hendi. Enn er þeir komu á skipit út, þá spurði Hávardr: hverr fell af láginni? þeir sögðu, at sá het Gitzor. Þá varð minna happit enn ec villda, segir hann. Ærit var óhappit, segia þeir, enn eigi skallto vinna fleiri, oc drepa hann. Síðan var vallrinn kannadr, oc borit se til lutsciptis, hálfir þridi tugr scipa af þeim Jomsvíkingom. Sva segir Tindr Hallkelsson:

Vann á Vinda Sínni
 verð bióðr hugins ferdar
 beit solgagar seilar
 sverds eggja spor leggi.
 Aðr hiör meidar hrióða
 hætting var þat mætti
 lidar lángra skeida
 lids hálfan tog þridia.

Síðan skilia þeir her þenna; fer Hákon Jarl til Þrándheims, oc líkadi stórilla, er Eiríkr Jarl hafði grid gefit Vagni Akasyni. Þat er sögn manna, at Hákon Jarl hafi í þessari orosto blotit til sigurs ser Erlingi syni sínom, oc síðan gerði el, oc þá sneri

mannfallino á hendur Jomsvíkingom. Eiríkr Jarl fór þá til Upplanda, oc sva austr í ríki sitt, oc fór Vagn Akason med hanom. Þá gipti Eiríkr Jarl Vagni Ingibiörgo dóttor Þórkels Leiro, oc feek hanom lánscip gott med öllum reida, oc feek hanom sci-pan til. Scilldoz þeir inir kærsto vinir: fer þá Vagu heim sudr til Dannmerkr, oc vard hann síðan ágætr madr, oc er mart stórmenni frá hönom komit.

CAP. XLVIII.

DAUDI HARALLDSKONUNGS GRÆNSKA.

Haralldr Grensci var konungr á Vestfolld, sem fyrr er ritit, hann feek Asto dóttor Gudbrands Kúlo. Eitt sumar, þá er Haralldr Grænski fór í Austrveg í hernat, at fá ser fiár, þá kom hann í Svíþíód. Þá var þar konungr Olafr Sænski; hann var son Eiríks konungs ens Sigrsæla, oc Sigrídar, dóttor Scöglar-Tosta; var Sigrídr þá eckia, oc átti mörg bú oc stór í Svíþíód. Enn er hon spurdi at þar var kominn vid land scamt í brott Haralldr Grænski föst-bródir hennar, þá sendi hon menn til hans, oc baud hanom til veizlo. Hann lagdiz þá ferd eigi undir höfot oc fór vid mikla sveit manna til Sigrídar. Þar var allgódr fagnadr; sat konungr, oc drottning í há-sæti, oc drucko bædi samt um kvelldit; oc var veitt allkappsamliga öllum mönnom hans. Um kvelldit, er konungr fór til hvílo, þá var þar sæng tiölldot pello, oc búinn dyrligom klædom; í því herbergi

var fátt manna. enn er konungr var afklæddr oc kominn í hvílo, þá kom drottning þar til hans, oc skenkti hanom siálf, oc lockadi hann miök til at drecka, oc var hin blidasta: konungr var allmiök druckinn oc bædi þau. Því næst sofnadi hann; enn dróttning geck þá til svefns. Sigrídr var hin vitrasta kona, oc forspá um marga luti. Eptir um morguninn, var veizla enn hin kappsamligsta. Enn þar vard sem iafnan verdr, þar er menn verda allmiök drucknir, at hinn næsta dag eptir varaz flestir menn vid dryckinn. Enn drottning var kát, oc töludo þau konungr sín á milli. Sagdi hon sva, at hon virði eigi minna eignir þær oc ríki, er hon átti í Svíþíód, enn konungdóm hans í Noregi oc eignir. Vid þessar rædor vard konungr ógladr, oc fannz fátt um allt, oc bióz í brott, oc var allhugsíúkr; enn drottning var hin kátasta, oc leiddi hann í brott med stór giöfom. Fór þá Haralldr um haustit aptr til Noregs, var heima um vetrinn, oc allókátr. Eptir um sumarit fór hann í austrveg med lidi síno, oc hellt þá til Svíþíódar. Hann sendi ord Sigrídi drottningo þau, at hann vill finna hana: hon reid ofan á fund hans, oc talaz þau vid; hann vegr brátt þat mál, ef Sigrídr villdi giptaz hanom. Hon segir, at þat var hanom hegóma mál, oc hann er ádr sva vel kvangadr, at hanom er fullrædi í. Haralldr segir, at Asta er gód kona oc göfog, enn ecki er hon sva stórborinn sem ec. Sigrídr svarar: vera kann þat, at þú ser ættstærri enn hon; hitt mundi ec ætla,

at med henni mundi vera nú beggia yckor hamingia. Litlo sciptoz þau fleirom orðom við ádr drottning reid í brott. Haralldi konungi var þá helldr scapþúngt. Hann bióz at ríða upp á land, oc fara enn á fund Sigrídar drottningar: margir hans menn lötto hann þess, enn eigi at sídr fór hann med mikla sveit manna, oc kom til þess bæar er drottning red fyrir. Hit sama kvelld kom þar annar konungr, sá het Visavalldr, austan or Gardaríki; sá fór at bidia Sigrídar drottningar. Þeim var scipat bádóm konungunom í eina stofu mikla, oc öllu lidi þeirra; stofan var gömol, oc eptir því var allr búnadr stofunnar, enn dryck skorti þar eigi um kvelldit, sva áfengan, at allir voro fulldrucknir, oc höfutverdir oc útverdir sofnodo. Þá let Sigrídr drottning um nottinna veita þeim atgaungo, bædi med elldi oc vapnom; brann þar stofan, oc þeir menn sem inni voro; enn þeir voro drepnir sem út komoz. Sigrídr sagdi, at sva scylldi hon leida smá konungom at fara af öðrom löndom, til þess at bidia hennar. Síðan var hon köllot Sigrídr hin Stórráða.

CAP. XLIX.

FEDDR OLAFR KONUNGR HARALLDS-
SON.

Þann vetr ádr var Jomsvíkinga orosta á Hiörungavági. Hrani hafði verit eptir at scipom; þá er Haralldr hafði gengit á land upp, med því lidi er eptir var, til forráða. Enn er þeir Hrani spurdo at Har-

alldr var af lífi tekinn, þá fóro þeir í brott sem tí-
daz oc aptr til Noregs, oc sögdo þessi tíðindi. Hrani
fór á fund Asto, oc segir henni allan atburd um
fór þeirra, oc sva hverra erinda Haralldr fór á fund
Sigrídar drottningar. Asta fór þegar til Upplanda
til födor síns, er hon hafði spurt þessi tíðindi, oc
tók hann vell vid henni, enn bædi þau voro miök
reid um þá ráða ætlan, er verit hafði í Svíþíód, oc
þat er Haralldr konungr hafði henni ætlat einlæti.
Asta Gudbrandsdóttir ól sveinbarn þá um sumarit;
sá sveinn var nefndr Olaf, er hann var vatni au-
sinn; Rani iós hann vatni. Var sá sveinn þar upp-
fæddr fyrst med Gudbrandi oc Asto módor sinni.

CAP. L.

FRÁ HÁKONI JARLI.

Hákon Jarl red Noregi allt et ytra med síá, oc
hafði hann til forráða XVI fylki. Enn síðan er Har-
alldr hinn Hárfagri hafði sva scipat, at Jarl scyllði
vera i hverio fylki, þá hellzt þat lengi síðan. Há-
kon Jarl hafði XVI Jarla undir ser. Sva segir í
Velleklo:

Hvar viti ölld und einom
jardbyggvi sva liggia;
þat skyli her of huxa
hiarl oc XVI Jarla.
Þess rídr furs med flórom
folk leikr Hedins reikar
lögscundadar lindar
lofkendr himins endom.

Medan Hákon Jarl red fyrir Noregi var góð árferð í landi, og góðr fridr innanlands með bændom. Jarl var vinsæll við bændor lengsta stund æfi sinnar; enn er áleid, þá gerdiz þat miök at um Jarl, at hann var úsidugr um kvenna far; gerdiz þar sva mikit at, at Jarl let taka ríkra manna dætor, og flytia heim til sín, og lá^{tt} hiá þeim viko eda tvær, enn sendi þær heim síðan; feck hann af því óþocka mikinn af frændom kvennanna, og tóko bændor at kurra illa, sva sem þrændir ero vanir um allt, er þeim er í móti scapi.

CAP. LI.

FERD ÞÓRIS KLÖCKO AT LEITA OLAFS
TRYGGVA SONAR.

Hákon Jarl fær nockorn pata af því, at sá madr mun vera fyrir vestan haf, er Ali nefndiz, og halla þeir hann þar fyrir konung. Enn Jarl grunadi af frásögn nockorra manna, at vera mundi nockor af konunga ætt Norrænni: hanom var sagt, at Ali kalladiz Gerskr at ætt, enn Jarl hafdi þat spurt, at Tryggvi Olafsson hafdi átt son, þann er farit hafdi austr í Gardaríki úngr, og þar uppfædz með Vallðimar konungi, og het sá Olaf: hafdi Jarl og miök at spurningom leidd um þann mann, og grunadi, at sá hinn sami mundi vera kominn þar í Vestrlöndom. Madr er nefndr Þórir Klacka, vin mikill Hákonar Jarls; hann var laungom í viking, enn stundom

í kaupferdom, oc var víða kunnið fyrir. Þenna Þóri sendi Hákon Jarl vestr um haf, bad hann fara kaupferd til Dyflinnar, sem þá var mörgom títt, enn skynia þar reyndar hverr madr Ali þessi væri: enn ef hann spyr þat til sanns, at þar væri Olaf Tryggvason, edr nockr annarr af konunga ætt Norrænni; þá skyldi Þórir koma vid hann svikrædom nockorom, ef han mætti.

CAP. LII.

OLAFR TRYGGVASON KOM Í NOREG.

SÍÐAN fór Þórir vestr til Írlands til Dyflinnar, oc spurdi þar til Ala; var hann þar með Olafi konungi Kvaran, mági sínom. Bráðliga kom Þórir ser í tal vid Ala; var Þórir madr ordspakr. Enn er þeir höfdo opt oc miök lengi talat, þá tók Ali at spyria af Noregi, fyrst frá Upplendinga konongom, oc mörgo stórmenni, hverir þeir voro þá á lífi, edr hvat ríki þeir höfdo: hann spordi oc um Hákon Jarl, hver vinsælld hans var í landino. Þórir segir: Jarl er sva ríkr madr, at engi þórir annat at mæla, enn hann vill. Enn þat velldr því, at hvergi er í annan stad til at gánga. Enn þer satt til at segia, þá veit ec margra göfigra manna scaplyndi, och sva alþyduunnar, at þess væri fúsastir oc búnastir, at nockor konungr kæmi þar til ríkis, af ætt Harallds ens Hárfagra. Enn ver síam nú engan þann til; oc mest fyrir þá sök, at þat er nú reynt, at illa dugir

at beriaz vid Hákon Jarl. Enn er þeir töludo þetta opt, þá lætr Olafr í liós fyrir Þori nafn sitt oc ætt, oc spyr hann ráds, hvat hann hyggi, ef Olafr ferr til Noregs, hvært bændor mundi vilia taka vid hanom at konungi. Þórir eggíadi hann ákafliga þessar ferðar, oc lofadi hann miök, oc atgervi hans. Tók Olafr þá at fysaz miök at fara til ættleifðar sinnar. Siglir Olafr þá vestan med V skipom, fyrst til Sudreya; Þórir var þar í för med hanom; þadan sigldi hann til Orkneya. Sigurðr Jarl Löðvisson lá þá í Rögnvalldsey í Asmundarvogi, med eitt lánng-skip, oc ætladi at fara yfir á Katanes. Þá sigldi Olafr síno lidi vestan at eyonom, oc lagdi þar til hafnar, þvíat Petlandsfiörðr var eigi fær. Enn er konungr vissi, at Jarlinn var þar fyrir, þá let hann Jarl kalla til tals vid sik. Enn er Jarl kom á scipit til tals vid konung, þá haufdo þeir fátt talat, áðr konungr segir, at Jarl scyllði scíraz láta, oc allt landsfólk hans; enn at audrom kosti scyllði hann þá deya þegar í stad; enn konungr qveze mundo fara med eld oc usla yfir eyarnar, oc eyða land þat, nema landsfolkit cristnadiz. Enn sva sem Jarl var þá vid kominn, þá kaus hann þann af, at taka scírn; var hann þá scírd, oc allt þat folk, er þar var med hönom. Síðan svardi Jarl konungi eida, oc gerdiz hans madr; feck hönom son sinn til gislingar, er het Hvælpr eda Hundi; oc hafði Olafr konungr hann med ser til Noregs. Sigldi Olafr þá austr í haf, oc kom af hafi utan at Morstr; geck þar fyrst

á land upp í Noregi; oc let konungr þar messo syn-
gia í landtialldi; enn síðan var í þeim sama stad
kirkia giör. Þórer Klacka sagði konungi, at þat
cina var honom ráð, at gera eigi bert um, hverr
hann var, oc láta enga niósn fara fyrir ser, oc fara
sem ákalligaz á fund Hákonar Jarls, oc láta hann
óþínn vid verða. Oc sva gerir Olafur konungr, at
hann ferr norðr dagfari oc náttfari, sva sem leidi
gaf, oc gerdi eigi landsfólk vart vid ferd sína,
hverr þar fór. Enn er hann kom norðr til Agda-
nes, þá spurdi hann, at Hákon Jarl var inn í firði-
nom, oc þat með, at hann var ósáttir vid böndor.
Enn er Þórer heyrði þetta sagt, þá var miök annan
veg, enn hann hugdi; þvíat eptir Jomsvíkinga oro-
sto voro allir menn í Noregi fullkomner vinir Háko-
nar Jarls, fyrir sigr þann er hann hafði fengit, oc
frelsat land allt af úfrídi. Enn nú var sva illa at-
borit, at höfðingi mikill er kominn í landit, enn
böndor voro ósátter vid Jarlinn.

CAP. LIII.

FLÓTTI HÁKONAR JARLS:

Hákon Jarl var á veizlo í Gaulardal at Medalhú-
som, enn scip hans lágo út vid Viggio. Ormr Lyrgia
er madr nefndr, ríkr bóndi; hann bió á Bynesi;
hann átti kono þá er Godrún er nefnd, dóttir Berg-
þórs af Lundom; hon var köllot Lundarsól; hon var
qvenna

qvemma fridoz. Jarl sendi þræla sína til Orms, þeirra
 örenda, at hafa Godruno konu Orms til Jarls; þræ-
 lar báro upp örendi sin; Ormr bad þá fyrst fara til
 náttverdar, enn ádr þrælar höfdo mataz, þá voro
 komnir til Orms margir menn or bygdinni, er hann
 hafdi ord send. Let Ormr þá engan kost at God-
 rún föri með þrælonom. Godrun mællti, bad þræla
 sva segia Jarli, at hon mundi eigi til hans koma,
 nema hann sendi eptir henne þóro af Rimol; hon
 var húsfreyja rik, oc einn af unnöstom Jarls. Þræ-
 larnir segia at þeir skolo þar sva koma audro sinni,
 at bóndi oc húsfreyja mundo þessa idraz skambrags,
 oc heitaz þrælarnir miök, oc fóro brott síðan. Enn
 Ormr let fara herör flögurra vegna um bygdina oc
 let því bodi fylgia, at allir scyldo með vapnom fara
 at Hákon Jarli oc drepa hann; oc sendi til Halld-
 ors á Skerdingstedio; enn Halldor let þegar fara herör.
 Litlo ádr hafdi Jarl tekit kono þess manns er Bry-
 niólfr het, oc var þat verk allmiök úþockat; oc var
 þá við siálfst, at her mundi upplaupa; eptir þesso
 aurbodi lióp upp múgi manns, oc sótti til Medalhúsa;
 enn Jarl feck niósn, oc fór af bönom með lid sitt,
 oc í dal diúpan þann er nú er kalladr Jarlsdalr; oc
 leyndoz þeir þar. Eptir um dagin hafdi Jarl niósn
 af bóndaherinum. Böndor toko vego alla, oc ætlado
 hellzt at Jarl mundi hafa farit til scipa sinna; enn
 fyrir sciponom red þá Erlendr son hans, hinn mann-
 vænsti madr. Enn er náttadi þá dreifdi Jarl lidino,

oc bad fara marc-leidi út til Orcadals, oc mun ydr engi madr mein gera, ef ec em hvergi í náund: görit ord Erlendi, at hann fari út eptir firdinom, oc hittumz vid á Möri. Enn ec mun vel fá leynt mer fyrir böndom: Fór Jarl þá oc þræll hans vid honom, er Karkr er nefndr. Iss var á Gaul, oc ratt Jarl þar út á hesti sinom, oc þar let hann eptir möttol sinn. Enn þeir fóro í helli þann er síðan er kalladr Jarls-hellir. Þá sofnado þeir; enn er Karkr vaknadi, þá segir hann draum sinn, at madr svartr oc illiligr fór hiá hellinom, oc hræddiz hann, at hann mundi inn-ganga, en sá madr sagdi honom, at Ulli var daudr; Jarl svarar, at Erlendr son hans mundi drepinn. Enn sofnar Karkr audro sinni, oc lætr illa í svefni, sem fyrr; enn er hann vaknar, segir hann draum sinn, at hann sá þá enn sama mann fara ofan aptr, oc bad þá segia Jarli at þá voro lokin sund öll. Karkr sagdi Jarli drauminn; hann grunadi at slíkt mundi vera fyrir scam-lífi síno; síðan stóð hann upp, oc gengo þeir heim á böinn Rímol; þá sendi Jarl Kark á fund Þóro, bad hana koma leyniliga til sín; hon gerdi sva, oc fagnar vel Jarli. Jarl bad hana fela sik um nockorra nátta saker, þar til er böndor ryfi samnadinn. Her mun þín leitað, segir hon, um bö minn, bæði úti oc inni; þvíat vito margir, at ec mun giarna hiálpa þer, allt þat er ec má. Einn stadr er her sá á minom bö, er ec munda eigi kunna leita slíks manns, þat er svína-bæli nockot. Þau komo þannog til; þá mællti Jarl, her skolo ver

um búaz; lífsins skal nú fyrst gæta. Þá gróf þrællinn þar gróf mikla, oc bar í brot molldina; síðan lagdi hann þar vido yfir. Þóra sagdi Jarli tíðindi þau, at Olafr Tryggvason var kominn utan í fiordinn, oc hafði hann drepit Erlend son hans. Síðan geck Jarl í gröfina, oc bádir þeir Karkr, enn Þóra geði yfir med vidom, oc sópadi yfir molldo oc myki, oc rak þar yfir svmin. Svinaböli þat var undir steini einom miklomu.

CAP. LIV.

DAUDI ERLENDS.

Olafr Tryggvason hellt utan í fiörðin med V lánscipom; enn þar reri innan í móti Erlendr son Hákonar Jarls, med scipom; enn er scipin nálgadoz, þá grunadi þá Erlend, at úfridr mundi vera, oc snúa at landi. Enn er þeir Olafr sá lánscipinn eptir fiördinom fara, oc róa í móti ser, þá hugdi hann þar mundo fara Hákon Jarl, oc bad róa eptir þeim sem ákafast, enn er þeir Erlendr voro komnir miök at landi, rero þeir þegar á grunn oc liópo þegar fyrir bord, oc leitodo til lands; þá rendo at scipin Olafs. Olafr sá hvar lagdiz madr forkunnar fridr; Olafr greip upp hiálmunvölinn, oc kastar at þeim manni, oc kom höggit í höfot Erlendi syni Jarls, sva at haussinn brotnadi til heila; let Erlendr þar lif sitt. Þeir Olafr drápo þar mart manna, enn sumt kom á flótta, enn sumt tóko þeir oc gáfo grid,

oc höfdo af tíðinda sögn; var þá Olafi sagt at böndor höfdo rekit Hákon Jarl, oc hann var farflótti fyrir þeim oc dreift var öllum flocki hans.

CAP. LV.

DAUDI HÁKONAR JARLS.

Síðan koma böndor á fund Olafs, oc verda hvarir audrom fegnir, oc taka þegar samlag sitt; taka böndor hann til konungs yfir sic, oc taka allir eitt ráð, at leita síðan allir samt eptir Hákon Jarli; fara upp í Gaulardal, oc þickir þat líkaz at Jarl muni vera á Rímol, ef hann er nockot at böiom; þviat þóra var þar kærstr vin hans í þeim dal. Fara þeir þannog, oc leita Jarls úti oc inni, oc finna hann eigi. þá átti Olaf húsbíng úti í gardinom; hann stóð upp á stein þann inn mikla, er þar stóð hiá svínabölinu; þá taladi Olaf fyrir mönnom, oc vard þat í röðo hans at hann mundi þann mann göda bæði fe oc virding, er Hákon Jarli yrði at scada. þá röðo heyrdo þeir Jarl oc Karkr þræll; þeir höfdo liós hiá ser; þá mællti Jarl, hví ertú sva bleikr, enn stundom svartr sem jorð? er eigi þat nú, at þú vilir svikia mic. Eigi, segir Karkr. Vid vorom föðdir á einni nótt, segir Jarl, oc mun scamt verda milli dauða ockars. þá fór Olaf konungr á brott, er qvelladi. Enn er náttadi, þá hellt Jarl vöko yfir ser, enn Karkr sofnadi, oc let illiliga; þá yaki Jarl hann, oc spurdi hvat hann dreymdi? hann

segir, ec var nú á Laudom, oc lagdi Olaftr Tryggvason gullmen á háls mer; Jarl svarar: þar mun Olaftr láta hring raudan um háls þer, ef þú finnr hann; vara þú þic sva; enn af mer muntú gott hlióta, sva sem fyrr hefir verit, oc svík mik eigi. Síðan vokdo þeir bádir, sva sem hvarr vekdi yfir audrom. Enn í móti degi þá sofnadi Jarl brátt oc let hann illa; oc sva mikit vard at því, at Jarl scaut hölonom under sik, oc hnackanom, sva sem hann mundi vilia upprisa, oc let hátt och ógnarlíga. Enn Karkr vard hræddr, oc felmsfullr, oc greip kníf mikinn af linda ser oc scaut í gögnom barka Jarli oc skar út or; var þat bani Hákonar Jarls. Síðan sneid Karkr haufot af Jarli, oc lióp í brot med, oc kom eptir um daginn inn á Lader, oc förði haufot Jarls Olafi Konungi, segir oc þá alla þessa atburdi oc um ferdir þeirra Hákonar Jarls. Síðan let Olaftr konungr leida hann í brot oc hauggva höfot af.

CAP. LVI.

GRÝTING HÖFUDS HÁKONAR JARLS.

Þá fór Olaftr konungr út til Nidarhólms, oc fiöldi bönda med honom, oc hafði med ser haufot þeirra Hákonar Jarls oc Karks; sá hólmr var þá hafdr til þess, at drepa þar þjófa oc illmenn, oc stóð þar gálgi, oc let han þar tilbera haufot Hákonar Jarls, oc sva Karks; geck þá til allr herinn, oc öpti up, oc grytti þar at, oc mællto, at þar scyllði fara

nídingr með audrom nídingom. Síðan láta þeir fara upp í Gaulardal, oc taka búkinn. Vard her sva mikill máttur at fiandscap þeim er þröndir geido til Hákonar Jarls, at engi madr mátti hann nefna annan veg enn Jarl hinn illa; var þetta kall haft lengi síðan. Enn hitt er þó satt at segia frá Hákon Jarli, at han hafði til þess marga luti at vera höfdingi; fyrst kynqvislir stórar, þar með speki oc könleik, at fara með ríkdóminom, röskleik í orostom at vega sigrinn, oc þar með hamingiona at drepa fiandmenn sína. Sva segir Þorleifr Raudfelldarson:

Hákon! vitom hvergi,
hafiz hefir runur af gunni
fremra Jarl und ferli
folk ranar þer mána.
Þú hefir audlinga Odni
etr hrafn af ná getnom
vera máttu af því visi
vídlendr, nio senda.

Manna örvastr var Hákon Jarl; enn hina mesto ohamingio bar slíkr höfdingi til dánar dögur síns. Þat bar mest til er sva vard, at þá var sú tíð komin, at fyrirdömaz scylldi blótscaprinn oc blótmennirnir, enn í stad koma heilog trúa oc rettir sidir.

CAP. LVII.

OLAFR TRYGGVASON TÓK KONUNG- DÓM YFIR NOREGI.

Olafr Tryggvason var til konungs tekinn í þránd-

heimi á allzheriar þingi, um land allt, sva sem haft hafði Haralldr hinn Hárfagri; hlióp þá upp múgr oc margmenni, oc villdi engi annat heyra enn Olaf Tryggvason skyldi vera konungr. Fór Olaf þá um land allt, oc lagði undir sik; snéroz þá til lydni við hann allir menn í Noregi; samt þeir höfðingar á Upplöndom oc í Víkinni, er ádr höfðo land halldit af Dana konungi, þá gerdoz þeir menn Olafs konungs, oc helldo land af honom: Fór hann sva yfir land hinn fyrsta vetr oc eptir um sumarit. Eiríkr Jarl Hákonarson oc Sveinn bródir hans, oc adrir frændor þeirra oc vinir, flydo landit, oc sóttu austr í Svíavellði til Olafs konungs hins Sönsca, oc feugo þar góðar viddök. Sva segir Þórdr Kolbeinsson:

Meinrenner brá manna
margs fýsa skop varga
lióða litlo sidar
læ, Hákonar æfi.
Eun til lands þess er liudar
ládstafr vegit hafði
hraustr þá er her fór vestan,
hygg oc qvæmi son Tryggva.

Oc enn:

Hafði ser við særi
slíks var ván at þanom
ands, enn upp um qvæði
Eiríkr í hug meira.
Sótti reidr at rádom
rann engi því manna
þrályndi fecz þrondom,
þrænsar Jarl konung Sænskan.

CAP. LVIII.

KVANFANG LODINS.

Lodinn er madr nefndr Vikverscr audigr oc ættadr vel. Han var optliga í kaupferdom, enn stundom í hernadi. Þat var eitt sumar, at Lodinn fór í kaupferd, átti hann einn scip þat oc hafdi mikinn kaupery. Hann hellt til Eistlands oc var þar í kaupstefno um sumarit. Enn þá er markadrinn sted, þá var þángat fluttr margskonar kaupskapr; þar kom mann mart falt; þar sá Lodinn kono nockora, er selld hafdi verit mánnali, oc er hann leit á konna, þá kendi hann at þar var Astridr Eiriks dóttir, er átt hafdi Tryggvi konungr, oc var hon þá úlik því sem fyrr, er hann sá hana: hon var þá faul oc grannleit oc illa klædd. Hann geck til hennar oc spnrði hvat ráds hennar var; hon segir: þúngt er frá því at segia, ec em selld mansali enn hingat haufd til saulo. Sídan kaunnodoz þau vid, oc vissi Astríd skyn á honom; bad hon sídan ef hann villdi kaupa hana, oc hafa heim med ser til frænda hennar. Ec man gera þer kost á því, segir hann, ec man flytia þik til Noregs, ef þú vill giptaz mer. Enn med því, at Astrid var þá naudoliga vid komin, oc þat annat, at hon vissi Lodinn var madr stórættadr, vaskr oc audigr, þá heitir hon honom þesso til útlausnar ser. Sídan keypti Lodinn Astrídi, oc hafdi heim med ser til Noregs, oc feck hennar þar þá med frænda rádi. Þeirra börn voro þau Þorkell Nefia, Ingiridr oc

Ingigerdr: dötur Astrídar oc Tryggva konungs, voro þær Ingibiörg oc Astrídr. Synir Eiríks Biódaskalla voro þeir Sigurdr Karlshaufot, Josteinn oc Þórkell Dydrill; þeir voro allir gaufgir menn, oc audgir, oc átto bú austr í landi. Brædortveir bioggo í Vík austr, audgir oc kynstórir; het annarr Þorgeirr enn annarr Hyrningr, þeir fengo dötur Lodins oc Astrídar, Ingirídr oc Ingigerdr.

CAP. LIX.

OLAFR KONUNGR KRISTNADI VÍKINA.

Haralldr Gormson Dana konungr, þá er hann hafdi vid kristni tekit, sendi hann bod um allt ríki sitt, at allir menn scylldo sciraz láta, oc snuaz til rettar trúar. Fylgdi hann siálfr því bodi, oc veitti þar styrk oc refsingar, er eigi gengi vid ella. Hann sendi tvo Jarla í Noreg med lid mikit, er sva heto, Uргуþríótr oc Brímilskiar; þeir scylldo boda kristni í Noregi; þat geck vid í Víkinni, þar er ríki Harallds konungs stóð yfir, oc skírdiz þar mart landsfólk. Enn brátt eptir dauda Haralldz, þá fór Sveinn Tiúguscegg sonr hans í hernad, bædi í Saxland oc Frísland, oc at lýctom til Englands. Enn þeir menn í Noregi er vid kristni haufdo tekit, þá hurfo þeir aptr til blóta, sva sem fyrr, oc sva gerdo menn norðr í land. Enn er Olaf Tryggvason var konungr ordinn í Noregi, þá dvaldi hann lengi um sumarit í Víkinni: komo þar til hans margir fræn-

dor hans, enn sumir mágar: enn margir höfðu verit miklir vinir fedr hans, og var honum þar fagnat með allmiklom kærleik. Þá kallar Olafr til tals við sik móðrbræður sína, Lodinn stíupföðr sinn, mága sína Þorgeirr og Hyrning; bar síðan fyrir þá með enom mesta alhuga þat mál, at þeir scylldu siálfir under taka með honum, og fylgia síðan með öllum krapti, at hann vill kristnibod upphafia um allt ríki sitt; segir, at hann skal því áleidis koma at kristna allt í Noregi, edr deya at audrom kosti; og skal gera ydr alla mikla menn og ríka, þvíat og trúi ydr best, fyrir sakir frændsemis og annarra tengda. Allir þeir játado þessu, at gera hvat sem hann baud, og fylgia honum til þess allz er hann villdi, og allir þeir menn er þeirra ráðom vilia fylgia: Gordi þá Olafr konungr þegar bert fyrir alþýðu, at hann vill biðda kristni öllum mönnum í ríki sínu; toko þeir þegar fyrstir undir at játa þessu bodi, er ádr höfðu undir gengit; voro þeir og ríkastir af þeim mönnum er þá voro viðstaddir: og þá gerdo allir at þeirra dömum; voro þá scírdir menn allir austr um Víkina: Fór þá konungr norðr í Víkina, og baud öllum mönnum at taka við kristni; enn þeir er í móti mællto veitti hann stórar refsingar, drap suma, suma let hann hamla, suma rak hann af landi á brott; kom þá sva at um þat ríki allt er fyrr hafði styrt Tryggvi konungr fadir hans, og sva þat er átt hafði Haralldr Grenski frændi hans geck þat fólk allt

undir kristnibod, þat er Olafur bodadi, oc varð þat sumar oc eptir um vetrinn alkristit um Vikina.

CAP. LX.

FRÁ HÖRDOM.

Olafur konungr fór snemma um várit út í Vikina oc hafði lid mikit; fór hann þá norðr á Agðer, enn hvar sem hann átti þing við bændor, þá bodadi hann öllum mönnum at láta scíraz, oc gengo menn undir kristni; þvíat engi fekk upreist af böndom móti konungi, oc var fólkitt skirt hvar sem hann fór. Menn þeir voro á Hördalandi margir oc göfgir, er komnir voro af ætt Hörðakára; hann átti fjóra sono; einn var Þorleifr Spake, annarr Augmundr fadir Þórólfs Skiálgs, födr Erlings af Sóla, þridi var Þorðr fadir Klyps hersis, er drap Sigurd konung Slevu Gunnhillðarson; fjórði Ölmóðr fadir Askels, födr Aslács Fitiascalla; þessi ættbogi var þá mestr oc göfgaztr á Hördalandi. Enn er þeir frændor spurdo til vanqvæðis þessa, at konungr fór austan með landi oc hafði lid mikit, oc braut forn lög á mönnum; enn allir sætto refsingom oc afarkostom, þeir er í móti mællto; þá gerdo þeir frændor stefnolag milli sin, oc skolo gera ráð fyrir sér, þvíat þeir vita at konungr mun brátt koma á fund þeirra; oc semz þat með þeim, at þer skolo koma allfiöhlment til Gulaþings, oc stefna þar fund við Olaf konung Tryggvason.

CAP. LXI.

KRISTNAT ROGALAND.

Olafr konungr stefndi þing þegar er hann kom á Rogaland; enn er böndom kom þingbod, þá samnaz þeir fiölment saman oc med alvæpni; enn er þeir koma saman, taka þeir tal oc ráðagerd, oc ætla til þess þríá menn, þá er málsniallastir voro í þeirra flokki, at svara Olafi konungi á þingino, oc tala móti honom; oc þat med, at þeir vilia eigi gánga undir olaug, þótt konungr biodi þeim. Enn er bændor koma til þings, oc þing var sett, þá stód Olafr konungr upp, oc taladi fyrst blidt til bænda, fannz þat þó í hans máli, at hann vill, at þeir taki vid kristni, oc bad þá til med fögrom ordom, enn at lyfdom let hann þat fylgia, vid þá er í móti mællto, oc eigi villdo undergánga bod hans, at þeir mundo sæta af honom reidi oc refsingom, oc hördom afar-kostom, hvar sem hann mætti vidkomaz. Enn er hann lauk máli sino, þá stód upp sá madr af böndom er einna var málsniallastr, oc fyrst var til þess tekinn, at svara scylldi Olafi konungi. Enn er hann villdi til máls taka, þá setr at honom hósta oc þrönga sva mikinn, at hann feck engo ordi uppkomit; oc setz hann nidr. þá stendr upp annarr bóndi, oc vill sá eigi fallaz láta ansvörin, þótt enom fyrra hefði eigi vel tiltekiz; enn er sá hefr upp mál sitt, þá var hann sva stamr, at hann feck engo ordi uppkomit; tóko þá allir at hlæia, er áheyrdó, settiz þá

bóndi nidr. Þá stóð upp enn þridi, oc vill tala í móti Olafi konungi; enn er sá tók til máls, var hann sva hás oc ramr at engi madr heyrði þat er hann taladi, oc settiz hann nidr: þá vard engi til af böndom at mæla í móti konungi; enn bændor fengo engan til ansvara vid konung; þá vard engi uppreist þeirra til mótstodo vid konung; kom þá sva, at allir játto því er konungr baud; var þá skirt allt þat þingfólk, ádr konungr scildiz þar vidr.

CAP. LXII.

QVANBÓN ERLINGS SKIÁLGSSONAR.

Olafur konungr stefndi lidi síno til Gulaþings; þvíat bændor hafa honom þau ord send, at þeir vilia þar svara máli hans. Enn er þar koma hvarirtveggio til þings, þá vill konungr fyrst eiga tal sitt við landshöfðingia. Enn er þeir koma á stefno allir saman, þá berr konungr upp örendi sín, oc bydr þeim at taka vid scírn eptir bodi hans. Þá segir Ölmódr hinn Gamli: rött hofom ver frændor um mál þetta, oc mano ver frændor allir hverfa at eino rádi. Med því, konungr, at þú ætlar at pynda oss frændor til slikra luta, at brióta lög var, oc brióta oss undir þik med neckorri naudung, þá mono ver í móti standa med öllo afli, oc fáir þeir sigr, er audit verdr. Enn ef þú vill, konungr, leggja neckora farsælliga luti til var frænda, þá máttu þat gera sva vel, at ver manom allir hverfa til þín med fullkominni

þíonosto. Konungr segir, hvers vilit þer mik beida, til þess at sætt var verdi sem bezt. Þá svarar Ölmódr: Þat er et fyrsta, ef þú villt gipta Astrídi systri þína Erlingi Sciálgssyni frænda varom, er ver kol-
 lom mandvænztan allra úngra manna í Noregi. Olafur konungr segir, at honum þickir líkligt, at þat gia-
 ford muni gott vera, segir, at Erlingr er ættadr vel,
 oc madr hinn líkligsti synom; enn þó segir hann at
 Astríð á svör þessa máls. Síðan röddi konungr þetta
 við systir sína; lítt nyt ec nú þess, segir hon, at ec
 ein konungs dóttir oc konungs systir, ef mik skal gipta
 útignom manni; man ec enn helldr bida nockora
 yctor annars giafords; oc seildo þau røðina at sinni.

CAP. LXIII.

KRISTNAT HÖRDALAND.

Olafur konungr let taka hauk er Astríð átti, oc let
 plocka af fiadrar allar, oc sendi henni síðan. Þá
 mællti Astríð: reidr er bróðir minn nú; síðan stóð
 hon upp oc geck til konungs, hann fagnadi henni
 vel; þá mællti Astríð, segir, at hon vill at konungr
 sæi fyrir hennar ráði, slíkt sem hann vill; þat hug-
 da ec, segir konungr, at ec munda fá valld til, at
 gera þann tíginn mann, sem ec vil, her í landi.
 Let konungr þá kalla til tals Ölmód oc Erling, oc
 alla þá frændor; var þá talat bönord þetta; lauk sva,
 at Astríð var faustnot Erlingi. Síðan let konungr
 setia þíngit, oc baúd bændom kristni, var þá Öl-

módr oc Erlingr forgángsmadr at flytia þetta konungs mál, oc þar med allir frændor þeirra; þar þá engi madr traust til at mæla í móti; var þá scirt þat allt fólk oc kristnat.

CAP. LXIV.

BRULLAUP ERLINGS SKÍALGSSONAR.

Erlingr Skíalgsson gerdi um sumarit brullaup sitt, oc var þar allmikit fiölmenni; þar var Olafr konungr; þá baud konungr at gefa Erlingi Jarldómi. Erlingr segir sva: hersar hafa verit frændor minir, vil ec ecki hafa nafn hærra enn þeir; hitt vil ec þiggia, konungr, af ydor, at þer látit mik vera mestan med því nafni her í landi; konungr játti honom þat; oc at scilnadi þeirra veitti Olafr konungr Erlingi mági sínom nordan frá Sognsæ oc austr til Lidandisness, med þvílíkom hætti sem Haralldr hinn Hárfagri hafdi veitt sonom sínom, oc fyrr er ritat.

CAP. LXV.

KRISTNADIR FIRDIR OC RAUMDÆLIR.

Þetta sama haust stefndi Olafr konungr fiögra fylkna þing norðr á Stade á Dragseide; þar scylldo koma Sygnir oc Firdir, Sunnmörir oc Raumdölir: Fór Olafr konungr þannog med allmikit fiölmenni, er hann hafdi austan or landi, oc sva þat lid er þá hafdi komit til hans á Rogalandi oc Hordalandi. Enn er Olafr konungr kom þar til þings, þá boda-

di hann þar kristni sem í audrom stödom; enn fyrir því, at konungr hafði þar styrk mikin fiölmennis, óttudoz þeir þat; enn at lýctum þess máls, þá baud konungr þeim tva kosti: annat hvart at þeir tæki kristni oc leiti scíraz; edr enn at audrom kosti, at þeir scylldi hallda við hann orosto. Enn er bændor sá eigi faung til at beriaz við konung, þá var hitt ráð upptekit, at allt fólk kristnadiz. Enn Olafur konungr fór þá með lidi síno á Nordmöri; oc kristnar hann þat fylki. Síðan siglir hann inn á Lader, oc lætr brióta ofan hofit, oc taka allt scraut oc fe or hofino, oc af Godino. Hann tók gullhring mikinn or hofshurdunni, er Hákon Jarl hafði látit gera. Síðan let Olafur konungr brenna hofit, enn er bændor verda þessa varir, þá láta þeir fara heraur um öll fylki, oc stefna her út, oc ætla at konungi. Olafur konungr hellt þá lidi síno út eftir firði, oc stefnir síðan norðr með landi, oc ætlar at fara norðr á Hálogaland oc kristna þar: Enn er hann kom norðr í Biarnau, þá spyr hann þat af Hálogalandi, at þeir hafa þar her úti, oc ætla at veria land fyrir konungi: Ero þeir þar höfðingiar fyrir lidi, Hárekr or Þiótto oc Þórer Hiortr or Vagom, Eyvindr Kinnrifa. Enn er Olafur konungr spurdi þetta, þá snyr hann leid sinni, oc siglir suðr með landi. Enn er hann kom suðr um Stad, þá fór hann allt tómlikar, oc kom þó öndverðan vetr allt austr í Víkina.

CAP. LXVI.

BÓNORD OLAFS KONUNGS TIL SIGRÍÐAR.

DROTTNINGAR STÓRRÁÐO Í SVÍÞÍÐ.

Sigríð drottning í Svíþíð, er köllot var enn Stórráða, sat at búom sínom; þann vetr fara menn milli Olafs konungs oc Sigríðar, oc hóf Olafr konungr þar upp bónord sitt, oc bad Sigríðar, enn hon tók því líkt; oc var þat mál fest med einka málom. Þá sendi Olafr konungr Sigríði drottningo gullhríng þann hinn mikla, er hann hafði tekit or hofshurdinni á Hlaudom, oc þótti þat höfod gersemi. Stef-nolag skyldi vera til þessa mála eptir um varit í Elfinni, vid Landa-mæri. Enn er hríngur þessi er Olafr konungr hafði sent Sigríði drottningo, var sva miök lofadr af öllom mönnum, þá voro med drottningo smidir hennar, brædor tveir. Enn er þeir höfðo hrínginn med höndom, oc handvetto, oc mæla einmæli milli sín, þá let drottning kalla þá til sín, oc spurdi hvat þeir spottadi; þeir dylia þess; hon segir at þeir scoló fyrir hvern mun láta hana vita hvat þeir hafa atfunnit; þeir segia at fals se í hríngiginom; síðan let hon briáta í sundr hrínginn, oc fannz þar eyr í innan; þá vard drottning reid, oc sagði, at Olafr mundi at fleira falsa hana, enn þesso eino. Þenna enn sama vetr fór Olafr konungr upp á Hríngaríki, oc kristnadi þar.

CAP. LXVII.

SKÍRDR OLAFR HARALDSSON.

Asta Gúðbrandsdóttir giptiz brátt eptir fall Harallds Grensca, þeim manni er nefndr er Sigurdr Syr; hann var konungr á Ríngaríki. Sigurdr var son Hálfðanar, enn hann var son Sigurdar Hrísa, Haralldssonar ins Hárfagra. Þá var þar med Asto oc Sigurdi Olafr son þeirra Harallds Grensca; hann föddiz upp í ösco med Sigurdi Syr stíupfödur sínem. Enn er Olafr konungr Tryggvason kom á Hríngaríki at boda þar kristni, þá let seiraz Sigurdr Syr oc Asta kona hans, oc Olafr son hennar; oc gerdi Olafr Tryggvason gudsífiar vid Olaf Haralldsson; þá var hann þrevetr: Fór Olafr konungr þá enn út í Víkina, oc var þar um vetrinn; þann var hann hinn þridia vetr konungr yfir Noregi.

CAP. LXVIII.

TAL ÞEIRRA OLAFS KONUNGS OC SIGRÍÐAR STÓRRÁÐO.

Snemma um varit fór Olafr konungr austr til konunga-hello, til stefno móti Sigríði drottningo; enn er þau funnoz, þá tölodo þau þat mál er rött hafdi verit ádr um vetrinn, at þau mundo gera samgáng sinn; oc fór þat mál alt líkliga. Þá mællti Olafr konungr, at Sigrídr skyllði taka seirn oc retta trú;

hon sagdi sva: ecki man ee ganga af trú þeirri, er ee hafi fyrr haft oc frændr mínir fyrir mer; man ee oc ecki at því telia, þótt þú trúir á þann Gud, er þer líkar. Þá varð Olafur konungur reidr miök, oc mælti brálliga: hví mun ee vilia eiga þic asgamla oc hundheidna, oc laust í andlit henni með glófa sínom, er hann hellt á: Stóð hann upp síðan, oc bædi þau. Þá mælti Sigríður: þetta mætti verða vel þinn bani. Síðan seildu þau; fór konungur norðr í Vikina, enn drottning austr í Sviavelldi.

CAP. LXIX.

SEIDMANNA BRENNNA.

Olafur konungur fór þá til Túnsbergs, oc átti þar þá enn þing, oc taladi á þingino, att þeir menn allir, er kunnir oc sannir yrði at því, at færi með galldra oc gerningar, edr seidmenn, þá scylldu allir fara af landi á brott. Síðan let konungur ransaka eptir þeim mönnum, um þær bygdir, er þannog voro í námunda, oc boda þeim öllum til sín. Enn er þeir komo til þings, þá var einn madr af þeim, er nefndr er Eyvindur Kellða; hann var sonarson Rögnvallds Rettilbeina, sonar Harallds Hárfagra. Eyvindur var seidmadr oc allmiök fiölkunnigr. Olafur konungur let scipa þessom mönnum öllum í eina stofu, oc let þar vel um búaz; let gera þeim þar veizlu, oc fái þeim sterkan dryck. Oc þá er þeir voro miök drucknir, let Olafur konungur leggja elld í stofuna, oc brann

stofa sú, oc allt þat fólk er þar var inni, nema Eyvindr Kellda; hann komz út um liórann, oc sva i brott. Enn er hann var langt i brott kominn, þann hann menn þá á leid sinni, er fara ætlado til konungs, oc bad þá sva segia konungi, at Eyvindr Kellda var brott kominn or elldinom, oc mun aldri síðan koma á valld Olafs konungs; enn hann mun allt fara á sömo leid, sem fyrr gerdi hann, um alla kunnusto sina. Enn er þessir menn komo á fund Olafs konungs, þa segia þeir slíkt frá Eyvindi, sem hann hafði þeim bodit. Konungr lætr illa yfir er Eyvindr var eigi daudr.

CAP. LXX.

DRÁP EYVINDAR KELLDÓ.

Olafr konungr fór, er varadi, út eptir Vikinni, oc tók veizlor at stórbúom sínom, oc sendi bod allt um Vikina, at hann vill lid hafa úti um sumarit, oc fara norðr i land. Síðan fór hann norðr á Agdir, oc er á leid lánga fösto, þá sótti hann norðr á Rogaland, oc kom Páska aptan norðr i Körmt, á Ögvalldsness; var þar búin fyrir hönom Páskaveizla; hann hafði nær CCC manna. Þá sömo nótt kom þar vid eyrna Eyyindr Kellda, hafði lángskip alskipat; voro þat allt seidmenn, oc annat fiölkyngis fólk. Eyvindr geck upp af skipi, oc sveit hans öll, oc mögnodo fiölkyngi sina: gerdi Eyvindr þeim huliz hiálm oc þoko myrkr sva mikit, at konungr oc lid hans

skylldo eigi mega síá þá. Enn er þeir komo miök sva til bæarins á Ögvalldsnesi, þá gerdiz liós dagr; vard þá miök annan veg enn Eyvindr hafdi ætlat; kom þá myrqvi sá, er hann hafdi gert med fiölkyn- gi, yfir hann oc hans föroneyti, sva at þeir sá eigi helldr augom enn hnacka, oc föro allt í hring um eyna. Einn vardmenn konungs sá þá, hvar þeir föro, oc visso eigi hvat lid þat var; var þá sagt ko- nungi; stód han þá upp, oc allt lidit, oc klæd- diz. Enn er konungr sá hvar þeir Eyvindr föro, bad han sina menn vapna sik, oc vita hvat mönnum þat væri. Enn er konungsmenn kendo þar Eyvind, þá tóko þeir hann höndom, oc alla þá, oc leiddo þá til konungs. Sagdi þá Eyvindr allan atburd um sinar ferdir. Sídan let konungr taka þá alla, oc flytia í flædi-sker, oc binda þar: Let Eyvindr sva lif sitt, oc allir þeir. Er þat sídan kallat Skratta- sker.

CAP. LXXI.

FRÁ OLAFI KONUNGI OC VELOM ÓDINS.

Sva er sagt, þá er Olafr konungr var á veizlonni á Ögvaldsnessi, at þar kom eitt qvæld madrgamall oc ordspakr miök, hafdi hött sídan; han var ein- synn; kunni sá madr seiga af öllom löndom. Hann kom ser í tal við konung; þötti konungi gaman mi- kit att rædom hans, oc spurdi hann margra luta, einn gestrinn feck orlausn til allra spurninga, oc sat

konungr lengi um kveldit. Þá spyr konungr, ef hann vissi, hværr Ögvaldr sá hafði verit, er nesit oc bæriinn var viðkendr? Gestriinn segir, at Ögvaldr var konungr, oc hermadr mikill, oc blet kú eina mest, oc hafði hann hana með sér, hvargi er hann fór, oc þótti lönom þat heilnæmlikt, at drecka iafnan miölk hennar. Ögvaldr konungr bardiz við konung þánn er Varinn het. Í þeirri orrosto fell Ögvaldr konungr; var hann her heygdr skamt frá bænom, oc settir upp bautasteinar, þeir er enn standa her. Enn í annan haug, skamt hedan, var lagið kyrrin. Slika luti sagði hann, oc marga adra, frá konungom eða öðrom forntíðindom. Enn er lengi var setit um nóttina, þá minnti biskop konung á, at mál væri at ganga att sofa: gerði konungr þá oc sva. Enn er hann var afklæddr, oc hafði í reekia lagz, þá settiz gestriinn á fotskörina, oc taladi eum lengi við konung. Þótti konungi æ ords vant er annat var mælt. Þá mælti biskop til konungs, segir, at mál væri at sofa; gerði konungr þá sva, enn gestriinn geck út. Litlo síðarr vaknadi konungr, oc spurdi þá eptir gestinom, oc had hann kalla til sín; enn gestr fannz þá hvargi. Eptir um morgininn let konungr kalla til sín steikara, oc þann mann er dryckiinn vardveitti, oc spyr ef nockorr úkunnr madr hefði komit til þeirra. Þeir segia, at þá er þeir skyldo matbúa kom þar madr nockorr, oc sagði at furdo illt slátr sudo þeir til konungs hords; síðan feck hann þeim tvær nautz-síðor digrar oc feitar, oc

sudo þeir þær með ödro slátri. Þá segir konungr, at þá vist alla scylldi ónyta; segir, at þetta mundi eingi annarr madr verit hafa, enn sá Odinn er heidnir menn höfdo lengi átrúat; sagði, at Odinn scylldi þá engo áleidis koma at svíkia þá.

CAP. LXXII.

ÞÍNG Í ÞRÁNDHEIMI.

Olafr konungr dró þá saman lid mikit austan or landi um sumarit, oc hellt lidi því norðr til Þrándheims oc lagði fyrst inn til Nidaróss. Síðan let hann fara þingbod um allan fiördinn, oc stefndi VIII fylkna þing á Frosto, enn bændor sneyro þingbodi í herör, oc stefndo saman þegn oc þræl um allan Þrándheim. Enn er konungr kom til þings, þá var kominn bænda múgrinn með allvæpni. Enn er þing var sett, þá taladi konungr fyrir lydnom, oc baud þeim at taka við kristni. Enn er hann hafði litla hríð talat, þá köllodo bænder, oc bado hann þegia, segia, at ella mundo þeir veita hanom atgaungo, oc reka hann í brott; gerdo ver sva, sögdo þeir, við Hákon Adalsteinsfóstra, þá er hann baud oss þvilik bod, oc virdo ver þik eigi meira enn hann. Enn er Olafr konungr sá ædi bændanna, oc þat með, at þeir höfdo her sva mikinn, at ecki mátti viðstanda, þá veik hann sva ræðunni, at hann sneri til samþykkis við bændor, segir sva: oc vil at ver gerim sætt vora, sva sem ver hafom áðr lagt með oss; vil

ec fara þar til, er þer hafit ið mesta blót ydart, oc siá þar sido ydra; tókum þá ráð vart um sidona, hveria ver vilium hafa, oc samþykkiom þá þat allir. Enn er konungr taladi linliga til bænda, þá mykdoz hugir þeirra, oc fór sidann allt talit líkliga oc sáttgjarnliga; oc var þat ráðit at lykdom, at vera scyll-di midsumars blót, inni á Mærinni, oc scylldo þar til koma allir höfðingar oc ríkir bændor, sva sem sidvandi var til; þar scylldi oc koma Olafr konungr.

CAP. LXXIII.

FRÁ JÁRN-SKEGGIA.

Skeggi er nefndr ríkr bóndi; hann var kalladr Járn-Skeggi; hann bió á Upphaugi á Yriom. Skeggi taladi fyrst á þingino imót Olafi konungi, oc var mest fyrir bændom, at mæla imóti kristniinni. Þeir slito þingino med þessom hætti; fóro þá bændor heim, enn konungr á Hladir.

CAP. LXXIV.

VEITZLA Á HLÖDOM.

Olafr konungr lá scipom sínom í Nid, oc hafdi XXX scipa, oc frítt lid oc mikit, enn siálfr konungr var optliga á Hlödom med hirdsveit sina. Enn er miök leid at því, er blótit scylldi vera inn á Mærinni, þá gerdi Olafr konungr veizlo mikla á Lödom; sendi bød inn á Strind, oc upp í Gaular-

dal, oc út í Orkadal, oc baud til sín höfðingiom oc öðrom stórbændom. Enn er veizla var búin, oc bodsmenn höfðu til sótt, þá var þar et fyrsta kvölld veizla fögr, oc veitt allkappsammliga; voro menn miök drucknir. Enn eptir um nóttina sváfo allir menn þar í ró. Um morguninn eptir er konungr var klæddr let hann syngia ser tídir, oc er messor var lokit, þá let hann blása til húsþings: gengo þá allir menn hans af scipom, oc fóro til þings. Enn er þing var sett, stóð konungr upp, oc mællti sva: ver áttom þing inn á Frosto, baud ec þá búandom, at þeir scylldo láta scíraz; enn þeir budo mer þar ímót, at ec scylldi hverfa til blóta med þeim, sva sem gert hafði Hákon konungr Adalsteins föstri; kom þat ásamt med oss, at ver scylldim finnaz inn á Mærinni, oc gera þar blót mikit. Enn ef ec skal til blóta hverfa med ydr, þá vil ec gera láta et mesta blót, þat sem títt er, oc blóta mönnum; vil ec eigi til þess velia þræla edr illmennu; skal til þess velia, at fá Godonnum ena ágætosto menn: nefni ec til þess Orm Lygro af Medalhúsom, Styrkár af Gimsom, Kár af Grytingi, Asbiörn Þórbergsson af Ærnesi, Orm af Lyxo, Halldor af Skerdingstedio; oc þar med nefnir hann adra V, þá er ágætastir voro; segir sva, at hann vill þessom blóta til árs oc fridar, oc let þegar veita þeim atgaungo. Enn er bændor sá, at þeir höfðu eigi lidskost vid konungi, þá bidia þeir ser gríða, oc bióða allt mál sitt á valld konungs: Semz þat á milli þeirra, at allir bændor, þeir

er þar voro komnir, leto scíraz, oc veitto konungi swardaga til þess at hallda retta trú, enn leggja nidr blótskap allan: Hafdi konungr þá menn þessa alla í bodi síno, allt þar til er þeir fengo sono sína, eda bræðor, edr adra náfrændor, í gisling til konungs.

CAP. LXXV.

FRÁ ÞÍNGI Í ÞRÁNDHEIMI.

Olafr konungr fór med öllu lidi síno inn í Þrándheim; enn er hann kom inn á Mæri, þá voro þar komnir allir höfðingiar Þrænda, þeir er þá stódo mest í móti kristninni, oc höfdo þar med ser alla stórbændor, þá er fyrr höfdo halldit upp blótom í þeim stad; var þar þá allfiölment af bændom, sem vandi var til, oc eptir því sem fyrr hafdi verit á Frostþingi: Let þá konungr krefia þings, oc gengo hvarirtveggio med alvæpni til þings. Enn er þing var sett, þá taladi konungr, oc band mönnom kristni. Járnskeggi svarar máli konungs af hendi bænda, segir, at bændor villdo enn sem fyrr, at konungr bryti eigi lög á þeim; viliom ver, konungr, segir hann, at þú blótir, sem her hafa gert adrir konungar fyrir þer. At hans rædo gerdo bændor mikinn róm, oc sögdo, at þeir villdo allt vera láta, sem Skeggi mælti. Þá segir konungr, at hann vill fara í hofit med þeim, oc síá sido þeirra, er þeir blóta. Bændom líkar þat vel; fara þá til hofsins hyarirtveggio.

CAP. LXXVI.

KRISTNADR ÞRÁNDHEIMR.

Olafr konungr gengr nú í hofit, oc fáir menn með hanom, oc fáir af bændom. Enn er konungr kom þar sem Godin voro, þá sat þar Þór, oc var mest tignadr af öllum Godom, búinn gulli oc silfri. Olafr konungr hóf upp refdi gullbúit; er hann hafdi í hendi, oc laust Þór svo at hann fell af stallinom. Síðan liþo at konungs menn, oc svipto ofan öllum Godom af stöllonom. Enn meðan konungr var inni í hofino, þá var drepinn Járnskeggi úti fyrir hofsdyronom, oc gerdo þat konungsmenn. Enn er konungr kom út til lids sins, þá baud hann bændom tva kosti, annan þann, at þeir scylldo þá állir við kristni taka, enn at öðrom kosti, hallda við hann bardaga. Enn eptir lát Skeggia, þá var engi fóngangsmadr at, í bonda lidi, til at reisa merki ímót Olafi konungi: Vard himn kostr upptekinn, at gángga til handa konungi, oc lyda því er hann baud. Þá let Olafr konungr scira fólk allt, þat er þar var, oc tók gisla af bóndom til þess, at þeir scylldo hallda kristni sína. Síðan let Olafr konungr fara menn sína um öll fylki í Þrándheimi; mællti þá engi madr ímót kristninni: Var þá scirt allt fólk í þrændalögom.

CAP. LXXVII.

BÆR GERD.

Olafr konungr fór lidi síno út til Nidaróss; þá let

hann reisa þar hús á Nidarbacka, oc scipadi sva, at þar scylldi vera kaupstadr; gaf mönnom þar toptir til at gera ser þar hús, enn hann let gera konungsgard upp frá Scipa-krók; let hann þannog flytia um haustit öll faung, þau er þurfti til vetrseto, oc hafdi þar allmikil fiölmenni.

CAP. LXXVIII.

KVANFÁNG OLAFS KONUNGS.

Olafr konungr gerdi stefnolag frændom Járnскеggia; oc baud þeim bætor. Enn þar voro til svara margir göfgir menn. Járnскеggi átti dóttor, er Guðrún er nefnd; oc kom þat at lyktom í sáttmál þeirra, at Olafr konungr scylldi fá Guðrúnar. Enn er brullaups stefna sú kom, þá gengo þau í eina reckio Olafr konungr oc Guðrún. Enn hina fyrsto nótt; er þau lágo bædi samt, þegar Guðrúno var grunr á at konungr væri sofnadr, þá brá hon knifi, oc villdi leggja at hanom; enn er konungr varð þessa varr, tók hann knifinn frá henni, oc steig upp or hvilunni, oc geck til manna sinna, oc sagdi hvat ordit hafdi: Tók Guðrún þá oc klædi sín, oc allir þeir menn er henni höfdo þannog fylgt; fóro þau í brott leid sína, oc kom Guðrún eigi síðan í sama reckio Olafi konungi.

CAP. LXXIX.

GIÖRR TRANINN

Þetta sama haust let Olafr konungr reisa lángscip

mikit út á eyronom við Nid; þat var sneekia; hafði hann þar til smíði marga: enn öndverðan vetr var skipit algert; var þat þritugt at rúmatali, stafnhatt oc ecki mikit í ser; þat skip kalladi konungr Tra-nann. Eptir dráp Járnскеggia var lík hans flutt út á Yriar, oc liggir hann í Skeggiahugi á Austrátt.

CAP. LXXX.

ÞÁNGBRANDR FÓR TIL ÍSLANDS.

Þá er Olafur konungr Tryggvason hafði verið II vetr konungr at Noregi, var með hönom Saxneskr prestur, sá er nefndur er Þangbrandr; hann var ofstopa maður mikill oc víga maður; enn klerkur góður, oc maður vaskur; enn fyrir sakir úspektar hans, þá villði konungr eigi hann með sér hafa, oc fekk hanom sendiferð þá, at hann skyldi fara til Íslands, oc kristna landit; var hanom kaupskip fengið, oc er frá hans ferð þat at segja, at hann kom til Íslands í Austfirðo, í Alftafjörð hinn Syðra, oc var eptir um vetrinn með Halli á Síðo. Þangbrandr bodadi kristni á Íslandi, oc af hans orðom lét Hallr skíraz, oc hion hans öll, oc margir aðrir höfðingi, enn miklo fleiri voru hinir, er ímóti mæltu. Þórvaldr Veili oc Vetrliði skáld ortu nið um Þangbrand, enn hann drap þá báða. Þangbrandr dvalldiz II vetr á Íslandi, oc varð þriggja manna bani áður hann fór í brott.

CAP. LXXXI.

FRÁ HAUKI OC SIGURDI.

Sigurdr er madr nefndr, enn annar Haukr; þeir voro Háleyskir, oc höfðoz miök í kaupferdom. Þeir höfðo ferit eitt sumar vestr til Englands; enn er þeir komo aptr til Noregs, þá sigldo þeir norðr með landi; enn á Nordmæri urdo þeir fyrir lidi Olafs konungs. Enn er konungi var sagt, at þar voro komnir nockorir menn Háleyskir, oc voro heidnir; þá let konungr kalla styrimenn til sín. Hann spurdi þá ef þeir villdi sciraz láta; enn þeir qveda þar nei vid. Síðan taladi konungr fyrir þeim á marga vega, oc stodadi þat ecki. Þá het hann þeim clauda edr meidslom; þeir scipadoz ecki vid það. Þá let hann setia þá í iárn, oc hafdi með sér nockora hrid, oc voro þeir í fiötrom halldnir. Konungr taladi optliga fyrir þeim, oc tydi þat ecki. Oc á einni nótt hurfo þeir á brott, sva at engi madr spurdi til þeirra, edr vissi með hveriom hætti þeir komoz í brott. Enn um haustit komo þeir fram norðr með Háreki í Þiótto; tók hann vel vid þeim; voro þeir þar um vetrinn með hanom í góðo yfirlæti.

CAP. LXXXII.

FRÁ HÁREKI Í ÞÍÓTTO.

Þat var um varit einn góðan vedrdag at Hárekr var heima, oc fátt manna á bænom, oc þótti han-

om daufligt. Sigurdr mælti við hann, ef hann vill, at þeir röi nockot, oc skemti ser? Þat likar Háreki vel; gánga síðan til strandar, oc draga fram sexæring einn; tók Sigurdr or naustino segl oc reida, er fylgdi scipino, sva sem þeir voro optliga vanir at fara, at hafa segl er þeir fóro at skemta ser. Hárekr geck á scip, oc lagdi styri í lag. Þeir Sigurdr brædor fóro með alvæpni, sva sem þeir voro vanir iafnan heima at gánga með bóanda; þeir voro bádir manna sterkastir. Enn ádr þeir gengi út á scipit, köstodo þeir út smiörlaufom nockorom, oc braudkassi, oc báro milli sín mikla munngátz bytto á scipit. Síðan rero þeir frá landit; enn er þeir voro skamt komnir frá eyonni, þá færa þeir brædor segl upp, enn Hárekr styrði; bar þá brátt frá eyonni. Þá ganga þeir brædor aptr, þar til er Hárekr sat. Sigurdr mælti til Háreks bónda: nú skallto kíosa her um kosti nockora: sá er enn fyrsti, láta ockor brædor fyrir ferd varri ráða oc stefno; hinn er annar, at við manom binda þik; sá er inn þridi, at við manom drepa þik. Hárekr sá þá hvernog komit var hans máli; hann var andvígr ecki betr enn öddrom þeirra brædra, ef þeir væri iamnbúir; kaus hann því þann af er hönom þotti nockoro villdastr, at láta þá ráða fyrir ferdinni: batt hann þat svardögom við þá, oc selldi þeim trú sína til þess. Síðan geck Sigurdr til stiórnar, oc stefndi sudr með landi: gæta þeir brædor þess, at þeir skylldo hvargi menn finna; enn byri gaf sem best: Letta þeir

ferdinni eigi fyrr enn þeir koma suðr í Þrándheim, oc inn til Nidröss, oc finna þar Olaf konung. Síðan let Olafr konungr kalla Hárek á tal vit sik, oc baud hanom at láta scíraz; Hárekr mælti ímóti. Þetta tala þeir konungr oc Hárekr marga daga, stundom fyrir mörgom mönnum, enn stundom í einmæli, oc kemr her eigi ásamt. Enn at lyktom segir konungr Háreki: nú skallto fara heim, oc vil ec eigi granda þeir at sinni; helldr þat til, at frændsemi er mikil milli ockar, oc þat annat at þú munt kalla, at ec hafa med svikom fengit þik. Enn vit þat til sanns, at ec ætla mer í sumar at koma norðr þannog, oc vitia yðar Háleygianna; scolot þer þá vita, hvart ec kann refsa þeim er neita kristninni. Hárekr let vel yfir því, at hann qvæmi sem fyrst þadan í brott. Olafr konungr feck Háreki skúto góða, oc rero á bord X menn edr XII; let þat scíp búa sem best at öllom faungom. Konungr feck Háreki XXX manna vaskra drengia oc velbúinna.

CAP. LXXXIII.

DAUDI EYVINDAR KINNRIFO.

Hárekr or þiótto ferr þegar í brott or bænom sem fyrst mátti hann, enn þeir Haukr oc Sigurdr voro med konungi, oc leto scíraz bádir. Hárekr fór leid sína, þar til er hann kom heim í þiótto. Hann sendi þegar ord Eyvindi Kinnrifo vin sínom, oc
bad

bad sva segia hanom, at Hárekr or Þiótto hafdi fundit Olaf konung, oc hafdi eigi kúgaz látit til þess at taka við kristni; hitt annat bad hann segia hanom, at Olaf konungr ætla um sumarit at fara norðr þannig með her á hendr þeim; segir Hárekr, at þeir mæna þar verða varhuga við at gíalda; bad Eyvind koma sem fyrst á sinn fund. Enn er þessi erindi voro borin Eyvindi, þá sér hann at yfrin naudsýn mun til vera, at gera þar fyrir þat ráð, er þeir verði eigi uppnæmir fyrir konungi: Ferr Eyvindr sem skyndiligaz með letti-skúto, oc fáir menn á; enn er hann kom til Þiótto, fagnar Hárekr hanom vel, oc þegar skiótt ganga þeir á tal Hárekr oc Eyvindr annan veg frá bænom. Enn er þeir hafa litla hrid talat, þá koma þar menn Olafs konungs, þeir er Háreki höfðo norðr fylgt, taka þá höndom Eyvind, oc leida hann til scips með sér, fara síðan í brott með Eyvind: Letta þeir eigi fyrr sinni ferd, enn þeir koma til Þrándheims, oc finna Olaf konung í Nidarósi: Var þá Eyvindi fylgt til tals við Olaf konung: Baud konungr hanom at taka skírn sem öðrom mönnum. Eyvindr qvæð þar nei við; konungr bad hann blíðom orðom at taka við kristni, oc segir hanom marga skynsemi, oc sva biskop; Eyvindr skipaðiz eigi við þat. Þá baud konungr hanom gíafar oc veizlor stórar: enn Eyvindr neitti öllu því. Þá het konungr hanom meizlom edr dauða; eigi skipaðiz Eyvindr við þat. Síðan let konungr

bera inn munnaug fulla af glódom, oc setia á qvid Eyvindi, oc braz brátt qvidrinn sundr. Þá mællti Eyvindr takit af mer munnaugina, ec vil mæla ord nockor ádr ec dey; oc var sva gert. Þá spurdi konungr: vilto nú, Eyvindr, trúa á krist? nei! segir hann: ec má enga skirn fá; ec em einn andi, qviknadr í manns likam, med siölkyngi Finna, enn fadir minn oc módir fengo eigi fyrr barn átt. Sídan dó Eyvindr, oc hafdi verit hinn siölkunngasti madr.

CAP. LXXXIV.

CHRISTNATHÁLOGALAND.

Enn um várit eptir let Olafr konungr búa skip sín oc lid; þá hafdi hann siálfr Trönona; hafdi konungr þá mikit lid oc frítt; enn er hann var búinn, hellt hann lidino út eptir firdi, oc sídan norðr fyrir Byrdo, oc sva norðr á Hálogaland. Enn hvar sem hann kem vid land eðr eyar, þá átti hann þing, oc baud hann þar öllo fólki, at taka skirn oc retta trú; bar þá engi madr traust til at mæla ímóti, oc kristnadiz þá land allt þar sem hann fór. Olafr konungr tók veizlo í þiótto at Háreks, þá var hann skirðr oc allt lid hans; gaf Hárekr konungi stórar gíafir at skilnadi, oc gerdiz hans madr, oc tók veizlor af konungi, oc lendsmanns rett.

CAP. LXXXV.

FALL ÞÓRIS HIARTAR.

Randr hinn Rammi er nefndr bóndi einn, er bió

í Firdi þeim er Salpti heitir, í Godey. Raudr var madr stórandigr, oc hafdi marga húskarla; hann var ríkr madr; fylgdi hanom mikill fiöldi Finna, þegar er hann þarfti. Raudr var blótmadr mikill, oc miök fiölkunnigr; hann var vin mikill þess mans, er fyrr var nefndr, þórir Hiörtr: Voro þeir bádir höfdu-gjar miklir. Enn er þeir spurdo at Olafir konungr fór med her manns sunnan um Hálogaland, þá sam-na þeir her saman, oc bióða scipom út, oc fá lid mikit. Raudr hafdi dreka mikinn oc gullbúinn höfot á, var þat scip XXX at rúmatali, oc mikit at því. Þórir Hiörtr hafdi oc mikit skip; þeir hallda lidi því sudr ímóti Olafi konungi, oc þegar er þeir hit-taz, leggja þeir til orosto vid konung; vard þar mikill bardagi, oc gerdiz brátt mannfali, oc sneri því í lid Háleygia, oc rudoz scip þeirra: oc því næst sló á þá felmt oc ótta: Reri Raudr med dreka sinn út til hafs, oc því næst let hann draga upp segl sitt. Raudr hafdi iafnan byr, hvert er hann villdi sigla, oc var þat af fiölkyngi hans; er þat at segia skiótaz af ferd Rauds, at hann sigldi heim í Godey. Þórir Hiörtr flydi inn til lands, oc liópo þar af scipom. Enn Olafir konungr fylgdi þeim; liópo þeir oc af scipom oc rako þá oc drapo: Vard konungr enn fremstr sem iafnan, þá er slíkt skyllði þreyta; kon-ungr sá hvar þórir Hiörtr lióp; hann var allra man-na fóthvatastr; konungr rann eptir hanom, oc fylgdi hanom Vígi hundr hans. Þá mælti konungr: Vígi! tak hiörtinn; Vígi lióp fram eptir þóri, oc þegar

upp á hann. Þórir nam stad við, þá skaut konungr kesio at þóri; þóri lagdi sverdið til hundsins, oc veitti honom sár mikit, enn iamskiótt fló kesia konungsins undir hönd þóri, sva at út stód um adra síðona; let þórir þar líf sitt, enn Vígi var borinn sárr til scipa. Olafur konungr gaf grid öllum mönnum þeim er báðo, oc kristni villdo taka.

CAP. LXXXVI.

FERD OLAFS KONUNGS TIL CODEYA.

Olafur konungr hellt lidi síno norðr með landi, oc kristnadi allt fólk, þar sem hann fór; enn er hann kom norðr at Salpti, ætladi hann at fara inn í fiörðinn, oc finna Raud; enn hret vedrs oc stakastormr lá innan eptir firði, oc lá konungr þar til viko, oc hellz et sama hreggvidri innan eptir firðinom, enn et ytra var blásandi byrr at sigla norðr með land: Sigldi þá konungr allt norðr í Ömd, oc geck þar allt folk undir kristni. Síðan snýr konungr ferd sinni aptr suðr; enn er hann kom nordan at Salpti, þá var hregg vedrs út eptir firði oc siádrif; konungr lá þar nockorar nætor, oc var vedr et sama. Þá taladi konungr við Sigurd biskop, oc spurdi eptir, ef hann kynni þar nockot ráð tilleggja. Biskop sagði at hann mundi freista, ef Guð vill sinn styrk tilleggja, at sigra þenna fianda krapt.

CAP. LXXXVII.

FRÁ SIGURDI BISKUPI OC PININGO RAUDS.

Sigurdr biskop tók allan messo skráða sinn, oc geck fram í stafn á konungs skipi, let tendra kerti, oc bar reykelsi; setti rodokross upp í stafninn; las þar Gudspjall oc margar bænir; stökdi vígdo vatni um allt scipit; síðan bad hann taka af fiölldin, oc róa inn á fiördinn. Konungr let þá kalla til annara scipa, at allir skyldo róa inn á fiördinn eptir hanom. Enn er ródr var greiddr á Trönunni, þá geck hon inn á fiördinn, oc kendo þeir eingan vind á ser, er því skipi rero, oc sva stód toptin eptir í varrsímanum, at þar var logn. Enn sva laust siárokan brott frá tveggja vegna, at hvergi sá fiöllin fyrir: Reri þá hvert skip eptir ödro þar í lognino; fóro þeir sva allan dag, oc eptir um nóttina; komo litlo fyrir dag inn í Godeyar. Enn er þeir komo fyrir bæ Rauds þá flaut þar fyrir landi dreki hans sá hinn mikli. Olafur konungr geck þegar upp til bæarins með lid sitt, veitti þar atgaungo lopti því, er Raudr svaf í, oc bruto upp; hliópo menn þar inn; var þá Raudr handtekinn oc bundinn; enn drepnir þeir menn aðrir er þar voro inni, enn sumir handteknir. Þá gengo konungs menn at skála þeim er húskarlar Rauds sváfo í, voro þar sumir drepnir, enn sumir bundnir, sumir bardir: Let þá konungr leida Raud fyrir sik, oc baud hanom at láta skíraz; mun ec þá, segir konungr, eigi taka af þer eigo þína, vara helldr vin

Þinn, ef þú kant tilgæta. Raudr æpti á móti því, segir, at alldri seyllði hann á krist trúa, oc Gudla-stadi miök; konungr varð þá reidr, oc sagði, at Raudr skyllði hafa hinn versta dauda. Þá let konungr taka hann oc binda opinn á slá eina, let setia kelli á millom tanna hanom, oc lúka sva upp munninn: þá let konungr taka lyng-orm einn, oc bera at munnni hanom, enn orminn villði eigi í munninn, oc reyktiz frá í brott, því Raudr bles ímóti hanom. Þá let konungr taka hvann-niöla trumbo, oc setia í munn' Raudi; enn sumir menn segia, at konungr leiti lúdor sinn setia í munn hanom, oc let þar í orminn; let síðan bera at utan slá-iárn glóanda; rökðiz þá ormrinn í munn Raudi, oc síðan í hálsinn, oc skar út um síðona; let Raudr þar lif sitt. Olafur konungr tók þar ofa mikit fe í gulli oc silfri, oc öðro lausafe, í vapnom oc margskonar dyrgrípom. Enn menn alla, þá er fylgt höfðo Raudi, let konungr skíra, enn þá er þat villdo eigi, let hann drepa edr qvelia. Þá tók Olafur konungr dreka þann, er Raudr hafði átt, oc styrði sjálfr, þvíat þat var miklō meira skip oc fridara, enn Tranan; fram var á dreka höfot, enn aptr krókr, oc fram af sem spódr: oc hvartveggi svírin, oc allr stafinn var með gulli lagdr: þat skip kalladi konungr orminn; þvíat þá er segl var á lopti, skyllði þat vera fyrir vængi drekans: var þetta seip frídaz í Noregi öllom. Eyar þær'er Raudr bygdi heto Gilling oc Hæring, enn allar saman heita þær Godeyar, oc Godeya-straumur fyrir nordan, oc

milli meginlands. Olafur konungur kristnadi fiðrd þann allan; ferr síðan leid sína suður með landi, og varð í þeirri ferð mart til tíðinda, þat er í frásögn er fært, er tröll og illar vættir glettoz við menn hans, og stuundom við hann siálfan. Enn ver vilíom hit helldr rita um þá atburði, er Olafur konungur kristnadi Noreg, eður önnor þau lönd, er hann kom kristni á. Olafur konungur kom líði síno þat sama haust í þrándheim, og helld til Níðaross, og bió ser þar til vetrseto. Þat vil ec nú næst rita láta, at segia frá Íslenskum mönnum.

CAP. LXXXVIII.

FRÁ ÍSLENDINGOM. 3

Þetta sama haust komo til Níðaróss útan af Íslandi Kíartan Olafsson Höskulldssonar, og dóttorson Egíls Skallagrímssonar, er einn hesir kalladr verit mannvænstr maður, þeirra er fædz hafi á Íslandi. Þar var þá og Halldor son Guðmundar á Möðrovöllum, og Kollbeinn son Þórdar Freysgoda, bróður Brenno-Flosa; og Svertíngur son Runólfs Góða: þessir voro allir heíðnir; og margir aðrir, sumir ríkir, enn sumir úríkir. Þá komo og af Íslandi göfgir menn, er kristni höfðu tekit af þángbrandi, Gíssor Hvíti, son Teits Ketilbíarnarsonar; enn móður hans var Alöf, dóttir Bóðvars Hersis, Víkinga-Kárasonar; bróður Bóðvars var Sígurður, faður Eiríks Bíóðascalla, föður Astríðar, móður Olafs konungs.

Hiallti het madr Islendzkr Skeggiason; hann átti Vilborgo dóttor Gissora Hvíta; Hiallti var oc kristinn madr, oc tók Olafr konungr feginsamliga við þeim mágom Gitzori oc Hiallta, oc voro þeir með hanom. Enn þeir Islendskir menn er fyrir scipom redo, oc heidnir voro, þá leitado þeir til brott-siglingar, þegar er konungr var í bænóm; þvíat þeim var sagt, at konungr naudgadi öllum til kristni; enn vedr geck í þrá þeim, oc rak þá aptr undir Nidar-hólm. Þeir redo þar fyrir scipom Þórarinn Ne-fiúlfsson, Hallfredr Skálld Ottarson, Brandr hinn Örvi, Þórleikr Brandsson. Þetta var sagt Olafi konungi, at Islendingar voro þar nockorom scipom, oc heidnir allir, oc villdo flya fund konungs. Þá sendi konungr menn til þeirra, oc bannadi þeim braut at hallda; bad þá leggja inn til bæar, oc gördó þeir sva, enn báro eigi af scipom sínom. Þeir átto kaupstefno, oc helldo torg við konungs bryggior. Um várit leitado þeir til brautsiglingar þrysvar, oc gaf þeim alldri, oc lágo við bryggior. Þat var einn góðan vedr dag, at margir menn fóro á sund, oc skemta ser; einn var sá madr, er þar bar langt af öðrom of allir iþróttir. Kiartan mælti við Hallfred Vandrædaskálld, at hann skyldi reyna sund við þenna mann; enn hann telz undan. Kiartan mælti: ec skal þá freista; kastar af ser klædonom, oc verpr ser á sund; legdz at þessom manni, oc grípr um fót hānom, oc færir hann nidr; koma upp; oc höfdoz engi ord við: fara nidr öðro sinni oc ero myklo

lengr nidri, enn hit fyrra sinn; koma enn upp, oc þegia: fara þegar nidr þridia sinni, þar til er Kiartani þickir allt mál upp, oc er þá eigi þess kostur, oc kennir þá aflsmunar; ero nidri, þar til er Kiartan er miök þrotinn; koma þá upp oc leggiaz at landi; spyr hinn Norræni madr, hverr Islendingr væri at namui? Kiartan nefnir sik; hinn mælti: þú ert vel sundfærr; edr ertu iþróttamadr at fleirom lutom? Kiartan svarar: þat er litil iþrótt. Hinn Norræni mælti: hví spyrto eingis ímót? Kiartan svarar: ec ætla mik eingo skipta, hverr þú ert, edr hvat þú heitir; hinn svarar: ec mon þá segia þer; her er Olaf Tryggvason. Hann spurdi Kiartan margs af Islandi; enn hann segir allt of lettliga. Sidan ætla Kiartan braut at gánga sciotliga. Konungr mælti: her er skickia, er ec vill gefa þer Kiartan, enn Kiartan þá skickiona, oc þackadi hanom forkunnar vel.

CAP. LXX XIX.

SKÍRDIR ÍSLENSKIR MENN.

Þá kom Michialsmessa; let konungr þá hallda miök til, at syngia messo hátidliga. Islendingar gengu til oc lyddo saung fögrom, oc klucknahliódi. Enn er þeir komo til scipa sinna, sagði hverr þeirra hvernig likat hafdi atferd kristinna manna. Kiartan let vel yfir, enn flestir adrir löstodo. Enn sva fór þar, sem mælt er, at mörg ero konungs eyro:

Var konungi þetta sagt. Þá gerdi hann þegar um daginn mann eptir Kiartani, oc bad hann koma til sín. Kiartan geck til konungs med nockora menn; konungr sagnadi hanom vel. Kiartan var allra manna mestr oc fríðastr, oc vel ordi farinn; enn er þeir konungr höfðo fáan ordom vidsciptz, þá baud konungr Kiartani at taka vid kristni. Kíartan segir, at hann vill því eigi neita, ef hann skal þá hafa vinátto konungs; konungr heitir hanom vinátto sinni fullkominni, oc semia þeir Kiartan þá sáttmál milli sín. Annan dag eptir var Kiartan skídr, oc Bolli Þórleiksson frændi hans, oc allt föroneyti þeirra: Var Kiartan oc Bolli í bodi konungs, medan þeir voro í hvítavadam, oc var konungr allkærr til þeirra, oc þóttu þeir ágætir menn, hvar sem þeir komo.

CAP. XC.

SKÍDR HALLFREDR VANDRÆDA-
SKÁLLD.

Olafr konungr geck einn dag úti á stræti, enn menn nockorir gengo ímóti hanom, oc sá er fyrstr geck, sagnadi konungi. Konungr spurdi þann mann at nafni; sá nefndiz Hallfredr. Þá mælti konungr: erto skálldit? hann sagdi: kann ec yrkia. Þá mælti konungr: þú mant vilia taka kristni, oc geraz síðan minn madr? hann segir: kostur skal á því vera, at ec man scíra: láta, ef þú, konungr, veitir mer siálfr gudsfiar; af engom manni öðrom vil ec þat þiggia;

konungr svarar: ec vil þat gera: Var þá Hallfredr scídr, oc hellt konungr hanom undir scírn. Síðan spurdi konungr Hallfred: villto nú geraz minn madr? Hallfredr sagdi: ec var fyrr hirdmadr Hákonar Jarls; nú vil ec eigi geraz þer handgenginn, oc engom ödrom höfðingiom, nema þú heitir mer því, at mik hendi enga þá luti, er þú rekir mik frá þer. Sva at eino er mer sagt, segir konungr, at þú er eigi sva vitr eda spakr, at mer er örvænt, at þú gerir þá luti, er ee vil fyrir engan mun vidsæma; drepto mik þá, segir Hallfredr; konungr mælti: þú ert Vandrædascáll, enn minn madr scallto nú vera. Hallfredr svarar: hvat gefr þú konungr mer at nafnfesti, ef ec scal heita Vandrædascáll. Konungr gaf hanom sverd, oc fylgdi engi umgerd. Konungr mælti: yrk nú víso um sverdit, oc lát sverd vera í hverio víso ordi. Hallfredr qvad:

Eitt er sverd þat er sverda
sverdandgan mik gerdi
fyrir svip-niördom sverda
sverdótt mun nú verda.

Mana van-sverdat verda,
verdr em ec þriggja sverda,
iadar leggs ef yrði
umgerd at því sverdi.

Þá feck konungr hanom umgerd oc mælti: eigi er sverd í hverio víso ordi; Hallfredr svarar: tveir ero oc í cino: sva er þat, segir konungr. Af Hallfredar qvædom tókóm ver hellz vísindi, oc sannindi, þat er sagt er frá Olafi konungi Tryggvasyni.

CAP. XCI.

ÞÁNGBRANDR KOM APTR FRÁ ÍSLANDI
TIL OLAFS KONUNGS.

Þetta sama haust kom Þángbrandr prestur aptr af Íslandi til Olafs konungs, og sagði sínar farar eigi sleifar; segir, at Íslendingar hefði gert níð um hann, enn sumir villdu drepa hann, og let enga ván, at þat land mundi kristit verða. Olafur konungur varð svo óðr og reidr, at hann let blása öllum Íslenskum mönnum saman, þeim er þar voru í bænóm, og mælti síðan, at alla skyldi drepa. Enn Kíartan og Gíssor og Híallti, og aðrir þeir er þá höfðu við kristni tekið, gengu til hans, og mæltu: eigi manto, konungur, vilja svo ganga á bak orðom þínum, þvíat þú mælir svo, at eingi maður skal svo mikit hafa gert til reidi þinnar, at eigi villto þat uppgefa, þeim er skíraz vilja, og láta af heidni. Nú vilja þessir allir Íslenskir menn, er her eru nú, skíraz láta. Enn ver manom finna bragð þar til, er kristni mun vídgáng-az á Íslandi. Ero her margir ríkra manna synir af Íslandi, og mano feður þeirra mikit lídsinni veita at þessu máli; enn Þángbrandr prestur fór þar, sem her með yður, við ofstopa og manndráp, og þoldu menn hanom þar ecki slíkt: Tók þá konungur at lyða á slíkar ræður: Voru þá skírdir allir Íslenskir menn þeir sem þar yoru þá.

CAP. XCII.

FRÁ ÍPRÓTTOM OLAFS KONUNGS.

Olafr konungr var mestr íþrótta madr í Noregi, þeirra er menn hafa frásagt, um alla luti; hveriom manni var hann sterkari oc fimari, oc ero of þat margar frásagnir ritadar. Ein sú, er hann geck í Smalsarhorn, oc festi þar upp skiölld sinn í ofanverdt biargit; oc enn þat, er hann halp hirdmanni sínom, þeim er ádr hafdi klifit biargit, sva at hverki mátti hann komaz upp, ne ofan; enn konungr geck til hans, oc bar hann undir hendi ser allt ofan á iöfno. Olafr konungr geck eptir árom útbyrdis, er menn hans rero á Orminom. Oc hann lek at þrimor handsöxom, sva at iafnan var eitt á lopti, oc hendi æ medalkaflan; hann geck fyrir bard á scipi síno; hann var iafntamr bádóm höndom, oc skaut II spiótom senn. Olafr konungr var allra manna gladastr oc leikinn miök, blídr oc litillátr, ákafamadr mikill of alla luti, stórgiöfull, sundrgerda madr mikill; fyrir öllom mönnom um fræknleik í orosto; allra manna grimmastr, þá er hann var reidr, oc qvaldi úvini sína miök; suma brendi hann í elfti; suma let hann ólma hunda rífa í sundr; suma lemia edr kasta fyrir hábiörg: voro af þeim sökum vinir hans ástúdgir miök vid hann, enn úvinir hans hræddoz vid hann; var því mikill framqvæmd hans, at sumir gerdo hans vilia med blíðo oc vinátto, enn sumir fyrir rædslosakir.

CAP. XCIII.

SKÍRDR LEIFR EÍRIKSSON.

Leifr son Eiríks Rauda, þess er fyrstr bygdi Grænland, var þetta sumar kominn af Grænlandi til Noregs; fór hann á fund Olafs konungs, oc tók við kristni; oc var um vetrinn með Olafi konungi.

CAP. XCIV.

FALL GUDRÖÐAR KONUNGS GUNN!

HILLDAR SONAR.

Gudrödr son Eiríks Blódöxar, oc Gunnhilldar konunga móðor, hafði verit í hernadi í Vestrlöndom sidan er hann flyði land fyrir Hákoní Jarli. Enn á þessu sumri er nú er áðr fráságt, þá er Olaf konungr Tryggvason hafði IV vetur ráðit fyrir Noregi, þá kom Gudrödr til Noregs, oc hafði mörg herscip; hann hafði þá siglt út af Englandi; oc er hann kom í landvön við Noreg, þá stefndi hann sudr með landino, þángat er hanom var minni van Olafs konungs; siglir Gudrödr til Víkurinnar. Enn þegar er hann kom til lands, tók hann at heria oc brióta undir sik landsfólk, enn beiddi ser vidtöko. Enn er landsmenn sá at her mikill var kominn á hendör þeim, þá leita menn ser grida oc sætta, oc bióða konungi, at þingbod skuli fara yfir land, oc bióða hanom helldr vidtöko, enn þola her hans; oc væri þar lögd frest á, medan þingbod færi yfir; krafði þá konungr

vista gjallds, meðan sú bíðandi scyllði vera. Enn bræðor kíósa hinn kost helldr, at búa konungi veizlor, þá stund alla, er hann þurfi til þess; oc tók konungr þann kost, at hann fór um land at veizlom med sumt lid sitt, enn sumt gætti skipa hans. Enn er þetta spýria þeir bræðor Hyrningr oc Þórgeirr, mágar Olafs konungs, þá samna þeir ser lidi, oc ráða ser till scipa; fara síðan norðr í Vikina, oc koma á einni nótt, med lidi síno, þar sem Guðrödr konungr var á veizlo; veita þar atgaungo med elldi oc vapnom; fell þar Guðrödr konungr, oc flest allt lid hans. Enn þat er á skiponom hafði verit, var sumt drepit, enn sumt komz undan oc flyði víðs vegar. Voro þá dauðir allir synir Eiríks oc Gunhíldar.

CAP. XCV.

GIÖRR ORMRINN LÁNGI.

Þann vetr eptir, er Olaf konungr hafði komit af Hálogalandi, let hann reisa scip mikit inn undir Ladhömrom, þat er meira var miklo, enn önnor þau skip, er þá voro í landino, oc ero enn þar backastockar, sva at siá má; þat var at lengd IV álnar hins átta tigar, er graslægt var. Þórberg Skafhogg er nefndr sá madr, er stefna-smidr var at scipino; enn þar voro margir adrir at; sumir at fella, sumir at telgia, sumir saum at slá, sumir til at flytia vido: voro þar allir lutir vandadir miök til: var skipit bæði langt oc breidt, oc bordmikit, oc stórvidat. Enn er

Þeir báro skipit bordi, þá átti Þórbergr naudsýnia erindi at fara heim til bús síns, oc dvalldiz þar miök lengi. Enn er hann kom aptr, þá var skipit fullborda: Fór konungr þegar um qvölldit, oc Þórbergr með hanom, oc síá þá skipit, hvernog ordit var: oc mælti hverr madr, at alldri hefði sed lánscip jammikit, edr jamfritt: ferr þá konungr aptr í bæinn. Enn snemma eptir of morguninn, ferr konungr enn til skipsins, oc þeir Þórbergr; voro þá smidar þar ádr komnir; stódo þeir allir, oc höfdoz ecki at. Konungr spurdi: hví þeir færi sva? þeir segia, at spillt var skipino, oc madr mundi gengit hafa ödro megin frá stafni til lyptingar, oc sett í bordit ofan hvert skyli högg at ödro: Geck konungr þá til, oc sá, at satt var; mælti þegar, oc svaradi um, at sá madr skyldi deya, ef konungr vissi, hverr fyrir öfundar sakir hefði spillt skipino: enn sá er mer kann þat segia, skal mikil gædi ef mer lióta. Þá segir Þórbergr: ec mun kunna segia ydr konungr, hver þetta verk mun gert hafa. Mer er eigi þess at ödrom manni meiri von, segir konungr, at þetta happ muni henda, enn at þer, at verda þess vís, oc kunna mer segia. Segia mun ec þer konungr, sagdi hann, hver gert hefir: ec hefi gert. Þá svarar konungr: þá skallto bæta, sva at iamvel se sem ádr var; þar skal lif þitt vid liggia. Síðan geck Þórbergr til oc telgdi bordit, sva at öll gengo or skylihöggin. Konungr mælti þá, oc allir adrir, at skipit

skipit væri miklo frídara á þat bord er Þórbergr hafði skorit; bad konungr hann þá sva gera á bæði bord, oc bad hann hafa mikla þöck fyrir: Var þá Þórbergr höfotsmidr fyrir skipino, þar til er algert var; var þat dreki, oc gerr eptir því sem dreki sá, er konungr hafði haft af Hálogalandi; enn þetta scip var miklo meira, oc at öllum hlutom meir vandat. Konungr kalladi þetta scip Orm hinn lánga, enn hinn, Orm inn skamma. A orminom lánga voro IV rúm oc XXX. Höfudit oc krókrinn var allt gullbúit; sva voro há bordin sem á hafskipom. Þat hefir skip verit best gert, oc med mestom kostnadi í Noregi.

CAP. XCVI.

FRÁ EIRÍKI JARLI HÁKONARSYNI.

Eiríkr Jarl Hákonar son oc brædor hans, oc margir adrir göfgir menn, frændor þeirra, fóro af landi á brott, eptir fall Hákonar Jarls: Fór Eiríkr Jarl austr í Svíþíód, á fund Olafs Svía konungs, oc fengo þeir þar góðar viltökör: Veitti Olafr konungr þar Jarli fridland, oc veizlor stórar, sva at hann mátti þar vel halda sik í landi, oc lid sitt. Þess getr Þórdr Kolbeinsson:

Mein rennir brá manna &c.

Hafði ser vit særi &c.

(Cap. 57.)

Lid mikit sótti af Noregi til Eiríks Jarls, þat er landflótta vard fyrir Olafi konungi Tryggvasyni; tók

Eiríkr Jarl þá þat ráð, at hann red ser til scipa, oc fór í hernad, at fá ser fiár oc lidi síno. Hann hellt fyrst til Gotlands, oc lá þar vid lengi um sumarit, oc sætti þar kaupscipom, er sigldo til landsins, edr víkingom; stundom geck hann upp á landit, oc heriadi þar vida med síanom. Sva segir í Bandadrápo:

Mærr vann miklo fleiri
málm hrið iöfurr sídan,
ádr fragom þat, adra
Eiríkr und sik geira;
þá er gard vala gerdi
Gotland vala strandar
Virvils vítt of heriat
vedrmilldr oc semr hilldi.

Sídan sigldi Eiríkr Jarl sudr til Vindlands, oc hitti hann fyrir staurinom víkinga-skip nockor, oc lagdi til orosto vid þá: þar feck Eiríkr Jarl sigr, enn drap víkingana. Sva segir í Bandadrápo:

Stærir let at stauri
stafn vigg í höfn liggia,
gramr vælti sva gunna,
gunnblídr oc red sídan.
Sleit at sverda móti
svörd víkinga hördo
unda már fyrir eyri;
Jarl Gud vördo hiarli.

CAP. XCVII.

HERNADR EIRÍKS Í AUSTRVEG.

Eiríkr Jarl sigldi um haustit apr til Svíþíódar, oc var þar vetr annan; enn at vári bió hann her sinn,

oc sigldi síðan í Austrveg. Enn þá er hann kom í ríki Valldimars konungs, tók hann at heria oc drepa mannfólkit, oc brenna allt þar sem hann fór, oc eyddi landit; hann kom til Aldeigioborgar, oc settiz þar um, þar til er hann vann borgina, drap þar mart fólk, enn braut oc brendi borgina alla, oc síðann fór hann víða herskilldi um Gardaríki. Sva segir í Banda-drápo:

Oddhrídar fór eyða,
 óx hrið at þat síðan,
 log fágandi lægis
 land Valldimars brandi.
 Aldeigio branzt ægir,
 os nunnaz skil, gunna,
 sú vard hilldr med hölldom
 hörd, komto austr í Garda.

Eiríkr Jarl var í þessom hernadi öllom samt V sumor: enn er hann kom or Gardaríki, fór hann herskilldi um alla Adalsyslo oc Eysyslo, oc þar tók hann IV víkinga-skeidor af Dönom, oc drap allt af. Sva segir í Banda-drápo:

Frá ec hvar fleina sævar
 fur herdir styr gerdi
 endr í Eyasundi
 Eiríkr und sik geira.
 Raud fur gíafall fíórar
 fólk meidr Dana skeidar,
 ver frágom þat, vaga
 vedr milldr oc semr hilldi.
 Attot hialldr þar er hölldar
 hlunn viggs í bæ runno
 gæti niördr víð Gapta
 gunnblídr oc red síðan.

Herskilldi fór hilldar,
 hann þverdi frid manna,
 áss of allar syslor,
 Jarl Gud vördo hjarli.

Eiríkr Jarl fór til Danmerkor, þá er hann hafði einn vetr verit í Svíavelldi; hann fór á fund Sveins Tiúguskeggs Dana konungs, oc bad til handa ser Gydo dóttor hans, oc var þat at ráði gert; feck þá Eiríkr Jarl Gydo. Vetri síðar átto þau son er Hákon het. Eiríkr Jarl var á vetrom í Danmörk, en stundom í Svíavelldi, enn í hernadi á sumrom.

CAP. XCVIII.

KVANFÁNG SVEINS KONUNGS.

Sveinn Dana konungr Tiúguskegg átti Gunnhilddi; dóttor Burislafs Vinda konungs. Enn í þenna tíma, sem nú var ádr frásagt, var þá þat til tíðinda, at Gunnhilldr drottning tók sótt oc andadiz: Enn litlo síðar feck Sveinn konungr Sigrídar hinnar Stórrádo; dóttor Sköglar Tosta, módor Olafs ens Sænska, Svía konungs: Tókoz þar þá med tengdom konunga kærleikar, oc med öllom þeim Eiríki Jarli Hákonar syni.

CAP. XCIX.

KVANFÁNG BURISLEIFS KONUNGS.

Burislafur Vinda konungr kærði mál þat fyrir Sigvallda Jarli mági sínom, at sættargerð sú var rofin, er Sigvalldi Jarl hafði gert milli Sveins konungs oc

Burislafs konungs, er Burislafr konungr skyldi fá þyri Harallds dóttor, systor Sveins konungs; enn þat ráð hafði ecki framgengit, þvíat þyri setti þar þvert nei fyrir, at hon mundi giptaz vilia konungi heidnom oc gömlom. Nú segir Burislafr konungr Jarli, at hann vili heinta þann máldaga, oc bad Jarl fara til Danmerkor, oc hafa þyri drottningo til sín. Sigvalldi Jarl lagdiz þá ferd eigi undir höfot, oc fer á fund Sveins Dana konungs, oc ber þetta mál upp fyrir hann; oc kemr Jarl sva fortölom sínom, at Sveinn konungr fær í hendur hanom þyri systor sína; oc fylgdo henni konor nockorar, oc fósturfadir hennar, er nefndr er Ötzorr Akason, ríkr madr, oc nockorir menn adrir; kom þat í einkamál med konungi oc Jarli, at eignir þær í Vindlandi, er átt hafði Gunnhilldr drottning, skyldi þá hafa þyri til eiginords, oc þar med adrar stórar eignir í tilgiöf sína. Þyri gret sárliga, oc fór miök naudig. Enn er þau Jarl komo í Vindland, þá gerdi Burislafr konungr brullaup sitt, oc feck þyri drottningar. Enn er hon var med heidnom mönnom, þá villdi hon hvarki þiggia mat ne dryck at þeim, oc fór sva fram VII nætor.

CAP. C.

OLAFR KONUNGR FECK ÞYRI DROTTNINGAR.

Enn þá var þat á einni nótt, at þyri drottning oc

Ötzorr líópoz í brott í nátt-myrkri, oc þegar til skógár; er þat skiótaz af þeirra ferd at segia, at þau koma fram í Danmörk, oc þorir Þyri þar fyrir engan mun at vera, fyrir þá sök at hon veit ef Sveinn konungr bródir hennar spyr til hennar þar, at hann mun sciótt senda hana aptr til Vindlands: Fara þau allt huldo höfði, þar til er þau komo í Noreg; letti Þyri eigi ferdinni, fyrr enn þau koma á fund Olafs konungs: tók konungr vid þeim vel, oc voro þau þar í góðom fagnadi: Sagdi Þyri konungi allt um sín vandrædi, oc bidr hann hialpráda, oc fridar í hans ríki. Þyri var kona ordsniöll, oc virðiz konungi vel rædor hennar: Sá hann, at hon var fríd kona, oc kemr í hug, at þetta mani vera gott qvanfång, oc víkr þannog ræduuni, oc spyr ef hon vill giptaz hanom. Enn sva sem þá var hennar rádi komit, þótti henni vandi mikill or at ráda; enn í annan stad sá hon hvarso farsælligt giaford þetta var, at giptaz sva ágætom konungi, oc bad hann ráda fyrir ser, oc síno rádi. Oc sva sem um þetta var talat, þá feck Olafur konungr Þyri drottningar. Þetta brullaup var gert um haustit, þá er konungr hafdi komit nordan af Hálogalandi: Var Olafur konungr oc Þyri drottning í Nidarósi um vetrinn. Enn eptir um várit, þá kærði Þyri drottning opt fyrir Olafi konungi, oc gret sárliga, þat er eignir hennar voro sva miklar í Vindlandi, enn hon hafdi eigi fiárlut þar í landi, sva sem drottningo sæmdi: stundom bad hon konung fögrom ordom, at

hann skyldi fá henni eign sína; segir, at Burislafr konungr var sva mikill vin Olafs konungs, at þegar er þeir fynniz, mundi konungr fá Olafi konungi allt þat er hann beiddiz. Enn er þessar rædo urdo varir vinir Olafs konungs, þá lötto allir konung þessarar farar. Sva er sagt, at þat var einn dagsnimma um várit, at konungr geck eptir stræti, enn vid torg geck madr ímóti hanom med hvannir margar, oc undarlíga stórar þann tíma várs. Konungr tók einn hvann-níola mikinn í hönd ser, oc geck heim til herbergis þyri drottningar; þyri sat inn í stofni, oc gret er konungr kom inn. Konungr mælti: se her hvann-níola mikinn, drottning, er ec gef þer; hon laust vid hendinni, oc mælti: stærrom gaf Haralldr Gormsson, enn midr ædradz hann at fara af landi, oc sækia eign sína, enn þú gerir nú; oc reyndiz þat þá, er hann fór hingat í Noreg, oc eyddi mestan luta lands þessa, enn eignadz allt at skyldom oc sköttom; enn þú þorir ei at fara í gegnom Danavellði fyrir Sveini konungi bróðor minom. Olafur konungr lióp upp vid, er hon mælti þetta, oc mælti hátt, oc svardi vid: alldri skal ec hræddr fara fyrir Sveini konungi bróðor þínom, oc ef ockrir fundir verða, þá skal hann fyrir láta.

CAP. CI.

ÚTBOD OLAFS KONUNGS.

Olafur konungr stefndi þing í bænom litlo síðar;

hann gerdi þá bert fyrir allri alþýdo, at hann mundi leidánger úti hafa um sumarit fyrir landi, oc hann vill nefnd hafa or hverio fylki, bædi at skipom oc lidi: segir hann hversu mörg skip hann vill þadan hafa or firdinom. Síðan gerir hann ordsending bædi norðr oc suðr með landi, et ytra oc et efra, oc lætr lidi útbióða. Olafr konungr lætr þá setia fram Orminn lánga, oc öll önnor skip sin, bædi stór oc smá: Styrði hann síálfr Orminom lánga. Oc þá er menn voro þar ráðnir til scipanar, þá var þar sva miök vandat lidit oc valit, at engi madr scylldi vera á Orminom lánga ellri enn sextogr, edr yngri enn tvítogr; enn valdir miök at afli oc hreysti. Þar voro fyrst tilskoradir hird-menn Olafs konungs, þviat þat var valit af innanlands mönnom oc útanlands, allt þat er sterkast var oc fræknast.

CAP. CII.

MANNTAL Á ORMINOM.

Ulfur Raudr het madr, er bar merki Olafs konungs; oc í stafni var á Orminom, oc annar Kolbiörn stálari, Þorsteinn Uxafótr, oc Vikarr af Tiundalandi, bródir Arnlióts Gellina. Þessir voro á Rausninni í Söxom: Vakr Elfski Raumason, Bersi hinn Sterki Bollason, An Skyti af Jamtalandi, Þrándr Rami af Þelamörk, oc Uþyrmir bródir hans; Þeir Háleygir: Þránder Skiálgi oc Ögmundr Sandi, Lödver Langi or Salltvík, oc Hárekr Hvassi; Þeir Innan-Þrændir:

Ketill Hani, Þorfinnr Eisli, Havardr, oc þeir bræðor or Orkadal. Þessir voro í Fyrirrúmi: Biörn af Studlo, Börkr or Fiördom, Þórgrímr or Hvini Þjóðólsson, Asbiörn oc Ormr, Þórdr or Mardarlög, Þórsteinn Hvíti af Ofrostödom, Arnór Mærski, Hallsteinn oc Haukr or Fiördom, Eyvindr Snákr, Bergdórr Bestill, Hallkell af Fiölom, Olafr Drengr, Arnfinnr Sygnski, Sigurdr Bíldr, Einarr Hörðzki, oc Finnrr; Ketill Rygski, Griótgardr Röskvi. Þessir voro í Krapparúmi: Einar Þambarskelfir, hann þótti þeim eigi lutgengr, þvíat han var XVIII vetra; Hallsteinn Hlífarson, Þórolfr, Ivarr Smetta, Ormr Skógarnef; oc margir adrir menn miök ágætir voro á Orminom, þótt ver kunnom eigi at nefna. Atta menn voro í hálf-rymi á Orminom, oc var valit einom manni oc einom. XXX manna voro í Fyrirrúmi. Þat var mál manna, at þat mannval er á Orminom var, bar eigi minna af ödrom mönnom um fríðleika oc afl oc fræknleik, enn Ormrinn lángi af ödrom scipom. Þórkell Nefia, bródir konungs, styrði Orminom Skamma; Þórkell Dydrill, oc Jósteinn, móðorbræðor konungs, höfdo Trönona; oc var hvartveggia þat skip allvel skipat. Ellifo stórskip hafði Olafr konungr or Þrándheimi, oc umfram Tvítogsessor oc smærri skip oc vistar byrðinga.

CAP. CIII.

KRISTNAT ÍSLAND.

Enn er Olafr konungr hafði miök búit lid sitt or

Nidarósi, þá skipadi hann mönnum um öll þrændalög í syslor oc ármennningar; þá sendi hann til Islands Gitzorr Hvíta oc Hiallta Skeggiason at boda kristni á Islandi, oc feck med þeim prest þann er þormódr er nefndr, oc fleiri vígda menn; enn hafdi eptir med ser í gisling IV Islendzka menn, þá er hönom þóttó ágælastir, Kiartan Olafsson, Halldor Gudmundarson, Kolbein Þórdarson, Sverting Runolfsson. Oc er þat sagt af ferd þeirra Gitzorar oc Hiallta, at þeir komo til Islands fyrir Alþing, oc fóro til þings, oc á því þingi var kristni í lög tekin á Islandi, oc þat sumar var skírt allt landsfólk.

CAP. CIV.

KRISTNAT GRÆNLAND

Olafr konungr sendi oc þat sama vár Leif Eiríksson til Grænlands, at boda þar kristni, oc fór hann þat sumar til Grænlands; hann tók í hafi skipsögn þeirra manna, er þá voro ófærir, oc lágo á skipsflaki, oc þá fann hann Vínland it góða; oc kom um haustit til Grænlands, oc hafdi þannog med ser prest oc kennimenn, oc fór til vistar í Brattahlíð til Eiríks födor sins. Menn köllodo hann síðan Leif hinn Heppna. Enn Eiríkr fadir hans segir, at þat var sauskulda, er Leifr hafdi borgit skipsögn manna í hafi, oc þat er hann hafdi flutt ske-mannin til Grænlands, þat var prestrinn.

CAP. CV.

FRÁ SIGLING BIARNA HERIÚLSSONAR.

Heriúlfr var Bardar son, Heriúlfssonar: hann var frændi Ingolfs landnámamans. Þeim Heriolfi gaf Ingolfr land á milli Vogs oc Reykianess. Heriúlfr bió fyrst á Dreppstocki; Þórgerdr het kona hans, enn Biarni son þeirra; oc var hinn efniligsti madr. Hann fystiz utan þegar á unga alldri: vard hönom gott, bædi til fiár oc mannvirdingar, oc var sinn vetr hvert utanlands edr med fedr sínom. Brátt átti Biarni skip í förom. Hinn sídasta vetr, er hann var í Noregi, þá brá Heriúlfr til Grænlands ferdar med Eiríki, oc brá búi sino. Med Heriúlfí var á skipi Sudreyskr madr kristinn, sá er orti Hafgerdingar-drápo; þar er þetta stef í:

Mínar bidr ec munka reyni
meina lausan farar bæina;
hæidis halldi hattar folldar
hallar drottinn yfir mer stalli.

Heriulfr bió á Heriúlfssnesi, oc var hinn göfgasti madr. Eiríkr Raudi bió í Brattahlíð; hann var þar med mestri virdingo, oc luto allir til hans. Þessi voro börn Eiríks: Leifr, Þórvalldr oc Þórsteinn; enn Freydis het dóttir hans: hon var gipt þeim manni, er Þorvalldr het, oc biuggo þau í Górdom, þar sem nú er Biskops stóll. Hon var svarri mikill, enn Þorvalldr var lítil menni: var hon miök gefin til fiár. Heidit var fólk á Grænlandi í þann

tíma. Þát sama sumar kom Biarni skipi síno á Ey-
rar, er fadir hans hafði brott siglt um vorit: þau
tíðindi þóttu Biarna mikil, oc villdi eigi bera af
skipi síno. Þá spurdo hásetar hans hvat er hann
bæriz fyrir? enn hann svarar, at hann ætladi at
hallda síðvenio sinni, oc þiggja at fòðr sínom vetr
vist, oc vil ec hallda skipino til Grænlands, ef þer
vilit mer fylgd veita. Allir kváðoz hans rádom fyl-
gia vilia. Þá mælti Biarni: úvitrlig mun þyckia vor
ferd, þar sem eingi vor hefir komit í Grænlands
haf. Enn þó hallda þeir nú í haf, þegar þeir voro
búnir; oc sigldo III daga, þar til er landit var vat-
nat; enn þá tók af byrina, oc lagði á norræni, oc
þokor, oc visso þeir eigi hvert þeir fóro, oc skipti þat
mörgom dægrom. Eptir þat sá þeir sól, oc máttu
þá deila áttir; Vinda nú segl, oc sigla þetta dægr,
ádr þeir sá land; oc ræddo um með sér, hvat landi
þetta mun vera. Enn Biarni qvedz hyggja, at þat
mundi eigi Grænland. Þeir spyria, hvert hann vill
sigla at þesso landi, edr eigi? þat er mitt ráð at
sigla í nánd við landit; oc sva gera þeir; oc sá þat
brátt, at landit var ófíaulloft oc skógi vaxit, oc
smá hæðir á landino. Þeir leto landit á bakborda,
oc leto skaut horfa á land: Síðan sigla þeir II dæ-
gor, ádr þeir sá land annat; þeir spyria, hvert Biarni
ætladi þat enn Grænland? hann qvadz ei helldr
ætla þetta Grænland, enn et fyrra; þvíat jöklar ero
miklir sagdir á Grænlandi. Þeir nálgudoz brátt þetta
land, oc sá þat var slett land oc vidi vaxit. Þá

tók af byr fyrir þeim; ræddo hásetar þat at þeim þótti þat ráð, at taka þat land. Enn Biarni vill þat eigi; þeir þóttu bædi þurfa við oc vatn: at ein-go ero þer því úbyrgir, segir Biarni; enn þó feck hann at því nockot ámæli af hásetom sínom. Hann bad þá vinda segl; oc sva var gert; oc setto fram-stafn frá landi, oc sigla í haf útsynnings byr III dægor; oc sá þá land it þridia. Enn þat land var hátt oc fiöllot, oc jöklar á. Þeir spyria þá, ef Biarni vill at landi láta þar? enn hann qvadz ei þat vilia; þvíat mer litz þetta ógagnvænligt. Nú lægdo þeir eigi segl sitt; hallda med landino fram, oc sá, at þat var eyland; setto enn stafn við því landi, oc helldo í haf hinn sama byr; enn vedr óx í hönd, oc bad Biarni þá svipta, oc eigi sigla meira, enn bædi dygdi vel skipi þeirra oc ræida: Sigldo nú III dægor; þá sá þeir land hit fiórda; þá spurdo þeir Biarna, hvert hann ætladi þetta vera Græn-land, edr eigi? Biarni svarar: þetta er líkast því, er mer er sagt frá Grænlandi. Her munom ver at landi hallda. Sva gera þeir, oc taka land undir einhverio nesi, at kveldi dags, oc var þar bátur á nesino. Enn þar bió Heriúlfr fadir Biarna á því nesi; oc af því hefir nesit nafn tekit, oc er síðan kallat Heriúlfsnes: Fór Biarni nú til fautr síns, oc hættir nú siglingo, oc er med fautr sínom medan Heriulfr lifdi; oc síðan bió hann þar, eptir fautr sinn.

CAP. CVI.

FRÁ LANDA FUNDI LEIFS EÍRIKS SONAR.

Þat er nú þessu næst, at Biarni Heriulfs son kom utan af Grænlandi á fund Eiríks Jarls; tók Jarl við honum vel: Segir Biarni frá ferdom sínom, er hann hafði lönd sed: oc þótti hann verit hafa úforvitinn, er hann hafði eigi af þeim löndom at segia; oc seck hann af því nockot ámaeli. Biarni gerdiz hirdmadr Jarls, oc fór út til Grænlands um sumarit eptir, oc var nú mikil umræða um landa leitan. Leifr son Eiríks Rauda or Brattahlíð, fór á fund Biarna Heriúlfssonar, oc kaupir skip at honum, oc red þar til háseta, sva at þeir voro hálfir fiordi togr manna saman. Leifr bad Eirík föðr sinn, at hann mundi enn fyrir vera förinni. Eiríkr taldiz helldr undan: kvedz þá vera hnúginn í alldr, oc kvedz minna mega við vosi öllo, enn var. Leifr kvad hann enn mundo mestri heill styra, af þeim frændom: oc þetta let Eiríkr eptir Leifi, oc rídr heiman, þá er þeir ero at öllo búnir; oc þá skamt var at fara til skipsins, drepr hestrinn fæti, sá er Eiríkr reid, oc fell hann af baki, oc lestiz fótr hans. Þá mælti Eiríkr: eigi mun mer ætlat at finna lönd fleiri enn þetta, er nú byggjom ver; munom vær nú ecki lengr fara allir samt: Fór Eiríkr heim í Brattahlíð, enn Leifr redz til skips, oc felagar hans með honum, hálfir fiordi togr manna. Þar var sudrmadr einn í ferd, er Tyrker het. Nú biuggo þeir skip sitt, oc sigldo í haf,

þá er þeir voro búnir; oc fundu þá þat land fyrst, er þeir Biarni fundu síðarst. Þar sigla þeir at landi, oc köstudo ackerum, oc skúto báti, oc fóro á land, oc sá þar eigi gras. Jöklar miklir voro allt it efra; enn sem ein hella væri allt til jöklanna frá síðom; oc syndiz þeim þat land vera gædalaust. Þá mælti Leifr: eigi er oss þat nú ordit um þetta land, sem Biarna, at ver hafom eigi komit á landit; oc mun ec nú gefa nafn landino, oc kalla Helloland. Síðan fóro þeir til skips, oc sigldu i haf, oc finna land annat; sigla enn at landi, oc kasta ackerom; skióta síðan báti, oc gánga á landit; þat land var slett oc skógi vaxit, oc sandar hvítir víða, þar sem þeir fóro, oc ósæbratt. Þá mælti Leifr: af kostom skal þessu landi nafn gefa, oc kalla Markland; Fóro síðan ofan aptr til skips sem fliótast. Nú sigla þeir þadan aptr i haf landnyrdings vedr: oc voro úti II dægur, ádr þeir sá land; oc sigldu at landi, oc komu at ey einni er lá norðr af landino, oc gengo þar upp, oc sáz um i góðu vedri, oc fyndo þat, at dogg var á grá-sino, oc vard þeim þat fyrir, at þeir tóko hondom sínom i doggina, oc brugdu i munn ser: oc þóttu eigi iafnsætt kent hafa, sem þat var. Síðan fóro þeir til skips síns, oc sigldu i sund þat, er lá milli eyarinnar oc ness þess er norðr geck af landino; stefndu i vestr átt fyrir nesit. Þar var grunnsævi mikit at fióro síóvar, oc stóð þá uppi skip þeirra: oc var þá langt til síóvar at síá frá skipino. Enn þeim var sva mikil forvitni á at fara til landsins, at þeir

nento eigi þess at bida, at siór felli undir skip þeirra: oc runno til lands, þar er á ein fell or vatni eino. Enn þegar siór fell undir skip þeirra, þá tóko þeir bátinn, oc rero til skipsins, oc flutto þat upp í ána, síðan upp í vatnit, oc köstudo þar ackerom, oc báro af skipom húdföt sín, oc gerdo þar búdir: tóko þat ráð síðan, at búaz þar um þann vetr, oc gerdo þar hús mikil. Hvarki skorti þar lax í ánni, ne í vatnino; oc stærra lax, enn þeir hefði fyrr set. Þar var sva góðr landskostr, at því er þeim syndiz, at þar mundi eingi fenadr fóðr þurfa á vetrom: þar komo eingi frost á vetrom, oc litt renudo þar gros. Meira var þar iafndægri, enn á Grænlandi edr Islandi; sól hafði þar eyktar stad oc dagmála stad, um skamm-degi. Enn er þeir hofdo lokit húsgerd sinni; þá mælti Leifr vid föruneysi sitt: nú vil ec skipta láta lidi voro í II stadi, oc vil ec kanna láta landit; oc skal helmingr lids vera vid skála heima; enn annar helmingr skal kanna landit: oc fara eigi lengra enn þeir megi koma heim at kvelldi, oc skiliz eigi. Nú gerdo þeir sva um stund. Leifr gerdi ymist, at hann fór med þeim, edr var heima at skála. Leifr var mikill madr oc sterkr, skörugligr at siá, yitr madr, oc góðr hófsmadr um alla hluti.

CAP. CVII.

LEIFR ER Á ÞVÍ LANDI UM VETRINN,
OC KALLADI ÞAT VÍN-LAND; SIGLIR
SÍÐAN HEIM TIL GRÆNLANDS APTR,
OC HIALPAR SKIP-BROTZ
MÖNNOM.

A eino hverio kveldi bar þat til tíðinda, at mans var vant af lidi þeirra, oc var þat Tyrker sudrmadr. Leifr kunni því stórilla: þvíat Tryker hafdi miök lengi verit med þeim fedgom, oc elskat miök Leif í barn-æsko. Leifr taldi nú miök á hendr föronautom sínom, oc bióz til ferdar at leita hans, oc XII menn med hönom. Eun er þeir voro skamt komnir frá skála, þá geck Tyrker ímót þeim; oc var hönom vel fagnat. Leifr fann þat brátt, at fóstura hans var skapgott: hann var bratt-leitr, oc laus-eygr, smáskilligr í andliti, lítill vexti oc vesalligr; enn íþróttá-madr á allzkonar hagleik. Þá mælti Leifr til hans: hví varto sva seinn, fósturi minn, oc fráskili föruneýtino? hann taladi þá fyrst lengi á þyrsko, oc skaut marga vega augunom, oc gretti sik; enn þeir skildo eigi hvat hann sagdi. Hann mælti þá á Norræno, er stund leid: ec var genginn eigi miklo lengra enn þit; kann ec nockor nynæmi at segia: þvíat ec fann vínvid oc vínber. Mun þat satt, fósturi minn? qvad

Leifr. At vísso er þat satt, qvad hann; þvíat ec var þar fæddr, er hvarki skorti vínvid, ne vínber. Nú svofo þeir af þá nótt; enn um morguninn mællti Leifr vid háseta sína: nú skall hafa tvennar syslor fram, oc skal sinn dag hvert; lesa vínber, eda höggva vínvid, oc fella mörkina, sva at þat verdi frainr til skips míns; oc þetta var ráds tekit. Sva er sagt, at eptir báttr þeirra var fylldr af vínberiom. Nú var högginn farmr á skipit. Þar voro oc hveitiakrar siálfsánir, oc þau tre er mosor heita: oc höfdo þeir af öllo þesso med ser nockor merki; sum tre sva mikil, at í hús voro lögd. Oc er vorar, þá biuggoz þeir, oc sigldo brott, oc gaf Leifr nafn landino eptir landkostom, oc kalladi Vínland: Sigla nú sídan í haf, oc gaf þeim vel byri, þar til er þeir sá Grænland, oc fiöll undir jöklom. Þá tók einn madr til máls, oc mælti vid Leif: hví styrir þú sva miök undir vedr skipino? Leifr svarar: ec hygg at stiörn minni, enn þó nú at fleira, edr hvat siái þer til tidinda? þeir qvadoz eigi siá, þat er tidindom sætli. Ec veit eigi segir Leifr, hvart ec se skip, edr sker. Nú siá þeir, oc qvodo sker vera. Hann sá því framar enn þeir, at hann sá menn í skerino. Nú vil ec, at ver beitim undir vedrit, segir Leifr, sva at náim til þeirra, ef menn ero þurf-tugir, at ná vorom fundi; oc er naudsyn á at duga þeim. Enn med því, at þeir se eigi fridmenn, þá eigom ver allan kost undir oss: enn þeir eigi undir ser. Nú sækia þeir undir skerit, oc lægdo segl

sitt, oc köstudo atkeri, oc skuto litlom báti öðrom er þeir höfðu haft með sér. Þá spyrdi Tyrker: hver þar redi fyrir lidi? sá kvez Þórir heita, oc vera Norænn madr át kynni: edr hvert er þitt nafn? Leifr segir til sín. Erto son Eiríks Rauda or Brattahlíð? segir hann. Leifr qvad sva vera. Nú vil ec, segir Leifr, bióða yðr öllum á mitt skip, oc semunom þeim er skipit má viddaka. Þeir þágo þann kost; oc sigldo síðan til Eiríksfiardar með þeim farni, þar til er þeir komo til Brattahlíðar; báro farninn af skipi. Síðan baud Leifr þóri til vistar með sér, oc Guðríði konu hans, oc þrim mönnum öðrom; enn feck vistir audrom hásetom, bæði þóris oc sínom felaugom. Leifr tók XV menn or skerino. Hann var síðan kalladr Leifr hinn Heppni. Leifi vard nú bæði gott till fiár oc mannvirdingar. Þann vetr kom sótt mikil í lid þóris; oc andadiz hann Þórir, oc mikill hlúti lids hans. Þann vetr andadiz oc Eiríkr Raudi. Nú var unmræða mikil um Vínlands för Leifs, oc þótti Þórvaldi bróðr hans of úvida kannat hafa verit landit. Þá mælti Leifr við Þórvalld: þú skalt fara með skip mitt, bródir, ef þú vill til Vínlands: oc vil ec þó, at skipit fari ádr eptir vidi þeim er Þórir átti í skerino. Oc sva var gert.

CAP. CVIII.

FRÁ ÞÓRVALLDI EIRÍKS SYNI BRÓÐR
LEIFS OC SKRÆLINGIOM Í VÍNLANDI.

Nú bióz Þórvalldr til þeirrar ferdar með XXX

manna, með umráði Leifs bróðor síns. Síðan biuggo þeir skip sitt, og helldo í haf. Og er engi frásögn um ferd þeirra, fyrr enn þeir koma til Vinlands, til Leifs búða, og biuggo þar um skip sitt, og sátu um kyrt þann vetr, og veiddo fiska til matar ser. Enn um vorit mælti Þórvaldr, at þeir skyldo búa skip sitt, og skyldi eptir-bátr skipsins, og nockrir menn með, fara fyrir vestan landit, og kanna þar um sumarit. Þeim syndiz landit fagurt og skógótt; og skamt milli skógar og síóvar: og hvítir sandar. Þar var eyott miök og grunnsævi mikit. Þeir fundu hvorki manna vistir ne dyra; enn í eyo einni vestarliga, fundu þeir kornhiálm af tre: eigi fundu þeir fleiri manna-verk; og fóro aptr og komo til Leifs búða at hausti. Enn at sumri ödro fór Þórvalldr fyrir austan með kaupskipit, og hit nyrðra fyrir landit. Þá gerdi at þeim vedr hvast fyrir andnesi eino; og rak þá þar upp, og bruto kiöllinn undan skipino, og höfdo þar töf lánga, og bættu skip sitt. Þá mælti Þórvalldr við förunauta sína: nú vil ec at ver reisim her upp kiöllinn á nesino, og kallim Kialarnes: og sva gerdo þeir. Síðan sigla þeir þadan í braut, og austr fyrir landit, og inn í Fiardarkiapta þá þar ero næstir, og at höfda þeim er þar geck fram: hann var allr skógi vaxinn. Þá leggja þeir fram skip sitt í lægi, og skióta bryggjom á land; og gengr Þórvalldr þar á land upp, með alla förunauta sína. Hann mælti þá: her er fagurt, og her vilda ec bæ minn reisa:

ganga síðan til skips, oc síá á sandinom, inn frá höfðanom þriár hædir, oc fóro til þángat oc síá þar húðkeipa þriá oc þriá menn undir hveriom. Þá skipto þeir lidi síno, oc höfðo hendor á þeim öllom; nema einn komz í brott med keip sinn. Þeir drepa hina VIII, oc ganga síðan aptr á höfðann, oc síáz þar um; oc sá inn í fiördinn hædir nockor-
rar, oc ætludo þeir þat vera bygdir. Eptir þat sló á þá höfga sva miklom, at þeir máttu eigi vöko hallda, oc sofna þeir allir. Þá kom kall yfir þá, sva at þeir vöknudo allir; sva segir kallit: vaki þú Þórvalldr, oc allt föruneysi þitt, ef þú vill lif þitt hafa; oc far þú á skip þitt, oc allir menn þínir, oc farit frá landi sem skiótast. Þá fór innan eptir firdinom útal húðkeipa, oc lögdo at þeim. Þórvaldr mælti þá: ver skúlom færa út á bord víggleka, oc veriaz sem best; enn vega lítt ímót. Sva gera þeir. Enn Skrælingiar skuto á þá um stund; enn flya síðan í brott sem ákafast, hver sem mátti. Þá spurdi Þórvalldr menn sína, ef þeir væro nockot sárir? Þeir qvodoz eigi sárir vera. Ec hefi fengit sár undir hendi, segir hann, oc fló ör milli skipbordsins, oc skialldarins, undir hönd mer; oc er her örin, oc mann mik þetta til bana leida. Nú ræd ec, at þer búit ferd ydra sem fliótast, aptr á læid; enn þer skolot færa mik á höfda þann, er mer þótti byggiligr vera; má þat vera, at mer hafi satt á munn komit, at ec muni þar búa á um stund: þar skulo þer mik grafa, oc setia krossa at höfði oc fótom;

oc kallit þat Krossanes íafnan síðan. Grænland var þá kristnat, enn þó andadiz Eiríkr Raudi fyrir kristni. Nú andadiz Þórvalldr, oc gerdo þeir allt eptir því sem hann hafdi mælt: oc fóro síðan, oc hitto förunauta sína; oc sögdo hvorir öðrom slík tíðindi sem visso: oc biuggo þar þann vetr, oc fengo ser vinber oc vinvid til skips síns. Nú búaz þeir þadan um vorit, aptr til Grænlands; oc komo skipi síno í Eiríks fiörd, oc kunno Leifi at segia mikil tíðindi.

CAP. CIX.

FRÁ ÞÓRSTEINI EIRÍKSSYNI BRÓÐR
LEIFS, OC HANS VÍNLANDS FERD.

Þat hafdi gerz til tíðinda meðan á Grænlandi, at Þórsteinn í Eiríksfirði hafdi qvongaz, oc fengit Gudrídar Þórbiarnar dóttor, er átt hafdi Þérir Austrmadr, er fyrr var frásagt. Nú fystiz Þórsteinn Eiríksson at fara til Vínlands, eptir líki Þórvallds bróðr síns; oc bió skip hit sama: oc valdi hann lid at afli oc vexti, oc hafdi með ser hálfan þridiatog manna, oc kono sína Gudrídi; oc sigla í haf þegar þau ero búin, oc or landsyn. Þáu velkti úti allt sumarit, oc visso eigi hvar þau fóro; oc er vika var af vetri, þá tóko þeir land í Lysofirði á Grænlandi, í hinni vestri bygd. Þórsteinn leitadi þeim um vistir oc feck vistir öllum hásetom sínom; enn hann var vistlaus oc kona hans. Nú voro þau eptir at skipi tvao neckorar nætor. Þá var enn úng kristni á Grænlandi. Þat var einn dag, at menn komo at tialldi þeirra snemma; sá spyrdi er fyrir þeim var,

hvat manna væri í tialldino? Þórsteinn svarar: tveir menn, segir hann; edr hver spyr at? Þórsteinn heiti ec, oc er ec kalladr Þórsteinn Svartr; enn þat er erindi mitt hingat, at ec vil biðað yckor báðom hiðnom til vistar til min. Þórsteinn qvaz vilia hafa unmræði kono sinnar; enn hon bad hann ráða, oc nú iátar hann þesso. Þá mun ec koma eptir yckor á morgin med eyki; þvíat mik skortir eigi til, at veita yckor vist: enn fásinni er mikit med mer at vera; þvíat tvö erom við þar hion; þvíat ec er einþyckr miök; annan sid hefir ec oc, enn þer hafit; oc ætla ec þann þó betra er þer hafit. Nú kom hann eptir þeim um morgininn med eyki, oc fóro þau med Þórsteini Svarta til vistar; oc veitti hann þeim vel. Guðríðr var skörulig kona at síá, oc vitr kona, kunni vel at vera med ókunnum mönnum. Þat var snemma vetrar, at sótt kom í lid Þórsteins Eiríkssonar oc andadiz þar margr förunautr Þórsteins. Hann bad gera kistor at líkom þeirra er öndudoz, oc færa til skips, oc búa þar um; þvíat ec vil lata flytia til Eiríksfiardar at sumri öll líkin. Nú er þess skamt at biðað, at sótt kemr í hiðyli Þórsteins, oc tók kona hans sótt fyrst, er het Grímhildr; hon var ákafliga mikil, oc sterk sem karlar, oc þó kom sóttin henni undir. Oc brátt eptir þat tók sóttina Þórsteinn Eiríksson, oc lágo þau bæði senn; oc andadiz Grímhildr kona Þórsteins Svarta. Enn er hon var daud, þá geck Þórsteinn fram or stofunni eptir fiöl at leggja á líkit. Guðríðr mælti þá: verto litla hríd

í brott, Þórsteinn minn, segir hon: hann qvad sva vera skyldo. Þá mælti Þórsteinn Eiríksson: með undarligom hætti er nú um húsfreyo vora; þvíat nú örglaz hon upp við ólnboga, oc þokar fótom sínom frá stocki, oc þreifar til skúa sinna. Oc í því kom Þórsteinn bóndi, oc lagdiz Grímhilldr nidr í því; oc brakadi þá í hverio tre í stofunni. Nú gerir Þórsteinn kisto at liki Grímhilldar, oc færði í brott oc bió um: hann var bædi mikill madr oc sterkr, oc þurfti hann þess allz, ádr hann kom henni brott af bænom. Nú eluadi sóttin Þórsteni Eiríkssyni, oc andadiz hann. Gudrídr kona hans kunni því litt: þá voro þau aull í stofunni. Gudrídr hafdi setit á stóli frammi fyrir becknom, er hann hafdi legit Þórsteinn bóndi hennar. Þá tók Þórsteinn bóndi Gudridi í fang ser af stólinom, oc settiz í beckinn annan með hana, gegnt liki Þórsteins, oc taladi um fyrir henni marga vega, oc huggadi hana, oc het henni því, at hann mundi fara með henni til Eiríksfiardar, með liki Þórsteins bónda hennar, oc forunauta hans: oc sva skal ec taka hingat hión fleiri þer til hugganar oc skemtunar. Hon þackadi honom. Þórsteinn Eiríksson settiz þá upp oc mælti: hvar er Gudrídr; þrjá tíma mælti hann þetta; enn hon þagdi. Þá mælti hon við Þórstein bóanda: hvert skal ec svör veita þesso máli, edr eigi? hann bad hana eigi svara. Þá geck Þórsteinn bóndi yfir gólfít, oc settiz í stólinn; enn Gudrídr sat í kniám honom; oc þá mælti Þórsteinn bóndi: hvat viltu nafni? se-

gir hann; hann svarar, er stund leid: mer er ant til þess, at segia Gudrídi fórlaug sín, til þess at hon kunni þá betr andláti míno; þvíat ec er kominn til góðra hvíllðar stada. Enn þat er þer at segia, Gudrídr, at þú munt giptaz Íslendskom manni, oc muno lángr vera samfarar yckar, oc margt manna mun frá yckor koma þroskasamt, biart oc ágætt, sætt oc ilmat vel; muno þit fara af Grænlandi til Noregs, oc þadan til Íslands, oc gera bú á Íslandi; þar muno þit lengi búa, oc munto honom lengr lifa; þú munt utan fara, oc gánga sudr, oc koma út aptr til Íslands til búz þins: oc þá mun þar kirkia reist vera, munto þar vera oc taka nunno vígslo, oc þar munto andaz; oc þá hnígr Þórsteinn aptr, oc var búit um lík hans, oc fært til skips. Þórsteinn bóndi efndi vel við Gudrídi, allt þat er hann hafði heitit. Hann seldi um vorit iord sína oc kvikfe, oc fór til skips með Gudrídi, með allt sitt: bió skipit, oc feck menn til, oc fór síðan til Eiríksfiardar: Voro nú líkin iordot at kirkio. Gudrídi fór til Leifs í Brattahlíð; enn Þórsteinn Svarti gerði bú í Eiríksfirði, oc bió þar meðan hann lifði: oc þótti vera hinn vaskasti madr.

CAP. CX.

FRÁ ÞÓRFINNI KARLSEFNI ER HANN
KOM TIL VÍNLANDS, OC FRÁ
SKRÆLINGIOM.

Þat sama sumar kom skip af Noregi til Grænlands;

sá madr het Þórfinnr Kallzefni, er því skipi styrði; hann var son Þórdar Hesthofda, Snorra sonar, Þórdar sonar frá Höfda. Þórfinnr Kallzefni var stórauðigr at fe; oc var um vetrinn í Brattahlíð, med Leifi Eiríkssyni. Brátt felldi hann hug til Gudridar, oc beiddi hennar; enn hon veik til Leifs svörom fyrir sik. Síðan var hon honom föstnot, oc gert brúðkaup þeirra á þeim vetri. Hin sama var umræða á Vinlands för, sem fyrr, oc fysto menn Kallzefni miök þeirrar ferdar, bæði Gudríðr, oc adrir menn. Nú var ráðin ferd hans, oc red hann ser skipveria LX karla, oc konur V. Þann máldaga gerdo þeir Kallzefni oc hásetar hans, at iöfnom höndom skyllði þat hafa, allt þat er þeir fengi til gæda. Þeir höfdo med ser allzkonar fenat; þvíat þeir ætludo at byggia landit, ef þeir mætti þat. Kallzefni bad Leif húsa á Vinlandi; enn hann qvadz liá mundo húsin, enn gefa eigi. Síðan helldo þeir í haf skipino, oc koma til Leifs búða med heilo oc hölldno, oc baro þar upp húdföt sin. Þeim bar brátt í hendor mikil föng oc gód; þvíat reidor var þar upprekin, bæði mikil oc gód; fóro til síðan, oc skáro hvalinn: skortti þá eigi mat. Fenadr geck þar á land upp: enn þat vard brátt, at gradfe vard úrigt, oc gerdi mikit um sik. Þeir höfdo haft med ser gridung einn. Kallzefni let fella vido, oc telgia til skips sins; oc lagdi vidinn á biarg eitt til þurkanar. Þeir höfdo öll gædi af landkostom, þeim er þar voro, bæði af vínberiom, oc alizkonar veidom oc gædom. Eptir þann

vetr hinn fyrsta kom sumar; þá urdo þeir varir við Skrælingia, oc fór þar or skogi fram mikill flockr manna. Þar var nær nautfe þeirra; enn gridungr tók at belia oc gialla ákalliga hátt: enn þat hræddoz Skrælingiar, oc lögdo undan med byrdar sínar; enn þat var grávara oc safali oc allzkonar skinna vara; oc snúa til bæar Kallzefnis, oc vildo þar inn í húsinn. Enn kallzefni let veria dyrnar. Hvorigir skildu annars mál. Þá tóko Skrælingiar ofan bagga sína, oc leysto, oc budo þeim, oc villdo vopn hellzt fyrir. Enn Kallzefni bannadi þeim at selia vopnin. Oc nu leitar hann ráds med þeim hætti, at hann bad konor bera út búnyt: þá vildo þeir kaupa þat, enn eigi annat. Nú var sú kaupför Skrælingia, at þeir báro sinn varning í brott í mogom sínom; enn Kallzefni oc förunautar hans höfdo eptir bagga þeirra oc skinnavöro; fóro þeir við sva búit í brott. Nú er frá þat at segia, at Kallzefni lætr gera scípgard ramligan um bæ sinn, oc biuggoz þar um. Í þann tíma fæddi Gudrídr sveinbarn, kona Kallzefnis, oc het sá sveinn Snorri. Á aundverdom ödrom vetri, komo Skrælingiar til móts við þá; oc voro miklo fleirri enn fyrr, oc höfdo slíkan varnat sem fyrr. Þá mælti Kallzefni við konor: nú skulo þer bera út slíkan mat, sem fyrr var rífastr, enn ecki annat. Oc er þeir sá þat, þa köstudo þeir böggunom sínom inn yfir skípgardinn. Enn Gudrídr sat í dyrom inni med vöggo Snorra sonar síns: þá bar skugga á dyrin, oc geck þar inn kona í svör-

tom námkyrtli, helldr lág, oc hafdi dregil um höfot, oc liósiörp á hár, fölleit, oc miök eygd: sva at eigi hafdi iafnmikil augo set, í einom manz hausi: hon geck þar at er Gudrídr sat, oc mælti: hvat heitir þú? segir hon; ec heiti Gudrídr; edr hvert er þitt heiti? ec heiti Gudrídr, segir hon. Þá retti Gudrídr húsfreyja hönd sína til hennar, at hon sæti hiá henni; enn þar bar allt saman, at þá heyrdi Gudrídr brestmikinn, oc var þá konan horfin; oc í því var oc veginn einn Skrælingr af einom húskarli Kallzefnis, þvíat hann hafdi viliat taka vopn þeirra; oc fóro nú í brott sem tíðazt; enn klædi þeirra lágo þar eptir oc varningr. Eingi madr hafdi kono þessa set utan Gudrídr ein. Nú munom ver þurfa til ráða at taka, segir Kallzefni; þvíat ec hygg at þeir moni vitia vor hit þridia sinni, með úfridi oc fiölmenni. Nú skulom ver taka þat ráð, at X menn fari fram á nes þetta oc syni sik þar; enn annat lid hvart skal fara í skóg, oc höggva þar riðr fyrir nautfe vort, þá er lidit kemr fram or skóginom. Ver skulom oc taka gridung vorn oc láta hann fara fyrir oss. Enn þar er sva háttat, er fundr þeirra var ætladr, at vatn var ödromegin, enn skógr á annan veg. Nú voro þessi ráð höfd, er Kallzefni lagdi til. Nú komo Skrælingjar í þann stad, er Kallzefni hafdi ætlat til bardaga. Nú vard þar bardagi, oc fell fiöldi af lidi Skrælingia. Einn madr var mikill oc væun í lidi Skrælingia; oc þótti Kallzefni at hann væri höfdingi þeirra. Nú hafdi einn þeirra Skrælingia

tekit upp öxi eina, oc leit á um stund, oc reiddi at felaga sínom, oc hió til hans: sá fell þegar daudr. Þá tók sá hinn mikil madr við öxinni, oc leit á um stund, oc varp henni síðan sem lengst mátti á síóinn: enn síðan flya þeir á skóginn, sva hver sem fara mátti; oc lykr þar nú þeirra vidskip-tom: Voro þeir Kallzefni þar þann vetr allan; enn at vori þá lysir Kallzefni, at hann vill eigi þar vera lengr; oc vill fara til Grænlands. Nú búa þeir ferd sína, oc höfðo þadan mörg gædi, í vínvidi oc beri-om oc skiinna vöro. Nú sigla þeir í haf, oc komo til Eiríksfiardar skipi síno heilo, oc voro þar um vetrinn.

CAP. CXI.

FRÁ FREYDÍSI EIRÍKS DOTTOR, OC
VÍNLANDS FERD HENNA, OC
ÚDÁDOM.

Nú tekz umræða at nyo um Vínlands ferd; þvíat sú ferd þótti gód, bæði til fiár oc virðingar. Þat sama sumar kom skip af Noregi til Grænlandz, er Kallzefni kom af Vínlandi; því skipi styrdo bræðor tveir, Helgi oc Finnbogi, oc voro þann vetr á Grænlandi: þeir bræðor voro Islenskir at kyni, oc or Austfiördom. Þar er nú til at taka, at Freydis Eiríks dóttir gerdi ferd sína heiman or Gördom, oc fór til fundar við þá bræðor Helga oc Finnboga, oc beiddi þá, at þeir færi til Vínlands með farkost sinn, oc hafa helming gæda allra við hana, þeirra

er þar fengiz. Nú iáttu þeir því. Þaðan fór hon á fund Leifs bróðor síns, oc bad at hann gæfi henni hús þau, er hann hafði gera látit á Vinlandi. Enn hann svarar hino sama; qvez liá·mundo hús, enn gefa eigi. Sá var máldagi med þeim bræðrom oc Freydisi, at hverir skyldo hafa XXX vígra manna á skipi, oc konor umfram. Enn Freydis brá af því þegar, oc hafði sinnum mönnum fleira, oc leyndi þeim: oc urdo þeir bræðor eigi fyrri vid þá varir, enn þeir komo til Vinlands. Nú leto þau í haf, oc höfdo til þess mælt ádr, at þau mundi samflota hafa, ef sva villdi verda: oc var þess litill munr. Enn þó komo þeir bræðor næckro fyrri, oc höfdo uppborit faung sín til húsa Leifs. Enn er Freydis kom at landi, þá rydia þeir skip sitt, oc bera upp til húss faung sín. Þá mælti Freydis: hví báro þeir inn her faung ydor? Þvíat ver hugdom, segia þeir, at halldaz muni öll áqvedin ord med oss. Mer ledi Leifr húsanna, segir hön, enn eigi ydor. Þá mælti Helgi: þríóta mun ockor bræðor illsko vid þik: báro nú út faung, oc gerdo ser skála, oc setto þann skála firr síonom, á Vatnsströndom, oc biuggo vel um; enn Freydis let fella vido til skips síns. Nú tók at vetra, oc tölodo þeir bræðor, at takaz mundo upp leikar oc veri höfd skemtan. Sva var gert um stund, þar til er menn bároz verra í milli; oc þá gerðiz sundrþycki med þeim, oc tókoz af leikar; oc eingar gerdoz komor milli skálanna: oc fór sva fram lengi vetrar. Þat var einn morgin snemma at Freydis

stóð upp or rúmi sínu, oc klæddiz, oc fór eigi í skóklæðin; enn vedri var sva farit, at döggr var fallin mikil. Hon tók kápo bónda síns oc fór í; enn síðan geck hon til skála þeirra brædra, oc til dyra; enn madr einn hafði útgengit litlo ádr, oc lokit hurd aptr á midian klofa: hon lauk upp hurðinni, oc stóð í gátt um stund, oc þagdi; enn Finnbogi lá innstr í skálanom oc vakti. Hann mællti: hvat hvillto hingat Freyðis? hon svarar: ec vil at þú standir upp, oc gángir út með mer, oc vil ec tala við þik. Sva gerir hann. Þau ganga at tre, er lá undir skála vegginnom, oc settoz þar nidr. Hver-so líkar þer? segir hon. Hann svarar: góðr þyki mer landskostr; enn illr þyki mer þústr sá, er vor í millom er; þvíat ec kalla eigi hafa til ordit. Þá segir þú sem er, segir hon; oc sva þicki mer. Enn þat er eyrindi mitt á þinn fund; at ec villda kaupa skipom við yckor brædor; þvíat þit hafit meira skip enn ec, oc villda ec í brott hedan. Þat mun ec láta gángaz, ef þer líkar þá vel. Nú skilia þau, við þat; gengr hon heim, enn Finnbogi til hvílo sinnar. Hon stígr upp í rúmit kölldom fótom, oc vaknar hann Þórvalldr við, oc spyr, hví at hon væri sva kölld oc vot? hon svarar með miklom þjósti: ec var gengin, segir hon, til þeirra brædra, at fala skip at þeim, oc villda ec kaupa meira skip: enn þeir urdo við þat sva illa, at þeir bördo mik oc leko sárliga: enn þú, vesæll madr, munt hverki ylia reka ne retta minnar skammar, ne þinnar: oc

mun ec þat nú finna, at ec er brotto af Grænlandi: oc mun ec gera skilnat vid þik, utan þú hefnir þessa. Oc nú stóðz hann eigi átölur hennar, oc bad menn uppstanda sem skiótazt, oc taka vopn sín: oc sva gera þeir, oc fara þegar til skála þeirra brædra, oc gengo inn, at þeim sofandom, oc tóko þá, oc færdo í bönd, oc leiddo sva út hvern sem bundinn var. Enn Freydis let drepa hvern sem út kom. Nú voro þar allir karlar drepnir; enn konor voro eptir, oc vildi eingi þær drepa. Þá mælti Freydis: fáir mer öxi í hönd; sva var gert. Síðan veegr hon at konum þeim fimm er þar voro, oc geck af þeim daudom. Nú fóro þau til skála síns eptir þetta it illa verk; oc fanzt þat eitt á, at Freydis þóttiz allvel hafa unrádit, oc mælti vid felaga sína: ef oss verdr audit at koma til Grænlands, segir hon, þá skal ec þann mann ráða af lífi, er segir frá þessom atburdom. Nú skulo ver þat segia, at þau búi her eptir, þá er ver förum í brott. Nú biuggo þeir skipit snemma um vorit, þat er þeir brædor höfdo átt, med þeim öllom gædom, er þau máttu til fá, oc skipit bar: sigla síðan í haf, oc urdo vel reidfara; oc komo í Eiríksfiörd skipi síno snemma sumars. Nú var þar Kallzefni fyrir, oc hafdi albúit skip sitt til hafs, oc beid byriar: oc er þat mál manna, at eigi mundi audgara skip gengit hafa af Grænlandi, enn þat er hann styrði. Freydis fór nú til búss síns; því þat hafði stadit medan úskatt: hon feck mikinn

mikinn feng fiár öllo föróneyti síno; þvíat hon vildi leyna láta údádóm sínom: Sittr hon nú í búi síno. Eigi urdo allir sva halldinordir, at þegdi yfir údádóm þeirra edr illsko, at eigi kæmi upp um sídir fyrir Leifi bróðor hennar; oc þótti honom þessi saga allill. Þá tók Leifr þriá menn af lidi þeirra Freydisar, oc pindi þá sagnar á, um þenna atburd allan íafn saman: oc var með eino móti sögn þeirra. Eigi nenni ec, segir Leifr, at gera þat at við Freydisi systor mína, sem hon veri verd; enn spá mun ec þeim þess, at þeirra askemi mun lítt at þrifom verda. Nú leid þat sva fram, at eingom þótti um þau vert þadan ífrá, nema illz.

CAP. CXII.

FRÁ ÞÓRFINNI KARLSEFNI, OC HANS
ÆTTBOGA.

Nú er at segia frá því, er Kallzefni byr skip sitt, oc sigldi brott or landi: honom fórz vel, oc kom til Noregs með heilo oc hölldno, oc sat þar um vetrinn, oc seldi varning sinn: oc hafði þar gott yfir-læti, oc þau bædi hión, af hinom göfgazlom mön-nom í Noregi. Enn um vorit eptir bió hann scíp sitt til Islands; oc er hann var albuinn, oc scíp hans lá til byriar fyrir bryggionom, þá kom þar at þeim sudrmadr einn, ættadr af Brimom or Saxlandi; hann falar at Kallzefni húsasnotro hans. Ec vil

eigi selia, sagði hann. Ec vil gefa þer við hálf mörk gullz, segir sudrmadr. Kallzefni þótti vel viðbodit; oc keypti síðan: Fór sudrmadr brott með húsasnotruna: enn Kallzefni vissi eigi hvat tre var. Enn þat var mausor, kominn af Vinlandi. Nú siglir Kallzefni í haf: oc kom skipi sino fyrir nordan land í Skagafirdi; oc var þar upp sett skip hans um vetrinn. Enn um vorit keypti hann Glaumbæiar land, oc gerdi bú á; oc bió þar medan hann lifdi, oc var hit mesta göfugmenni, oc er margt manna frá hönom komit oc Gudríði kono hans, oc góðr ættbogi. Oc er Kallzefni var andadr, tók Gudríðr við búss vardveizlo, oc Snorri son hennar, er fæddr var á Vinlandi. Oc er Snorri var qvongadr, þá fór Gudríðr utan, oc geck sudr; oc kom út aptr til búss Snorra sonar síns, oc hafði hann þá látit gera kyrkio í Glaumbæ. Síðan vard Gudríðr nunna, oc einseto-kona: oc var þar medan hon lifdi. Snorri átti son þann, er Þorgeir het; hann var fadir Ingvellðar, módor Brands Biskops. Dóttir Snorra Kallzefnissonar het Hallfríðr: hon var módir Runolfs, föðor Þórláks Biskops. Biörn het son Kallzefnis oc Gudríðar; hann var fadir Þórunar, módor Biarnar Biskops. Fiöldi manna er frá Kallzefni komit, oc er hann kynsæll madr ordinn. Oc hefir Kallzefni gerst sagt allra manna, atburði um farar þessar, er nú er neckot ordi ákomit.

CAP. CXIII.

RÖGNVALLDR JARL SENDI MENN TIL
OLAFS KONUNGS.

Olafur konungur og Þýri drottning sátu í Nidarósi um vetrinn, er konungur hafði kristnat Halogaland. Þýri drottning hafði um sumarit áður fæddt sveinbarn, er þau Olafur konungur átto: sá sveinn var bæði mikill og efniligr, og kalladr Haralldr eptir móður-föður sínum: Unno þau konungur og drottning þeim sveini mikit; og hugðu gótt til, at hann mundi fæðaz upp, og taka arf eptir föður sinn; enn hann lifði eigi fullt ár, frá því er hann var fæddr: þótti þeim báðum þat mikill skadi. Þann vetr var mart Íslenskra manna með Olafi konungi, sem fyrr er ritat, og margir aðrir göfgir menn. Þá var og með hirdinni Ingibjörg Tryggva-dóttir, systir Olafs konungs: hon var fríð synum, lítilát og blíð við alþýðu, fastræk og drenglundot í scapi, og allvinsæl. Hon var vel til Íslenskra manna, þeirra er þar voru: enn Kíartan Olafsson var henni kærast; þvíat hann hafði lengst af þeim verit með konungi; þótti honum og óþ skemtiligt at tala við hana; þvíat hon var bæði vitr, og sníöll í máli. Olafur konungur var íafnan gládr, og kátr við sína menn; og leiddi mikið at spurningom, um hátto og höfðingskap ríkra manna, af hinum næsto löndom, ef menn komu til hans af Danmörk eða Svíþjóð. Hallfredr Vandráedaskalld hafði komit um sumarit austan af Gautlandi; hafði

hann verit med Rögnvaldi Jarli Ulfssyni, er þá var kominn til rikis í vestra Gautlandi. Ulfr fadir Rögnvalds var bróðir Sigrídar hinnar Stórrádo: voro þeir syskina-synir Olafur konungur Sænski og Rögnvaldur Jarl. Segir Hallfredur Olafi konungi margt af Jarli; sagði, at hann var hraustr höfðingi og stjórnssamr, örr af penningom, drenglyndr og vinholmr: sagði Hallfredur þat og með, at Jarl vildi hallaz til vinátto við Olaf konung; og hafði þat talat, at hann vildi bidia Ingibiargar Tryggva-dóttur. Á þeim vetri komo austan af Gautlandi sendimenn Rögnvalds Jarls, og fundu Olaf konung norðr í Nidarósi; báðu þar fram eyrindi Jarls fyrir konung, öll slík sem Hallfredur hafði áður orði á komit, at Jarl vildi vera fullkominn vin Olafs konungs; og þar með mælti Jarl till mægda við konung, og vildi fá Ingibiargar systur hans: Fluttu sendimenn her með konungi berar iarteignir af Jarli, at þeir fóru með sönum hans eyrindom: Tók konungur vel þeirra máli; enn segir, at Ingibiorg mundi miklu ráða sjálf um gíaford sitt. Síðan taladi konungur þetta mál við systur sína, og spurði, hversu henni veri um þetta gefit? hon svarar sva: ec hefi verit með yðr um hríð, og hafi þer veitt mér bróðrlega umsiá, og elskuliga sæmd í alla stadi, síðan er þer komot í land þetta. Fyrir því vil ec iátta yðvarri forsió um gíaford mitt: vænti ec at þer giptit mik eigi heidnom manni. Konungur segir sva skyldi vera. Atti konungur þá tal við sendi-

menn; oc var þessu ráðit ádr þeir færi brott, at Rögnvalldr Jarl skyldi koma til motz við Olaf konung um sumarit austr í landi, ef hann villði gera við hann vinátto fullkomna; skyldo þeir þá siálfir tala með ser þessi ráð, er þeir fynduzt: Fara þá sendimenn Jarls austr aptr með þessom eyrindóm; enn Olaf konungur sat um vetrinn í Nidarósi með mikilli rausn oc fiölmenni.

CAP. CXIV.

OLAFR KONUNGR BYRIAR FERD SÍNA
TIL VINDLANDS.

Olafr konungur fór um sumarit, með lidi síno suðr með landi, um Stad. Þar í ferd var með hanom Þyri drottning oc Ingibjörg Tryggvadóttir, systir konungs: Sétto þá til fundar við hann vinir hans margir oc ríkis-menn, þeir er til ferðar voro búnir með konungi: Var þar hinn fyrsti maðr Erlingr Skjálgsson mágr hans, oc hafði hann skeid ena miklo: hon var XXX at rúnatali, oc var þat scip allvel scipat. Þá komo oc til konungs mágar hans Hyrningr oc Þorgeirr, oc styrði hvartveggi miklo sciði. Margir adrir ríkismenn fylgdo hanom: Fór hann öllum hernom suðr með landi; enn er konungur kom suðr á Rogaland, dvalldiz hann þar; þviat Erlingr Skjálgsson hafði búit hanom virðugliga veitzlo á Sóla. Þá kom austan af Gautlandi Rögnvalldr Jarl Ulfsson, á fund Olafs konungs, at vitia einka-

mála þeirra, er ord oc sendibod hafdi í midlom farit um vetrinn, at hann skyldi fá Ingibiargar, systor konungs; tók Olafr konungr þá vel vid hanom: Var þá talat um þetta mál; sagdi Olafr, at hann villdi hallda öll sín ord þar um, oc gipta hanom Ingibiörgo systor sína, ef hann villdi taka trúretta, oc kristna allt sitt undirfólk, þat er hann var yfirskipadr. Jarl játti því: var hann þá skirdr, oc allt hans föruneysi: var þá aukin veitzla sú er Erlingr hafdi giöra látit; geck Jarl at þeirri veitzlo, at eiga Ingibiörgo Tryggva dóttor; hafdi Olafr konungr þá gipt allar systor sínar: bióst Jarl til heimferdar, oc Ingibiörg; feck konungr Jarli kennimenn, at kristna fólk á Gautlandi, oc kenna því retta sido: skildo þeir konungr oc Jarl med hinom mesta kiærleik.

CAP. CXV.

FERD OLAFS KONUNGS TIL VINDLANDS.

Eptir gipting Ingibiargar systor sinnar, bióst Olafr konungr sem hvatligast or landi med lid sitt; hafdi hann frídt lid oc mikit; hann hafdi LX lánscipa, er hann fór or landi, oc sigldi sudr fyrir Danmörk gegnom Eyrarsund, oc sva til Vindlands. Hann gerdi stefnolag vid Burislaf konung, oc funnoz þeir konungarnir: tölodo þeir þá um eignir þær, er Olafr konungr heimti, oc fóro allar rædor líkliga milli konunga, oc var gódr greidscapr ger á þeim eignom er Olafr konungr þóttiz þar eiga: Dvalldiz

Olafr konungr þar lengi um sumarit oc fann þar marga vini sina.

CAP. CXVI.

SANTÖC SVÍA- OC DANA-KONUNGA OC
EIRÍKS JARLS ÍMÓT OLAFI KONUNGI
TRYGGVA SYNI.

Sveinn konungr Tiúguskegg átti þá Sigrídi hina Stórrádo, sem fyrr er ritit. Sigríd var hinn mesti úvin Olafs konungs Tryggvasonar, oc fann þat til saka, at Olafr konungr hafði slitit einkamálom við hana, oc lostit hana í andlit, sva sem fyrr var ritit. Hon eggíadi miök Svein konung til at hallda orosto við Olaf konung Tryggvason, oc segir, at þat væri ærin sök við Olaf konung, er hann hafði lagz með þyri systor hans at ólofi ydro, oc mundo eigi hinir fyrri frændor ydrir slíkt þola; hafði Sigríd drottning slíkar fortölur optliga í munni, oc kom hon sva sínom fortöloom, at Sveinn konungr var fullkominn at gera þetta. Oc snimma um várit sendi Sveinn konungr menn austr í Svíþíód til Olafs Svía konungs mágs síns, oc Eiríks Jarls, oc let segja þeim, at Olafr Noregs konungr hafði leidangr úti, oc ætladi at fara um sumarit til Vindlands: Fylgdi þat ordsendingo Dana konungs, at þeir Svía konungr oc Eiríkr Jarl scyldo her úti hafa, oc fara til móts við Sveinn konung; skyldo þeir þá allir samt leggja til orosto við Olaf konung Tryggvason.

Enn Svía konungr oc Eiríkr Jarl voro þessarar ferdar alþúnir, oc drogo þá saman scipa her mikinn af Sviavelli, oc fóro því lidi sudr til Danmerk, oc komo þar sva, at Olaf konungr Tryggvason hafði ádr austr um siglt. Þess getr Halldorr Ukristni í drápo, er hann orti um Eirík Jarl:

Ut baud iöfra hneitir
elmódr af Svíþjódo,
sumr hellt gramr til gunnar,
gunnblics lidi miklo; –
hverr villdi þá höllda
hræ gæitunga feitir,
már feek á síá sára
sylv, Eiríki fylgia,

Þeir Svía konungr oc Eiríkr Jarl helldo til móts við Dana konung, oc höfdo þá allir saman úgrynni hers.

CAP. CXVII.

SVIKRÆDI SIGVALDA JARLS.

Sveinn konungr, þá er hann hafði sendt til Svíþjóðar eftir herinom, þá sendi hann Sigvallda Jarl til Vindlands, at niósna um her oc ferdir Olafs konungs Tryggvasonar, oc gilldra sva til, at fundr þeirra Sveins konungs mætti verda oc Olafs konungs: Ferr þá Sigvalldi Jarl leid sína, oc kom fram á Vindlandi; fór til Jomsborgar, oc síðan á fund Olafs konungs Tryggvasonar; voro þar mikil vinátto mál þeirra á milli: kom Jarl ser í hinn mesta kærleika við konung. Astríð kona Jarls, dóttir Burislafs konungs, var vin mikill Olafs konungs Tryggvasonar,

oc var þat miök af hinom fyrrom tengdom, er Olaf konungr hafdi átt Geiro systor hennar. Sigvalldi Jarl var madr vitr oc rádugr: enn er hann kom ser í rádagard vid Olaf konung, dvalldi hann miök ferd hans austan at sigla, oc fann til þess miök ymsa hluti. Enn lid Olafs konungs let geysi illa; oc voro mennirnir miök heim-fúsir, er þeir lágo albúnir, enn vedor byrvænlig. Sigvalldi Jarl feck niösn leyniliga af Danmörk, oc þá var austan kominn her Svía konungs; oc Eiríkr Jarl hafdi þá oc búinn sinn her; oc þeir höfdingiarnir mundo þá koma austr undir Vindland, oc þeir höfdo áqvedit, at þeir mundu bíða þar Olafs konungs vid ey þá er Svollð heitir; sva þat, at Jarl skyldi sva tilstillia, at þeir mætti þar finna Olaf konung.

CAP. CXVIII.

FERD OLAFS KONUNGS AF VINDLANDI.

Þá kom pati nockr til Vindlands, at Sveinn Dana konungr hefði her úti, oc gerdiz brátt sá kurr, at Sveinn Dana konungr mundi vilia finna Olaf konung. Enn Sigvalldi Jarl segir sva Olafi konungi: ecki er þat ráð Sveins konungs, at leggja til bardaga vid þik med Dana-her einn saman, sva mikinn her sem þer hafit. Enn ef ydor er nockr grunur á því, at úfridr muni fyrir, þá skal ec fylgia ydor med míno lidi, oc þótti þat enn styrkr hvar sem Joms-víkingar fylgdo höfdingiom; man ec fá þer XI scip vel scipot. Konungr iátadi þesso; var þá lítit vedr

oc hagstædt; let konungr þá leysa flotann, oc blása til brottlögo; drógo menn þá segl sín, oc gengo meira smáscipin öll, oc sigldo þau undan á hafit út. Enn Jarl sigldi nær konungs scipino, oc kalladi til þeirra, bad konung sigla eptir ser; mer er kunnaz, segir hann, hvar diúpaz er um eya-sundin: enn þer manot þess þurfa med þau hin stóro scipin: Sigldi þá Jarl fyrir, med sínom skipom; hann hafdi XI scip, enn konungr sigldi eptir hanom med sínom stórscipom; hafdi hann oc þar XI scip, enn allr annar herinn sigldi út á hafit. Enn er Sigvalldi Jarl sigldi utan at Svöld, þá reri ímóti þeim skúta ein; þeir segia Jarli, at her Dana konungs lá þar í höf-ninni fyrir þeim. Þá let Jarl hlada seglonom á scipom sínom, oc róa þeir inn undir eya. Halldorr UCristni segir sva:

Ona fór oc eino
unnviggs konungr sunnan
sverd raud mætr at mordi
meidr siötigom skeida;
þá er hun lagar hreina
hafdi Jarl ofkrafa
sætt geck seggia ættar
sundr skánunga fundar.

Her segir, at þeir Olafr konungr, oc Sigvalldi Jarl höfdo LXX scipa, oc eino meirr, þá er þeir sigldo sunnan.

CAP. CXIX.

FRÁ TALI KONUNGANNA.

Sveinn Dana konungr oc Olafr Svía konungr, oc

Eiríkr Jarl, voro þar þá með allan hersinn; þá var fagrt vedr oc biart sólskin, gengo þeir nú á hólminn allir höfðingiar, með miklar sveitir manna, oc sá er scipin sigldo út á hafit, miök mörg saman, oc nú siá þeir hvar siglir eitt mikit scip oc glæsilikt; þá mæltu bádir konungarnir: þetta er mikit scip oc ákafa fagrt; þetta mun vera Ormr hinn lángi. Eiríkr Jarl svarar: ecki er þetta Ormr hinn lángi; oc sva var sem hann sagdi; þetta scip átti Eindridi af Gim-som. Litlo síðar siá þeir, hvar annat scip sigldi, miklo meira enn it fyrra. Þá mælti Sveinn konungr: hræddr er Olaf Tryggvason nú, eigi þorir hann at sigla vid höfudin á scipi síno. Þá segir Eiríkr Jarl: eigi er þetta konungs scip, kenni ec þetta scip oc seglit, þvíat stafat er seglit; þetta er Erlingr Skiálgsson, látom sigla þá; betra er oss skard oc missa í flota Olafs konungs, enn þetta scip þar sva búit. Enn stundo síðar sá þeir oc kendo scip Sigvallda Jarls, oc viko þau þannog undir hólmann. Þá sá þeir hvar sigldo III scip, oc var eitt mikit scip; mælti þá Sveinn konungr, bidr þá ganga til skipa sinna, þvíat þá ferr Ormr hin lángi. Eiríkr Jarl segir: mörg hafa þeir önnor stórscip oc glæsilig, enn Orm hinn lánga; bidom enn. Þá mæltu miök margir menn: eigi vill Eiríkr Jarl nú beriaz, oc hefna födor síns; þetta er skömm mikill, sva at spyriaz mun um öll lönd, ef ver liggiom her með jann-miklo lidi, enn Olaf konungr sigli á hafit út her hiá oss siálfom. Enn er þeir höfðo þetta talat um hríd,

Þá sá þeir hvar sigldo IV scip, ok eitt af þeim var dreki allmikill, oc miök gull-búinn. Þá stóð upp Sveinn konungr, oc mællti: hátt mun Ormrinn bera mik í kvölld, því hanom skal ec styra. Þá mæltu margir at Ormrinn var furdo mikit scip oc frítt, oc rausu mikil at láta gera slíkt scip. Þá mælti Eiríkr Jarl, sva at nockorir menn heyrdo: þótt Olaf konungr hefði eigi meira scip enn þetta, þá mundi Sveinn konungr þat alldri fá af hanom med einom saman Dana-her: Dreif þá fólkit til scipanna, oc ráko af tiölldin, oc ætlado at búaz skiótliga. Enn er höfðingiar ræddo þetta milli sín, sem nú er sagt, þá sá þeir hvar sigldo III scip allmikil, oc et fiórda síðast, oc var þat Ormr hinn Lángi. Enn þau hino stóro scip, er ádr höfðo siglt, oc þeir hugdo at Ormrinn væri, þat var it fyrra Tranan, enn it síðara Orm hinn Skammi. Enn þá er þeir sá Orminn Langa, kendo allir; mælti þá eingi ímót, at þar mandi sigla Olaf Tryggvason; gengo þá til scipanna, oc scipado til atlögunnar: Voro þat einka mál þeirra höfðingianna Sveins konungs oc Olafs konungs oc Eiríks Jarls, at sinn þridiung Noregs scyllði eignaz hverr þeirra, ef þeir felldi Olaf konung Tryggvason; enn sá þeirra höfðingia, er fyrst gengi á Orminn, scyllði hann eignaz oc allt þat lutscipti, er þar fekz, oc hverr þeirra þau scip er siálfr hrydi. Eiríkr Jarl hafði barda einn geisi mikinn, er hann var vanr at hafa í viking; þar var skegg á ofanverdo bardino

hvarotveggia; enn nidr frá iárnspaung þyck, oc sva breid sem bardit, oc tók allt í síá ofan.

CAP. CXX.

FRÁ LIDI OLAFS KONUNGS.

Þá er þeir Sigvalldi Jarl rero inn undir hólmann, þá sá þeir þat Þorkell Dydrill af Trönonni, oc adrir scipstiórnar menn, þeir er med hanom fóro, at Jarl sneri sinom scipom undir hólmann; þá hlódo þeir oc seglom, oc rero eptir hanom, oc kölludo til þeirra, oc spurdo, hví þeir fóro sva. Jarl segir, at hann vill bida Olafs konungs, oc er meiri von at úfridr se fyrir oss; leto þeir þá flióta scipin, þar til er Þorkell Nefia kom med Ormynn Skamma, oc þau III skip, er hönom fylgdo, oc voro þeim sögd enn sömo tíðindi. Hlódo þeir þá oc sínom seglom, oc leto flióta, oc bido Olafs konungs. Enn þá er konungrinn sigldi inn at hólmanom, þá reri allr herinn innan fyrir þá, oc út á sundit. Enn er þeir sá þat, þá bádo þeir konunginn sigla leid sína, enn leggja eigi til orosto vid sva mikinn her. Konungr svarar hátt, oc stóð upp í lyptingunni: látit ofan seglit; eigi skulo mínir menn hyggia á flótta; ec héfi allðri flúit í orosto; ráði Gud fyrir lífi míno, enn allðri mun ec á flótta leggja: Var sva gert, sem konungr mælti. Sva segir Hallfredr:

Geta skal máls þess er mæla
menn at vapna senno
dólga fangs vid dreugi
dádöflgan gram qvado;

badat her tygdar hyggia
 hnekkir sína recka,
 þess lífa þjóðar sessa
 þróttar ord, á flóttu.

CAP. CXXI.

LAGT SAMAN SKIPOM OLAFS KONUNGS.

Olafur konungur let blása til samlögo öllum skipom sínum; var konungs skip í midio lidi; en þar á annat bord Ormr hinn Skaumi, enn á annat bord Tranan. Enn þá er þeir tóko at tengia stafnana, þá bundu þeir saman stafnana á Orminom Langa oc Orminom Skamma; enn er konungur sá þat, kalladi hann hátt, bad þá leggja fram betr 'it mikla skipit, oc láta þat eigi aptaz vera allra skipa í herinom. Þá svarar Ulfr hinn Raudi: ef Ormrinn skal því lengra framleggja, sem hann er lengri en önnor skip; þá mun ávint verða um söxin í dag; konungur svarar: eigi víska ec, at ec átti stafnbúan bæði raudan oc ragan. Ulfr svarar: ver þú eigi meir baki lyp-tinguna, enn ec man stafninn. Konungur hellt á boga, oc lagdi ör á streng, oc sneri at Ulfi; Ulfr mælti: skíót annan veg, konungur, þannog sem meiri er þörfin; þer vinn ec þat er ec vinn.

CAP. CXXII.

FRÁ OLAFI KONUNGI.

Olafur konungur stóð í lyp-ting á Orminom; bar hann hátt miök; hann hafði gylltan skiöld oc gullrodin

hiálm; var hann miök audkendr frá öðrom mönnum; hann hafði raudan kyrtíl stuttan yfir brynio. Enn er Olafur konungur sá at ridlodoz flokkarnir, oc upp voro sett merki fyrir höfðingiom, þá spurði hann: hverr er höfðingi fyrir lidi því, er gegnt oss er? hanoð var sagt, at þar var Sveinn konungur Tiúgu-skegg, með Danaher; konungur svarar: eigi hræðomz ver bleyðor þær; eingi er hugr í Dönom: enn hverr er fyrir lidi því, er hægra veg er frá Dönom; hanoð var sagt, at þar var Olafur konungur með Svíaher. Olafur konungur segir: betra væri Svíom heima, oc sleikia um blótbolla sína, enn gánga á Orminn lánga undir vapn yðor. Enn hvarir eiga þau stóro skip, er þar liggia út á bakborda Dönom. Þar er, segia þeir, Eiríkur Jarl Hákonarson. Þá svarar Olafur konungur: hann mun þíckiaz eiga við oss skaplígan fund, oc af því lidi er oss van snarprar orrosto; þvíat þat ero Nordmenn, sem ver erom.

CAP. CXXIII.

UPPHAF OROSTUNNAR.

Síðan greiða konungar atróðrinn: lagði Sveinn konungur sitt skip móti Orminom lánga, enn Olafur konungur Sænski lagði þar út frá, oc stack stöfnom at ytzta skipi Olofs konungs Tryggvasonar, enn öðrom megin lagði at Eiríkur Jarl: Tókz þar þá hörð orösta. Sigvalldi Jarl let skotta við sitt skip, oc lagði ecki til orosto. Sva segir Skúli Þórsteinsson hann var þá með Eiríki Jarli:

Fylgdak Frísa dólgi
 feck ec úngr þar er spior síngo,
 nú sídr ölld at ec elldumz,
 alldr bót oc Sigvallda.
 Þar er til móts við mæti
 málm þíngs í dýn hialma
 sunnr fyrir Svoldrar mynni,
 sár lauc roðinn bárom.

Oc enn segir frá þessom tidindom Hallfredr:

þar hyck víst til miök misto
 mörg kom drott á flótta,
 gram þann er gunni framdi
 gengis þrænskra drengia.
 Næfr vá einn við iöfra
 allvalldr tva snialla
 frægr er slíkt at segia
 sídr enn Jarl hinn þridia.

CAP. CXXIV.

FLOTTI SVEINS KONUNGS OC OLAFS
KONUNGS.

Þessi orosta var hin snarpasta, oc allmannskæd. Frambyggjar á Orminom lánga oc Orminom skamma oc Trönonni færdo akkeri oc stafnliá í skip Sveins konungs; enn átto vapnin att bera á þá nidr undir fætor ser; hrudo þeir öll þau skip, er þeir fengo halldit. Enn konungrinn Sveinn, oc þat lid er undan komz, flydi á önnor skipin: oc því næst lögdo þeir frá or skotmáli. Oc fór þessi her, sva sem gat Olafr konungr Tryggvason. Þá lagdi þar at i staddinn Olafr Svía konungr; oc þegar er þeir komo nær

stor-

stórskipunom, þá fór þeim sem hinom, at þeir letu
lid mikit, oc sum skip sín, oc lögdo frá vid sva
búit. Enn Eiríkr Jarl sibyrði bardanom vid it yzta
skip Olafs konungs, oc rand þat oc hió þegar þat
or tengslom: enn lagdi þá at því, er þar var næst,
oc bardiz till þess, er þat var rodit: Tók þá lidit at
hlaupa af hinom snærrum skipunom, oc upp á stór-
skipin. Enn Jarl hió hvert or tengslom, sva sem
hrodit var. Enn Danir oc Svíar lögdo þá í skotmál
oc öllom megin at skipom Olafs konungs: enn Eiríkr
Jarl lá avallt sibyrðt vid skipin, oc átti höggorosta.
Enn sva sem menn fello á skipom hans, þá gengo adrir
upp í stadin, Danir och Svíar. Sva segir Halldórr:

Gerdis snarpra sverda
slito drengir frid lengi
þar gullin spior gullo
gáugr of Orm hinnu lánga:
dolgs qvádo fram fylgia
fráus leggbita hanom
Sænska menn at seuno
sunnr oc Danska runna.

Þá var orosta hin snarpasta, och fell þá miök lidit,
oc kom sva at lyktom, at öll voro rodin skip Olafs
konungs Tryggvasonar, nema Ormrinn lángi; var
þar þá allt lid komit, þat er vígt var hans manna.
Þá lagdi Eiríkr Jarl bardanom at Orminom sibyrðt,
oc var þar þá enn höggorosta; sva segir Halldórr:

Fiörd kom helldr í harda
huito reyr samman dreyra,
túngl skároz þá tingla
táugar, Ormr hinnu lángi;

Þá er bord mikinn Barda
 brynflagds regin lagði
 Jarl vaun hlálms at hólm
 bríd við Fafnis sído.

CAP. CXXV.

FRÁ EIRÍKI JARLI.

Eiríkr Jarl var í fyrirrúmi á skipi sínu, oc var þar fylkt með skialldborg: Var þar þá bæði höggorosta oc spiótom lagt, oc kastat öllu því er til vapna var: enn sumir skuto bogaskoti edr handskoti: Var þá sva mikill vapnaburdr á Orminn, at varla mátti hlífom fyrir sik koma, er sva þykt flugo spiót oc örvar; þvíat öllum megin lágo þá herskip at Orminom. Enn menn Olafs konungs voro þá sva ódir, at þeir liópo upp á bordin til þess, at ná með sverdshöggom at drepa fólkit. Enn margir lögdo eigi sva undir Orminn, at þeir villdo í höggörosto vera. Enn Olafs konungs menn gengo flestir út af bordonom; oc gádo eigi annars, enn þeir berdiz á slettom velli, oc sucko nídr með vapnom sínom. Sva segir Hallfredr:

Sucko nídr af nadri
 naddfárs í böð sárir
 baugs gerdot við vægiaz
 verkendor megin serkiar;
 vaar mun Ormr þótt ormi
 alldyr konungr styri
 hvars hann skrídr með lid lyða
 lengi slíkra drengia.

CAP. CXXVI.

FRÁ EINARI ÞAMBARSKELFI.

Einar Þambarskelfir var á Orminom aptr í Krapparúmi: hann skaut af boga; oc var allra manna hardskeytastr. Einar skaut at Eiríki Jarli, oc laust í styris hnackann, fyrir ofan höfot Jarli; oc geck allt upp á reyrböndin. Jarl leit til, oc spurdi, ef þeir vissi hverr þar skaut? enn janskiótt kom önnor ör, sva nær Jarli, at flaug milli sídunnar oc handarinnar, oc sva aptr í höfðafiölina, at langt stóð út broddrinn. Þá mælti Jarl við þann mann, er sumir nefna Finn, enn sumir segia at hann væri Finnskr; sá var hinn mesti bogmadr: skióttu mann þann hinn mikla í Krapparúmino! Finnr skaut; oc kom örin á boga Einars midian, í því bili er Einar dró it þriðia sinn bogann: brast þá boginn í tva luti. Þá mælti Olafr konungr: hval brast þar sva hátt? Einar svarar: Noregr or hendi þer, konungr! eigi mun sva mikill brestr ordinn, segir konungr: tak boga minn, oc skiót af: oc kastadi boganom til hans. Einar tók bogan, oc dró þegar fyrir odd örvarinnar, oc mælti: ofveikr, ofveikr allvallds boginn, oc kastadi aptr boganom: tók þá skiölld sinn oc sverd, oc bardiz röskliga.

CAP. CXXVII.

OLAFR KONUNGR FÆR MÖNNOM SÍNOM
SKÖRP SVERD.

Olafr konungr Tryggvason stóð í lypting á Orm-

inom, oc skaut optaz um daginn stundom bogaskoti, enn stundom gallokom; oc iafnan tveim senn. Konungr sá fram á skipit, oc sá sína menn reida sverðin, oc höggva títt, oc sá at illa bito: mælti þá hátt: hvart reidit þer sva slíáliga sverðin, er ec se at ecki bita ydor? Madr svaradi: sverd var ero slæ, oc brútin miök. Þá geck konungr ofan í fyrirrúmit, oc lauk upp hásetis kistuna; tók þar or mörg sverd hvöss, oc feck mönnum sínum: enn er hann tók nidr inni hægri hendi, þá sá menn at blóðrann ofan undan brynstúkunni; enn engi veit hvar hann var sárr.

CAP. CXXVIII.

UPPGÁNGA Á ORMINN.

Mest var vörnin á Orminom, oc mannskædoz af Fyrirrúms mönnum, oc stafnbúom; þar var hvar-tveggia valit mest mannfólk, oc hæst bordin. Enn lid fell fyrst um mitt skip. Oc þá er fátt stóð upp mannanna um siglo skeidit, þá red Eiríkr Jarl til uppgaungunnar, oc kom upp á Orminn med fimtán-da mann. Þá kom imóti hanom Hyrningr, mágr Olafs konungs, med sveit manna, oc varð þar hinn hardasti bardagi, oc lauk sva, at Jarl röck ofan aptr á Bardann: enn þeir menn, er hönom höfðo fylgt, fello sumir, enn sumir voro særdir. Þess getr Þórdr Kolbeinsson:

þar var hiálmads heriar
hroptz við drægar tóptir;

ord feck gott er gerdi
grams vör oc blám hiörvi,
höll bilar hárta fialla
Hyrningr adr þat fyrniz.

Þá vard enn hin snarpasta orosta, oc fello þá margir menn á Orminom. Enn er þyntiz skipan á Orminom til varnarinnar, þá red Eiríkr Jarl i annat sinn til uppgaugo á Orminn: vard þá enn hörd vidtaka. Enn er þetta sá stafnbúar á Orminom; þá gengo þeir aptr á skipit, oc snúaz til varnar móti Jarli, oc veita harda vidtöko. Enn fyrir því, at þá var sva miök fallit lid á Orminom, at víða voro aud bordin; tóko þá Jarlsmenn víða upp at gánga: enn allt þat lid, er þar stóð upp til varnar á Orminom, sótti aptr á skipit, þar til sem konungr var: oc sneriz þá enn til varnar. Sva segir Halldórr Ucrístni, at Eiríkr Jarl eggjadi þá sína menn:

Het á heiptar nyta
hugreifr med Oleifi
aptr stöck þíód à þóptor
þengill sína drengi.
Þá er haf víta höfdo
Hallands of gram sniallan,
vard fyrir Vínda mvrði
vapneidr, lokit skeidom.

CAP. CXXIX.

RODINN ORMRINN LÁNGI.

Kolbiörn Stallari geck upp í lypting till konungs; þeir höfdo miök líkan klædabúnað oc vapna. Kol-

biörn var oc allra manna mestr och frídastr: Vard nú enn i Fyrrráumino hin snarpasta orosta. Enn fyrir þá sök, at þá var sva mikit fólk komit upp á Orminn af lidi Jarls, sem vara mátti á skipino; enn skip hans lögdo at öllum megin utan at Orminom, enn lítit fiölmenni til varnar, móti sva miklom heri nú þótt þeir menn væri bædi sterkir oc fræknir; þá fello nú flestir á litilli stundo. Enn Olafr konungr siálfr, oc þeir Kolbiörn Stallari bádir, liópo þá fyrir bord, oc á sitt bord hvarr; enn Jarls menn höfdo lagt at utan smáskútor, oc drápo þá er á kaf liópo. Oc þá er konungr siálfr hafdi á kaf laupit, villdo þeir taka hann höndom, oc færa Eiriki Jarli. Enn Olafr konungr brá yfir sik skilldinom, oc steyp-tiz i kaf; enn Kolbiörn Stallari skaut undir sik skill-dinom, oc hlífdi ser sva vid spiótom, er lagt var af skipom þeim, er undir lágo, oc fell hann sva á siá-inn, at skiölldrinn vard undir hanem; oc komz hann því eigi i kaf sva skiótt: oc vard hann handtekinn, oc dreginn upp i skútona, oc hugdo þeir, at þar væri konungrinn: Var hann þá leiddr fyrir Jarl; enn er þess vard Jarl varr, att þar var Kolbiörn, enn eigi Olafr konungr, þá voro Kolbirni gríð ge-fin. Enn i þessi svipan liópo allir fyrir bord af Orminom, þeir er þá voro á lífi, Olafs konungs menn; oc segir Hallfredr sva, at Þórkell Nefia, ko-nungs bródir, lióp sídast allra manna fyrir bord:

Ugrædir sá ánda
 armgrióts Tröno-ðlíóta,
 hann raud geir at gunni
 gladr, oc báða Nadra.
 Adr hialldr þóriun helldi
 hugframr í böð ramri
 snotr af snæris vitni
 snuds þórketill undan.

CAP. CXXX.

EYA-SÖGN.

Sva var fyrr ritat, at Sigvalldi Jarl kom til föruneytis við Olaf konung í Vindlandi; oc hafði Jarl X skip; enn þat ellista, er á voro menn Astrídar konungs dóttor kono Sigvallda Jarls. Enn þá er Olafur konungur hafði fyrir bord laupit, þá æpti herinn allr sigr óp: oc þá lusto þeir árom í síá Sigvalldi Jarl oc hans menn, oc rero til bardaga. Þess getr Hall-dórr Ukristni:

Drógoz vítt at vagi
 Vinda skeidor oc gíndo
 þridia haudrs á þjódir
 þunn galkn í iáru-munnom.
 Gnyr vard á síá sverda
 sleit örn gera beito
 dyrr vo drengia stióri
 drótt kom mörg á flóttu.

Enn sú Vinda sneckian, er menn Astrídar voro á, reri brott, oc aptr undir Vindland; oc var þat þegar ræða margra manna, at Olafur konungur mundi steypit hafa af ser brynionni í kafi, oc kafat sva út

undan lángskipunom; lagz sídan til Vinda sneckionnar, oc hefdi menn Astrídar flutt hann til Vindlands; oc ero þar margar frásagnir um ferdir Olafs konungs gerðar sídan af sumom mönnoim. Enn á þessa leid segir Hallfredr:

Veit ec eigi hitt hvart heita
 húngrdeyfi skal ec leyfa
 dynsædinga dandan
 dyr blikis éða þó kvqvan.
 Alls sannliga segia
 sárr mun gramr at hvaro
 hætt er til hans at fretta
 hvartveggia mer seggir.

Enn hvarnug sem þat hefir verit, þá kom Olaf konungr Tryggvason alldrigi sídan til rikis í Noregi. Enn þó segir Hallfredr Vandræðaskálld á þessa leid:

Samr var árr of æfi
 óðbragðs hinn er þat sagði
 at lofða gramr lifði
 læstyggs sonar Tryggva.
 Vera qvedr öld or eli
 Olaf kominn stála;
 menn geta mali sönno.
 miök er verr enn sva, ferri.

Mundot þess alls þegnar
 þrótthardan gram sóttu
 frá ec með lyða lidi
 land her þar sköp verða.
 At mundiökuls mundi
 margdyrr koma styrir
 geta þickiaz þess gotnar
 glíkligs or styr slíkom.

Enn segir audar kenni

austr

austr í málma gnaustan
 seggr frá sárom tiggia
 sunnr eda brot of komnom.
 Nú er sann fregit sunnan
 siklings or styr miklom
 kann ec eigi mart við manna
 mord veifanar ordi.

CAP. CXXXI.

FRÁ EIRÍKI JARLI HÁKONAR SYNI.

Eiríkr Jarl Hákonarson eignadiz Orminn lánga
 með sigrinom, oc lútscripti mikit; oc styrði Jarl Or-
 minom frá fundinom. Sva segir Halldórr:

Hiálmfalldinn bar hilmí
 hríngs at miklo þingi,
 skeidor glæsto þá þjódir,
 þáingat Ormr hinn lángi.
 Enn sudr at gny gunnar
 gladr tók Jarl við nadri
 ádr varð egg at rióða
 ættgóðr Hemings broðir.

Sveinn, son Hákonar Jarls, hafði þá fest Hólmfríði,
 dóttor Olafs Svía konungs. Enn er þeir skipto No-
 regss velldi milli sín, Sveinn Dana konungr oc Olafr
 Svía konungr, oc Eiríkr Jarl, þá hafði Olafr kon-
 ungr IV fylki í Þrándheimi oc Mæri hvaratveggio,
 oc Raumsdal, oc austr Ránríki frá Gautelfi oc til
 Svínasunds. Þetta ríki feck Olafr konungr í hendur
 Sveini Jarli, með þvilíkvm formála, sem fyrr höfðo
 haft skattkonungar edr Jarlar, af yfirkonungom.
 Enn Eiríkr Jarl hafði IV fylki í Þrándheimi, oc

Halogaland, oc Naumedal, Fiördo oc Fialir, Sögn oc Hördaland, oc Rogaland, oc Nordan Agdir allt til Lidandisness. Sva segir Þorðr Kolbeinsson:

Veit ec fyrir Erling utan

fár at hersar váro

lofak Fasta ty-flestir

Farlands vinir Jarla;

Enn ept víg frá veigo

vel ec ord at styr nordan

land eða lengra stundo

lagdiz snðr til Agða.

Allvallds nuto alldir

una likar vel slíko

skyldr letz hendi at hallda

hann of Noregs mönnum.

Enn Sveinn konungr suman

sagðr er dandr hinn audi,

fátt bilar flestra yta,

fár hans byir váro.

Sveinn Dana konungr hafði þá enn Víkina, sva sem hann hafði fyrr haft; enn hann veiti Eiríki Jarli Raumaríki oc Heidmörk. Sveinn Hákonarson tók Jarldóm af Olafi enom Sænska. Sveinn Jarl var allra manna fríðastr, er menn hafa sed. Eiríkr Jarl oc Sveinn Jarl leto bádir skiraz, oc tóko rétta trú; enn medan þeir redo fyrir Noregi, leto þeir gera hvern sem vildi um kristnihalldit: enn forn lög helldo þeir vel, oc alla lands sído; oc voro menn vinsælir oc stíórnsamir; Var Eiríkr Jarl miök fyrir þeim bræðrom um forráð öll.



LIcel
S6737h
1816

42223
Snorri Sturluson. Heimskringla
Konunga Sögur. Ed. of 1816.
v.1

DATE

1-10-57

NAME OF BORROWER

Car Dept (DDR)

University of Toronto
Library

DO NOT
REMOVE
THE
CARD
FROM
THIS
POCKET

Acme Library Card Pocket
Under Pat. "Ref. Index File"
Made by LIBRARY BUREAU

